



B.VI.7

~~Handwritten scribble or signature~~

Ermit. Camaldulensium
Ereni Vigrensis



1870
1871
1872

1873
1874

NORMA MORTIS,

ab exemplis

JESU CHRISTI

PATIENTIS, AC MO-
RIENTIS

præcipuè desumpta,
&

Morituris omnibus

ad piè felicitérq; mori-

Eremitarū endum
Infulæ proposita
per *Canald?*
Vigrensis

P. GEORGIUM IWANEK,
SOCIETATIS JESU Sacerdotem.

WRATISLAVIÆ,

In Officina Baumanniana Typis exprimebat

Joannes Güntherus Rörerus, Factor.

ANNO M, DC. XC.



Sit tibi JESUS semper in
corde, & nunquam Imago
CRUCIFIXI ab animo tuo
recedat. Hic tibi sit cibus &
potus, dulcedo & consolatio
tua, mel tuum & desiderium tu-
um, lectio tua & meditatio tua,
oratio & contemplatio tua, vi-
ta, MORS, & resurrectio
tua.

S. Bernard. formul. hon. vite. §. 2.



Joannes Schommer del.

Br. n. sc.


S. Bruno Cartusianorum Patriarcha.

5



Portrait of a woman, seated, facing slightly to the left.

DEDICATIO.



TIBI

MORIENTIS CHRISTI JESU,

Speſtabili ECTYPO,

Carthuſianæ Aſceſeos

Principali ARCHETYPŌ,

Sanctè vivendi moriendique

Excellenti PROTYPO,

Multorum in CHRISTO Filiorum,

PATRIARCHÆ

GLORIOSO,

Sanctè Pater BRUNO,

hanc

Mortis Normam

ratam, gratamq; & ſacratam eſſe,

quanto poſſum.

Studio, voluntate, affectu

cupio, exopto, volo.



Arens es Magni tui Ordinis,
poſtremus ego Filiorum Mi-
nimæ Societatis; cujus utri-

DEDICATIO.

usq; Charitatem mutuam si quis expenderit, illum istius Fratrem, hanc illius sororem jure æstimaverit. Jam quos inter viget intima meritorum, & amoris Unio, quidni intercedat, & laborum operùmq; communicatio? Quò deinde nisi *ad locum, unde exeunt, flumina revertantur?*

At rivulus iste, quantuscunq; est, conaminis mei, suam originem Religiosissimæ Familiæ Tuæ refert in acceptis; è latebris umbrarum fortasse emerfurus nunquam, nisi Tua, PATRIARCHA Inclyte, Waldicensis apud Bohemos Carthusia, quam ego *Fon-tem*, claustrì arctioris sigillo *signatum*, meritò appellaverim, opportunitam Scriptori aperuisset venam beneficentiæ, cujus adminiculo in publicam utilitatem, ac lucem latex hic scatu-

DEDICATIO.

scaturiret. Quod si, ut sapienter ipsa
libri fronte, quem *Directorium mori-*
entium inscripsit, affirmat Majoris
Carthusiæ etiamnum PRIOR Reve-
rendissimus, Ordinisq; Tui Summus
Moderator INNOCENTIUS,
ad vivæ mortis scholam veniunt, qui vi-
tam Carthusianam, & solitariam profi-
tentur; ad quem pertinebit æquius
Norma, seu Regula mortis, quàm ad
Te, PATER Sancte, Religiosissimum
Scholæ illius Magistrum? aut cui
potius deferri oportuit *feliciter mori-*
endi Methodum, quàm illi, cui ex inte-
lici Morte Parisiensis Doctoris feli-
cior, sanctiôrq; vita, tanquam è ve-
pre Rosa, effloruit? cujus ad latus
cùm mortualem calvariam appingunt
Parrhasii, quid, nisi perpetuam mor-
tis meditationem, & Tibi fuisse, &

DEDICATIO.

Tuis Alumnis continuò esse in usu loquuntur? cujus dextera cùm *Crucifixum* prætendit, quid aliud, quàm inde videlicet exempla Sanctè moriendi, esse desumenda indigitat? Sed nimirum is deniq; felicissimè emoritur, cujus inter palmas, non secùs atque inter Tuas *palmeo virore* conspicuus frondet Crucifixus. Sanè palma Victoriæ bene viventi promittitur, bene morienti datur. Et Christus quando Crucem ascendit, morti palmam eripuit: quia moriendo mortem triumphavit. O Liceat per Te, Patriarcha Divine, verè dicere, atq; profiteri: *Ascendam in palmam, & apprehendam fructus ejus.*
[a] *Ascendam per virtutis imitationem ad perfectionem doctrinæ Tuæ, Domine, & per*


(a) Theodoretus apud Cornelium à Lapide in Cantic.
c. 7. v. 8.

DEDICATIO.

*Et per contemplationem apprehendam
ejus sublimitatem. Nihil enim pro-
fectò Christi Morte ad Doctrinam
sublimius, nihil ad virtutis consum-
mationem perfectius. Quorum ego
utrumq, facile me consequi posse
sperabo, ô Pater Beate! si quam gra-
tiosè *Normam Mortis* Tuis sacratam
auspiciis acceptare, tam promptè il-
lius auctorem seriùs ocyùs cum mor-
te luctaturum sustinere fueris digna-
tus; qui proinde Tuo Sancto Nomi-
ni uti devotus in tempore, sic futurus
est obstrictissimus in æternitate,*

Tuorum Clientum
postremus

Georgius Ivvanek.



Præmonitio AD LECTOREM.



Posteaquam nuper Vitæ Normam dirigendis potissimum Scholastica Juventutis actionibus accommodatam dedissem in lucem, mirabantur Amici, cur aliorum simili in lucubratione exempla secutus, non etiam de Præparatione ad mortem aliqua vel in fine libelli adjecerim; cum illa vita nostra ad finem vergentis Actio summi sit momenti, & omnium retrolapsi cursûs actionum meta, & corona. Verùm ego mihi hoc ipso, quòd bene vivendi Normam conscriberem, videbar unà Methodum bene moriendi monstrasse; quando Sapientium omnium judicio, nulla sit ad mortem, quàm bona vita, melior comparatio. Deinde, quia strictim ac breviter exequabar modos, quibus consuetæ Actiones rectè institui possent, locupletiores videbatur tractationem exigere illa tanti momenti ad piè moriendum Præparatio. Res etenim magnæ industriam magnam operamque requirunt. Denique, probè gnarus, quàm fastidiosa sint ingenia hujus Seculi, longas lucubrationes, & quod

Præmonitio ad Lectorem.

Et quod prolixum sit, facile respuentis, nolui ex Norma vitæ librum facere, sed statui distinctâ & brevi lucubratiunculâ nobilissimam bene moriendi Methodum non tam ex meo ingenio depromptam, quàm sanctissimo JESU Christi Patientis exemplo sancitam proponere; quam si secuti fuerimus, aspicientes in Auctorem Fidei & Consummatorem JESUM, (Hebr. 12. 2.) non poterimus nisi sanctè, & beatè mori. Ceterum, et istud primo in limine hujusce libelli vehementer monitum, rogatumq; velim, Benevole Lector, ut si quidem, quæ leges, probaveris, in usum referre, dum sanus es & valens, quamprimum assuescas; neque verò in tempus illud differas, quo languente corpore, pariter elanguescat animus, fiatq; ad ista exercenda ineptior. quæ mihi causa fuit, ipso libelli titulo indicata, cur Patientem Christum in bene moriendi Normam morituris, quales omnes sumus, etiam cùm valemus optimè, non autem moribundis statuerim. Comparatio siquidem ad mortem negotium est ejusmodi, ut eam sæpe sapius exercere repetendo, & exercendo repetere, quàm maximum sit opera pretium. Equitem accepimus nomine Adeodatum, cum dracone Rhodio conflicturum, equum & molossos egregie facinoris subsidiarios ad invadendum fictitium draconem sic erudivisse, ut eorum adminiculo verum postea draconem Victor prosligaveris. (Henr. Korn. Sac. Eloquent. pag. 37) Serius, ocius cum Morte luctabimur, monstro sanè humano generi insensissimo & cujus morsum nemo adhuc evasit mortalium: fingamus, oro, sapius Mortem jam adesse, jam apertos rictus ad nos absorbendos minari; & quibus
illius

Præmonitio ad Lectorem.

illius ferociam armis aliquando verè elisuri sumus, jam illam nunc stringere discamus. Ne Davidem quidem Saulis Armatura juvat, si careat usu: nec ullis armis tutius, quàm assuetis pugnatur. Dum vivimus, in Theatro agimus, spectaculum facti mundo, & Angelis, & hominibus, Superest Comœdiæ (sic Vitam humanam cum Seneca & Augusto vocemus) Actus ultimus, & Scena Decretoria, à qua omnis ratio vel laudis, vel ignominia, vel interitûs, vel salutis pendet semperiterna; quidni admirabilem in præparandis Dramatis, tum Præceptorum in Scholis, tum discipulorum diligentiam imitamur? Prodeundum in theatro comitæ; quanta, DEUS bone! quàm sollicita, quàm diuturna, & quàm crebrò repetita unius horule spectaculum præeunt periclitationes? Quos labores non sorbet, quos non haurit pulveres, quos non clamores geminat, quos non sudores excitat Præceptor, dum puerum doceat, ut locare pedes, ut oculos ferre, ut moderari vocem, ut variare gestum, ut totum corpus flectere ille debeat quarum rerum pericula dum repetuntur toties, incertum est, majorne inde Præceptoris labor, an Pueri dolor oriatur: si præsertim exercitia in id tempus incidant, quo ceteris liceat vel campis vagari, vel aucupio piscari, ve animum remittere; iste verò tanquam ursus catenâ coercitus, cogatur, quos nollet gestus & saltus edere, Sisyphœumque ludum ad Scholam revocare. Quam sanè Comîcorum diligentiam, in apparanda, quam dixi, vite nostræ novissima Scena, si renuiter tantum & quadamtenus imitaremur Mortales, ausim polliceri, vix ullum ex nobis malè moriturum. Præ-

visa

Præmonitio ad Lectorem.

visa jacula, minùs feriunt: & rerum bene maturèque
dispositarum felices sunt plerumq, eventus. Sed de
his aliàs, & modò quidem plura, quàm voluerim:
nunc, quo ordine decurrat Opusculum, paucis edocebo.
Alterutra morte possumus ex hac vita decedere, Lentà
videlicet, siue Violentà. Mortem Lentam appello,
quam corporis infirmitas tempore aliquanto precedit,
quæq, lento ad nos, & veluti lanceo passu progreditur:
Violentam verò, repentinam quamlibet, qua, si nature
conditionem spectes, non potest, nisi Violentè accide-
re. Ut, si quis ex alto repentè corruens, cervicem
frangat, aut aquis mergatur, aut occidatur ex insidiis,
aut apoplexiâ, catarrho, similive morbo, opinione ci-
tiùs obruatur. Rursus adpiè obeundam Mortem du-
plex est Preparatio: Proxima altera, altera Remota,
hec in eo consistit, ut quis probè vivat; illa, ut sibi de
iis, quæ faciunt ad felicem ex hac vita transitum, tem-
pori provideat, Remotæ Præparationis, hoc est, bene
vivendi exempla, ex ipsa vita Christi optimi Præcep-
toris nostri petenda sunt; Proximæ verò, ex ejusdem
sacratissima Passione, qua præclarissimarum, atque
plane omnium virtutum est Speculum, quibus Mori-
bundum quemque seu Christianum, seu religiosâ vel
Sacerdotali vite professione DEO sanctum Hominem
par est enitescere. Harum ergo rerum quas hic suc-
cincte breviterque tractamus, series est hac: Parte pri-
mâ agimus de Præparatione ad Mortem utramque,
Lentam scilicet atque Violentam, Remota. Parte
secundâ de Proxima Præparatione, à qua potissimùm,
suum sibi Titulum vendicat Libellus. Pars tertia con-
tinet

Præmonitio ad Lectorem.

*tinet Preparationem ad Mortem Violentam: quartâ
denique proponuntur varii Virtutum Actus, Prolixi
& breviores Affectus, Orationes & Aspirationes, qui-
bus pietas ad mortem inclinantium excitetur, excitata
alatur. Lege ista, mi Lector, & si placent, fruiere:
quamque tibi ipse expetis, felicem mihi mor-
tem à Patiente Christo JESU
deprecare.*



PARS

PARS I.

De remota ad felicem Mortem Præparatione.

CAPUT I.

Christus imitandus in Morte.

Cogitanti mihi sæpenumero, quæ tantum ex omnibus optima foret pro morte præparatio, venit in mentem, illam videri optimam, quæ hominem ad ita moriendum, sicut est Christus mortuus, disponderet; cum & ipsa Mors ea sit felicissima, quæ morti Christi simillima. Quemadmodum enim is optimè vivere censendus est, qui ad vitam Christi moribus proximè accedit: ita, qui se morienti Christo plurimum conformat, beatissimè optimèq; moritur. Quod innuere videntur illa verba Apocalypseos: *Beati, qui in Domino moriuntur.* (*Apoc. 14. 13.*) quid enim est *in Domino* mori, quàm Dominum ipsum moriendo imitari? Et verò non tantum *omnis Christi actio, nostra est instructio*, passio ejusdem & mors etiam in exemplum nobis & imitationem proponitur, ut sanctè vivere morique valeamus. Centurio ille cognitâ Christi morte, & videns, quia sic clamans expirâset: *Verè, inquit, hic homo Filius Dei erat.* (*Matth. 27. 54.*) Non illi certè
simplex

simplex Christi morientis clamor hanc confessionem
 expressit, cum commune ferè sit morientibus in le-
 thales clamores, in singultus, in gemitus erumpere :
 sed quia vidit sic clamantem, sic in summis doloribus
 constantem, sic inter tot, tantasque blasphemias
 æquanimiter perseverantem, sic pro inimicis depre-
 cantem; statuit, qui sic moreretur, non jam homi-
 nem solum, sed & DEI Filium esse oportere : ut intel-
 ligamus, nos quoq; pro charissimis filiis à Deo tum
 demum agnitum iri, si sic, quemadmodum Christus,
 eadem nempe animi constantiâ, patientiâ, fortitudi-
 ne mortui fuerimus. Hoc profectò est non tam vo-
 cis, quàm exempli contentione clamare. Quòd si
 lectis auditisve præclaris Sanctorum mortibus suspira-
 mus illud : *Moriatur anima mea morte Justorum,*
& fiant novissima mea eorum similia! (Num. 23. 10.)
 quantò erit convenientius, optare nos simili morte
 fungi, quam obiit omnis justitiæ & Author, & largi-
 tor, & exemplar Christus? *Ecce, quomodo moritur*
Justus, & nemo percipit corde! queritur ipso Christi
 morientis die, sepulchro ejusdem devota Sancta ma-
 ter Ecclesia, Nimirum, qui Christum pro se mor-
 tuum recogitent, ut compatiantur, ut ament, ut
 gratias agant, multi sunt : at pauci, qui mortis *Mo-*
dam, ut imitentur, seriò perpendant. Cum enim is
 plenus sit desolatione, amaritudine, & cruciatibus;
 fit, ut illud mortis genus horreamus, malimusque
 mortem tranquillam & quietam, quàm adeò duram &
 acerbam subire. Et tamen non desinit nos Apostolo-
 rum Princeps admonere; (1. Petri 2. 21.) *Christus*
passus

passus est pro nobis, vobis relinquens exemplum, ut sequamini vestigia ejus. quod tamen toto vitæ tempore præstari oporteat: sub mortem tamen maximè locus est æmulandi præclaras Domini Patientis virtutes, & cruentis illius vestigiis insistendi; atq; ad illius morum regulam, id quoque, quod est vitæ extremum, exigendi. Nam, si (ex Tertulliani Sententia de Patient. c. 3.) probos quosq; servos & bone mentis, pro ingenio Dominico conversari videmus; hoc est ad Dominorum ingenium se fingere, in eorum mores & instituta transire: quanto magis nos secundum Dominum moratos esse oportet? iisdem scilicet cum Domino JESU moribus esse, ipsius sensa, indolem, affectusq; induere? Videtur hæc Christi pro nobis Passi imitatio altè & in animum & in mores illapsa P. Roderico Alvarez, S. J. Sacerdoti, cujus inter acutos dolores hæc erat oratio: *Malo hos dolores pati, quàm esse Angelus, quàm Archangelus, quàm Seraphim, His enim Christum imitor; & dum patior, facio id, quod illi non possunt.* (Nadas. Pret. Occup. c. 20. n. 1.) Ergo, & Tu mi bone Lector, aspices identidem in Authorem fidei & Consummatorem JESUM, (Hebr. 12. v. 2.) & in absolutissimum bonæ mortis exemplum eundem assumes, ut dicere aliquando liceat: *bonum certamen certavi, cursum consummavi.* (2. Tim. 4. v. 7.) *Vita tua* (Christus Crucifixus) *erit quasi pendens ante te:* (Dent. 28. 66.) ut more Pictorum, in Exemplar illud, quod tibi in Monte Calvariæ monstratur oculos mentis conjiciens, ultimam vitæ lineam rectè feliciterq; trahas.

CAPUT II.

Volentes Christum imitari in morte, prius imitentur in vita.

VERUM enimverò frustra ad imitationem Christi aspiramus in morte, nisi imitari assuescamus in vita. Mors est Echo vitæ: qualis hæc præcessit, talis illa sequitur. Sanctorum Patrum unanimis vox est: non posse bene mori, qui malè vixerit; neq; malè mori, qui vixerit bene. Et, unicum solummodo Latronem in omnibus sacræ scripturæ paginis se reperisse, qui vitam malam bona morte clauserit, testatur S. Bernardus. (*Serm. 38. in parv.*) Quare insipiens est prorsus ista cogitatio: Invalescente morbo, vitam emendabo: morte ingruente, Morientem imitabor Christum: tum ad Deum seriò convertar, cùm de vita seriò agi advertero: nunc, quod libet, liceat: seria in crastinum. Ah aliter longè ibi evenit. Ægrotasti, quisquis ista cogitas, aliquando? Memineris quæso, quàm omnia tunc visa sint molesta. non sapit tum oratio, pœnitentiæ vix venit in mentem. non est expeditus animus ad exercendum munus suum, torpet ad exerendas virtutes, ad eliciendos virtutum actus languet. totus homo in eo est, ut convalescat, & cum corpore infirmatur plerumq; & virtus. *Multa bona potes operari, dum sanus es: sed infirmatus, nescio quid poteris.* ait Thomas Kempensis libri primi de Imitatione Christi capite 23. quod caput operæ pretium esset quàm

quàm sapissimè legere, & attentissimè ruminare. Sicut autem quæ interdum egimus, in somno nobis recurrunt; ita quæ in vita sunt frequentata à nobis, sub mortem resumimus. Speculi nempe vicem subit moriendi conditio. qualem ei faciem opponis, talem repræsentat: si Helenæ, Helenam; si Therisitæ, Therisiten tibi respondebit. Quid est, quòd alios lethali morbo stratos, mites, taciturnos, orationi assiduè intentos; contrà verò alios impatientes, querulos, iracundos, DEI suiq; vix memores videamus? quia priorum vitam mansuetudo, patientia, orandi studium; istorum mores iracundia, impatientia, rerum divinarum neglectus imbuerunt. Etiam ubi mens aberrat, suumq; munus Phantasiæ committit, quæ usu habitūq; trita sunt, moribundis recurrunt. Pater noster *Vincentius Carafa*, cum sub vitæ finem mente exerraret, de rebus divinis & ad regimen spectantibus loquitur: (*Vit. L. 1. c. 12. p. 210.*) Patrum quispiam Soc. JESU, de lecto, tanquam de sacro tribunali, cruces manu, formulam à peccatis solvendi ore ingeminat; quippe ille actu societati præerat, ac de DEO, dum viveret, semper loquebatur; hic in audiendis Pœnitentium confessionibus assiduus, nihil solemnius habuit, quàm eosdem peccatis absolvere. Contrà verò faber ille aurifex porrectum sibi ad pia oscula Christi in cruce fixi sigillum intuitus, rogat *quanti foret talis metalli uncia?* quid ita? quoniam hæc illi, dum viveret, erat palmaris occupatio, pondus auro pretiūmq; ponere. Usq; adeò quàm vulgare, tam verum est illud: *Qualis vita, finis ita.* Etiam in

morre, quæ in vita diligebamus, placent. Quare quisquis imitari desideras JESUM morientem, imitare viventem: indidémq; sume exempla vivendi, unde moriendi. qualem orsus es telam texere in vita, talem videbis absolutam in morte. Religiosæ mortis, sancta vita parens est.

CAPUT III.

Quidnam in vita Christi imitandum; & primum quidem animi nitor.

FRustrà sum, si Christum, Candorem lucis æternæ, Speculum sinè macula, *qui peccatum non fecit*, (1. Petr. 22.) nec peccare potuit, à peccato vindicem. *Tollere peccatum mundi*, hujus Agni Immaculati erat, (Joa. 1. 29.) non admittere; destruere, non adsciscere: ut meritò admiretur Gregorius Christum ex divinitate peccare impotentem, ex ratione ostendere se peccati expertem, dum ait: *quis ex vobis arguet me de peccato?* (Joa. 8.) Do verba Doctoris: *Pensate fratres charissimi, mansuetudinem DEI. Relaxare peccata venerat, & dicebat: Quis ex vobis arguet me de peccato? Non dedignatur ex ratione ostendere se peccatorem non esse, qui ex virtute divinitatis poterat peccatores justificare.* (Hom. 18. in Evan.) Itaq; hoc agendum potiùs, ut qui felicem nobis ex hac vita exitum paramus, nitore conscientiae, munditiae cordis, vitae inculpatæ ità, studeamus,

deamus, ut amore DEI timoréque instructi peccare non possimus per gratiam, quemadmodum Christus per divinam naturam, illud castissimi Josephi apophthegma usurpare parati: *Quomodo possum hoc malum facere, & peccare in Deum meum.* (Gen. 39. 9.) Sanè horror, & fuga cujuscunq; peccati tam est necessaria ad bonam mortem, quàm ad æternam salutem; cujus perdendæ manifestum discrimen toties adimus, quoties delinquimus graviter. Peccatum unum & solum est, quod mortem reddit terribilem, quod incutit horrorem divini judicii, & metum inferni. *Mors peccatorum pessima;* (Ps. 33.) *Sanctorum,* qui se videlicet à peccatis abstinent, *pretiosa.* (Ps. 115.) Equidem nunquam satis admirari queo quorundam hominum vesaniam, qui cum strenuè indies peccent; fusà quotidie pro felici morte aliquâ precatiunculâ, putant sibi eo pacto bonam mortem jam oppignoratam. O cœci! o *curvæ in terras animæ,* & *cœlestium inanæ!* quousq; diligitis mendacium, & vobismet ipsi imponitis? Peccatum est, peccatum, quod mortem ita facit infelicem & miseram, ut, nisi lacrymis & poenitentiâ deleatur, certissimum aditum ad æternam infelicitatem aperiat. Et, sicut nihil moritur, quod non antè vixerit: ita nemo bene moritur, qui non bene vixerit, qui in vita mala perseverat. Cæsarius refert lib. 7. c. 59. Latronum Ducem homicidiis prædisq; infamem aliquando captum, mortisq; damnatum fuisse. In quo tamen ætatis juvenilis florem miserati Judices, cum cum vitâ donatum vellent tantummodo multare exilio, ille gratiam oblatam re-

B 3

spuens,

spuens, ultro fatali gladio cervices subiecit, tam sanctâ & felici morte defunctus, ut cœlestibus etiam luminibus nocte comparentibus honestatus, quasi sanctus, ab Episcopo & Clero cœlesti viso admonitis, honorificè fuerit sepultus. Sed unde illi tam rara felicitas? à fuga peccati. In Monachum quondam illac iter agentem inciderat, à quo interrogatus: *quid à puero actitasset, & quæ fuisset hætenus ejus vita;* respondit: *Pessima: quando puer eram, cum omnibus coetaneis meis rixabar; factus adolescens furtis operam dedi: deinde in virum proficiens, latrocinia exercui, in quibus adeo profeci, ut hodie sim Magister omnium latronum.* Tum ab eodem Monacho persuasus, ut omni die Sabbati Magnæ Matris honori jejunans ab omni flagitio abstinere; fecit, & suæ præmii abstinentiæ, quale modò vidimus, recepit. Nullo nempe pignore sic assecratur felicitas mortis, ut vitâ immaculatâ. Vis, Moriture, esse in morte, & à morte beatus? Eslo immaculatus. *Beati immaculati!* (Psal. 118.) quam Psaltæ vocem explicans Augustinus: (*in hunc psal. conc. 1.*) Scio, inquit, quid velis: beatitudinem queris. Si ergo vis esse beatus, esto immaculatus. Illud enim omnes, hoc pauci volunt: Sinè quo non pervenitur ad illud; quod omnes volunt.

Ergo, Moriture, quasi à faciè colubri fuge peccata; (Eccli. 21. v. 2.) nihilq; secius vel ad primam dæmonis suggestionem, vel ad occasionem peccandi exhorresce,

*Improvissum aspris velut qui sensibus angvem
 Pressit humi nitens, trepidusq; repente refugit,
 Attollentem iras, & cœrula colla tumentem.*

Utinam tuus, meisque Lector, utinam omnium nostrum animi tantâ puritate niterent, quantâ *Vincentii Carafa*, Generalis nostri, ut quovis in loco, tempore, occupatione, negotio mortem, si ingrueret promptissimus excipere! Relaxabat is aliquando à prandio animum de more, cum, injectâ de nostro quopiam brevi Sacramentis ad mortem piè obeundam muniendo, mentione, rogatus à collocutore; quid demum acturus esset, si extemplo ipsi moriendum? *Ego verò*, ingenuè asseverantèrque dixit, *non aliud agerem, quàm quod in presentia ago: id est, animo, relaxando vacarem.* Ain' tu, Vincenti, non vasa colligeres? non confelsarium inclamares? non oleo imbui moribundorum, non Eucharistiæ viatico muniri expeteres? *Non inquam, aliud, quàm hoc ipsum agerem*, subjecit denuo, admirante Socio, Vincentius. (*Vit. l. 2. c. 10. p. 409.*) Unde hæc confidentia? ex cordis munditiæ. Memoravit quondam, non meminisse violatæ à se sponte ullius legis Societatis: non modò non admisæ culpæ; &, juniorem se duas noxas destinatione voluntatis admisisse, quas jam proVectior maximè omnium defleat. Priorem, quòd studiis ob invaletudinem intermissis, cum Româ Neapolim rediret, solâ animi causâ, equum, quo vehebatur, ad celeriores gradum incitârit: posteriorem, quòd jnnuâ cellæ Patris cujusdam amici sui pulsatâ, subtraxerit se illico, ut egressi admirantisq;

habitum, nemine invento, ipse ex abdito observaret. (*ibid.* p. 399.) Grandia nempe crimina! quibus grandiora si nos non redarguunt, morituro Lector, moriamur libenter, tametsi ludentes, animoque remittendo vacantes mors conveniat. Ego verò repeto, iterumque moneo: *tanquam à facie colubri fuge peccata.* (*Eccli.* 21.) Fugies autem, non dubita, si semper timueris illum, qui postquam in morte occiderit corpus, potest continuò animam perdere in gehennam. Veritatis certissimæ axioma est, & quidem in animum altissimè demittendum axioma: *Si sum in peccato lethali, sicut nullum momentum est, quo non possum mori, ita nullum momentum est, quo non possum damnari. Timor Domini expellit peccatum.* (*Eccli.* 1. 17.) Et: *Timent Dominum bene erit in extremis, & in die defunctionis suæ benedicetur.* (*ibid.* p. v. 13.) *Beatus homo, qui semper est pavidus.* (*Prov.* 28. 14.) Quod S. Bernardus fide interpositâ hunc in modum confirmat: *In veritate didici, inquit, nihil ita efficax esse ad gratiam promerendam, retinendam, recuperandam, quam si omni tempore inveniaris non altum sapere, sed timere. Beatus homo, qui semper est pavidus. Time, cum arriseris gratia; time, cum abierit; time, cum denuo revertetur. Gratia cum adest, time, ne non dignè opereris ex ea, nam hoc monet Apostolus: videte, nè in vacuum gratiam Dei accipiat. Si recesserit, multò magis timendum est:*

est : quia ubi deficit gratia, deficit et tu. time ergo subtractâ gratiâ, tanquam mox casurus. Jam, si gratia repropitiata redierit, multo amplius tunc timendum, ne forte contingat recidivam pati. Hæc Abbas mellifluus. (*Serm. 54. in Cant.*)

CAPUT IV.

Imitandum in Christo studium bene operandi.

Qui vel se remotè ad piè moriendum accingit, non modò malum fugere, sed & bonum facere (& quidem bene navitèrque) studeat, oportet. Sint lumbi vestri præcincti, monet Dominus (*Luc. 12.*) Lumbos restringere, Gregorio est, carnis luxuriam per continentiam coarctare; (*hom. 13. in Evan.*) Augustino ab omnibus illicitis concupiscentiis abstinere; (*ser. 30. de Verb. Dom.*) Fulgentio, quiescere, quod Isaias monet, perversè agere, (*Isa. 1. 16.*) Sed quia ad assecurandam felicitatem mortis minus est mala non agere, nisi etiam quisque studeat & bonis operibus insudare, protinus additur : Et lucernæ in manibus vestris. Lucernas quippe ardentes in manibus tenemus, cum per bona opera proximis nostris lucis exempla monstramus. Ita Gregorius. Ubi vigilanter observandum, non lucernas simpliciter, sed ardentes lucernas præcipi tenendas, quæque ex ardoris magnitudine lucem insignem evibrent. quo modo loquendi sat clarè innuitur, opera nostra non utcunq; & obiter,

sed ferventer, & totâ mentis viriûmq; applicatione, quæ in exemplum traducta possint alios accendere, esse peragenda. id quod luculentiùs expressit Magnus Augustinus: *Abstinerere nos debemus*, inquit, *ab omnibus illicitis concupiscentiis, hoc est lumbos accinctos habere debemus: & fervere, & lucere in operibus bonis, hoc est, lucernas ardentes in manibus habere.* (Serm. 30. de Verb.) Est enim verò Fervor iste in DEI obsequio Lampas quædam ardens, quâ instructi Sponso animarum nostrarum JESU Christo in morte fidenter occurrimus. Tepidi, ignavi, & quibus omnia perfunctoriè de manibus effluunt, cum pudore, fatûsq; virginibus dicere cogentur: *Lampades nostræ extinguuntur*; (Matth. 25. 8.) Sed cogentur audire vicissim: *nescio vos.* Ipse illis cereus Iustralis hinc migrantibus porrigi solitus fuliginem potiùs pudoris, quàm spei lucem exeret, quibus, dum viverent, lampades ac lucernæ operum refrixère, atqui ex adverso, quibus solationum æstibus incallescunt, qui non tam in tesseram clypei, quàm omnium actionum amussim assumplerant illud Imperatoris Symbolum: *nihil obiter? Benedictus DEUS!* (dicebat ille apud Rodericium (Part. 1. tr. 2. c. 5.) confessionis, morte instante, admonitus) *Benedictus Deus!* jam triginta & amplius anni sunt, ex quo mea quotidie sic peccata sum confessus, ac si statim è vita mihi discedendum esset. Sic nimirum confessio, sic sacra communio, sic oratio, sic literaria occupatio, sic omnis animi corporisque labor, sic peragenda omnia,

omnia, ut si continuò opere peracto essemus morituri. Pro Regula omnis actionis habeatur illud elogi-um à turba Christo datum: *Bene omnia.* (*Marc. 7. 37.*) sed & tibi bene sit simplex equidem, ac cara Deo plebecula, quæ tam propè à Veritate, quàm longè à Pharisaico supercilio abfuiſſi, dum Christum omnis boni authorem bene feciſſe omnia palàm es professa. Quid enim ab illa perfectionis Idea, nisi absolutum; quid nisi omni ex parte sanctum ab illo sanctitatis fonte profluere potuit? Hanc Ideam factis exprimere, huic fonti se prorsum immergere, est bonam mortem anticipatò haurire. Hoc solidum in morte solatium, hæc DEI ipsius Creatoris nostri imitatio: *bene feciſſe omnia.* Quare S. Thomas opusc. 62. de divinis moribus, § *Deus omnia bene fecit*, cùm ex ratione ipsa demonstrâſet *DEI perfecta eſſe opera*, subjunxit: *Similiter nos diligentiam apponere debemus, ut singula opera nostra, quantum unquam meliùs possumus, faciamus; ex omni virtute D. N. I. Christi, & cum omni desiderio triumphantis & militantis Ecclesiæ, & sub nomine Creatoris; quasi tota salus nostra & omnis laus DEI, & universitatis utilitas ex uno opere dependeat: quasi nunquam ad id opus reversuri, neq; aliud postmodum facturi.* Hæc Doctor Angelicus; suo certè digna ingenio, digna quæ non cursim, sed meditatò legantur, multò autem dignissima, ut in nostras actiones tranſeant atq; imbibantur. Quid enim, oro, juvat, diu juxta ac segniter vivere? Plus prodest semel strenuè laborâſſe, quàm milles remiſſè, scribit S. N. Ignatius ad suos Conimbricam 3. Mar-

tii 1545. Et, si Sanctæ Scholasticæ, uti par est, credimus: *dies unus bene impensus in obsequio DEI plus valet, quàm millio annorum ad obtinendum universum mundum.* Quæ cum ita habeant, age Morituri, (Eccli. 33.) *in omnibus operibus nostris præcellentes simus.* Georgius Gilbertus, Vir zelo divino plenus deplorantibus suam mortem intempestivam ceteris, *Mihi, inquit, dolendum, mihi lacrymandum est, qui nullâ re gestâ inutilis morior.* (Hist. Societ. p. 5. l. 3. pag. 112.) Ità Vir omni virtutum genere insignis, & teste ipso summo Pont. Gregorio XII. Ecclesiæ Anglicanæ magnum præsidium. Nos, ne idem sub mortem, non demissione animi, sed pudore urgente fateri cogamur, in tempore provideamus. Non pudeat vel ex Novitio (sed veterano virtutum) discere, quid ad vitam faciat, quid ad mortem sanctam. Joannes Rlesfemau is erit, in quo ad extrema deducto, eum insignium exempla virtutum venerantur omnes, jussit Rector, ut præsentibus Sociis aliquod pro suprema allocutione mnemosynon relinqueret; collegit, quas potuit, vires ad obediendum, & dixit: *Agere, quod agis, accurate, perfectèq, res una mihi videtur esse, quâ & sanctè vivimus, & securè morimur.* (Nadas. Pret. Occup. morien. cap. 39. pag. 300.) Optimè, & ad mentem nostri Theodidacti appositè, ita submonentis: *Quàm felix & prudens, qui talis nunc nititur esse in vita, qualis optat inveniri in morte.* Dabit namq, magnam fiduciam feliciter moriendi perfectus contemptus mundi, fervens desiderium in virtutibus proficiendi, amor discipline, labor

*labor pœnitentiæ, promptitudo obedientiæ, abnegatio sui, & supportatio cujuslibet adversitatis pro amore Christi. Sic Thomas à Kempis lib. 1. c. 23. n. 4. Habemus singularis hujus in morte fiduciæ ex studio accuratè peragendi omnia profectæ luculentum exemplum in Fratre Societatis nostræ Joanne de Soto, de quo hæc Nierembergius Vit. Div. c. 22. Vestiario Collegii multis annis præfuerat sartor: demum gravi, &, ut prædixerat, mortifero ex morbo decumbens, mortiq; jam vicinus, acum poposcit, quam in parietis alicujus rimam inseruerat. Hîc præsentès aberrare animum hominis opinabantur: quibus ille, Non deliro, inquit, mentisque, & animi, DEI beneficio, sanus sum; quare amore ejusdem Majestatis, dari mihi velim, quod peto. Acceptam itaq; acum in manus sumpsit, dixitque: Hæc mihi cœli clavis erit, hæc paradisi portas reserabo, cùmq; hac mori cupio, & Christum invisere, Redemptorem meum. Nihil enim hac acu paravi, nisi solum amore Numinis; neq; filum eâdem trajeci unquam, præterquam ut illi placerem, non aliter, quàm si ipsummet Christum vestire debuisssem. Dixit, & sanctè obiit. Usque adeò verum est Novitii suprâ laudati apophthegma: *Agere, quod agimus, perfectè, & accuratè, rem esse unam, quâ & bene vivimus, & sanctè morimur.**



CAPUT V.

In Christo imitanda Abnegatio sui.

Vulgò nota, paucis in praxim inducta Nostri Salvatoris est admonitio: *Qui vult venire post me, abneget semetipsum, tollat. crucem suam, & sequatur me. (Matth. 16.)* Perinde quasi dicat: Qui militi vult vivere, qui beneficio mortis optatissimæ ad gloriam meam pervenire, abneget seipsum, sibi moriatur, méque imitetur. An verò se ipse abnegavit Christus? non abnegavit modò, sed planè *exinanivit*. Non poterat ille immoderatis affectibus mori, quia caruit. ad divinæ sanctitatis ordinem temperata erant apud illum omnia: sed quæ nos indomitæ appetitionibus confectamur, voluptates, comoda, honores, divitias, nostri æstimationem, etsi sine noxa admittere potuit, rejecit; quæ nos refugimus, dolores, contemptum, rerum inopiam, ultro arripuit. Nihil erat in rebus humanis vel tam delectabile, quod nostrà causâ non respuerit; vel tam despicabile, quod non sit amplexus. Quibus quidem in rebus si servuli Dominum, si Magistrum discipuli sequeremur, quàm fortunatum nobis ex hac vita exitum curaremus! *O quanta fiducia erit morituro, quem nullius rei affectus detinet in mundo!* (Kemp. l. 3. c. 53.) Facile namque relinquet in morte omnia, qui antea contempsit omnia: & qui sibi perfectè est mortuus, non difficulter seculo morietur. Miles primo in
prælio

prælio mortem expavescit: ubi confligit sapius, nullo mortis metu tangitur: similiter & nos per mortificationem mori discimus. Quocirca, Moriture, quod vel gentilis Philosophus pariter ac Orator monet, *consuescamus mori.* (Cic. Tusc. 99. l. 1.) Hæc nostra sit prima potissimâq; in vita exercitatio: mori assuescere, vincere nos ipsos, abnegare, &, ut Ascetæ loquuntur, exire omnino ex nobismet ipsis, cupiditates coërcere omnes, amorem proprium & sensum expugnare, voluntatem nostram & judicium in omnibus Deo subicere. Vicies quater interdum hoc genere mortis & moriebatur ipse S. Franciscus Borgia, & mori unumquemque Religiosum debere asserbat. quod à nobis si factitaretur, quàm læti, quam hilares hinc emigraremus! *Quàm beatum est vivere quotidie moriendo* (clamat ab Oriente ultimo alter Franciscus Indiarum Apostolus) *Quàm beatum est vivere quotidie moriendo, nostrasq; frangendo voluntates, ut queramus, non que nostra sunt, sed que JESU Christi!* (Epist. 1.) Beatum revera! Sic enim qui moritur, veluti granum frumenti mortuum, in æteræ felicitatis gloriam excresecit à morte, fructumq; reportat cælo mundoque latabilem. Siqua pulchra est, siqua morum informatrix tesseræ, pulcherrima certè illa Apostolorum Principis: *quotidie morior.* (1. Cor. 15.)



CAPUT VI.

CAPUT VI.

*Imitandus in Christo Amor
DEI.*

PORRÒ ex hac mortificatione, ex hac continua carnem inter & spiritum lucta, tanquam ex collisu sili-
 lis & ferri: erumpet purissimus ignis *divini amoris*,
 quo inflammatus Morituri animus cupiet dissolvi &
 esse cum Christo. Atque utinam accendat in nobis
Dominus JESUS ignem hunc sui amoris, & flam-
mam eterne charitatis! Amoris, inquam, *sui*, quo
 ipse in Patrem, nósq; omnes flagravit. Nam, quòd
 hanc nostram carnem tam benignè asumere, quòd
 tam obscurè nasci, tam meticulosè fugere, tam oc-
 cultè & tam diu latere, tam vili pendì, tam sarcasticè
 illudi, tam atroci infamique morte exturbari è vivis
 voluerit, quid nisi Amor fecit, quo hinc Patris hono-
 rem, inde nostram salutem ascereret, nobisque exem-
 pli facem, ut DEUM, ut Proximum amare sciremus,
 praeferret? Simili amore cujus vita imbuitur & mors
 dulcoratur. Non est amantibus DEUM mors in tadio,
 est in desiderio. Qui sic ardent, in cineres, in pulve-
 res, in favillas redigi mortis beneficio exoptant. *For-*
tis est ut mors dilectio: (*Cant. 8. v. 6.*) separat ani-
 mam à corpore, ut DEO jungat. Inter Amantem
 & DEUM sola corporis humani cortina interjacet:
 hanc ubi mors recluit, Deum amanti dedit. Quidni
 igitur amamus, Moriture, Deum, ex toto corde,
 quia Bonus est: ex tota mente, quia sapiens est: ex tota
 forti-

fortitudine, quia Potens est: ex omnibus viribus, quia EST, qui EST? Quidni amamus ex toto corde illum appetendo, ex tota anima, illi nos consecrando; ex tota fortitudine pro illo patiendo; ex omnibus Viribus illi serviendo? Inferbamus omnibus cogitationibus, verbis, & operibus, & siquæ unquam acciderint a lveris rebus: *Amo, amo, amo.* Hoc animus assue cogitet, hoc cor desideret, hoc lingua loquatur, hoc manus opereatur, hoc calamus scribat, hoc omnia ossa, omnia quæ intra nos sunt, dicant: *Amo, qui amo; & amo, ut amem.* Amemus Deum, qui charitate perpetuâ dilexit nos; qui cùm non essemus, fecit nos, cùm perissemus, reparavit nos; cùm defece- rimus, recipiet nos. Amemus DEUM qui nullam habet originem: qui utri à nemine factus est, & à nemine limitari potest, irâ infinitè bonus est & perfectus; adeo ut nec intellectus noſter majus aliquid cogitan- do sibi queat fingere, & quidquid deniq; fingat, id ad magnitudinem illius collatum, parvum sit, & nihil. (*Nierem. Ut. div. c. 17.*) DEUM illum tam admi- rabilem, qui cum Unus sit, est Trinus, & in Summa sua Unitate complectitur Trinitatem: miraculum mi- raculorum, quod per omnem aternitatem, perpetuam maximamq; movebit admirationem. DEUM, tam infinite bonum, ut solum id quod est, Pater commu- nicaverit Filio, & Filius ejusdem cum Patre bonita- tis, dederit peccatoribus. DEUM tam bonum, ut nec punctum unum temporis cessare potuerit à commu- nicatione sui ipsius; aliter, admirabili bonitati suæ haudquaquam satisfaciurus. DEUM omnipotentem,

C

qui

qui res omnes ex amore, & ex nihilo condidit. DEUM tam Sapientem, ut bene nobis faciendo errare non possit. DEUM tam immensum, ut abesse à nobis nequeat; quique nos, quoquò eamus, videt, quaque petimus, exaudit. DEUM tam immutabilem, cujus pulchritudo non potest exolescere, neque, benevolentia deficere. Deum simplicissimum, in quo sine inquietudine ulla & impedimento bonum omne possidemus. DEUM tam justum & misericordem, qui ut misericordiam adhiberet, pepercit hominibus, proprio Filio suo non pepercit. DEUM æternum, qui nobis interire non potest. DEUM fidelissimum, cui etsi nos fidem datam fregerimus, promissiones tamen nobis factas accuratè præstat. DEUM tam amantem nostrum, ut miseras infirmitatesque nostras tolerare sustinuerit. DEUM, qui omni ei quod est, dat suum esse; qui cælos sustentat, & per quem elementa permanent, plantæ vivunt, animalia sentiunt, homines ratione utuntur, Angeli intelligunt. DEUM immensum, qui nihil turbatur, neque fatigatur faciendo omnia, curando omnia, in omnibus existens. DEUM Bonum, qui in se concludit omne bonum, à quo oritur omne bonum, unde omnis iustitia promanavit; unde nata est omnis pulchritudo; unde omnis potentia dependet; unde omnis Sapientia suam ducit originem, omnis dulcedo suum principium. DEUM, qui est bonum super omne bonum, pulchrum super omnia pulchra, justum super omnia iusta, potens super omnem potentiam, sapiens, super omnem veritatem, dulce super omnem saporem. DEUM tam bonum, bonaque adeo
volunt-

voluntatis, ut mori elegerit, quò abjectissima viveret creatura; humiliari, ne vermiculus aliquis se extolleret; homo fieri propter inimicum sibi & divinitati suæ insidiantem hominem; seipsum deniq; relinquere alimoniam & sustentationem vitæ ejus, qui mille mortes increbatur; & humano claudi corpore, quæ non capiunt cæli cælorum. Diligamus DEUM tam nosrî amantem; qui unumquemq, hominem pari charitatis modo diligit, quo diligit orbem universum. (*Chrysost. in c. 2. ep. ad Cor.*) Diligamus DEUM, tam bonum: qui singulis Angelis sanctisq, animabus in tantum se subjecit, quasi sit servus emptitius singulorum, quilibet verò ipsorum sit Deus suus. (*S. Thom. opusc. 63.*) Diligamus DEUM, qui ita querit hominem, quasi tota salus divina in ipsius inventione penderet, & quasi sine ipso beatus esse non posset. (*Idem opusc. 13.*)

CAPUT VII.

*Imitandus in Christo Amor
Proximi.*

Est autem Amoris DEI lapis quidam Lydius *dilectio Proximi.* Hanc si, Moriture, non habes, illum te habere negas. Vult amari DEUS non tantum in se, sed & in Proximo. Quomodo non amabis hominem, quando DEUS factus est Homo? Quomodo non amabis hominem, pro quo tanta passus est DEUS. Homo? Passus est? Pati rursus, si necesse foret, toties paratus est,

est, quoties foret necesse. Nullius mortalium anima minoris est Christo, quàm aut Brigittæ, aut Gertrudis fuerit. Et tamen priorem Christus ita alloquitur: *Tu autem filia mea, quam elegi mihi, & cum qua spiritu meo loquor, dilige me toto corde: quia ego, qui creavi te, nulli meo membro peperci ad supplicium pro te. Et adhuc (notet ista Lector) sic charitate diligo animam tuam, ut antequam eâ carerem, adhuc iterum, si possibile esset, pro ea cruci affigerer. (Revel. l. i. c. i.)* Sanctæ verò Gertrudi ita idem dixit: *Ecce quomodo causâ tui amoris pependi in cruce nudus, & despectus, & toto corpore vulneratus, nec non per singula membra distentus. Si tamen salutis tuæ expediret, & aliter salvari non posses, jam pro te sola vellem omnia tolerare, quamquam estimare posses, me tolerasse pro toto mundo. (Infin. l. 3. c. 41.)* I nunc homuncio, neq; amorem Proximo, cujus auctori Dei Filius vitam cum profunderit, paratus sit alias mille, si quidem oporteret, prodigere. Age verò, nisi belluas velis ingratitude superare, quid faceres DEO, aut quid velles facere, si, quæ pro te ille vel tulit, vel fecit, velles rependere? Velles illi procul dubio omne bonum. Atqui ille bonorum tuorum non eget, quippe qui est Primum, Summum, Unicum & Omne Bonum. quid ergo? Adverte, quid dicat Spiritu Dei plenus, Magister & Scientiarum & virtutum Avila: *Quamvis JESUS pro omnibus beneficis, quæ in hominem confert, nullam pro se vicissim gratiam spectet, exigatve, ut qui nullus eget, donaq; sua puro ex affectu & bo-*

mirare, propriis commuai studiis prorsus vacuâ largitur: eam nihilominus redai vult Proximo, cum videbitur honore, benevolentia, ac subsidio indigere? (*Super And. filia c. 96.*) Quod si de modo quaras, quo te facillime possis ad diligendum Proximum excitare, suggeret tibi idem P. Joannes Avila sequentibus verbis: *Attente animi oculis intueri Filium DEI; & cogita quali cum misericordia propter genus humanum factus sit homo; quali studio & solitudine in ejus Salutem incubuerit; quali exuberantia amoris pariter & Doloris subierit in crucemorem pro illo: & sicut ex intuitu tui ipsius didicisti proximum tuum deinde humanis oculis intueri; ita ex aspectu JESU Christi, discas alios aspicere oculis Christianis, hoc est eadem ratione, quâ Christus illos aspicit.* (*Ibid. c. 95.*) Hæc ille En, ut admonitu Viri prudentissimi, exemplum Christi intuentibus facile sit ad amorem Proximi sese irritare. Sed quid hic amor ad felicem mortem? Longè plurimum. Nam, quis explicet, quàm sit uber solationum vena: Nunquam in vita Proximum judicio, lingua, oculo, opere, pravo exemplo lafisce; aut si lafisce contigit, injuriam prout par erat, reparâsse? Ridebat moribundus ille, religiosæ vitæ alioqui non observantissimus. Unde verò illi latitiæ seges? quod neminem unquam temerè judicâsset. *Non judicavi, ajebat, non judicabor.* Vitalis illi mors est, cujus in corde caritas est. Hoc docet Augustinus: *Videat, inquit, unusquisq, ad cor suum; si sibi invenerit caritatem fraternam, securus sit, quia transit à morte ad vitam.* (*Tract. 5. in Epist. S. Joan.*)

CAPUT VIII.

Ad felicem mortem iuvat, exemplo Christi, sæpe mortis meminisse.

Quisquis ad mortem sanctè obeundam se comparat, memoriam illius sæpe in mentem revocet. Ad quod fructuosè præstandum non sufficit cogitare: se aliquando certè moriturum; sed sic adfuturæ mortis meminisse oportet, ut illius felicitas à DEO magnâ contentione petatur, ut conscientiæ rectè consulatur, ut ad poenitentiam animus compungatur, ut desiderium cœlestis patriæ in nobis excitetur, ut, quod alicubi sùadet S. N. Ignatius, in dubiis perplexisq; rebus ab ea consilium postuletur, ut deniq; illa quovis loco & tempore à nobis expectetur; ex mente S. Bernardi sapienter sùadentis: *Quoniam te mors ubiq; expectat, tu, si sapiens fueris, ubiq; eam expectabis.* (*In meditat. c. 3.*) Dixeram superiùs Puritatem animi & Immunitatem à peccato ante omnia necessariam esse uti ad salutem, sic ad bonæ mortis Præparationem; hanc verò puritatem, quid tamen efficaciter procurat, quàm seria & circumspècta mortis recordatio? Discreta Veritatis vox est: *Memorare novissima tua, & in æternum non peccabis.* (*Eccli. 7. 40*) Cujus Sententiæ consideratio (Augustinum audis) destructio est superbiæ, extinctio invidia, medela malitiæ, effugatio luxuriæ, evacuatio vanitatis & iactantiæ, constructio discipline,

*ciplina, perfectio sanctimonie, preparatio salutis
eternae. (Aug. Spec. Peccat. c. 1.) Suffragatur Au-
gustino Gregorius: Qui considerat (inquit) qualis
erit in morte, semper sit timidus in operatione: nil,
quod transeat, appetit, & cunctis presentis vite desi-
denis contradicit. Perfecta enim vita est mortis
meditatio, quam dum Iusti sollicitè peragunt, culpa-
rum laqueos evadunt. (Lib. 13. Moral. c. 10.) In-
numeri sunt, qui horum veritatem dictorum experi-
entiâ comprobârunt. Principem Hussæum Jobum te-
stem allego. Innocentiam ille suam hac tesserâ pro-
didit: *Non peccavi.* (Job. 17. v. 2.) Mirum! tantis di-
vitiis, honoribus, felicitate prolium, gloria affluen-
tem potuisse vitam servare peccati immunem; *non pec-
cavi.* At multò mirabilius de Principe mendicum,
de divite pauperem, de glorioso factum despicabi-
lem; liberis, sanitate, opibus privatum, ulcere percus-
sum, à dæmone, amicis, uxore vexatum, exturbatum
è domo, ejectum in sterquilinum, desertum ab omni-
bus; tamen in innocentie gradu perstitisse; *Non pec-
cavi.* Unde illi tam incredibilis constantia? ex fre-
quenti memoria mortis, quam sibi assiduè hæsisse in
animo cùm prodidisset illis verbis: *Dies mei brevian-
buntur, & solum mihi superest sepulchrum;* subiecit:
Non peccavi. (Job. 17. v. 1.) Observavit hanc ratio-
nem acutè suprâ laudatus S. Doctor, suamq; obser-
vationem hoc calamo protulit. Unde & Beatus Job,
quia dies suos brevians considerat, & solum sibi su-
peresse sepulchrum pensat, aptè subjungit: *Non pec-
cavi.* Sunt & aliæ complures recogitatæ mortis uti-
litates,*

litates, quas, ne longum faciam, consulo prætereo, quòd illas malim experiendo potiùs, quàm legendo vel audiendo disci; nobis satis esto, quòd hæc quoque recogitatione Christum imitemur: qui à primo articulo suæ conceptionis in Passionem & mortem sibi à Patre decretam, continuè mentem defixam habebat; voluitq; ejusdem etiam sapius diserte meminisse; ut videre licet apud S. Matthæum cap. 12. vers. 39. S. Lucam c. 12. v. 50. præcipue verò apud S. Joannem cap. 2. 3. 10. 12. 18. rellat, ut quibus ex rebus nominatim memoria mortis excitari possit, suggeramus.

CAPUT IX.

Quibus occasionibus memoria mortis elici possit.

Solertis est hominis ex obviis quibusque rebus scire proficere. S. Parenti nostro nulla fuit tam vilis creatura, non musca, non vermiculus, non plantula, non flosculus, cujus ille aspectu non illico ad laudandam Creatoris Potentiam, Sapientiam, Bonitatem assurgeret. S. Franciscus Borgia quidquid conspiceret, in sui contemptum pudorèq; trahebat. Memoriam mortis ut sibi facillimè refricaret, varii excogitant varia. Calvariam ob oculos ponere, multis est in usu. Defunctorum aspectu, cum licet, libenter attinentur alii. Nonnulli ossaria adeunt, cœmeteriaq;, & in illis mortuorum reliquiis legunt expressam

expressam ad vivum rerum omnium vanitatem. Aegyptii cadaver ligneum affabre laboratum inferobant convivis. Quorum Rex sapientissimus ille Ptolomæus Philadelphus medias inter epulas positam ad letus mortualem calvariam contemplari solitus. Philippus Macedo quotidie sibi per familiarem ephēbum summo manē iussit recantari illam parœmiam: *Philippe, memento te hominem esse.* Severus Imperator, & illius exemplo Maximilianus I. ex Austriae Sarcophagum domi asservabant; Carolus V. præterea secum, quæquæ veheretur, vehebat. Laudo, probôq; omnia: ego tamen, ut insistam consilio, quo Lectori meo auctor esse cœpi, ut, si sanctam mortem adornare velit, assiduè mentis corporisque oculis Christum Patientem Morientemq; intueretur, putarem utilissimam fore ejusmodi consuetudinem, si perspectâ aliunde, solerti consideratione, Christi pro nobis Passi immensâ caritate, ejusdem Crucifixi Imaginem oculis cum licet, animo, cum libet, objiciens, modò suspiret illud: *Moriatur anima mea morte justî hujus!* modò cum Ecclesia: *Per mortem tuam, A subitanea & improvisa morte, A morte perpetua Libera nos Domine!* Vel illud piorum *Salve Crux Digna super omnia ligna benigna, Tu me consigna, moriar ne morte malignâ.* Vel illud Bernardi: *Horâ mortis meus status Intret in ESU tuum latum. In hac fossa me reconde, Ibi meum cor absconde.* Vel, si vacaverit, illam Religiosi preculam: *Domine Jesu Christe propter illam amaritudinem &c.* Vide pag.

Ita nimirum mortis nostræ recordatio, quia in-
 pium affectum, morumq; (ut antea monui) emen-
 dationem transibit, Theologica erit, non Stoica; &
 obsecundabitur piissimo S. Abbatis Claræ-Vallis mo-
 nito: *Nulla vel brevis mora subrepat, in qua non*
habeas memoriam Filii DEI pro tua miseria, & sua
Misericordia Crucifixi. (*Opusc. de char. c. 32.*)
 Atque hoc unum pietatis exercitium satis esse posset
 ad frequentandam salubrem mortis reminiscenciam:
 Varietatis tamen gratiâ plures occasiones insinuabo,
 quibus illa excitari possit. In quo sicui forrè visus
 ero paullò prolixior, meminerit, *Mortem* non modò
juvenibus, quod ait Nazianzenus, sed omnibus om-
 nino mortalibus *esse in insidus*, ac proinde ex more
 eorum, qui sibi sciunt insidias strui, nos ubiq; cau-
 tos, ubiq; timidos, ubiq; circumspectos esse oportere.
 Nunquam satis cavetur, quod semper timetur. Porro
 facile elicitur *Mortis* recordatio ex quotidianis *Vitæ*
actionibus, quarum primaria est *Psalmorum* cantus,
 seu Recitatio, persolvenda ab iis, qui ad illam te-
 nentur: *Usus* deinde *sensuum*, ac deniq; *Locus*
 & *Tempus* insidiatricis nos mortis admo-
 nere possunt. Ordiamur à
 primo.



CAPUT X.

Memoria mortis ex diurnis
Actionibus.

MANÈ dato ad surgendum seu campanæ seu alio signo, occurrat illud S. Hieronymi auribus assidue intonans: *Surgite mortui!* Revera enim quoties à somno, toties à morte quadam excitamur, quæ perinde ac mortuos rerum omnium usu privat. *Nam quid tam mortis simile, quàm dormientis aspectus?* quærit Chrysologus. (f. 24.) Salutaris est hoc tempore & illa admonitio: *Cum manè fuerit, puta te ad vespèram non perventurum.* (Th. k. l. i. c. 23. n. 3.) Nec minus utilis S. Borgiae consuetudo, quæ illum, simul atq; de strato surrexit, ad figendum terræ osculum deprimebat, ut se de humo conditum, in terram reversurum meminisset.

Vestimur. Paulum audiamus 1. Cor. 15. 34. *Oportet corruptibile hoc induere incorruptionem; & mortale hoc induere immortalitatem. Cum autem mortale hoc induerit immortalitatem: tunc fiet sermo, qui scriptus est: ubi est mors victoria tua? ubi est mors stimulus tuus?*

Meditamur. Optima Philosophia est mortis Meditatio. Assumatur itaq; interdum Meditandi thema de Morte. quale ministramus Parte ult. hujus libelli pag.

Oramus. Oremus, quæso, quotidie aliquid, &

pro felici morte. Cui exorandæ potissimum serviunt Litariæ de SS. Virgine Lauretanæ, Fidelibus jam propè omnibus in dies usitata.

Studemus. O quàm miserum est nescire mori! clamat Seneca. Ars arrium est scire bene mori: hanc ergo discamus; ne alioquin eorum in numero simus, qui, ut ait idem, *inter mortis metum & vite tormenta miseri fluctuant, & vivere nolant, & mori nesciunt.* (ep. 4.)

Vesimur. Mors in Olla. 4. Reg. 4. 40. Venenum in auro bibitur. Seneca. Uxæ acinus Anacreonti Poëtæ, Spina piscis Tarquinio Prisco satis ad mortem tuit.

Decumbimus. Vespere factò, manè non audeas tibi polliceri. Kemp. Quis scit, an adjicient hodiernæ crastina vitæ Tempora Dii Superi? Cogitemus cum Lipsio:

Adlectum: ad lethum! vel cum Joanne Berkmanno S. J. adolescente innocentissimo. *En mortis incertus, intro hoc sepulchrum!* Decantatum est illud de Reginaldo licentiæ vivendi assveto, qui cum nullam de rebus divinis mentionem admittere vellet, eo tantum projecto: (Isai. 14. v. 11.) *Subter te sternetur tinea, & operimentum tuum erunt vermes; ad frugem rediit.* Proderit & nobis in strato decumbentibus idem recordari.

Confitemur. Illum imitemur, qui, ut dicebamus cap. 4. quotidie perinde, ac si mox obeundum foret, sacrum tribunal adibat. Ajunt ipsam Adami calvariam Christi in Golgothæo monte Morientis sanguis.

sanguineis stillis fuisse perlusam : unde Pictoribus
cranium ad pedem Crucis pingendi data sit occasio
sit fides penes Authores : poterat enim ex picta cal-
varia Mons Calvaria significari : pium est inter con-
fitemdum cogitare, nos stillante de Christi Crucifixi
vulneribus sanguine irrorari. Nam (qui est Sensus
S. Franc. Salesii) tametsi ipsissimus Salvatoris I. S. U.
Sanguis non sit, est tamen Sanguinis ejus effusi meri-
tum, qui Pœnitentes irrigat, lavat, & respergit.
(Introd. par. 2. c. 19.)

Communicamus. Si sacra Synaxis instar Viatici
sacri ad mortem sumatur, & vim illius obtinet, si con-
tingat mori, & liquido quodam singularique Felatio
ex hac cogitatione animus perfunditur.

Sacrificamus. Dum Christi Mortem commemoramur, mortis quoque nostrae meminerimus cum physicae tum moralis, hoc est, mortificationis. Posteriori a nobis requirit hūc verbis Gregorius: *Quæ Passionis Dominicae mysteria celebramus, debemus imitari, quod agimus.* (*Dialog. l. 4. c. 59*) Et iterum: *Necesse est, ut dum hæc agimus, nosmetipsos Deo in cordis contritione mactemus.* (*Idem ibid*) Multis ad sacrum ire, est ire ad martirium. *Eamus* (ajunt illi cum fervente Thoma) *Eamus & nris, & morsamur cum eo.* (*Joan. 11. 16.*) Atque utinam tam felices essemus, ut quoties Hostiam divinam Omnipotenti Deo offerimus, toties ipsi Deo victima cadamus! Sanctis Matthæo Apostolo, Stanislae Episcopo, Clementi Ancirano, Stephano Pontifici pluribusq; aliis felicitate similes; quorum gloriosa mors

tuir

fuit ad aras cum Christo, & pro Christo generose
oppetiisse.

Horis Canonicis seu continendis, seu legendis vacamus. Quoties illa salubrem nobis mortis memoriam suggerunt; modò suggestiones illas non primoribus tantummodo labiis delibemus, sed in cor demittamus. Etenim, ut unum alterumve locum in finuem, quàm efficax ad corrigendos mores inconditos illud: *Emendemus in melius, quæ ignoranter peccavimus; nè subito præoccupati die mortis, quæramus spatium penitentiae, & invenire non possimus.* (Dom. 1. quadr. lect. 4. resp. 4.) In Communi Confessorum Lectiones S. Gregorii in Evangel. *sint tumbi, &c.* ad maturam mortis incertæ dispositionem nos clarè informant. Pretiosas Sanctorum Mortes nōne idcirco legimus, ut illas non æstimare modò, sed imitari etiam studeamus? Jam verò gloriosi Martyrum agones eò nos, nisi fallor, impellunt, ut cum iisdem Christum Redemptorem nostrum amemus in vita, sequamur in morte. Sic enim illos laudare jubemur. *Viri Sancti gloriosum sanguinem fuderunt pro Domino, amaverunt Christum in vita sua, imitati sunt eum in morte sua: & idè coronas triumphales meruerunt.* (Comm. pl. MM. R. 2.) At verò Psalmi ipsi, quia referti sunt ejusmodi versibus, qui ad accurandam mortis felicitatem plurimum conducant, juvat illos hîc singillatim excerpere. Sed duo observanda: alterum, ut dum pronunciantur, id fiat cum aliqua animadverrentia: alterum, idq; præstabilius, ut otium ad penetrandam illorum

illorum vim assumatur. Obiter decursa intellectum
subinde perstringunt, voluntatem non afficiunt.

CAPUT XI.

Psalmorum Versus mortis me- moriâ refrigerantes.

Psalmo 1. versu 5. *Non resurgent impii in judi-
cio.* q. d. Reprobi cum mortui fuerint non re-
surgent in extremo die iudicii ad vitam, etsi resur-
gent ad poenam. *Omnes quidem resurgemus, sed
non omnes immutabimur.*

3. v. 6. *Ego dormivi & soporatus sum, & re-
surrexi.* q. d. Ego (Christus) mortuus sum, sed ter-
tiâ die resurrexi. quo Fideles meos de resurrectione
à morte, assecuravi.

4. 9. *In pace in idipsum dormiam, & requi-
escam.* Inde illud: *Requiescant in pace.*

6. v. 5. & 6. *Convertere Domine, & eripe
animam meam: Saluum me fac propter misericor-
diam tuam. Quoniam non est in morte, qui memor
sit tui, in inferno autem quis confitebitur tibi?* q. d.
Salva me, & libera tantisper à morte: quia post
mortem & in sepulchro non est amplius occasio
cum merito te laudandi.

7. v. 13. & 14. *Nisi conversi fueritis, gladium
suum vibraui, arcum suum tetendit, & paravit il-
lum. Et in eo paravit vasa mortis: sagittas suas
ardentibus effecit.* Psalm.

Psalin. 9. vers. 14. & 15. *Miserere mei Domine: vide humilitatem meam de inimicis meis: Qui exaltas me de portu mortis.*

Psal. 12. v. 5. *Illumina oculos meos, ne unquam abdormiam in morte: nequando aicas inimicus meus, Prævalui adversus eum.*

15. v. 9. *Caro mea requiescet in spe,*

10. v. 17. *Satiabor, cum apparuerit gloria tua.*

21. v. 10. 11. 16. *Tu es (Domine) qui extraxisti me de ventre: Spes mea ab uberibus matris mee. In te projectus sum ex utero. De ventre matris mee Deus meus es tu ne discesseris à me. Quoniam tribulatio proxima est, quoniam non est, qui adjuvet. Sicut aqua effusus sum: & dispersa sunt ossa mea. Factum est cor meum tanquam cera liquecens in medio ventris mei. Aruit tanquam testa virtus mea, & lingua mea adhesit faucibus meis, & in pulverem mortis deduxisti me.*

22. 4. *Etsi ambulavero in medio umbrae mortis, non timebo mala: quoniam tu mecum es.*

26. 1. *Dominus illuminatio mea, & Salus mea, quem timebo? Dominus protector vite mee à quo trepidabo? Psalmus hic abundat piis Adiectibus desiderii cœlestis Patriæ, fiducia in Deum, Petitionis, &c. qui morituris & Moribundis serviunt.*

29. 10. 11. *Quæ utilitas in sanguine meo, dum descendo in corruptionem? Numquid confitebunt tibi pulvis, aut annuntiabit veritatem tuam?*

30. v. 1. & sequentibus, usq; ad: *In manus tuas (Domine) commendo Spiritum meum.*

32. 18. *Ecce oculi Domini super metuentes eum: & in eis, qui sperant super misericordia ejus. Ut eruat à MORTE animas eorum.*

33. v. 20. *Multa tribulationes justorum: & de his omnibus liberabit eos Dominus.*

Mirum est, quantum hic versiculus cum fiducia pronunciatus, hominem in adversis corroboret.

Ibid. v. 22. *Mors peccatorum pessima.*

34. 10. *Omnia ossa mea dicent: Domine, quis similis tibi?*

35. *Domine, apud te est fons vite: & in lumine tuo videbimus lumen.* v. 10.

36. v. 1. 2. *Noli amulari in malignantibus, neq; Zelaveris facientes iniquitatem. Quoniam tanquam fœnum velociter arescent: & quemadmodum olera herbarum citò decident.*

37. 1. *Domine, ne in furore tuo arguas me &c.* Psalmus hic, uti & reliqui, quos vocamus *Pœnitentiales*, si ut par est, à sanis usurpentur, erunt usui solatiôq; infirmis. Experto Augustino crede.

40. 1. *Beatus vir, qui intelligit super egenum & pauperem: in die mala liberabit eum Dominus.* Dies mala & amara valdè est dies mortis, & particularis judicii. In hac die mala bene erit misericordibus.

41. v. 1. & seq. *Quemadmodum desiderat cervus ad fontes aquarum: ita desiderat anima mea ad te DEUS. Sicut in te &c. quoniam transibo (per jan-*
D
nuam

nuam mortis ; in locum tabernaculi admirabilis, usq;
ad domum Dei.

42. 1. *Judica me Deus, & discerne causam meam de gente non sancta.* q. d. Divino judicio tuo, me, Deus, permitto: sed simul rogo, ut discernas causam salutis meæ & secernas ab iis, qui audituri sunt ex te; *Ite maledicti in ignem æternum.*

43. 20. *Humiliasti nos in loco afflictionis, & cooperuit nos umbra mortis.* Et v. 22. *Propter te mortificamur tota die: æstimati sumus sicut oves occisionis.* Revera enim ut victima sub cultro, sic nos sumus sub mortis imperio: & quamdiu vivimus, tamdiu morimur. *Ipse enim quotidianus defectus corruptionis, quid est aliud, quam quedam prolixitas mortis?* S. Gregor.

48. 6. *Cur timebo in die mala? Iniquitas calcanei mei circumdabit me.* Quid per istam calcanei iniquitatem intelligatur, per sententias interpretum non eo, sequorq; sensum eorum, qui peccata venialia intelligunt, quæ ordinariè ab hominibus, pulveris instar habentur, contemnuntur, calcaneo teruntur. his igitur circumdari timet Propheta. Ita Pawlowsky Locut. DEi ad cor. pag. 35.

Ibid. v. 21. *Simul insipiens & stultus peribunt. Et relinquent alienis divitias suas: & sepulchra eorum domus illorum in perpetuum.* & vers. 15. *Sicut oves in inferno positi sunt: MORS depascet eos.*

51. 1. *Quid gloriaris &c.* Propterea Deus destruet te, & emigrabit te de tabernaculo tuo, & radicem tuam de terra viventium.

53. 8. *Voluntariè sacrificabo tibi. q. d. Meti-
bi per mortem libenter & ultro sacrificare volo. Sa-
crificanda DEo anima!* ajebat identidem in extremo
morbo P. Humbertus Selinus S. J.

54. v. 5. 6. 7. *Cor meum conturbatum est in me,
& formido mortis cecidit super me. Timor & tre-
mor venerunt super me, & contexerunt me tenebra.
Et dixi: Quis dabit mihi pennas sicut columba, &
volabo, & requiescam.*

55. 14. *Eripuisti, Domine, animam meam de
morte, & pedes meos de lapsu, ut placeam coram Deo
in lumine viventium.*

58. v. 17. *Ego autem cantabo &c. Quia factus
es susceptor meus, & refugium meum in die tribula-
tionis meae. Dies mortis non incongruè dicitur dies
tribulationis: erit enim tunc tribulatio magna. Su-
sceptor autem noster Deus est, dum nos cœlo recipit.*

61. v. 6. *Verumtamen Deo subjecta esto anima
mea: quoniam ab ipso patientia mea. Quia ipse Deus
meus, & Salvator meus: adjutor meus, non emi-
grabo. q. d. Spero me ex hoc mortis periculo evasu-
rum per gratiam & opem Dei: cui tamen me resi-
gnatè subjicio, ejusq; voluntati trado.*

62. 4. *Melior est misericordia tua, Domine,
super vitas. Hoc toties ingeminandum, quoties no-
bis desiderium vitæ intrinsecus oritur, vel vana diu-
tius vivendi spes injicitur; exemplo Alphonſi Salme-
ronis, cui cum Amici longiorem vitam seu precaren-
tur, seu pollicentur, reponebat: Melior est Miseri-
cordia Domini super vitas.*

64. 5. *Beatus, quem elegisti, & assumpsisti: inhabitabit in atriis tuis.* R. Patri Vincentio Garafæ, cùm quis domi vitâ excedebat, solito serenius micabat vultus, neape erecta ad præsentem ejus obitum spe, brevi illum ad beatam vitam sequendi; neq; divellere se à cadavere poterat, sublatûsq; in cœlum oculis, *Quàm felix est*, exclamabat, *quàm felix! Vitæ. l. j. c. 12.*

Pl. 65. v. 8. *Benedicite Gentes Deum nostrum, & auditam facite vocem laudis ejus. Qui posuit animam meam ad vitam: & non dedit in commotionem pedes meos.*

67. v. 1. *Exurgat Deus, & dissipentur inimici ejus, & fugiant, qui oderunt eum, à facie ejus: Sicut deficit fumus, deficiant: sicut fluit cera à facie ignis, sic pereant peccatores à facie Dei*

His versibus utitur Ecclesia in Commendatione animæ: quibus tartareas legiones à Moribundo arcet.

68. 1. *Salvum me fac Deus, quoniam intraverunt aquæ usq; ad animam meam. &c.* Psalmus hic, sicut Christum in morte dolentem repræsentat: Sic Moribundi doloribus auxilium adferet: si, dum valet, illum piè oraverit, in morbo repetierit.

70. 9. *Cum defecerit virtus mea, ne derelinquas me.* Quando animi corporisq; vires magis, quàm in morte deficiunt?

72. v. 4. 6. 7. *Quia non est respectus morti eorum Ideo tenuit eos superbia operi sunt iniquitate & impietate suâ. Prodit quasi ex adipe iniquitas*

Psalmorum Versus mortis memoriam refricantes. 39

quitas eorum: transierunt in affectum cordis. En, quæ mala mortis oblivionem comitentur!

Ibid. v. 25. *Quid mihi est in cælo &c. Affectus est Prophetæ terrena omnia nauscantis, & Deo conjungi à morte cupientis.*

74. 3. *Cum accepero tempus, ego justitias judicabo. Etiam, quæ nobis justa videmur fecisse, discutiet Examinator Deus. quo tempore? die mortis clanculum, die judicii palam & aperte.*

75. 6. *Dormierunt somnum suum: & nihil invenerunt omnes v. ri divitiarum in raambus suis* Fur nimirum Mors, non tantum rapit omnia, sed cum raptura minimè putatur.

76. v. 6. *Cogitavi dies antiquos, & annos æternos in mente habui. O si haberemus! Quem æternitas non movet, aut fidem non habet, aut cor non habet. Telsera est Guilielmi Lamormaini Ferdin. II di Confessarii.*

81. *Vos autem sicut homines moriemini. v. 7.*

83. 1. *Quam dilecta tabernacula tua Domine virtutum! Totus hic Psalmus ad cœlestem patriam aspirat.*

85. 12. *Confitebor tibi Domine Deus meus in toto corde meo &c. quia eruisti animam meam ex inferno inferiori. Gratiarum est actio pro recuperata valetudine, & liberatione à morte.*

87. v. 4. *Repleta est malis anima mea, & vita mea inferno appropinquavit.*

88. 49. *Quis est homo, qui vivet, & non videbit mortem?*

89. v. 4. *Quoniam mille anni ante oculos tuos, tanquam dies hesternæ quæ præterit.* v. 6. *Manè sicut herba transeat, manè floreat & transeat: vespere decidat, induret, & arescat.* Appositè Nazianzenus: *Homo flos, tempestivè nascens, tempestivè arescens.*

90. 1. *Qui habitat &c.* Multi sunt, qui hoc Psalmo iter, cum peregre proficiscuntur, prosperum efficiunt. Hoc eodem nos tueri, possumus, cum ingredimur iter æternitatis. Hunc P. Franciscus Conterus, jamjam migraturus cum meditatè audiret, singulorum versuum sensum in divina beneficentiâ ajebat se cum bono DEO expertum. Tandem ubi lectum: *Ostendam illi salutare meum:* adjecit; *hoc adhuc superesse: hoc se sperare,*

100. v. 12. *Dies mei sicut umbra declinaverunt: & ego sicut fœnum arui.*

Ibid. v. 24. *Paucitatem dierum meorum nuncia mihi: ne revoces me in dimidio dierum meorum.*

102. v. 15. *Recordatus est quoniam pulvis sumus, homo sicut fœnum dies ejus: tanquam flos agri sic efflorescit.*

103. v. 33. *Cantabo Domino in vita mea: psallam Deo meo, quam diu sum.*

107. 1. *Paratum cor meum Deus, paratum cor meum.* Idem repetit Psalter ps. 56. v. 8. quasi dicat: *Paratus sum ad vivendum, paratus ad moriendum.* Et hoc est, quod in S. Martino miratur Ecclesia: *O virum ineffabilem, nec labore victum, nec morte vincendum, qui nec mori timuit, nec vivere recusavit.*

113. v. 17. *Non mortui laudabunt te Domine, neque omnes qui descendunt in infernum. Vide Psal. 6. v. 6.*

114. v. 3. *Circumdederunt me dolores mortis: et pericula inferni invenerunt me. Tribulationem et dolorem inveni: et nomen Domini invocavi, &c.*

115. v. 15. *Pretiosa in conspectu Domini mors sanctorum ejus.*

117. *Non moriar, sed vivam: et narrabo opera Domini. Castigavit me Dominus, et morti non tradidit me.*

118. *Beati immaculati, &c.* Quanta sit hujus Psalmi pro consecutione felicitis migrationis efficacia, vel inde conjicitur, quod illum Ecclesia apud Moribundos recitari jubeat, si eveniat illos extremum agnitionem diutius trahere. Et verò multa sunt in eo, quæ illi articulo commodum inserviant. Ut:

Non me derelinquas usquequaque. v. 8.

Benedictus es Domine. v. 12.

Concepivit anima mea desiderare justificationes tuas in omnitempore. v. 20.

Adhæsit pavimento anima mea: vivifica me secundum verbum tuum. v. 25.

Noli me confundere. v. 31.

Veniat super me misericordia tua Domine, salutare tuum secundum eloquium tuum. 41.

Memor esto verbi tui servo tuo, in quo mihi spem dedisti. Hec me consolata est in humilitate mea. 49.

Præquam humiliarer, ego deliqui. 67.

Bonum mihi quia humiliasti me. 71.

Fiat cor meum immaculatum in justificationibus tuis, ut non confundar. v. 80.

Defecit in salutare tuum anima mea. 81.

Quot sunt dies servi tui? quando facies de persecuentibus me iudicium? 84.

Tuus sum ego, salvum me fac. 94.

Omnis consummationis vidi finem. 96.

Suscipe me secundum eloquium tuum, & vivam, & non confundas me ab expectatione mea. 116.

Confige timore tuo carnes meas, à iudiciis tuis timui. 120.

Aspice in me, & miserere mei 132.

Judica iudicium meum & redime me. 154.

Concupivi salutare tuum, Domine, 174.

Erravi sicut ovis quæ perit, quare servum tuam. v. 176.

Psal. 119. v. 5. Hen mihi, quia incolatus meus prolongatus est!

121. *Latatus sum in his, qui dicta sunt mihi. In domum Domini ibimus, Multis hic versiculus in morte solatio fuit: B. Aloysio Gonzagæ præsertim, qui invisenti ad se cuidam Sacerdotum: Pater me dicebat, latantes imus, latantes imus.*

123. *Benedictus Dominus, qui non dedit nos in captionem dentibus eorum. Anima nostra sicut passer erepta est de laqueo venantium: Laqueus contritus est, & nos liberati sumus.*

126. v. 3. *Cum dederit dilectis suis somnum: ecce hereditas Domini,*

138. v. 23. 24. *Proba me Deus, & scito cor meum: interroga me, & cognosce semitas meas. Et vide si via iniquitatis in me est: & deduc me in via eterna.*

141. 1. *Voce meâ ad Dominum clamaui, &c.*

v. 8. *Educ de custodia animam meam: me expectant iusti donec retribuas mihi. Psalmus hic S. Francisco Seraphico vivendi pariter & orandi finem dedit: dum in eo versiculo, Me expectant iusti, &c. efflavit animam. Breviar. 4. Octobr.*

142. 2. *Non intres in iudicium cum servo tuo: quia non iustificabitur in conspectu tuo omnis vivens.*

Ibid. v. 10. 11. *Spiritus tuus bonus deducet me in terram rectam: propter nomen tuum Domine vivificabis me, in equitate tua. Educes de tribulatione animam meam.*

143. *Homo vanitati similis factus est: dies ejus sicut umbra pratererunt. v. 4.*

145. 4. *Exibit Spiritus ejus, & revertetur (corpus) in terram suam: in illa die peribunt omnes cogitationes eorum. Hoc fatetur Jobus: Dies mei transierunt, cogitationes meae dissipatae sunt, torquentes cor meum. Job. 17.*

150. *Omnis spiritus laudet Dominum. v. 6. Hoc eodem versiculo S. Vincentius Ferrerius vitam, quo suum David Psalterium absolvit.*



CAPUT XII.

*Ex usu Sensuum, Loco item, &
Tempore potest elici memoria
Mortis.*

INfinitus essem, si res omnes, quæ sub sensum cadunt, etiam sub mortis memoriam cogerem. De infinitis pauculæ sufficiant: quæ tamen ipsæ non eò spectabunt, Morituro Lector, ut solâ mortis recollectione animum tuum pungant, sed uti nunc istâ, nunc illâ occasione mortis reminiscens discas deniq; & mortem non timere, & conscientiæ puritati consulere, & perspicere rerum omnium vanitatem.

Quod igitur ad *Aspectum* attinet,

Vides c.c. immensas illas patentium *Cælorum* regiones? Patriam tuam cogita, ad quam per mortis beatæ januam sit aditus, & levato in cœlum animo, aut, si placet, etiam digito, dic ipse tibi: *Ecce hereditas Domini!* quando cernenda? *Cùm dederit dilectis suis somnum.* Psal. 126.

Vides *Aquam* seu lacubus stagnantem, seu flumine currentem? Occurrat illud: *Omnes morimur, & quasi aque dilabimur in terram, quæ non revertantur.* 2. Reg. 14.

Terram aspicias? *Pulvis es, & in pulverem revertêris.* Gen. 3. 19.

Facem ardentem vel *Candelam* vides? Sic & nos consumimur, donec extingvamar.

Homi.

Hominem consideras ? Mortalis mortalem : Homo de humo , limus de limo. Xerxes , cùm ingentem suum exercitum de editiore loco spectâisset , solutus est in lacrymas. Causâ lacrymarum : Quòd post 50. annos nemo militum superviviturus esset.

Solem aspicias ? Quod soli occasus hoc nobis Mors est. Vix orimur , morimur.

Florem intueris ? Homo natus de muliere , repletur multis miseriis. qui quasi Flos egreditur , & conteritur , & fugit velut umbra. Job. 14. Leo Pont. XI. Rosam gerebat in scuto cum lemmate. Sic flormi.

Fabrica occurrit apparatu magnifica ? Erit cùm & hic non manebit lapis super lapidem. Luc. 19. 44.

Arborem vidisti ? Vide , ne forte in te conveniat : Succide illam , ut quid etiam terram occupat ? (Luc. 13. 8.) Et fortè jam posita est securis ad radicem. (Luc. 3. 9.) Ergo , quod S. Joannes Baptista monet (Matth. 3. 2.) age paenitentiam.

Jam verò

Audis aliquem ex morbo emortuum , illum igne absumptum , hunc aquis suffocatum , istum ruinâ domus obrutum , alium ab hoste peremptum , alium alio mortis genere extinctum ? Vellicet auriculam Bernardus inquires : Quidquid illis accidit , tibi accidere potest , quia homo es. In Medit. c 3. de dignit. anim.

Audis Campanam funebrem ? Vocamur ! Mihi hêri , tibi hodie. Eccli. 38.

Audis suavissimos Musica , insonantis modulos ? Perit memoria eorum cum sonitu. ps. 9. 8. Tenent tympanum & citharam , & in bonis ducunt dies

dies suos, & in puncto ad inferna descendunt. (Job. 21. v. 12.)

Audis horologium? Filioli, novissima hora est. 1. Joh. 2. v. 18. *Quâ horâ non putatis, Filium hominis veniet.* Luc. 12. *MARIA* Mater gratiæ, &c. Et mortis horâ suscipe. Ave Maria, &c. ora pro nobis peccatoribus, nunc & in hora mortis.

Ad Odoratum. Putredini dixi: Pater meus es: mater mea, & soror mea, vermibus. Job. 17. 14.

Ad Gustum. O Mors, quàm amara est memoria tua! Cui? Homini habenti pacem in substantiis suis. Eccli. 41. 10.

Ad Tactum. Credo, quòd Redemptor meus vivit, &c. & rursus circumdabor pelle meâ, & in carne mea videbo Deum Salvatorem meum. (Job. 19. 26.) Eutychius Patriarcha à S. Gregorio Papa de Resurrectione mortuorum convictus, instante morte, pellem manûs suæ tenebat, multis presentibus, dicens: *Confiteor, quia omnes in hac carne resurgemus.*

Locus demum ipse & Tempus nos mortis admonere potest. Nam si Domi moremur, cogitare possumus illum Psaltæ versiculum: *Sepulchra eorum domus eorum in perpetuum.* Psal. 48. 12.

Si in templo agamus, aut Cæmeterio; ibi sepulchrorum meminerimus. *Hæc Requies mea, hic habitabo.* Ps. 131. v. 14.

Si in horto, prato, vel amœno loco. *Homo sicut fœnum dies ejus: tanquam flos agri sic efflorescit.* Pl. 103.

Si de loco in illum peregre migremus. *Non habemus*

habemus hic manentem civitatem, sed futuram (in cœlo nimirum) inquirimus. ad Heb. 13. 14.

Porro malè collocati temporis jactura cùm in morte hominem plurimùm excruciet; danda est opera, ut illud semper utiliter insumatur. *Dum tempus habemus, operemur bonum.* Galat, 6. 10.

Nam, ut ait Bernardus, *Sicut capillus de capite, nec momentum peribit de tempore.* Omnia vitæ nostræ momenta in examen venient. Et, ut idem asserit, *Omne tempus impensum exigetur à nobis, qualiter sit expensum.* Discept. 208.

Ceterùm ut ex *Tempore* mortis meminerimus, poterit *matutinè* usurpari illa Ezechiae aspiratio: *Præcisa est velut à texente vita mea, dum adhuc or-
diner succidit me: de manè usq, ad vesperam finies
me.* Repetit: *De manè usq, ad vesperam finies me:*
*sicut pullus hirundinis sic clamabo, meditabor ut co-
lumba.* Isai 38. v. 12.

Passim jam orbi notus est Chrysaorii Pœnitenti-
tiam negligentis gemitus: *Inducas vel usq, manè!*
inducas vel usq, manè! Frustra! Priùs noctem Plu-
tonis, quàm Solis ortum vidit.

Sub meridiem Pium imprimis & salubre fuerit
Christi, ut sponsa loquitur, *cubantis in meridie.*
(*Cant. 1. 7.*) id est, in cruce tres horas inter enor-
mes cruciatus pendentis meminisse. Sunt certè,
qui sibi religioni ducerent, si ad horæ tertiæ sonum
(quæ verno æquinoctio ab ortu Solis est nona)
mortem suam Morienti Christo non commendarent
illâ saltem oratiunculâ: *Domine Jesu Christe prop-
ter illam amaritudinem &c.* pag. *Sub*

*Sub vesperum suspiremus cum Ecclesia: Largire
lumen vesperi, quo vita nusquam decidas: Sed premi-
um Mortis sacre perennis instet gloria!*


*Sub noctem cogitare licebit: Si audire contin-
geret: Hæc nocte reperent animam tuam à te; (Luc.
12.) quid agere vellem? Vel illud: Venit nox, quan-
do nemo potest operari Joan. 9. v. 4. Scilicet, ubi lu-
mina in mortem clausurimus, Tempus non erit am-
plius Apoc. 10. v. 7.*

Huc deniq; pertinet illa doctrina R. P. *Andreae Schambogen S. J.* magni in Provincia Bohemiæ Spiritus Magistri, svadentis, ut pro comparatione ad mortem deligatur certus in anno, mense, hebdomade dies, quo nobis collectione animi, precibus, afflictatione corporis, consideratione mortis felicem ex hac vita transi-
tum demcreamur. Ita demum fore, ut quocunq; anno, mense, hebdomade moriamur, felicitatis optatæ nobis veluti vestigales faciamus. Hunc ad finem valebit in anno dies Parasceves, Christo Morienti morientium omnium Præsidio & Exemplari sacratu; in mense primus illius aut ultimus Dies, vel certè S. Patrono menstruo consignatus; in hebdomada quaque dies Sabbathinus, Patrocinio Matris agonizantium Mariæ Virginis illustratus. Et hac piâ Praxi, æquum est, ut nos communiamus Nihil nobis præscribitur nimium. Agamus, quidquid possumus. Tota vita vix ad hoc unum sufficit, ut discamus bene mori.

Omne punctum industriæ sibi vendicat illud
Punctum, à quo pendet Æter-
nitas.

P A R S II.

De proxima ad felicem Mortem Præparatione.

 Hristus æterna Veritas, beatos pronunciat eos, qui puritate vitæ & conscientiæ nitore semper circumspecti ita vigilant, ut ad primum illius aditum & pulsum expediti sint eundem amanter accipere, hoc est, ex hac vita ad illam immortalem transire. Quid sit autem advenire Christum, quid fores hominis cujusq; pulsare, quid aperire pulsanti Christo, eleganter ut solet, declarat S. Gregorius: *Venit (inquit) Dominus, cum ad iudicium properat: pulsat verò, cum jam per agnitudois molestias esse mortem vicinam designat. Cui confestim aperimus, si hunc cum amore suscipimus. (Hom. 13. in Evang.)* Est verò singulariter amanda, gratòq; animo suspicienda isthæc DEI Optimi erga nos providentia, quòd tametsi pro potestate sui in nos dominii posset omnes omnino hinc repentè subducere, plerumq; tamen prævio agnitudois immisæ impulsu accedat, ut præparationi ad mortem & locum concedat & opportunitatem: quam si quis per supinam socordiam negligat, ipse sibi exitium, impudet, illudq; fulmen impendere non dubitet; *Perditio tua ex te. (Osee 13. 9.)* Quisquis igitur incolumis adhuc & viribus integris per Remotam Præparationem, de quâ actum hætenus, Christum Iudicem per-
vigil

vigil expectavit, ut primum eundem admonitorio infirmitatis strepitu pulsantem senserit, ad proximam pro morte Præparationem sese accingere studeat, quæq; præscribentur Deinceps, tempori observet. Neque inde ansam ignaviæ arripiat, quod fortasse sapius ægotans, rursus consanuerit: quando, *Quem sepe casus transit aliquando invenit;* (Senec.) & justo DEI judicio id fieri potest, ut hæc ipsâ ignaviâ mereatur citra ullos venturæ mortis monitores repentinò hinc abripi; spatiaq; temporis ad Præparationem illam idonei minimè invenire. Etenim verè ille cecinit:

Cui pænitere cùm licet, nunquam libet;

Huc pænitere cùm libet, nunquam licet.

Hujus verò Proximæ ad sanctam Mortem comparisonis unde congruentius documenta sumemus, quàm ex pretiosa Christi Passione? quæ non modò fuit copiosum nostræ redemptionis lytrum, sed etiam efficax piè moriendi exemplum. Huc enim rursus revocandum est Apostolorum Antesignani effatum: *Christus passus est pro nobis, vobis relinquens exemplum, ut sequamini vestigia ejus.* (1. Petr. 2. 21.) Quare observabimus deinceps potissima Domini Patientis mysteria, quidve ex iis Agroto seu Morituro discendum sit, ad præclaram imitationem, dispiciemus.



CAPUT I.

*Christus imminente Morte SSæ.
sue Matri valedicit.*

Nihil hac de re sacri Evangelistæ. Vero tamen si-
millimum est, Christum antè quàm Bethaniâ Jero-
solymam ultimùm ingressus esset, bona verba Matri,
quam unice diligebat, non sine mutuo complexu de-
disse: instantis sibi Passionis seriem recensuisse ex
ordine: ad constantiam animavisse mox ubi à mor-
te redivivus resurgeret, omnem se illi Dolorem ac
mæstitiam abstersurum, pollicitum esse. Acerba
utrinq; separatio: quæ tamen ex parte Christi non
minus fortitudoinis, quàm amoris habuit, cum postha-
bitâ Matris amantissimæ dulci consuetudine, læto
alacriq; animo ille ferebatur ad mortem. Jubeat
sane Moribundus suos bene valere; liberos, qui pa-
rens est, & conjugem benedictione impertiat; moni-
tis & doctrinis, quæ in animos altius illabantur, va-
leantq; ad vitam rectè instituendam communiat;
fieri se & plorari immoderanter, vetet: nihil ho-
rum prohibeo; hoc unum moneo, ne, ubi ista præsti-
tut, nimio se domesticorum amore & curis implicari
sinat; sed exemplo Christi amicos & cognatos om-
nes sibiq; carissimos generoso animo deserat, neq;
ullam perturbationem in animum admittat propterea,
quòd cogatur separari ab eis, quorum contubernio,
fide, societate, amicitia, etiam sanctâ, diutissimè sit
E usus.

usus. Satis tibi, Moribunde, fiat, si unum alterumve habeas fidelem tuo lecto astitem, qui cum negotium æternitatis agas; à quo tum precibus, tum monitis ad feliciter migrandum corroboreris: qui te, non tua curet; tuæ salutis, non possessionis cupidus qualitor. Quod si nihilominus importunis amicorum accessionibus te molestrari videris, alterutrum ægrotantium imitare, si lubet: vel illum de Societate JESU, quem morti vicinum cum è Proceribus regni quispiam ultimùm valedicturus inuissset, Pater ad officium humanitatis Laconice, inò Christianè respondit: *Domum hospes redeat, rem sibi cum solo Crucifixo.* Vel certè illum alterum Spiritu religioso plenum, qui ab amico rogatus, quod obsequium sibi postremum præstari vellet, respondit: *dicat aliqua de Crucifixo.* Utriusq; horum meminit Wencesl. Schwertfer libello pervenusto, quem *JESU Christo Crucifixo*, inscripsit. Mirabilis est sanè in sanctis suis Deus: mirabiles ipsi in Deo sancti, quorum si gratia multiplex, unus tamen atq; idem Spiritus gratiarum Auctor. Quis non veneretur Sanctorum Antonii, Martini, Dominici, Francisci, Mauricii, Petronii, aliorumq; longe plurimorum constantem & sollicitam erga suos caritatem, à quibus non citius hinc ad cœlos avolârunt, quàm paternâ apprecatione, ac saluberrimis ad omnem virtutem cohortationibus impertissent? Sanctum tamen Ignatium; Ducem & Parentem nostrum alia plane viâ incedentem, nunquam potui sine teneriore quodam animi liquefcentis sensu meminisse. Languore corporis

poris ad extrema deductus, non ignorabat sibi mortem jam esse in januis. quare Joannem Polancum sibi a secretis, ad pontificem indulgentiam peccatorum inde sibi relaturum ablegat. moratur hic tantisper, pejus nihil solito habere Ignatium, ut plerique ceteri, arbitratus. patitur ipse se negligi, & mortem opperitur in horas; interea neque Vicarium sufficit, nec socios convocat, nec præceptis ullis monitisve insruit, ita secum reputans: Tibi, Deus, tuæq; curæ meos omnes committo. Tui sunt, quos dedisti mihi. Non mihi sumo, ut tuis diætem monita, quorum aspectu capiebam in virtute profectum. Ita vixit, pauculis, qui forte accurrerant, sociis stipatus, multis coronis cumulatus Ignatius. Cujus morientis humilitasne spectabilior, an in D E U M fiducia fuerit, Lector arbitretur; mihi puritas omnis humani affectus libera, non obiter observanda videtur neque esse tantivis, quos in vita unice dileximus, destinata voluntate magis, quàm necessitate deferere. Itaque ex merito laudat S. Laurentium Regularis Canonicus: *Vicit, inquit, S. Martyr Laurentium seculum cum suo Sacerdote: quia omne, quod in mundo delectabile videbatur, dispexit: & summum Sacerdotem Sixtum, quem maximè diligebat, pro amore Christi, etiam à se tolli clementer ferebat. Amore igitur Creatoris, amorem hominis superavit: & pro humano solatio, divinum beneplacitum magis elegit.* Concludit Theodidactus Thomas: *Ita & tu aliquid necessarium & dilectum amicum pro amore D E I disce relinquere. Nec graviter feras, cum ab amico*
E 2 *dere-*

*derelictus fuerit, sciens quoniam oportet nos omnes tandem ab invicem separari. (Th. Kemp. l. 2 c. 9. n. 2.) Et vero non erit difficile nobis, quod cogit necessitas, ex virtute facere, si Christi exemplum respicere voluerimus, cui quàm violenta acciderit à discipulis separatio, verbo uno indicat Evangelista dicens: *avulsus est ab eis*: (Luc. 22. 41.) Nisi fortè dulcius sit nobis cum hominibus miserris & mortalibus, in hac vita tot ærumnis plena, quàm cum Christo vivere, & Angelorum, Cœlitumque aternâ societate perfrui: nec potius ad beatam illam patriam properare, ubi nos longè major charorum numerus expectat, jam de sua immortalitate securus, & adhuc de nostra salute sollicitus. (S. Cypr. de mortal. fine.)*

Dixerit Moribundus quispiam: Carissimis quibusq; vale dicere, tibi jam esse integrum: at illum, cui tot annos convalesceret cujus in sinu vixisset, fidissimum illum atq; individuum Achatem, Corpus nempe deferere, hoc verò sibi esse acerbissimum. In ò verò, licet in vita illud pro hoste habendum erat, sic in morte pro hoste deferendum est illud pondus animæ, incentivum scelerum, seminarium vitiarum. Quin potius Robertum Car. Bel-larminum imitari ut, qui in extrema ægritudine, pellem ipsæ suam digitis arripiens dicebat: *Quid tu obscura, & ignobilis caro mihi aaheres adhuc? quid animam retines nec ire illam pateris in domum suam? Dividere tandem, ac disrumpere! Vit. l. 7. c. 2.* Nónne cùm tua te Caro stimulet ad vitia, urget ad

ad illicita, tentaret ad impia, ingemisse e solebas: *Infelix ego homo, quis me liberabit de corpore mortis hujus?* (Rom. 7. 24.) Ecce Christus jam te de corpore liberat; nec gaudes? aculeum hebetat; nec plaudis? tentatorem fugat, nec exilarescis? Moriatur, putrescat caro, dum animus ad libertatem evolet, Quod si nostro Corpori, ut amico fas est, bene voluimus, quid melius illi possimus optare, quàm, ut sementis instar in terram projectum ad immortalitatis gloriam efflorescat? Latetur proinde potiùs quàm mœreat, aut turbetur, cum sui dissolutionem corporis adesse videt, æger, & cum illo Lazaro, de quo Magnum Speculum Exemplorum meminit, cadaveris similiore, quàm hominis vivi, etiam, si lubet, latitiam modulando testetur. Res ita se habet. Dynasta cum famulis venatum de more profectus, dum obvias fortè feras persequitur, in nemus delabitur, ibiq. vocem audit hominis suavissimè cantillantis. Hanc ille secutus, leprosum reperit prorsus informem, visiq; horridum, cujus putrescens caro tota defluebat. Quem cum percontatus elset, cujusnam vox illa adeò suavis insonuisset, & ille suam respondisset tuisse, Dynasta demiratus: *Quomodo, inquit, tantis aoloribus affectus canere, ac letari potes?* Cui leprosus: *Mèq, Deúmq, inter, inquit, luteum unus paries, hoc luteum nempe corpus intercedit. Hoc pariete disrupto collapsòq, liber ad Deum mihi aditus patebit. Quamobrem cum solvi, & dilabi meum quotidie corpus intueor, mirificè letor; & præ letitia mihi metipsi gratulor, mèq, cor-*

E 3

poris

poris & solutionem latus præstolor, ut ocyus ad Deum
perennis vitæ fontem valeam pervenire. Ita dixit,
ita cecinit.

Cantator Gygnus functis iste sui.

CAPUT II.

Christus cœnam Paschalem celebrat.

Nullo ad illam vinculo tenebatur, ut qui legem Mo-
saicam abrogaturus venerat, legem gratiæ illi
suffecturus. Celebravit tamen Paschalem illam cœ-
nam, (*Matthæi. 26*) & quidem ea cum diligentia,
ut ne minimum quidem apicem in servandis circa
illam ritibus prætermiserit. Quo exemplo eruditus
Æger, (Religiosos hæc præcipue, Deiq; amantiore
appello) non omittet, quantum quidem per vale-
tudinem licebit, communia ceteris, vel usu privato
fir nata pietatis ac religionis officia; ut sunt, oratio
mentalis & vocalis, examen conscientiæ, Horæ cano-
nica, Litaniæ Omnium Sanctorum, aliâq; similia ho-
rum. Sacerdos, si sacrificare nequeat, sic studebit vi-
vere ut sacra Synaxi quotidie recreari possit. Qui
sacr. fi. io Missæ secundum corpus interesse non po-
test, animo intersit optet non uni tantum, sed omni-
bus, quæ toto sunt orbe, adesse; illâq; SSS. Triadi
offerat quibus sub Missam afflictibus solebat, per
horæ dimidium vacet, neq; sacram Communionem
spiritualem obire intermittat; majorem fortasse hæc
ratione,

ratione, quàm si vere Sacro interesset, gratiam à munificentissimo Deo accepturus. Quis non laudi vercat illi Sacerdoti, qui cùm sacrificare non posset, Missam tamen diei competentem perinde legebat, atq; si illam reverâ celebraret? Ingeniosus est amor: quod viribus nequit, votis apprehendit interdum verò animi magnitudine, constantiaq; munus, viribus ipsis majora aggreditur. Quod perspicuè animadverti licuit in Joanne Nivello, Leodiensi Decano, Viro planè Apostolico, & in animatum lucra ultra valetudinis respectum intento. Acutissimis podagræ doloribus vexabatur, suum tamen solenne semper tenuit in prædicando Dei verbo, excipientisq; peccatorum confessionibus. Cùmq; nobilis quidam Medicus, ejus podagram se curaturum promississet, si quatuor modò menses à solennibus laboribus temperaret Nivellus complosis pedibus, altum, *Ve mihi!* inclamat: *Ergone solium quadrimestre otio exigendum? nec illas interea lucrabor animas, pro quibus liberandis Christus adeò liberaliter suum sanguinem profudit, & quidem propter putidos hosce pedes mox in pulverem solvendo? Equidem meos ipse dolores Deo commendabo.* Sic ille. (*Cantipratanus lib. 2. apum cap. 5.*) Dignissimus sanè, quem omnes Dei, Proximiq; amantes, quantum per morbum liceat, imitentur. Dixi: *quantum per morbum licebit*: Nam si is ità invalescat, ut facultatem adimat ista perageni, tum verò reliquum agrotanti erit, non modò pietatis, sed laborum etiam & ceterarum Virtutum externa exercitia, patientiæ impendiis,

sanctisq; desideriis compensare, dicendo: *Domine tu scis, quia amo te.* Tu scis, quia Vellem propter te docere in scholis, concionari ab exedris, ministrare in nosodochiis; gloriam tuam, proximi salutem amplificare ubiq;: Sed cum, ut vides, vires prohibeant, suscipe pro factis bonam voluntatem. Gratum & ratum habeo, quod tibi pro me ab aliis sanctè serviatur. *Particeps ego sum omnium timentium te. Omnis terra adoret te, & psallat tibi!* (Ps. 118.) ceteraq; hujusmodi. Non abibunt ista sine merito. Clementissimus est & optimus Deus: vota pro factis accipit, & ubi facultatem non reperit, voluntatem coronat. Quod ut certum sit: cautè tamen providendum est, ne infirmitate corporis rerum spiritualium fastidium invalescat. Plura sæpe possumus, quàm posse putemus. neque omnis ægritudo sævit usq; adeò, ut, si pristino labore eximat ægrum, continuo immunem faciat ab omnibus consuetis pietatibus. Salubria legere si per doloris non licet, licebit fortassis audire, & quando vocales preces frequentari non poterunt, poterit crebrioribus aspirationibus mens in cælum levari. Cardinalis Bellarmini hæc mihi commodum venit in mentem. Extremum decumbens dolentissimè ferebat Vir sanctus, seque adeò in hominem aliquem profanum desisse modestè dicebat propterea, quod sibi per Medicos Horas Canonicas persolvere, meditari, orationi vacare non liceret, itaq; Rosarii saltè recitationem ab eis impetravit. Hoc rosarium genere pariter afflictum inolevis animum ager retociller. *Hoc est*

meum rosetum, è quo rosas decerpo: hoc lilietum, unde lilia colligo; dicebat inter amplexus & aspectus Crucifixi P. Carolus Hoffman S. J. quoties doloris vim morbus acuebat. (*Nad. Pres. Occup. c. 9 p 62.*)
 Oratio, spiritualis lectio, examen conscientiae, Communio sacra, ceteraq; , quæ spiritum promovent, Pietatis sunt flores, & fructus honestatis, quibus ager fulcitur, ne passum facturus à tempore ad æternitatem malè corruat; quibus tanquam Excubiis stipatur, ut se contra tartareas legiones muniat. ergo, si languet dolore, amore quoq; DEI rerumq; divinarum langueat, dicatq; cum Philothea: *Fulcite me floribus, stipate me malis, quia amore langueo.* (*Cant. 2. 5.*) Quàm multa (ut hoc unum adhuc exercitii religiosi genus attingam) quàm multa, inquam, habet ager, quæ in Examen conscientiae quotidie vocet! fallor, si non plura, quàm dum valens & incolumis vixit. quo animo à paterna Dei manu morbum acceptet; quàm fortiter ferat, qualem se in medicos, in famulantes sibi, in ceteros domesticos gerat quàm se expeditum ad emigrandum reperiat; hac nisi quotidie diligenter discutiatur, Sacerdos sit, vel Religiosus, facile in profanum hominem desciscet, & siquid virtutis possederat antea, deperdet. Particulari, quod vocamus, Examine, si solam impatientiam expugnare studuerit, nã ille operæ pretium fecerit excellens. Cujus quidem faciendi si non Institutor, instaurator certe S. P. N. Ignatius, adeò tenax observator fuit, ut facit ani nadversus, extremo quoque vitæ suæ die Particularis Examinis notas consignasse quæ

eadem laus tribuitur in Vita Balthasaris Alvarez Joanni Ortunio, fratri nostro, ut ait Lucevicius de Ponte, valdè sancto; eademq; P. Jacobo Granado, & P. Andrea Sednik, qui mortis ipso die comperti sunt repositas de vitio, quod expugnabant, victorias adnotasse. Quid verò hoc aliud erat, quàm imitari inclutum illum Pancratiasten Eleazarum Ahohten, quem sacræ Litteræ perhibent in prælio Davidis adversus Philistinum, *stetisse ipsam, & percussisse Philistheos donec deficeret manus eius, & obrigesceret cum gladio.* (Reg. 23. v. 19.) Sic isti obriguere in mortem, sed non inè gladio: nec citiùs vitia defuerunt occidere, quàm ipsi occiderent: quati illo Davivico carmine torrent irritari: *Persequar inimicos meos, & comprehendam illos, & non convertar, donec deficiant.* (Ps. 17.) Quòd si hoc armorum genus, quo rebelles animi affectiones retundimus, Clypeum vocemus; comperiemus ab hisce Heroibus sanctè observatam illam tesseram: *aut cum hoc, aut in hoc.* quà Lacanæ matres militaturos filios, cùm eis scuta porrigerent, admonebant: ut post strenuam cum hostibus dimicationem vel *cum scuto* domum recirent victores, vel victi *in scuto* deferrentur (ut mos erat) ad tumulum. Neq; miuùs istos usq; ad mortem certantes, quàm fortissimum Ducem Epaminondam admirabimur: qui relatis à prælio plurimis vulneribus jam jam expiraturus, quasiit: *Salvum foret sum clypeus, an ab hoste direptus?* cùm Salvum comperisset. *Jam ergo, inquit, lubet, moriamur.* Et revera omnis Moribundi Oratio (ad quam etiam

etiam illud Examen Particulare refertur) Clypei est instar: hoc Salvo, Salva erunt omnia. ubi deprecatio miseriæ, ibi locus misericordiæ; quod innuere videntur illa Davi tis suspiria: *Benedictus DEUS: qui non amovit orationem meam, & misericordiam suam à me.* (Ps 65. perinde quasi dixerit: tamdiu nobis præstò fore Dei misericordiam, quamdiu ab orandi studio non destiterimus. Nam, ut egregiè. S. Augustinus: *Si videris, inquit, non esse amotam deprecationem tuam, securus es, quia non est amota à te misericordia eius.* (In ps. 65. versum ultim.) Sed de oratione aliàs prolixius: nunc à Cœna legali, ad Lotionem pedum cum Christo transeamus.

CAPUT III.

Discipulorum pedes lavat Christus. Joan. 13.

QVorsum tam stupenda demissio? Ut humilitatis exemplum discipulis pretioso Corporis sanguinisq; sui epulo mox reliciendis sublimissimus Magister relinqueret. *Exemplum, inquit, dedi vobis, ut quemadmodum ego feci, ita & vos faciatis.* (Joan. 13. 15.) Hæc pariter ægroti ad beatam Agni coenam properantis sit cura primaria, penitentiâ, lacrymis, compunctione conscientiam eluere, & quàm potest maximam animæ munditiem procurare. Martinus Stredonius castigatæ Sanctitatis Sacerdos, cùm Sociis præfset, non prius ægroto valetudinarîi ingressum per-

permittebat, quam is, depositis in lavacro pœnitentia navis & maculis etiam levissimis omnibus, purum se, atq; immaculatum reddere studeret. Merito. nam & hic locum habet illud: *Si non laverō te, non habebis partem mecum.* (*ibid.* v.8.) Et illud: *Nihil coinquinatum intrabit in regnum celorum* (*Apoc.* 21. 27.) Hinc neminem ex iis, qui DEO servire nitebantur impensius, facile reperias, quin omnium totius vitæ peccatorum confessionem ante mortem instituerit. Quod cuiq; faciendum *suaderem*, quamvis sensus vigent; ne, deficientibus prorsum viribus, pœnitentia sit sera, & non sit vera. Quid dico, *suaderem*? Cùm ipsa sacramenti pœnitentiæ ratio per se requirat hominem ita sibi compotem, ut & vitæ antea delicta revocare in mentem, & illa totis viribus detestari, & ad eorum fugam serium animum applicare possit. Ut extremum ritu catholico ungaris, ægrote, satis est te genuinum Ecclesiæ filium, vixisse. præsumitur velle, qui non recusavit. potest extrema unctio tibi etiam à sensibus alieno conferri; pœnitentiæ sacramentum, nisi prudenti, non potest. cujus utendi facultatem si tibi amentia interceperit, eris protectò mortalium omnium insipientissimus, ut, qui relipiscere, cùm sapiebas adhuc, præfractè nolebas. Sed nos ista non scribimus pœnitentiæ procrastinatoribus; ad *Promontorium mala spes* à Paulo Zehentnero patheticè conscriptum tales amandamus; siquis tamen esset (ut amat contingere interdum Viris alioqui, prò dolor! intelligentibus) qui dum sanus erat, ad infirmitatem; dum infirmatur, ad extremum

tremunt et iulum mortis dulci poenitentiam, videat, per DEUM, quid agat, ad imminenti periculi atrocitatem oculos aperiat, &, si Judæ Proditoris exitium perhorrescit, desinat imitari duritiem cordis. *Cor durum habebit malè in novissimo!* (Eccl. 3. 27.) Ut obstinatum meditato scelere pectus pessimi discipuli emolliret optimus Magister, surgit à cœna, vestimenta ponit, linteo se cingit, mittit aquam in pelvim, in genua procidit, pedes perduelli abluit calentibus non tam aquis, quàm lacrymis: hoc idem feriat tuis extremæ obsequium si tibi ille ipse Dominus præstare pararet, indurate Peccator, Judæmne potius nihil admodum Christi facto commotum, quàm Petrum insolescentiâ abjectionis turbatum sequi statueres? Atqui non aquæ balneo, nec lacrymis tantum, sed lavaacro proprii sanguinis te abluere paratus est piissimus JESUS, totiesq; id facit, quoties in sacramento poenientiæ Peccatores emaculat; & necdum emollefcis? ut vivas tu, emoritur ille, atq; pulsimi Pellicani instar, manus, pedesq; trabalibus clavis, pectus lanceâ fodicare finit, ut tu depluo inde sanguine potus, lotus, & fatus revivifcas; & tamen mortem saluti præponis? Durius certe adamante pectus, quod hujus Agni sanguine non liquefcet. I Pedes animæ sunt affectus. *Non movetur anima pedibus, sed affectibus*, ait Augustinus. (Tract. 48 in Joan.) hos à te Christus postulat, & negas? abluere desiderat, & retrahis? Ah! si scires donum DEI, (Joan. 4. 10.) & quis est, qui hos à te petit, tu fortitan exclamares cum Petro: Domine non tantum pedes

des meos, sed & manus & caput. (Joan 13. v. 9.) Ablue, Domine, non tantum pedes à pravis affectibus, sed & caput ab impuris cogitationibus, & manus à scelestis actibus. *Si scires donum DEI*, quantumq; sit hoc illius beneficium, quod te ut plurimos alios, è vivis subito non susceperit, sed spatium ad poenitendum dederit; gratus esces haud dubie beneficio, nec tuo decises sempiterno lucro! *Si cognosceres tempus visitationis tue! (Luc. 19.)* tunc enim te visitat, cum paternè castigat; tum invitat ad poenitentiam, cum ad poenam vocat: uterè utiq; tempore ad gratiam, non abuterè te DEI patientià ad vindictam. *Si cognovisses in hac die tua!* tanquam tuam bene collocares, quod minus timendam haberes diem illam Domini, diem calamitatis & miserie, diem magnam & amaram valde. Si cognovisses, quae ad pacem tibi cum DEO habendam faciant, quares quantocius cum eo reconciliationem, ne damnationem incurras! Nunc autem quia non vis intelligere, ut agas poenitentiam, quia neque visitationem agnoscis, neque tempus aestimas, neque die tanquam tuam uteris, neque pacem cum DEO procuras; ecce dies veniet in te, (Luc. 19. v. 43.) & tuam citius opinione veniet in te, quàm alioqui futura erat pro te, & circumdabunt te inimici tui daemones, circumdabunt te, & reptent animam tuam à te; & peccata tua coangustabunt te undique: & prosterneamur in terram grandes tuae designationes, & spes evanescent omnes: quia nolisti cognoscere tempus visitationis tuae. Quae tibi ne veniant, contumax Peccator, age, cognosce

see temporis opportunitatem, visitationem divinam accepta. *Non tardes converti ad Dominum Deum tuum.* Omnis mora periculosa est stanti ad linem æternitatis. Tempus tuum breve est. sed breve ad vitam, sat longum ad veniam. Non impeditur temporis angustia DEI misericordia. Quid hæres? quid moraris ad eum accedere, à quo recedere non timebas? Pater est; *si tu amisisti, quæ sunt filii; ille, quod Patris est, non amisit.* Non vult te perire, qui ne perires, hoc morbo percussit. non tibi parat mortem æternam, qui temporariæ nuncium præmisit. Adolescentem accepimus per continuatos flagitiorum profectus eo denique impietatis progreßum, ut DEO demum ipsi exitium moliri sit ausus. Die quodam, insaniâ post hominum memoriam inaudita actus, in campum procurrit, gladium vaginâ producit, Deum ad duellum provocat: quisquis ille foret, adesset, paratum se illi culpam merendam obicere. Si fulmina mille in caput sacrilegum, cælum depluisset, mite erat futurum: mitior æquo terra, si inferos mille referasset: sed multò mitissimum fuit Divinæ Bonitatis consilium. Schediasma de nubibus ad pedes debacchantis devolat nive candidius hac manu inscriptum: *Miserere mei Deus secundum magnam misericordiam tuam.* Quam in vecordi Juvenc mutationem effecerit lectum oblata ultro à Deo veniæ chirographum; quas lacrymas ab eo, quæ lamenta, quas sacrilegii detestationes extorierit; facilius erit cogitatione, quàm calamo consequi: te appello, moribunde, & tamen adhuc pœnitentiæ negligens

gens Peccator. Fatebere, scio, quoties peccasti, toties te DEO bellum intixisse. Certabas tu cum illo peccatis, dum ille tecum certaret beneficiis. Immortalem deposcebas ad mortem, & Herodæ crudelior, perditum ibas DEUM non infantem in stabulo, sed regnantem in cælo. Nam, ut ait Bernardus: *In ipsum, (horribile dictu!) desavit authorem, & quantum in ipsa est, ipsum DEUM perimit voluntas propria. Omnino enim vellet, Deum peccata sua aut vindicare non posse, aut nolle, aut ea nescire. Vult ergo Deum non esse DEUM.* (Serm. 3 de Resur.) Vera sint hæc, ut sunt verissima, ô Peccator, omnia. Si tamen, ut blasphemo illi gladiatori contigit, misericordiam suam, misso cœlitus chirographo tibi caveret Deus clementissimus, nōne continuo cum Prodigio surgeres? nōne ires ad Patrem? nōne in amplexus boni DEI rueres? nōne in lacrymas totus colliquesceres? Certiorem ego tibi, ô bone! divinæ clementiæ cautionem in manus configno, quæ te nec fallere vult quia est Bonitatis æternæ, nec fallere potest, quia sapientiæ infinitæ; utq; de illius certitudine sine novo scelere dubitare non possis, est sacrosancto Divinitatis jurejurando sancita. Vis illam? *Vivo ego, dicit Dominus DEUS: nolo mortem impii, sed ut convertatur impius à via sua, & vivat. Et impietas impii non nocet ei, in quacumq; die conversus fuerit ab impietate sua.* (Ezech. 33. v. 11. & 12.) Jam igitur de venia certus, de misericordia divina securus, quid ages, Moribunde Peccator? Ages utique quamprimum

poeni-

pœnitentiam: quia appropinquavit regnum Dei. Si te peccâsse pœnitet; quòd es propinquior morti, hoc vicinior regno Dei. *Sin autem: movebuntur candelabrum tuum de loco tuo: (Ap. 2. v. 5.)* & pro eo, quòd fulsurus eras instar lucernæ in regno Dei, ardebis ut titio æternum in camino inferni: ac Deniq; (ut ibi desinat, unde cœpit adhortatio) si non laverit te suo sanguine per pœnitentiæ sacramentum Christus, non habebis partem cum Christo, sed à morte prima, *pars tua erit in stagno ardenti igne, & sulphure, quòd est mors secunda.* Sed hæc satis hæcenus. Pharaonibus obduratis ista, qui plagis etiam morbisq; attriti nolunt ad cœlum mittere, vel potiùs cœlitus concessas admittere salutare ejusmodi cogitationes, quibus excitati sacrificent sacrificium Deo Spiritûs contribulati. alii sunt timentium Deum amantiûmque mores: quibus non est satis inferni periculis eximere sese, pœnas purgatorii evadere pro viribus satagunt. Sacram exomologesin crebriùs repetentes, cum Pœnitente Propheta ingeminant: *Amplius lava me, Domine, ab iniquitate mea! amplius! amplius!* nihil illis Conteritionis actibus ulcitatius; nihil in ore frequentius, quàm, sævientibus doloribus, modò cum bono latrone ingemiscere: *digna factis recipio!* modò cum contrito Davide: *Præquam humiliarer, ego deliqui (Ps. 118.)* & iterum: *Bonum mihi, Domine, quia humiliasti me!* modò Psalmos ejusdem à pœnitentia dictos vel legunt, vel audiunt; S. Augustini exemplo, qui eos ante discesum ex hac vita, & legebat cum lacrymis ipse, & dicebat: *Neminem, nisi nullius scelere sibi*
if
conscius

conscius esset, committere debere, ut sine pœnitentia migraret è vita: modò ad thesauros recurrunt Ecclesiæ indulgentias peccatorum hausturi, quas ut plene obtineant, diligentissimè cavent, ne, nisi pronuntiatis Sanctissimis JESU, MARIE & JOSEPHI Nominibus, migrent; utq; non solùm dignos pœnitentix fructus ferant, sed augeant maxime, mortem ipsam & dolores acceptant à benigno numine in peccatorum satisfactionem; petunt imò injungi sibi molestiarum omnium tolerantiam à Confessariis, ut hæc illis ad valorem Sacramenti elevata, *ex opere operato* (sic loquuntur Theologi) impendiò proffit. & quia non ignorant cum vita sensuum omnium facultatem dilabi, vel signa conducunt, quibus in agone ipso peccatis à peccatis absolvi; quæ signa si fortè dare non potuerint, voluntate præsentis futuram anticipant; deniq; nihil omittunt, quo se divino conspectu reddere possint dignissimos, atq; illud canere celestia: *Transivimus per ignem & aquam, per ignem dolorum & aquam lacrymarum, & deduxisti nos, Domine, in refrigerium.* (Psal 65. 12.) Eorum exempla, Moribunde, si secutus fueris, est cur speres præmia. Out mihi, ut tibi perinde quondam gloriari liceat, ac licuit S Petro de Alcantara tertissimo Pœnitentiæ speculo, qui eodem, quo exspiravit momento in cœlum ferri visus est Sanctæ Teretis, dixisseque postea auditus: *O felix pœnitentia, quæ mihi tantam promeruit gloriam!*

CAPUT IV.

Sanctissimum Eucharistiae Sacramentum instituit, Matth. 26.

Marci 14.

UT scilicet nobis illud esset non tantum viventibus
vitæ alimentum, ærumnarum solatium, gaudium
securigo, amoris incentivum, cella voluptatis,
meta desideriorum, necessitatum omnium remedium:
sed etiam ex hac vita abeuntibus in procinctu suffragi-
um, in æstu tentationum umbraculum, in confictu
cum hostibus scutum, in enavigando hujus mundi
pelago vehiculum, in æternitatis itinere securum,
Viaticum; ut ipso Christo duce, quò tendimus, pro-
spere perveniamus, & unde miseri per peccatum ex-
cidimus, felices eodem per gratiam redeamus. De
hoc igitur comiteatu sibi tempestivè provideat, hoc se
scuto præmuniat, æternitati, quàm temporis propin-
quior Homo Moribundus, maximèq; gratiæ loco re-
putet, quòd ad DEUM iturus, DEUM ipsam viæ
ducem ac comitem habere ipsi liceat. Et verò, quæ
major felicitas, quàm non prius hospitium de-
ferrere corpusculi hujus, quàm hospitem Christum in
SS. Sacramento venientem accipere? aut quæ lautio-
res cupediæ, quàm ad cœnam Agni Immaculati pro-
pediem antequam accumbas, jam nunc ad vitæ ve-
speram illius tragemata veluti prælibare? Sit mihi fas,
quod sentio, eloqui. Si neque æterna, quam sperare
debemus,

debemus, extaret beatitudo, neque nobis quidquam à Deo boni provenisset in vita; satis tamen superque nostros omnes totius vitæ labores pro Deo susceptos remuneratum iri, si vel semel in vita SS. Eucharistiam sumere daretur. Tormentis omnibus, quæ cogitare possumus, meretur hic gustulus emi. Neq; de æterna illa tantummodo, sed hac etiam Sacramentali fructificatione Christi merito Martyr Ignatius dixerit: *Ignis, crux, bestia, confractio ossium, membrorum Divisio, & totius corporis contritio, & tota tormenta diaboli in me veniant: tantum ut Christo fruatur!* Ex quo prudens quisq; facile conjecerit, quæ demum Præparatio præmittenda sit sumendo extremum sacrosancto Viatico. nimirum, qualis nunquam antea. in fine velocior motus: & vis flammæ maxima in acumine. aliæ sunt amicorum curæ discedentium ad tempus, aliæ æternum sibi inter sese valedicentium. Si quis illud carmen Publ. Ovidii, *Cum sabbat illius tristissima noctis imago*, modò ne sit saxum, attentiuslegerit, quo Poëta domui, conjugii, liberis, patriæ salve tristissimum flet magis, quam canit; et si sciat illam poenam meritum, nescio, an tenebit lacrymas. quid Ephesios ad ingentem complorationem, ad amplexus, ad oscula Paulo inferenda coëgit? *quod non essent faciem ejus amplius visuri.* (Act, 20 38.) Alii sunt (repeto) affectus amantium, cum invicem divelluntur tempore, alii, cum perennitate. Felicior, scio, nos manet conditio, si visuri simus (uti speramus) Christum in specie per gloriam, quem hic videmus per fidem in ænigmate; unde nobis videndi potius,

Santissimum Eucharistiae Sacramentum instituit. 71

potius, quàm flendi occasio datur: sed ego hic non tam doloris, quàm amoris lacrymas, oscula & amplexus requiro, atq; illud affirmo: quando ultimâ vice Dilectum cordis nostri sumimus, illiq; valedicimus, majori quâdam ac diligentiori curâ reverentiæ, amoris, puritatis, fidei, humilitatis, ceterarûmq; virtutum istud à nobis præstari oportere. Utquid enim sacram synaxin adeuntibus suadere solemus, ut ad eam sic accedere nitantur, tanquam posthac amplius nunquam accessuri? an verò minus valoris ad diligentiam in nobis excitandam habebit res ipsa existens, quàm imaginaria illius apprehensio? Sed hæc in genere. Sumpturo divinum Viaticum Card. Bellarminus, suadet, ut singula pensulatè ruminet, iisq; se ad pietatem extimulet, quæ illâ Ecclesiæ, beneficium Eucharistiæ admirantis Aspiratione continentur: *O Sacrum Convivium, in quo Christus sumitur, recolitur memoria Passionis ejus, mens impletur gratiâ; & futura gloriæ nobis pignus datur!* Pulcherrima, nec minùs fecunda, quæq; semper à Communicaturis instituenta esset, meditationis devotæ materia! Nam, si Sumptio SS. Sacramenti *Convivium* & quidem *sacrum est*; ergo *sancta sanctis* dentur necesse est; naq; fas erit ad illud aut illotis manibus, aut sine veste nuptiali, hoc est, munditiæ animi morûmq; innocentia accedere: si *Convivium* est nobilium ferculorum apparatu magnificum; quæ sunt divinitas, & humanitas, & ex utraq; harum constantis Personæ Christi Dignitas, Sapientia, Bonitas, Potentia, Sanctitas, Pulchritudo, aliæque infinitæ Perfectiones, Merita & dotes;

dotes ; ergo requiretur in convivâ respondens his do-
tibus altissima æstimatione , admiratio , laus , adoratio ,
actio gratiarum. Si hoc in Convivio *Christus sumi-*
tur ; ergo illum qui sumit , perinde debebit converti
in Christum , atq. in hominem alimentum : ergo iis-
dem cogitandi , loquendi , agendi moribus enitere ,
eâdem patientiâ , mansuetudine , modestiâ , humili-
tate , Patris æterni amore esse præditum conveniet.
Si mens impletur gratiâ ; quoniam illius plenitudo ,
respondet fumentis dispositioni , ergo sinus affectuum
omnes dilatandi erunt , ut tantò amplius hauriatur
gratiæ , quantò major erit contentio diligentiz. *Si*
recolitur memoria Passions Christi ; ergo appareat in
Convivantis opere , quod pertractatur in mente , &
pro quo moritur Christus , mortem pro Christo subire
non renuat Christianus , lentam sustineat , si nequit
violentam ; totq. de se offerat Sacrificia , quot paratus
est mactare perversæ voluntatis desideria. *Si futura*
gloria nobis pignus datur ; ergo cedat securitati ti-
mor , spei desperatio , diffidentia fiducia. Salutem
dubitare non potest , qui salvatorem habet. Præva-
let pignus oppignorato valori. qui dedit pignus glo-
riæ , dabit & gloriam : dabit cœlum , qui
cœlo pretiosius dedit Sacra-
mentum.



CAPUT V.

*Argumenti ejusdem Prose-
cutio.*

His, nisi fallor, similibusq; cogitationibus volebat
mentes imbui extremè Communicantium Bellar-
minus Mihi verò hæc eadem documenta, sanctè
sumendi SS. Viaticum, in Elia Propheta per Angelum
pacto, aptissimâ quâdam ratione videntur expressa.
(3. Reg. 19.) Jezabelem furentem fugiebat Vates Ze-
lantissimus, cùm de via lasso, ac sub junipero dor-
mienti Angelus panem & aquam offert, soporem ex-
cutit, dicens: *Surge & comede: grandis enim tibi
restat via: qui cùm surrexisset comedit & bibit, &
ambulavit in fortitudine cibi illius 40. diebus, & 40.
Noctibus usq; ad montem Dei Horeb.* Quid aliud
agimus in vita, quàm arrogantem mundum, sa-
vientem diabolum, lascivam Carnem, triadem nequissi-
mam in una *Jezabele* superba, feroci, impura (hoc
enim nomen *sterquilinum* olet) repræsentatam no-
bisq; insidiantem tum fugâ, tum luctâ evadere nitimur?
& id quidem tamdiu, dum, aliquando tandem in le-
thalem lectulum decidui, non tam quietem & um-
bram (nisi fortè mortis) quàm dolorem capimus:
ubi postquam vix respiravimus à laborum tumultibus,
expirandum est; imò eundem ulteriùs, & decursò
temporis spatio, emetiendum (si tamen emetiri po-
test, quod infinitum est) iter æternitatis. *Grandis*

adhuc nobis restat via. grandis enimverò, non tam locorum tractu, quàm æstimatu termini. uno passu peragitur, sed quàm lubrico! quàm periculoso! ubi cecidisse semel, est jacere semper. grandis! non temporum morâ, sed secuturâ vel æterni boni, vel æterni mali perpetuitate. Grandis via grande viaticum exigit. Et ecce profusam in nos manum divinæ Providentiæ! *Cibum grandium*, Viaticum offert, Angelorum, hoc est, Sacerdotum manibus paratum, quamquam farinæ specie velut cinere inspersum; cujus fortitudine roborati perveniamus ad illam usq; patriam, quæ propter bonorum omnium excessum, voluptatum affluentiam, stabilitatem felicitatis, **DEI** Trinius præsentiam ex merito dicatur *Mons Dei, mons pinguis, mons coagulatus, mons pinguis, mons in quo beneplacitum est DEO* (cum Electis omnibus) habitare in eo. ps. 67. v. 17. Vide nunc, qui hoc Viatico frui decrevistî, qualis esse debeas. *Elias* videlicet *Jezabelem*, seu omnem animi corporisq; impuritatem exosus & fugiens, amore divino Zelôq; ardescens, cujus verba seu oris, seu pectoris, quibus Christum Hospitem extremum alloquere, quasi facula ardeant. *Surgas* item oportet per poenitentiam (de qua proximo superiori capite) excusso pestilenti peccatorum Iethargo: *asurgas* per spem, nihil dubitando te coenaturum cum Christo, cum quo pransus es in exilio. ubi verò spe & fide asurrexeris, per humilitatem in abyssum tui nihili dejicere, cinere & pulvere te viliorum reputans, quando præsertim videris tui causâ **DEUM** usq; ad pulveres Eucharisticos sese demisisse.

Et

Et quia non tantum fatigatum de via, sed famelicum, & ut ait Tertullianus, *arido ore properantem in Horreb Prophetam pavit Angelus*, sitim ante omnia, & famem ad hanc mensam adferat Moribundus; qualem vel Magdalena de Pazzis, quæ Sanctæ Synaxis desiderio horas numerabat, tarditatis in currendo accusans: vel Catharina Senensis, quæ tardiusculè cum Sacramento veniente Confessario; *Esurio, Pater* (clamitabat) *cibum anima citò, per Deum! porrige*: vel Philippus Neri, cui summo manè communicare, cupienti cum Cardinalis scrius Eucharistiam adferret, quod quietem agro interturbare nollet: *Atqui ego*, inquit ille, *idcirco totà nocte somnum capere non posui*. Ad primum verò allati SS. Sacramenti conspectum, collectis, ut erat æger, viribus ita exclamavit: *Ecce amorem meum! Ecce amorem meum! solus hic mihi semper erat in amoribus! Amorem mihi meum porrigite!* Nimirum hoc Manna ante diem colligitur: his bonis esurientes implentur: hanc ad aquam veniat, qui sitit: desiderio desideret hoc Pascha manducare, qui cum optato fructu manducare desiderat. Sic & satiabit plenius, & melius sapiet. Saporem verò mirum quantum augebit *juniperi Umbra*, seu illius arboris, *quæ Vitam mortem pertulit, & morte vitam protulit*; quæ licet videatur aspera, & frequenti acumine horrida, salubrem fructum profert; cujus si singula grana, singula, inquam, Passionis mysteria diligenti consideratione commolas, veneni omnis, & quidquid vel tibi nocere, vel timeri à te potest, eris securissimus. Et illud est, quod dicebat

Apostolus: *Quotiescunq; manducabitis Panem hunc, & calicem bibetis, mortem Domini annuntiabitis* (1. Cor. II. 26.) Porro illud præterea in illa refectione Eliæ observandum venit, quod non semel tantum, sed iterum jussus sit Propheta sumpto cibo potuque grandem viam sibi alacriorem reddere. Sic enim sacra pagina: (3. Reg. 19, 7.) *Reversusq; est Angelus Domini secundo, & tetigit eum, dixitq; illi: surge; comede: grandis enim tibi restat via.* Quo facto erudimur, ut grandem æternitatis viam ingreßuri hoc Pane cœlesti sapius refici velimus. Per modum Viatici ille quidem datur, cum mortis periculum imminet: at citra hunc ritum, si, spectatâ temporis, morbi, personæ, opportunitatis ratione, sapius sumatur, hoc melius fiet. In Societate JESU infirmis, præsertim Sacerdotibus, ne quotidianam quidem communionem negandam esse censuit Præp. Gen. Vinc. Carafa. Sacerdos Ecclesiasticus quò minus alternis diebus communicet, si commodè fieri potest, quid prohibet? Sed est deploranda multorum socordia, qui cum infirmitatem in multos menses protrahant, ut vel semel divino epulo vescantur, non jam tangi, sed velli, sed concuti, sed impelli debent. Quid agitis fastidiosi mortales? in medicinas substantiam & opes exauritis, & *Pharmacum immortalitatis* negligitis? Gemitis, doletis, querulamini, dolorum acrimoniam inculcatis, & consolatorem renuitis? Quin illum acceditis, vel potius accedentem admittitis, qui vos solari mœstos, recreare debiles, reparare fractos, jacentes erigere, sanare infirmos, plus dicam,

dicam, mortuos exuscitare potest. Nam, ut ait Ambrosius: *Omnia nobis Christus est, & omnia habemus in Christo.* (*Lib. 3. de Virg.* Si Christus nobis est omnia: ergo & solatium, & quies, & medicina, & salus, & vita, & gratia, & corona. Sic est: illum qui habet, dicere cum Francisco potest: *Deus meus & omnia.*

Jam ergo, Moribunde, accepto Christi sanctissimo Corpore, vide ne cesses, cave desideas, vel torpescas, *ambulandum* cum Elia est *in cibi fortitudine*; procedendum, non de loco ad locum, sed de unius virtutis, ad alterius ardentissimum affectum. Eat totus animus & feratur in DEUM, seq; in illius brachia coniciat. Modò, cum eo, ut Jacob, luctare, & dic: *Non dimittam te, nisi benedixeris mihi* (*Gen. 32. 26.*) Modò illum tene cum Philothea, & protestare: *Inveni quem diligit anima mea: tenui eum, nec dimittam.* Modò cum Simeone cubitis implete, & clama: *Nunc dimittis servum tuum. Domine, secundum verbum tuum in pace.* (*Luc. 2. 29.*) Modò cum Emmautinis ad commanendum coge, & insta: *Mane nobiscum Domine, quoniam advesperascit, & inclinatur jam vitæ dies:* (*Luc. 24. 29.*) Modò cum Francisco Seraphico ut mendicus ditari, ut nudus vestiri, ut reus absolvi, ut filius in hereditatem induci postula. Modò illum cum Augustino hinc paulò post migraturo saluta: *Ave Principium nostræ creationis & reparationis: Ave sacrificium nostræ reconciliationis: ave antidotum nostræ curationis: ave Viaticum nostræ peregrinationis: ave solati-*

solatium nostri laboris: ave refugium nostræ tribulationis: ave premium nostræ expectationis Perge deinde in concitandis aliis affectibus, gratiarum actionis, fidei, spei, charitatis, resignationis, petitionis, nec prius ab exercendis desiste, quàm pervenias à valle lacrymarum ad montem gaudiorum, ubi (quod moribundis optat Ecclesia) *Redemptorem tuum facie ad faciem videas, & præsens semper assistens manifestissimam beatis oculis aspicias veritatem.* (Commend. anim.)

CAPUT VI.

Cœpit JESUS pavere, & tædere, contristari, & mœstus esse. Marci 14. v. 33. Matth. 26. 37.

JAM incipiunt mysteria. Non enim frustra pavet, & contristatur JESUS. Non frustra timet virtus DEI, non frustra tædio afficitur, per quem pusillanimes recteantur: non frustra contristatur, quo absente tristamur, quo præsente lætamur. Pavet tamen JESUS & tædio languet, & contristatur, & mœret; & tum contristatur, cùm mors acerba imminet, cùm Judas appropinquat, lictor flagella parat, miles crucem expedit. Omnia ista innunt aliquid, indicare volunt aliquid. Neque enim sibi timere poterat, qui se morti ultro offerebat, nec sibi mœstus esse, qui gaudii fontem semper domi habebat, quippe cujus anima divino in lumine DEUM semper videbat.

Cui

Cui ergo timet, aut cui contristatur JESUS? Tibi, Moribunde, timet, tibi mœret, tibi contabescit, tibi tristatur JESUS. Timet ille mortem, ut tu timere desinas; pavet, ut cum Ambrosio dicas: *Mori non timeo, quia bonum Dominum habeo.* tristatur ille, ut mœsticiam, quam ipse prævidit, abstergas: tædio languet, ne te præ doloribus vivere tæderet, præ horrore mori; Sciebat ille non posse nisi timeri à te, quod terribilium omnium esset terribilissimum, & idcirco ne tu Libitinæ terrore exanimarere, huic ille se spectro terrendum permittit: *timor*, inquit, *& tremor venerunt super me, & contexerunt me tenebra.* (Ps. 54. 6.) Sciebat ille cum mortis periculo plerumq; & timorem adesse: Sciebat, quod aliquando ad suos scripturus erat Magnus-Orientis Apostolus Franc. Xaverius in illam sententiam: *Qui voluerit animam suam salvam facere, perdet eam, Quæ quidem sententia* (loquitur ille lib. 2. epist. 3.) *cogitanti facilis est, experienti non item.* Ubi enim tempus incidit, cum vita amittenda est, ut eam in Deo invenias, cum mortis periculum intenditur, sic ut facile proficias, si DEO pareas, vitam esse dimittendam; cum verò nescio quomodo sit, ut, quod ante præceptum dilucidum videbatur, incredibili involvatur obscuritate. Nam nè doctissimi quidem viri tam præclara sententia vim consequuntur; sed ut duntaxat, quos singulari beneficio DEUS ipse interior Magister instituit. Et in eundem planè sensum lib. 1. epist. 5. *Ac mihi*, inquit, *credite, Fratres carissimi, etsi hujus sententia verba generatim facilissima sint ad intelligendum:*
tamen

tamen, ubi tempus incidit, cum statuere oportet, ubi pro DEO vitam amittendam esse, & mortis discrimen adeundum: usq; eò eadem sententia, etsi clarissima sit, obscura fieri solet, ut is modò eam intelligat, cui pro sua benignitate declaravit DEUS. Quæ ut de repentino mortis discrimine scripserit Xaverius: tamen etiam de instante, quanquam sæpe cogitata morte non ineptè intelligi possunt. Nam & tunc Pavet animus, horret, grande præagit malum: & quod expetebat antea, jam timet. Hæc ergo cum sciret JESUS, voluit obrui tristitiæ tenebris, ut tu clarè videas, Moribunde, mortem nihil esse mali, nisi fortè malis. Hic Christi timor fecit, ut Hilariones se ad excedendum animosè impellerent: *Egredere anima mea, quid times?* ut accepto mortis brevì venturæ nuncio Aloysii, *Te DEUM laudamus; Berkmanni, Latatus sum in his, quæ dicta sunt mihi, In domum Domini ibimus, Ludovici Erhardi: Benedictus DEUS! hoc est tempus, propter quod in Societatem veni!* exclamarent: Francisci Suarezii ex agone ipso tantisper respirantes dicerent: *Nunquam putabamus, tam dulce esse, & tam suave mori.* Hic Christi mœror fecit, ut inter crudeles mortis satellites, hoc est, Cruciatu dirissimos Martyres riderent, Tiburtii rosas in prunis calcarent, Spinolæ, & Camilli Constantii inter flammæ sanctus! sanctus! sanctus! Marci & Marceliani uno in ligno crucifixi, *Ecce quàm bonum & quàm jucundum habitare fratres in unum, concinerent.* Jam igitur per Christi pavorem devicto mortis aculeo, quid adhuc times, Moribunde?

Infer-

Infernum, inquis, timeo. Bonus timor. timuit & S. Bernardus, unde exclamabat: *O Regio extimescenda, regio fugienda! Totus tremo atque horreo ad memoriam istius regionis, & concussa sunt omnia ossa mea.* Sed sic tamen timeas infernum, ut ne desperes cœlum. Quid times? Timeo, inquis, peccata mea & Judicem justissimum. Salubris planè timor. Nam, ut ait Eusebius Gallicanus, *magna est jam pœna peccati, metum futuri perdidisse judicii.* (Hom. de bono Latron.) Timuit Franc. Piccolomineus S. J. Generalis, qui tamen inculpatæ vitæ innocentiam à cunis ad canos protulerat, & dicebat: *Timeo peccata mea, & Judicem justissimum.* Sed quid præmiserat? *Non dubito quidem de divina misericordia. Absit! hoc non. hoc nunquam in æternum.* Et cum subjiciebat: *Timeo tamen Judicem justissimum.* (Nadasi Pretios. Occup.) Sic igitur timeas justitiam Judicis, ut ames misericordiam Patris. Quod si nihilominus, etiam cū sanus multa de morte cogitasti, mortis timore naturali concuteris, si ariditas & tedium cor & pectus comprimunt, si tibi subtrahitur gustus ille & savoritas rerum diuinarum, quam habebas antea, si te molestiis & anxietatibus impugnari sentis, conjice mentis oculos in Christum ex apprehensione teterimæ mortis sanguineo sudore diffluentem, inspice. Cor mœstitiâ & timore marcidum, vide animam usq; ad mortem contristatam: inde solatia pete, illius mœroribus tuos absterge, timores frange. habes exemplum, sequere documentum; atq; certus esto, his quoq; terroribus patienter toleratis pœnas purgatorias magnâ

magnâ tibi parte imminutum iri. Interim tamen observa simul, quâ se ratione mœstissimus Dominus in eo statu tam luctuoso gerat. Quid enim agit? Evangelistas audi.

CAPUT VII.

Positis genibus, procidens in faciem suam super terram, orabat. Luc.

22. v. 42. Matth. 26. 39. Marc.

14. 35.

Nimirum, quod per Apostolum svasurus erat verbo, præoccupavit exemplo. *Tristatur aliquis vestrum? oret. (Jac. 5. 13.)* Non igitur sese in querelas effudit, non cumulavit lamenta, non à discipulis solatiola mendicavit: sed ad Patrem divinum, Patrem misericordiarum, & Deum totius consolationis recurrit. Oratio illi erat adversus timorem fortitudo, mœtorem solatium, pavorem robur. Ac nè dolorum acerbitate ab orando deterritum putes, *factus in agonia prolixius orabat.* Quàm id præclarum ægris quibuscunque & Moribundis exemplum! quod, si secuti fuerint, inveniant in mediis tristitiæ amatoribus, limpidos solatiorum fontes, poterintque *sugere mel de petra, oleumq; de saxo durissimo.* Quod si oratio *Sol est anima*, Joanni Chrysostomo, nebulas mœstitiæ dilucit, si Ascetis omnibus spiritualis panoplia sive armamentarium, omnes dæmonis intrusus elidit. Hinc prævidens Christus ante Passionem

graves

grates discipulis tentationes imminere, ad orandum stimulat: *Vigilate & orate, ut non intretis in tentationem* (Luc. 22.) Sed non satis illi fuit adinonere; fecit. Nam ut est apud S. Lucam: *Cum pervenisset ad locum, dixit illis, Orate, ne intretis in tentationem; & ipse avulsus est ab eis . . . & positis genibus orabat: Pater, si vis transfer calicem istum à me.* Itaq; quod monuit, exemplo sancivit. Orat ergo *Miserere cordia*, (libet hic cum Casario Arelatensi demirari Serm. 29) *& non oret miseria?* Orat *charitas*, *& non humilietur iniquitas?* prostratus in terra orat *Medicus*, *& non inclinetur Agrotus?* orat *innocentia*, *& non oret nequitia?* Orat, qui peccatum non fecit, *& non oret multis peccatis obnoxius?* orat *Judex*, *& desiderat parcere;* *& non oret reus, ut indulgentiam mereatur accipere?* orat *judicaturus*, *& orare dissimulet judicandus?* Non dissimulavit sanè & prudenter Ezechias Rex, sed cum egrotasset usq; ad mortem, *& introisset ad eum Isaias Propheta; dixissetq; ei: Dispone domui tue, quia morieris tu, & non vives; convertit Ezechias faciem suam ad parietem, & oravit ad Dominum, & fleuit fletu magno, (Isa. 39.)* Cujus fletus & orationis ea fuit vis, ut ejus vitæ Dominus 15. annos adjecerit postea, scq; illum & civitatem illius de hostili manu eruturum adpromiserit. Hujus te Principis, Agrote, si exemplum & lacrymæ ad orandum non movent: at moveat Regis Regum & Dominatoris Dominantium JESU Christi multò ardentior pietas, qui non tam ex dolore suo, quàm tui amore usq; ad mortem languidus, eamque pro nobis

jam diu expectatam brevī subiturus, procidit ad terram, vultūque suo ad illam conversus, ubertim profundè non solum ex oculis lacrymas, sed ex toto corpore sanguineas guttas, Patrēmq; Æternum non tam pro sua, quàm tua salute humillimè juxta atq; ardentissimè deprecatur: ut tu quoq; discas & precibus lacrymas, & lacrymis preces cumulare, quibus non ita vitam proroges temporaneam, quàm lucreris æternam, deque manu dæmonum tibi insidiantium singulari DEI præsidio eruāre. Et revera quo pacto, sub hoc tempus tam bellicosum, Duci malorum omnium diabolo resisti sine orationis armatura possit, equidem non video: Omnes ille machinas nocendi tunc adhibet, cū de vita hominis actum esse vider, estq; hoc ferocior, quò homo infirmior. Nunc sagittas vibrat vanæ gloriæ veneno clām illitas, nunc excutit lanceam desperationis, nunc blasphemix pugionem intentat, nunc gladium stringit incredulitatis, nunc alia tentationum tela promit; si galea, si clypeus, si lorica orationis desit, quomodo tot ictus in unus animæ perniciem facti elidentur? *Vigilate & orate, ne intretis in tentationem, Moribundi Homines! & aurei sermonis Præfuli Chrysologo credite: In tentationem vadit, qui in orationem non vadit. (Serm. 43.)* Ne vos inermes, hoc est, ab orationis armatura destitutos reperiat, qui contra vos in decretorium certamen veniens, descendit ad vos (ut S. Joannes ait) *habens iram magnam, sciens, quod modicum tempus habeat ad nocendum (Ap. 12. 12.)* quando ille exaggerat iras, vos orandi studium augete. Christus in

in agonia factus, prolixius orabat. quod *agonia* Græcis, hoc *certamen* Latinis. Certamen inflat & orandum prolixius, si non tractu temporis, contentione ardoris. Si orare non potestis ipsi, ut alii pro vobis orent, orate. Agonizantes vel agoni propiores, quin pro vobis, vel vobiscum oret, admittite neminem. Sine armis precum cum Inimico confingere, est illi herbam porrigere. Nam cum pro toto vitæ tempore, tum pro illius fine maximè valet illa Pauli Apostoli adhortatio: (Eph. c. 6. v. 10.) *De cetero fratres, confortamini in Domino & in potentia virtutis ejus. Induite vos armaturam DEI, ut possitis stare adversus insidias diaboli: quoniam non est nobis colluctatio adversus carnem & sanguinem: sed adversus principes & potestates, adversus mundi retores tenebrarum harum, contra spiritualia nequitie, in cælestibus. Propterea accipite armaturam DEI: ut possitis resistere in DIE MALO, & in omnibus perfecti stare.* Neque verò dolorum acerbitas Moribundum ab orando excuset: inflammare illum potius ad precandum deberet, non sufflaminare, calcare illi, non frænum subicere. Faber dum Ferrum molliet, ut ignem irriter, frigidâ inpergit: sic morbi vehementia acriorem orationem efficiat. Sancto Parenti Nostro ætate, laboribus, pœnitentiæ asperitate fracto moris erat dicere *Nihil jam valeo, nisi tantum ut orem.* Modestiz vox erat: orabat enim ille, & societatem unâ vigilibus curis gubernabat. Quoties ex Infirmo audias: Omnia mihi dolent: nihil planè valeo: radium est undique: ad nulla n

rem sum aptus. Credo, mi Lazare, & plene assentior. Non est integrum eadem præstare infirmis, quæ sanis. Templâ circuire, canere in choro, concionari, Sacramenta administrare, nosocomia visere, & infinita alia meritorum feracissima, fateor, non potes præstare: sed mentem ad DEUM elevare potes. nihil vales, nisi tantum ut ores. Nec orare, inquis, præ nimis doloribus possum. Eslo. non possis multa, at potes multum: diu non possis, potes breviter & per intervalla: si non ore; corde. Quid brevius illo Davidis jaculo: *Peccavi Domino!* aut illo Iobi: *fit nomen Domini benedictum*: aut illo boni latronis: *Memento mei Domine!* aut illo Ignatii M. *Amor meus Crucifixus est!* aut illo S. Franc. Salesij: *Vivat Iesus!* aut illo Teresæ: *aut pati, aut mori!* aut illo Xaverij: *Amplius! amplius!* aut illis longè plurimorum aspirationibus. *Credo! Spero! Diligo! Orantes nolite multum loqui,* (Matth. 6. 7.) ait Christus. hoc est: *Cum oras, clama, non voce, sed mente;* (Serm. de Quadr.) ut explicat Augustinus. Plus esse debet in oratione affectionis, quàm vocis; plus cogitare quàm loqui oportet. Potest DEUS homini, potest homo DEO multa paucis loqui. Redivivus à morte Christus hoc unum Magdalenæ dixit: *Maria!* & erat vox benignitatis, suavitatis, affabilitatis, humilitatis, adorationis, amoris, gaudii, salutationis, gratulationis. Scilicet non refert, quid dicamus, sed quid Deo dicere velimus. Unâ voce, *DEUS!* omnes affectus, qui fuerunt, sunt, erunt elicies, dum velis. *Paciscere cum DEO, & jam voluisti.*

Quam-

Quamobrem frustra difficultatem orandi causamur sive sani, sive infirmi simus: frustra ab orando nescio quibus ineptiis & nugis impedimur, quas ut nobis de manibus, quemadmodum pueris in scholis praeceptores solent, excuteret sapientissimus Siracides, monet: *Non impediaris orare semper, & ne verearis usq; ad mortem iustificari.* (Eccli. 18. 22.) Quod eleganter expressit S. Nilus apud S. Maximum Martyrem & Philosophum, dicens: *quemadmodum respirare nunquam est intempestivum, sic neq; postulare à DEO postulationes mysticas usq; ad extremum spiritum.* Sicut ergo nihil connaturalius respiratione, sic nobis oratione nihil esse deceret facilius. *Os meum aperui, can- tabat Psalter Regius, & attraxi spiritum.* (Ps. 118.) attrahes & tu, Moribunde, spiritum refrigerii contra desolationes, Spiritum fortitudinis adversus tentationes, si os aperueris in oratione. Sic respirare, & aspirare nunquam est intempestivum. Sic, S. Nilo auctore, respirare oportet usq; ad extremum Spiritum. Intellexit hujus vim consilii, ut innumeros alios prae- teream, Ludovicus Granatensis, Vir scriptorum glo- riâ toti mundo cognitus, qui ad extrema vergens, orabat omnes, ut cubiculo, qui aderant, egrederen- tur: cupere sese cum Deo solo colloqui: quibus vix egressis continuo suspiriis & gemitibus Deum sibi pro- pitium reddere studebat. (Vit. c. 14.) De S. Martino Turonis Episcopo quis nesciat? Hic oculis ac manibus in caelum semper intentus, invictum ab oratione spiri- tum non relaxabat. Cumq; in ipso febris a stu supi- num orantem viderent discipuli, suppliciter ab eo pe- tierunt,

tierunt, ut converso corpore, tantisper dum remitteret morbi vis, pronus conquiesceret: *finite me*, dicebat Martinus, *cælum potius, quàm terram aspicere, ut suo jam itinere iturus ad Dominum spiritus dirigatur.* Felices, qui cum S. Martino invidtum ab oratione spiritum non relaxant. qui orationem vitæ suæ imponunt coronidem, coronabuntur in misericordia & miserationibus. Nam qui dicere cum Psalmista potest: *Benedictus DEus, qui non amovit orationem meam à me*, poterit idem cum eodem dicere: (Ps. 68.) *Benedictus DEus, qui non amovit misericordiam suam à me!*

CAPUT VIII.

*Pater, non mea voluntas, sed
tua fiat. Luc. 22. v 42.*

HÆc erat Christi inter mœrores, tædia, tristitias, sudorem sanguineum, agoniam constituti oratio. Qui tamen præmisit: *Pater mi, si possibile est, transeat à me calix iste*; quâ se voce hominem mortis & cerbæ horrore percussum probavit: tamen illicò subjecit: *verum tamen non sicut ego volo, sed sicut tu*; suamque voluntatem divinæ perfectè subjecit. Hæc eadem oratio Moribundis usque omnibus est adeò necessaria, ut, sic cetera deessent, sive à virtutibus, sive à sacramentis, sive ab ope humana, sive à cælo expectita bene moriendi præsidia; consignatio una nostræ voluntatis in Deum, supplere omnia & possit, & debeat.

Præcla-

Ita clara sunt hanc in rem Blossij Documenta. Eo libro, quem *Farraginem utilium precum* inscripserat, hanc animi heroici resolutionem his verbis commendat: *Homo resignate voluntatis, qui in quibuslibet tentationibus, angustis, & doloribus suis novit amanter fidere DEO, securusq; se, & omnia sua paternae providentiae illius committere; is plane cor Dei vulnerat & ipsum Dominum cogit sibi adesse. Quam autem sit proficua in extremis constituto homini, ejusmodi in Deum fiducia, idem ita declarat: (consulat. Pusillan. pag. 328.) Nullum, inquit, exercitium in extremis utilius esse potest, quam ut quis seipsum ex integro divinae voluntati resignet: humiliter, amorose, plenèq; confidens in immensa DEI misericordia ac bonitate. Fieri enim nequit, quin is, qui in hujusmodi vera perfectèq; resignatione cum sancta erga DEUM fiducia ex hac luce exit, confestim ad regna caelestia evolet. Nam sicut nihil omnino poena, nihil ignis purgatorii in DEUM cadere potest: ita nec in hominem, qui eo modo per voluntatis conformitatem amorèq; DEO unitus est. Hoc animo justus ille Lathro moriebatur in cruce, qui non salutem corporis à Domino postulavit, nec oravit, ut à poena purgatorii servaretur; sed libenter pro peccatis suis, proq; DEI gloriam moriens, se totum in divinam resignavit voluntatem, se totum Christo obtulit, ut ille secum ageret, quidquid vellet. Quòd si morte imminente infirmitas natura mœret, aut trepidat; hujusmodi etiam mortifica & formido in DEUM per resignationem propicienda, ac certa spes in eum concipienda est. Mors*

*Christi mortem tuam soletur, me præcepit, præcesse-
runt & innumeri electi ejus: non igitur pigeat te se-
qui. Hæc Abbas Laticiensis; conformiter planè il-
tam succincto, quàm nervoso Magni Augustini dicte:
Projice te in eum; non se subtrahet, ut cadas.. In
DEUM se projicit, qui se voluntati illius omnino re-
gendum committit. Talem animam, quæ, ut ait Blo-
sius, confestim hinc ad celestia regna evolat, nihil
dubium quin Angeli ipsi comitantes mirentur & di-
cant: *Quæ est ista, quæ ascendit de deserto, innixa
super dilectum suum.* (Cant. 8. 5) Est enim profe-
ctò non humanâ tantùm, sed & angelicâ admiratio-
ne digna virtus, hæc nihil omittere vel studii, vel la-
boris, vel industriæ, quod ad bonæ mortis felicem exi-
tum conducere videatur; inde verò ita se DEI volun-
tati arbitriòq; tradere, ut is cum suo plasmate, quid-
quid velit, faciat; perindèq; se gerere, quasi in solius
DEI manibus omn's salus & tota felicitas Moribundi
consisteret, prout re verà consistit. hoc nimirum est S.
Petro Apostolorum Capiti auscultare: *Humiliamini
sub potenti manu Dei omnem sollicitudinem ve-
stram projicientes in eum: quoniam ipsi curâ est de
vobis.* (1. Petri 5.) Ad hujus verò tam præclaræ vir-
tutis perfectionem, ut exemplo Christi perveniamus,
observandus erit triplex Modus, quo ille se in Patris
sui voluntatem resignavit. Primum enim ad mori-
endum sese velut generatim obtulit, cum dixit: *Non
mea voluntas, Pater, sed tua fiat.* Quo exemplo
instructus, certò apud se moribundus statuat, ut mo-
riatur, esse voluntatem DEI. *Statutum est hominibus
semel**

semel mori; (Hebr. 9. 27.) & quoniam DEI nutibus omnia vite nostrae momenta decurrunt, nefas sit dubitare, mortem nobis sine ipsius nutu accidere, de quo personant illæ, aternæ Veritatis voces; Breves dies hominis sunt, numerus mensium ejus apud te est: constituisti terminos ejus, qui prateriri non poterunt. (Job. 14.) Et, Ecce mensurabiles posuisti dies ejus. (Ps. 39.) Et, Deus creavit de terra hominem: numerum dierum & tempus dedit illi. (Eccli. 17. 1.) Quò respiciens Prosper Aquitanicus: *Quis nescit, inquit, intra unam conditionem Mortalitatis humane, ab unius horæ infantia usq; ad annosissimam senectutem exitus morientium impari ætatis sine variari, neq; cujusquam animam citius, vel tardius, quàm DEUS voluerit à corpore, quod vivificat, abscedere? Quòd si ne passer quidem de tecto cadit absq; voluntate Patris nostri cœlestis; an de statione vitæ in sepulchri foveam sine eadem voluntate cadet is de quo Tertullianus: Homo, est ingeni divini cura? (de Resurrect.)* Cognitæ ergo voluntati DEI nè refragetur quisquam, sed mortem libenter acceptet à divina justitia quidem in peccatorum satisfactionem, à misericordia verò ut medium DEO aternum fruendi. De P. Joanne Isenbranto, S. J. memoriæ proditur, cum à morte septem jam vel octo horas in sarcophago positus jacuisset, distinctè ab illo tertium has voces fuisse pronunciatas: *libenter! libenter! libenter.* quâ illa tanquam antiphonâ solemni omnibus superiorum imperis, dum viveret, respondebat. (Nad. Pres. Occup. 6. 24. n. 3.) Idem ante mortem & dicto & facto res-

spondeat æger, dum à Deo evocatur: libenter morior hâc ætate, hoc loco, hoc tempore. Pudeat pro-
 vectæ ætatis, & prudentiæ homines ad mortis mentio-
 nem morosè indignari, dum interim floridi adole-
 scentes, genere & opulentiâ insignes libenter mori-
 untur. Virtus est, velle libenter, quod Deum velle
 novimus. Hoc urget Cyprianus: *Meminisse debe-
 mus*, inquit, *voluntatem nos non nostram, sed DEI*
facere debere, secundum quod nos Dominus quotidie
iussit orare. quàm praposterum est, quàmq; perver-
sum, ut, cùm Dei voluntatem fieri postulemus, quan-
do evocat nos, & accersit de hoc mundo Deus, non sta-
tim voluntatis ejus imperio pareamus. quid ergo ora-
mus & petimus, ne adveniat regnum calorum, si ca-
pitivitas terrena delectat? Hæc S. Cyprianus lib. de
 mortalit. qui declarans, quantopere Deo displiceat
 mortem non libenti animo accipere, refert quandam
 revelationem sancto Viro, collegæ suo factam. Huic
 in morte nimium sollicito eamq; deprecanti, adsticit
 subinde Juvenis (Angelum existima) honore & maje-
 state venerabilis, qui non sine quadam animi & vocis
 indignatione infremuit, dixitque: *Pati timetis, exire*
non vultis, quid faciam vobis? Procul ab hac repre-
 hensione abfuit illa Christi & imitatrix & amatrix Tere-
 sia, cujus votum unicum & tessera fuit: *aut pati, aut*
mori! quod votum utinam & nos, sive vivimus, sive
 morimur, in lingvis & factis semper haberemus! Il-
 lud deinde alterum in ea Christi Resignatione ob-
 servandum venit: quòd se non simpliciter ad mori-
 endum ille, sed ad illa quoq; omnia, quæ ei mortem
 acerbam

acerbam & infamem effectura essent, paratum obtulerit. Ait enim: *Non quod ego volo, Pater, sed quod tu.* Parabantur morituro fustes, flagra, spinæ, funes, catenæ, alapæ, convitia, contumeliæ, irrisiones, sputa, falsæ accusationes, crux, clavi, nuditas, sitis, nervorum extensio, solutio ossium; potuisset multa horum excipere; nihil detrectavit, ultro amplexus est omnia, certus ad ultimam usque guttam calicem Passionis hibere. *non quod ego volo, Pater, sed quod tu!* Ut videlicet, moribunde, discas, non quod tibi, sed quod DEO placuerit velle pati. Quare valde imperfecta est ista Resignatio, cogitare: Volo quidem mori, quia DEUS vult, sed absque diuturna ægroratione, citra hos, illósve dolores, isto bene, sed non illo morbo. Moriar; sed in ætate decrepita; nollem me præteriret flos temporis. infirmitas hæc mihi tolerabilis non est, aliam quamcunque libenter admitto. qui sic sentit, is dicere verè cum Christo non potest: *Pater, non quod ego volo, sed quod tu.* non est hoc suam voluntati divinæ, sed divinam suæ accommodare velle.


Verùm altius se porro extulit illa Redemptoris Magistr'q; nostri ad mortem Resignatio: quam ut in se ostenderet omni ex parte absolutam sic Patrem oravit: *Non sicut ego volo, sed sicut tu.* (Matth. 26 39.) Non dicebat illi: volo prodi ac vendi, sed non à discipulo tam leviter & callidè: comprehendi volo, sed non ut latro facinorosus tam turbulentè: cædi alapâ, sed non tam inclementer: spinis pungi, sed non tam atrociter: poni, sed non Barabbæ: crucifigi, sed
citra

citra nuditatem: mori denique volo, sed non tam propudiose; nihil horum dixit, ne cogitavit quidem paratissimus ad omnia DEI Filius; verum & mortem ipsam, & illius circumstantias, & mortis modum Patris voluntati remisit: *Non sicut ego volo, sed sicut tu.* Norma bonæ mortis tibi verè erit JESUS Christus Patiens, Moribunde, si lubens acquieveris, quocumque demum mortis & morbi genere (modò DEI gratiâ munitus) ex hac vita decedas, si nullâ tui habitû ratione Deo te totum remiseris, nec peniti habueris, placidè, an violente; domi, an peregre; hyeme, an æstate; calculo an feбри, in amicorum, an liciorum corona moriâre. Sunt morbi, non oculis modò & naribus, sed vel auribus aliorum graves, ad quorum latienam Deo se paratum offerre, non est tantivis meriti. Si eveniat vermibus scatere, viscera dissolvi, cancro exedi, ciborum fœces per os egerere, malum odorem latè diffundere, arceri ab accessu alios, si neque liceat, quæ summè petuntur, Ecclesiæ Sacramentis refici; liquis tamen ad omnia dicat: *Fiat, o Domine, non quod ego volo, sed quod tu: nec sicut ego volo, sed sicut tu;* hunc ego non cum magnis tantis comparo, sed ipsi DEI Filio simillimum judico: iterumque cum Blosio dico: *Fieri non posse, quin is, qui in hujusmodi perfectâ resignatione emigret, redi ad calum crelet.* Id quod locum habet apud eos maxime, qui in transfusione suæ voluntatis in divinam fuerint assidui. qua enim de causâ Christus non satis habuit semel tantum ad Patrem orationem fundere, sed oravit tertio sermonem eundem repetens; nisi ut hanc

hanc voluntatis nostræ cū divina sapissimè reperamus, conformitatem nihil ore, nihil corde versantes frequentius, quàm, *Fiat voluntas tua! Ita Pater! ita Pater, quoniam sic fuit placitum ante te.* Hoc egit S. Martinus, cujus discesum cūm acerbissimè ferrent discipuli, ita precabatur: *Domine, si populo tuo sum necessarius, non recuso laborem. Fiat voluntas tua!* Hoc egit II. Hispaniarum Rex, qui in fatali morbo divinæ voluntati devotissimus, illa Servatoris verba pœnè in finities repetebat: *Pater, non mea, sed tua voluntas fiat,* cūmq; de S. Matthæo Evangelista Christi D. Passio ad apostema ferro secandum prælegeretur, iussit Rex ad illa ipsa Domini verba: *Pater, non mea voluntas, sed tua fiat!* lectorem nonnihil subsistere; ideò videlicet, ut lentiore illorum consideratione animum adversus vulnus roboraret. Hoc egit Pater noster Gosvinius, quando ex diuturnis, acribusq; morbis decumbens, descriptam suâ manu, quam Ludovicus de Ponte in usu habebat, precatiunculam ob oculos positam assiduè ingeminabat: *Fiat, Domine, in me, de me, per me, circa me, & circa mea omnia sanctissima voluntas tua, in omnibus, & per omnia, nunc & in æternum.* Hoc idem egit raræ sanctitatis Frater S. J. Joannes Ximenius, cujus sub mortem rogati, num abire vellet in cœlum? ea responsio fuit: *Nihil volo, nisi quod Domino pridem spondi, ut sanctissima ejus Voluntas perfectè fiat.* (Nad. Pret. Occup c. 7. n. 2) Hoc pariter egit Carolus Casarius item de S. J. adolescens usq; ad mortem, vitæ integer, scelerisq; purus, cujus in supremis unica vox fuit; *volo, volo divinam*
semper

semper in me voluntatem perfectissimè adimpleri. (ibid. n. 1. pag 51.) Addebat: se, ut faceret quod vult Deus, libenter in purgantibus flammis usq; ad supremum iudicij diem, &, si ità lubeat, in aeternum, quàm libentissimè passurum, si Deus ità vellet. id quod iterum affirmate repetiit, facturum se amore DEI, & voluntatis illius adimplendi gratià libentissimè: *seq;* aiebat *probe advertere, quid, quantumq; dixisset.* Hoc egerunt denique, quotquot Christum Regem amare in vita, imitari in morte studuerunt. quemadmodum enim omnia domestica privatorum horologia ad publicum totius urbis horologium: sic voluntates illorum ad exemplum Christi dirigebantur. Eos tu imitari studebis, Moribunde, illamq; veritatem à laudato sapius Abbate Bloisio profectam, altissimè tuæ menti imprimes, ità sentiente: *Si dulcedine internâ repletus, & super te ipsum elevatus, usq; ad tertium cælum evolaveris, ibiq; cum Angelis miscueris colloquia; rem tam grandem non facies, sicut si gravamen & exilium cordis pro Deo tuo affectuose sustinueris, ipsiq; Salvatori, conformatus fueris: qui in extrema tristitia, tedio, pavore & angustia positus:*
dixit Patri: Fiat voluntas tua.

(*Speculum Monachor. divis. 2.*)



CAPUT IX.

Et factus est sudor ejus sicut guttæ sanguinis decurrentis in terram.

Luc. 22.

A Thletarum omnium cum Morte ac Dæmone duellantium & Princeps, & robur, & Agonotheta Christus JESUS, cum imminentibus sibi tot Æmulis quot cruciatibus, ipsaq; adeò Morte prælium initurus, in quo Mors & Vita duello conflixere mirando, in collem olivarum secedit, ibiq; Athletarum more non alio, quàm suometipsum sanguinis olivo inungitur, teste Evangelistâ: *Et factus est sudor ejus sicut gutta sanguinis decurrentis in terram.* Quod istius tam miræ unctionis consilium? Suos ut milites exemplo instituat, antequam extremam cum salutis Hoste luctam aggrediantur, sacro sint oleo, quod vires & animos ad certandum præbeat, delibuti. Qua de causa, ni fallor, Ecclesia Mediolanensis, teste S. Bonaventurâ (*in 4. dist. 23. part. 1. a. 1 q. 4.*) usurpabat hanc formulam: *Ungo te oleo sanctificato in nomine Patris, & Filii, & Spiritus sancti, ut more militis sancti preparatus ad certamen, aereas superare possis potestates.* Usq; adeò benignus, & salutis nostræ sollicitus procurator est Deus! non enim satis illi fuit contra ignea Nequissimi tela nos Orationis clypeo armare, in vitæ naufragio tabulam nobis Pœnitentiæ porrigere, Viatico Eucharistiæ nos ad iter æternitatis munire;

munire; de sacramento præterea extremæ Unctionis providit, ut pugnaturis assecuraret victoriam, vincens assereret palnam. Videat ergo Moribundus, ut tanti mysterii excellentiam agnoscat, ut illud in tempore, ut religiose usurpet. Quidni enim æstimet beneficii magnitudinem, quandoquidem *istud sacramentum est*, ut loquitur Concilium Tridentinum, (*Seß. 14. c. 2. & alibi.*) *totius vite Christianæ consummativum*, quo tanquam firmissimo præsidio munitus æger sanctificantem gratiam peccatorum veniam, sæpe etiam corporis salutem consequitur, morbi incommoda & labores levius fert, & tentationibus demonis calcaneo insidiantis facilius resistit. Ferunt Achillem, etiam tum infantem Lethæomersum flumine, nulli postea vulnere extitisse obnoxium, nisi plantâ pedis, quâ illum mater, dum mergebat, tenuit: hac verò parte corporis sagitta læsum ab Hectore, ex eo vulnere fuisse coactum occumbere. Fabulæ! aphantia! hoc verò longè certissimum, Avernalem Colubrum jam inde à malè gustatis Paradisi deliciis, nihil magis, quàm *hominis calcaneo*, id est, extremæ illius vitæ insidiari, quo tempore inflictum vulnus novit esse incurabile: verùm adversus illas insidias præclarum amuletum est Extrema unctio, quæ cum ipsos quoque in pedes effunditur, reddit hominem à virulento morsu antiqui serpentis indemnem: si præsertim, prout præmonebam in tempore illa usurpetur. Quod quia magis pender à diligentia domesticorum, quàm infirmi doloribus pressi aptitudine, per ego vos, quidquid carissimum in vita habetis, rogo atque obsecro,

Adstites

Adstites agrorum, ut, posthabitâ pro crastinatione
 iis de hoc tam salutari beatæ mortis præsidio providere
 curetis. Crudelis est, & à pectore Christiano ad Gara-
 mantas releganda ista cogitatio: *Contristabimus ami-
 cum, si extrema unctionis commonuerimus.* Quin
 imò, si erroneo timore, perinde ac si cum sacro oleo
 mors in donum ferretur, ager ab eo abhorreere vide-
 bitur, tum enim verò expugnandus est animus tum eo-
 rum exemplis, qui hoc sacramentum maximi fece-
 runt, tum qui neglexerunt. Tum revocandus in men-
 tem *S. Malachias*, qui, teste Bernardo, cum unctio-
 nem mulieris, à domesticis persuasus, longè illam
 abesse à periculo, distulisset, in posterum diem, il-
 lãq; paullò post obisset, incredibili dolore confectus,
 non priùs à lacrymis, singultibus, precibûsq; super
 mortua profulus destitit, quàm mulier spiritum, ac de-
 inceps oleum sacrum antè petiitum recepisset. Judica-
 vit scilicet Vir sanctus, fatigandum esse cœlum vel
 usque ad miracula, ne tanti boni jacturam, se auctore,
 muliercula pateretur. Tum commemoranda Hedwi-
 gis sanctissima Silesiæ Dux, quæ morbi mortisque sibi
 imminenti cœlitus admonita, extremè ungi voluit.
 Mirando potiùs, quàm imitando exemplo; neuti-
 quam tamen improbando: quia illam idem spiritus
 ad hoc faciendum impulit, qui de morte certiore
 fecit. Tum obstinatis auribus inculcandus ille,
 apud Lorinum in c. 5. v. 14. Epistolæ S. Jacobi, sacræ
 unctionis neglector, qui illius mentionem ne in aures
 quidem admittere voluit, præterea dictitans: concla-
 matum esse de vita, cùm de sacro liquore clametur.

Dixit, & vixit. Cùm jam ex more mortuali linteo esset involvendus, & condendus tumulo, resumpto repente spiritu, oculos aperuit, hæc verba locutus: *Quia extrema unctio salutare Sacramentum abhorruì, centum annis Purgatorii ignibus justo DEI judicio torquebor; si autem unctus fuisset; de hac aegritudine donvaluisset: sacra enim unctio non est mortis acceleratio.* Quo dicto se rursus ad mortem composuit. O formidabilem divinæ manûs potentiam, quæ quàm facile nobis in præsentì remedia delictorum pœnas abolendi suggerit, tam acerbè neglectum remediis iisdem utendi, post hanc vitam castigat! Felicior isto, tametsi consilio errore timoris præoccupatus Rupertus Romanorum Rex, qui denique ad percipiendum sacrum ceroma inductus, cùm ea, quæ in administratione illius usurpat Christiana religio, audivisset, gratulans ipsè sibi beneficii magnitudinem ità fatus est: *Revera si hoc Sacramentum scrivissem tam efficax esse ad animæ corporisq, salutem, prout jam mandio, dudum ipsum devotissimè postularem,* Audivit nimirum prudens Imperator ipso in aditu Basilicæ sacerdotem sacramenti Ministrum ità adprecantem: *Introcat Nomine JESU Christe domum hanc sub nostra humilitatis ingresso, æterna felicitas, divina prosperitas, serena lætitia, charitas fructuosa, sanitas sempiterna; & mirâ quædam hilaritate his sibi verbis animum erigi persensit. audivit: effugiat ex hoc loco accessus demonum, adsint Angeli pacis, domumq, hanc deserat omnis maligna discordia; & beatorum spirituum luce, tenebras demonum dissipari letatus*

letatus est. Audivit per sanctam unctionem & piissimam Domini misericordiam sibi indulgeri, quidquid per omnes sensus usquam deliquisset, & perditam sentium innocentiam redintegrari sibi gratulatus est. Audivit: Domine Sancte, Pater omnipotens, eterne Deitatis, ad invocationem tui nominis benignus assiste, ut famulum tuum ab egritudine liberatum, & sanitate donatum dexterâ tuâ erigas, virtute confirmes, potestate tuearis &c. & sacrum illud unguentum, non mortis, antehac rebatur, prodromum, non vitæ naufragium, sed sanitatis reditura votum, sed gratiæ divinæ venam, sed delictorum spem gratiam esse intellexit. Quæ emolumenta cum non ignorarent Viri sapientes, prolationes quasiam non minus pie, quàm provide instituebant incolumes, quibus se ad recipiendum sacrum liquorem reipsâ, cum obeundum esset, compararent. Duos tantum nè diu faciam memorabo. Alter erit pietate dubites, an rerum præclare gestarum illustrior Leopoldus Guilielmus Archidux Austriae, cui solemne erat, quoties vesperi decumberet, piissimâ quâdam assimilatione adumbratam Extremam unctionem asperzione lustralis aquæ usurpare cum hac adprecatione: *Per istam sanctam unctionem & suam piissimam misericordiam indulgeat mihi Deus, quidquid in anima per cordis affectum, & potentias internas commisi; & quidquid in corpore per sensus externos contra rationem & virtutem deliqui.* Alter verò erit P. Wolfgangus Gravenegg, præclarum in Societate alicujus virtutis nomen. Qui quotidie, cubitum conceisurus, vesperinâ totius

diei expiatione, veluti sacro quondam extremæ Unctionis imitamento, usus, in mortuali exspirantium situ tantisper, supinus, crucem fronti, oculis, aribus, aliisque de more illius sacramenti, sensibus impressit, additis accommodatis ad singulos sensus verbis. (*Nadasi Pret. Occup. c. 4. n. 3.*) Verum, ne tantum externorum sensuum expiatione suam circumferberet pietatem, frontem cruce muniens internos sensus expiavit in hæc verba: *Per istam sanctam Crucem, & suam piissimam misericordiam indulgeat mihi Dominus, quidquid memoriâ, intellectu, voluntate, cogitatione deliqui.* Sic isti, sic complures alii æternitatis providi facitabant. quâ pietate illud consecuti sunt, ut morti propiores non modò non ad mentionem, vel illationem sacri Olei pueriliter expavererent, quod nunnulli faciunt, sed illud ipsi & ultro expeterent, & religiosissimè acceptarent. Planè ad mentem Doctoris Angelici consentis: *hoc Sacramentum Actualem devotionem in suscipiente requirere, & &, immediate hominem ad gloriam disponere.* (*Supplement. p. 3. q. 32. a. 4. & q. 29. art. 1.*) Cujus quidem devotionis partes, is, meâ sententiâ, abunde expleverit, qui præmisso ungendi sui ardenti desiderio conscientiam emaculare, poenitiæ amorisq; divini affectibus indulgere, spem salutis in se excitare, Cœlites eodem mysterio quondam sanctè usos invocare, pro accepto gratias, quantas par est, agere, denique divinæ se voluntari in omnem nutum consignare studuerit. Felix, cujus in labiis (præter alia sensuum organa) diffusa fuerit gratia hujus Sacramenti: propterea benedicet eum Deus in æternum.

CAPUT X.

*Apparuit autem illi Angelus de
cælo confortans eum. Luc.*

22. v. 43.

PROPRIUM Angelorum est, cùm in vitæ totius cur-
riculo, tum præsertim in meta ejusdem, seu in
agonia constitutis Clientibus suis opportunè adesse,
folatia impertire, vires adversùs dæmonem pugnatu-
ris addere: animas verò corporibus egressas cælo mu-
nus offerre, divinòque conspectui præsentare. In ho-
ra exitûs nostrî adsunt boni Angeli, ait in Bibliotheca
P. P. Simeon ille admirandus, & copie cælestis ex-
ercitûs; atq; omnes contraria potestates, Principes te-
nebrarum: utriq; ad suas sibi sedes animam conantes
assumere. (Tom. 2. collat. 103.) & paullo inferiùs: In
gaudio, inquit, & exultatione cum Sanctis proficisci-
tur anima, ei Angelis victoriæ hymnos concinentibus
Deo, nec non eam Servatori Christo & gloriæ Dei offe-
rentibus. Magno Simeoni iisdem propè verbis adsti-
pulatur S. Anselmus: Cùm justus in extremis agit,
Angelus Custos cum multitudine Angelorum venit, &
animam Sponsam Christi de carcere corporis tollit, &
cum maximo dulcissima melodia cantu & immenso lu-
mine ac suavissimo odore ad cæleste perducit palati-
um. Cujus quidem extremi, sed longè felicissimi
Moribundis à beatis Spiritibus præstiti obsequii innu-
mera passim libri specimina continent; meum hîc dun-

taxat consilium esto, ut in extrema valetudine sanctos Angelos, ac præcipue vite nostræ Custodem, contin. q; Antesignanum Michaëlem quàm creberrimè, quàm ardentissimè invocemus. Istud certe faciendum innuit ipsa Mater Ecclesia, quando animam Christianam proficisci de hoc mundo jubet in nomine Angelorum & Archangelorum: in nomine Thronorum & Dominationum: in nomine Principatum & Potestatum: in nomine Cherubim & Seraphim, quando rursus Moribundum ita Deo commendat: *Suscipiat eum S. Michael Archangelus Dei, qui militia cœlestis meruit principatum. Veniant illi obviam sancti Angeli Dei, & perducant eum in civitatem caelestem Jerusalem.* quando denique animam ergastulo corporis egressam his votis comitatur; *Subvenite Sancti Dei, occurrite Angeli Domini: Suscipientes animam ejus; offerentes eam in conspectu Altissimi.* Porro signiferum cœlestis hierarchia S. Michaëlem, quem nonnulli particularis judicii innox à morte subeundi censent fore Præsidentem sic invocat eadem Ecclesia: *S. Michiel Archangele, defende nos in prælio, ut non pereamus in tremendo judicio.* Quod est illud prælium? nisi, ut sæpe diximus, extremus ille agon, in quo vita cum morte, corpus cum doloribus, anima cum Dæmonibus acriter luctatur; cujus exitus si felix, coronam; si infelix fuerit, exitium homini creat sempiternum. Et verò nihil est usitatius Angelis, quàm pro Dei causa præliantibus auxiliares suppetias adferre. Unius potentii Angeli, Ezechias de castris Sennacherib centum octoginta quinque milia stupuit interempta. Constantino ad opem ferendam

dam venientes Angelos, sic deferibit Nazarius: Flagrabant nescio qui umbone corusci, & cœlestium armorum lux terribilis ardebat, resonantibus vocibus: *Constantino imus auxilio.* S. Wenceslaum in certamen cum Duce Kurimensi descendente cœdi vetant Angeli, cœq; voce æmulum fulminant: *Ne feri.* Si pro terrenis regnis certantibus fortè nec invocati ultro suam elocant operam; quantò promptiores aderunt æternas bello coronas merentibus, dum summis precibus exorentur illi bellatores spiritus? *Quid substantiis Custodibus timeamus? Fideles sunt, prudentes sunt, potentes sunt; quid, Moribundi, trepidamus?* (S. Bern. in Ps. *Qui habit.*) Scio in morte esse tribulationem magnam, tentationes gravissimas, metus decumanos. Inter hæc, Moribunde quid ages? D. Bernardum audies, auditum sequêris. Sic etenim ille: *Quoties ergo gravissima cernitur urgere tentatio, & tribulatio vehemens imminere, invoca Custodem tuum, ductorem tuum, adiutorem tuum in opportunitatibus, in tribulatione: inclama eum, & dic: Domine, salva nos, perimus.* Salvabit. Rictus seu leonis, seu angvis Tartarei in tuam perniciem hiantes pertimescis? Clama, quod clamavit Tobias ad Angelum: *Domine, invadit me!* (Tob. 6. 3.) Invadentem fugabit. Geminata Angelorum signiferi S. Michaëlis invocatio geminum fulmen fuit, quod diabolum à moriente Religioso fugavit; quid erit centies, quid millies, quid innumeris vicibus repetita? Res ita evenit. (*Recupitus tract. 3. indust. p. 434.*) Aversabatur is toto vultûs abnutu porrectum sibi ab adstantibus Crucifixi signum, & pro sacratissimis JESU MARIEq;

nominibus Diabolum identidem nominavit. Cavete Mortales, qui rarò Angelos, rariùs JESUM vel MARIAM; sapiſſimè Diabolum inter loquendum appellatis, quibus in promptu ſunt illa: *demon huc iſtum tulit. Diabolum intelligis, me Diabolus rapiat;* Cavete, inquam, ne quorum vox Dæmon fuerat in vita, echo ſit in morte, nè tunc pro JESU & MARIA, utriusq; Hoſtem invocetis. quemadmodum flagitioſus ille Miles, qui tria verba, *Miferere mei Deus*, ſatis ſibi fore ad poenitentiam in morte pollicitus, longè alia ſubſtituit, nempe, *Dæmon rapiat omnia.* Verùm non ea mens Religioſi fuit. compertum enim eſt Dæmone nominato ſignificare illum voluiſſe, ſe à dæmone, quò minus JESUM invocaret, aut in crucifixum oſcularetur, fuiſſe impeditum. Ergo quotquot aderant abjecti in genua (ò quantum intereſt inter preces aliorum rori!) ſummo cordis affectu: *S. Michael ora pro eo! S. Michael ora pro eo!* ingeminant; cùm fugato protinus dæmone, vultuq; ſerenato ager respirans, atque in dulci crucifixi amplexu, JESUM & MARIAM compellans, animam cælo dedit. En, quàm ſit efficax Beatarum Mentium adverſus aëreas Potestates invocatio? Quare meritò monet Ambroſius: *Obſecrandi ſunt Angeli pro nobis, qui nobis ad præſidium dati ſunt. (lib. de viduis.)* Aderunt illi, aderunt, & jam inde à mundi incunabulis, cœleſtiq; prælio cum Dracone inito vincere docti, dæmonem nobis ſub horam potiſſimùm obituſ inſciantem rurfus in Tartara præcipitabunt, proſtigabunt.

Obierat Novellariæ Antonius Fauſtinus Societatis
noſtræ

nostræ Coadjutor. (*Nadaſ. Pret. Occur. c. 31. n. 7.*)
Adfuerat ſepulturæ energumena, cujus ore nequam
ſpiritus cum magno ſtridore exclamabat, indigna-
tus homuncionem verrendis templis deſtinatum illuc
perveſſiſſe, unde ipſe in perpetuum fuiſſet deturbatus.
Furentem interrogavit nonnemo: Quiſnam præci-
puè ex Beatorum choro aſtituiſſet, opemq; tuluiſſet ani-
mam exhalaturo Fratri? Beatam Virginem, reſpon-
dit, & Ignatium Societatis Authorem: Ang. in
præterea Cuſtodem ità poſtremis illis temporib; ad-
ſtiſſe, ut non ſit paſſus eum ulla in re à quoquam ex
tentatoribus ſpiritus agitari. Simile proſectò præ-
ſidii genus, Ægrote, & certiùs polliceri tibi, & au-
dentiùs expectare poteris in vitæ conſiniſ; ſi quam-
diu valebas, SS Angelos, ac præſertim cuſtodem pe-
culiari cultu proſequi nitebâre. De quo cultu quia in
Norma vitæ egi copioſiùs, hoc breviter repeto, duo-
bus illum documentis in ſacra pagina poſitis univer-
ſim contineri: *Obſerva eum, & audi vocem illius.*
(*Exodi 23.*) *Obſerva*: da quotidie obſervantiæ ho-
noriq; illius aliquod pietatis obſequium, ſtatas ad il-
lum preces, ut eſt Angelicum officiolum, quot diebus
funde. *Obſerva*: reverere. *in quovis diverſorio, in
quovis angulo Angelo tuo reverentiam habe. Tunc
audeas illo præſente, quod vidente me, non auderes?*
(*S. Bern. Qui habitat.*) *Obſerva*: attende, quibus
virtutibus Angeli eniteant: quàm ſint humiles, ſine
perſonarum, quibus miniſtrant, diſcrimine; quàm
puri ſine ulla labe; quàm audientes dicto, ſine cun-
ctatione; quàm Deo videndo intenti, ſine evagatione.

hæc observa, & pro virili imitare. *Et audi vocem ejus.* Angeli consiliis acquiesce, instinctibus obsecunda; quod jubet, exequere; quod prohibet, cave; à vitio tibi familiari abstine. Id verò est vocem Angeli audire. Audivit adolescens egregius Falco, & obedientiæ fructum tulit longè optatissimum. Legem sibi adamante scripserat, vel objecto mortis discrimine non mentiri. Commisso duello commilitonem ætate sibi generèq; parem interimit; solâ tenuiq; admodum facti suspicione ad judicium vocatus. Unâ negatione dilui crimen poterat, sed voluit hæc se tueri Falco. Memor fidei, quam Angelo dederat, factum confitetur. Gladio addictus ictum carnificis expectabat, cùm adfuit Angelus, & stricto inucone minax Carnificem exterret, & Falconem supplicio eripit. Hoc illi profuit Tutelarem Genium observâsse. Si vel mala Mors, vel nostræ Inimicus salutis feralem ictum intentaverit, prohibebit utrumq; ne noceant, Angelus; si per Gladium ex utraq; parte acutum de ore supremi Judicis, damnationis sententia in reprobos ferenda rectè intelligitur, hoc tu gladio, Moribunde, ne percutiâre, idem certè efficiet Angelus; modò tu illum observes audiâsq; in vita fideliter, in morte inclames constanter. Tum morti infelici ereptum, dæmoni subtrahum, sententiæ capitalis liberum idem ipse Angelus *introducet in locum, quem tibi Redemptor tuus suâ morte emit, suo in cœlum ascensu paravit.* *Vado, inquit, parare vobis locum.* Introducet in locum de quo suprà laudatus Simeon Mandrita, *in locum quietis, in gaudium ineffabile,*

in lumen perpetuum; ubi non est moror, nec gemitus, neq; fletus, neq; anxietas; sed vita immortalis & perennis latitia cum omnibus Sanctis acceptissimis Deo in regno cælorum. (Tom. 2 Bibl. P. P. coll. 103.)

CAPUT XI.

*Tunc discipuli omnes relicto eo
fugerunt. Math 26 v. 56.*

T*unc fugerunt, cum ad mortem Christus raptabatur, tunc, cum adesse maxime debuissent, tunc fugerunt, cum vineulatum enodare, accusatum defendere, damnatum comitari ad supplicium, vulnerato mederi, solari morientem oportuisset. Fugerunt; deseruerunt Parentem filii, milites Ducem, oves Pastorem, servi Dominum, discipuli Magistrum, subditi Regem, Apostoli Christum. Silent jam voces illæ: Tecum paratus sum & in carcerem, & in mortem ire. (Joan. 11.) Fugerunt omnes, etiam Thaboræ gloriæ spectator Jacobus, etiam tam Zelosus Petrus, etiam tam dilectus Ioannes discipulus. Fallor, nisi hic quoq; locum habuerit illud pronuntiatum: Est amicus secundum tempus suum, & non permanebit in die tribulationis. (Eccl. 6.) Et illud: Est amicus socius mensæ, & non permanebit in die necessitatis. (v. 8. & 10.)*

Habes, Moribunde, exemplum, quo tuam orbitatem solari possis, si quando te videris vel negligi
à do-

à domesticis, vel ab amicis deferri, vel destitui ab obsequiis, vel ea negari, quæ tibi deberi jure arbitreris. Neque enim rarum aut insolens est, ut Æger aliquid interdum desideret, nec obtineat; cogaturq; ingemiscere: *Hominem non habeo.* Non habeo hominem, qui solum tot horas decumbentem adeat, qui soletur moestum, qui pusillanimum erigat. Non est, qui in latus alterum submoveat, qui aridis faucibus frigidam porrigat, qui detectum contegat, qui lectulum sternat, qui ad ea quæ sunt naturæ, præstanda Vires accommodet: qui jacenti pium quid præoret aut legat. Non licet aurâ frui, non puriore cœlo, non hortorum gratiâ, non virore camporum. Latantibus aliis ego hîc tabesco, vefcentibus jejuno, sitio potantibus, dormientibus vigilo, exspatiantibus perputresco. intercidit memoria mei: curæ circa me postremæ: negligor, deferorq; penitus! Ain' tu Infirmus? quàm infirma est patientia tua, qui sic quiritaris. Christus, desertus à discipulis, neglectus à cunctis mortalibus ficcine conqueritur? nihil audio. Poterat ille dicere: *Circumspexi, & non erat auxiliator: quæsiui, & non fuit, qui adjuvaret.* (Isai. 63. v. 5.) nihil dixit. poterat queri: *Elongasti à me amicum & proximum, & notos meos à miseria.* (ps. 87. 19.) tacuit. poterat ingemiscere: *Sustinui qui simul contristaretur, & non fuit; & qui consolaretur, & non inveni:* (Psal. 68. 21.) siluit. Prophetis hæc tantum enuncianda reliquit, non impatientis animi indicio, sed extremæ desertionis, quâ subiturus erat, vaticinio. Illum tu, ægrote, si imitatus fueris, si humanâ ope destitu-

destitutus, ad solam divinam refugeris, si querelas & indignantis animi motus compresseris; multam profectò meritorum segetem in cœlo messueris Neq; enim minoris in morbo virtutis est ea patienter perferre, quæ nos *negativè*, ut scholæ loqvuntur, quàm quæ *positivè* affligunt. Posterioris generis sunt omnia, quæ vel mœrorem animo, vel dolorem corpori incutiunt: ad primum genus referuntur, incuria quædam, ut putamus, circa nos Medicorum, infirmariorum, amicorum; vel cùm illa nobis denegantur, quorum nobis egere maximè videmur: vel cum nobis cibi sunt minùs ad salivam; palati fastidio potiùs, quàm vitio esculentorum. Non rarò certè negligentior infirmitatis curatio, ipsâ infirmitate molestior fuit. Exulceratur dolor defectu condolentiæ, & ubi non reperit opem, ad extremum mœrorem ægrotum præcipitat: Fregit nihilominus hunc doloris impetum in vitæ occasu magnum illud Orientis lumen Franc. Xavexius. In Sanciano insula primam quamq; occasionem in Regnum Sinarum penetrandi opperientem febris intempestiva aggreditur & sternit. Nullus ibi tum erat, qui vel sacramentis, sacrisq; officiis, vel medicinis, fomentisq; langventem relevaret. Inciditur periclitanti vena, sed tam imperitâ & infelici manu, quæ mortem accerseret, non arceret. Cubile jacentis de ramalibus, quod frigidis ventis undique pateret: lectulus terra modico stramine investita. Hic præter æstus febriles alius calor urebat Xaverium, ardor vehemens per exquisita supplicia pro Christo moriendi; qui cùm sibi sperati martyrii palmam velut infringi in manibus cerneret,
hoc

hoc habuit reliquum, ut mactatæ voluntatis victimam DEO in holocaustum offerret. Interim magnis passibus ibatur ad mortem, quam nulla amicorum solatia, nulla obsequia famulantium, nulla comprecantium corona circumdaret. Ille in paternam Numinis providentiam summâ mentis totius tranquillitate projectus, modò illud sibi familiare ingeminat: *O sanctissima Trinitas!* modò Crucifixum lacrymis aspergens: *JESU Fili David, miserere mei!* modò ad DEIpam: *Mater DEI, memento mei.* Moriens denique, & Christum cruci affixum oculis osculisque prosequens: *JESU*, inquit, *DEUS cordis me!* mox *JESUM & MARIAM* primùm integris, ac postea intermortuis vocibus compellans mense septimo post expletum Indicis laboribus ærumnisque decennium, feriâ 6. alterâ post meridiem horâ, magnam animam à corpore multa gloriosè perpeso cælo coronandam transmisit. Erit tamen aliquis, qui murmure aut queruletur, se ab omnibus neglectum hinc excedere, quando sic morientem in Insula sterili, in lacero mapali, absque omni hominum obsequio videt Franciscum Xaverium? Moriamur sane, quocunque nos modò mori vult bonus DEUS, dum ut emoriamur in vitam. Desertos ab hominibus, DEUS non deseret. Tunc verò erit opus, ut, exemplo Xaverii, ad DEUM corde purissimo per doloris, amoris, pietatis, desideriorum pro DEO moriendi ejusque voluntati obediendi actus, per Virginis Matris preces, perque oscula & obtutus Crucifixi flagranter aspiremus; aspiciamusque ac imitemur exemplum, quod nobis Christus à disci-

à discipulis, amicis, patronis desertus, & Christi imitator Xaverius moriens, ab omni humanâ ope destitutus reliquit.

CAPUT XII.

Christus flagellatur, spinis coronatur, cruci affigitur. Joan. 19.

v. 1. 2. Luc. 23. v. 33.

Magna Patientiæ exempla fuisse Tobias, Job, Lidvina, Clemens Ancyranus, alijq; sancti, Martyres præsertim, sed maximum in sua Passione Christus. Ipse tolerantia magister, illi discipuli: sol ille, hi solares radii: illi guttam, ipse dolorum calicem potavit. Acerrimè flagris cadebatur: & tamen, auctore Laurentio Justiniano, *Tanquam Gigas imperterritus stetit.* Spinæ usque ad cerebrum capitis pertingebant; inauditum tormenti genus tam fortiter tulit, ut dicat Tertullianus: *Patientiam hujusmodi nemo hominum perpetraret.* (Tertull. l. de pat. c. 3.) manus & pedes clavis trajiciebantur, non murmur resonat, non querimonia: sed corde impavido mens bene conscia conservat patientiam. Quid hæc alaparum grandinem, quid crinium & barbæ vulliones, quid impactiones pugnorum, quid violentas ad terram afflictiones; quid sarcasmos, scommata, illusiones commemorem? Arundine percutiebatur ut canis, humi conterebatur ut vermis, conipuebatur ut

terra

tetra mephitis; quid ille ad omnia? *IESUS autem tacebat.* (*Matth. 26. 63.*) *Veni, inquit, in altitudinem maris, & tempestas demersit me.* (*1^a 68. v. 3.*) Non hoc erat pelago dolorum hauriri: secundum animam mœrore, tædiis, metu, tristitiâ, angoribus confici; corpore autem toto, & singulis membris cruciari? *O vos omnes, inquit, qui per viam mortis omnibus communem de hoc mundo transitis, attendite, & videte, si est dolor vester, sicut dolor meus.* (*Thren. 1. 12.*) Vide, quisquis etiam ad mortem decumbis, vide hunc Virum dolorum, & liquid sustines, quod ille prior pro te non patiat, tum strenuè licet, querulare. Quid enim? Capitis dolores te cruciant? Christo caput ad cerebri pertossionem compungitur. Laboras ex dolore dentium? Christus in domo Caiaphæ ferratâ nebulonis manu percutitur; alias non unâ alapâ verberatur. Te febris exagitat? flagella Christum. Siti exæstuas? majore Christus. Sudore enervaris? Sed non, uti Christus, sanguineo. Vexat manus & pedes arthritidis? Manus & pedes Christi clavis perforantur. Puncturæ latera fodicant? Latus Christi lanceâ transfoditur. vulnus quidem mortuo inflicto, sed à vivente pravisum. Herniâ torqueris? Christo nervi in cruce contrahuntur. Lectus premit? Crux Christum; quid horum mollius? Sed medicamenta dissipant? quomodo non fel & acetum Christo? Molesti sunt clamores invisentium? molestiores blasphemiarum Christo obtrectantium. Somnus te deserit? qualis, putas, fuit nox suprema Christo? Dolent membra omnia? à planta pedis usq; ad verticem

vicem capitis non erat in Christo sanitus. (Isai. 1. v. 6.)
Morbi deniq; Medicis ipsis non satis cogniti excruciant? Plura Christus pertulit, quàm vel sciamus nos, vel scripserint Evangelistæ, quàm Prophetæ prædixerint. Fecerunt in eo carnifices, milites, lictores, quæcunq; voluerunt. Ignorantur etiamnum ista, & in futurum revelanda servantur. Quod tu, ægrote, pateris gutta est ad Oceanum, atomus ad universum. Tu tamen hæc meritò pateris: quia peccâsti in Deum tuum: *ille autem nihil mali gessit.* Quòd si nihilominus dolorum tuorum lenimen desideras, en certissimum omnium Patientiam. Medicamentorum omnium primum & saluberrimum, Patientia. Huc in morbo recurrendum primò, huc ultimò. *Patientia vobis*, inquit Apostolus, *necessaria est. (Hebr. 10. 36.)* *Nobis*, qui tot malorum fluctibus jactamur, qui tot doloribus obnoxii vivimus; *nobis* omnibus mortalibus, sed maximè ægris atque moribundis. *Necessaria est*, & quidem omni loco, omni tempore: sed sub mortem præcipuè, quando mala non sensim adrepunt, sed irruunt simul universa. Et tunc quidem utilis est oratio, pretiosa humilitas, excelsa conformitas cum voluntate DEi, laudabilis obedientia, ceteræ virtutes omnes pulchræ sunt; sed Patientia tam nobis necessaria, quàm aqua piscibus, aër volucribus, cibus & potio animalibus. Velis, nolis, mi æger, patieris. Si libenter Christo; si secus, malo Latroni similis: si libenter, pœnas minuis; si invitus, auges. Ergò potiùs sustine cum Christo, & pro Christo, ut regnes cum Christo. Tu es Patientia
I
mea,

mea, Domine, dicebat Psalter Regius: dic tu quoque idem ad Crucifixum conversus. Inde pati disces, si nescis; ubi lignum illud, in quo fixa erant membra morientis, etiam cathedra fuit Magistri docentis. (Aug. tr. 119. in 70.) Apud hunc Patientiæ tuæ thesaurum depone: potens est servare depositum tuum. nullibi securiora sunt, quàm apud Patientem. Dominum Patientiæ cimelia. Satis idoneus Patientia Sequester Deus, ait Tertullianus: Si injuriam deposueris penes eum, ultor est: Si damnum, restitutor est: si dolorem, medicus est: si mortem, resuscitator est. quantum Patientia licet, ut Deum habeat debitorem! Sic ille. (Lib. 1. de pat. c. 15.) Jam verò est operæ pretium tam caræ Deo virtutis genuinos characteres novisse. Patientia siquidem taciturna est: soli Medico, quia debet, suas calamitates aperit: à murmure, & querelis abstemia, nemini dolorum acerbitatem exaggerat. Meminit videlicet illius aphorismi, quem Vincentius Carafa & servabat ipse, & aliis scribebat: *Quemadmodum*, ajens, *qui divitem aut venam, aut magnam copiam aurorum duplionum Hispanicorum humo infossam deprehendit, rem alios omnino celat, ut solus us potiatur: ita qui insueti Christi favore atq; indicio thesaurum invenit sanctæ istius crucis ac dolorum, occultare illum reliquis debet, ne, si quispiam inventum resciat, bona illius pars possessori adimatur sive remedium ac lenimentorum aggestu, sive plenâ charitatis commiseratione.* (Vital. 2. c. 1. pag. 241.) Patientia humilis & modesta est: à pretiosis medicamentis abhorrens, vilissimâ

vilissima appetit, vitæque magnanima contemptrix, etiam in rerum penuria nimis agi secum indulgentem credit. Patientia *obediens* est: à legibus Medici ne transversum quidem unguem recedit; quàm verumnus ad auram, tam ad nutus superiorum volubilis, ei que quam aliquando S. P. Noster exercuit, simillima. Languentem Medicus neq; atate, neq; arte multum spectabilis cùm adisset, calor egerere ratus, obturari fenestras, excludi aërem, vestes agro centonesq; injici jubet. Ex augmento langvoris animadvertit facilè errorem Ignatius: silet tamen, vehementiâ calor tantum non suffocatus. Extremum vitæ discrimen observantes domestici Machaonem alium accersunt, qui ut vidit ægrum ab æstu fatiscere, citò, citò aperiri fenestras, recentior auram introduci, disjici tegumenta omnia, frigidam ardentem porrigi imperat, itaq; fugientem penè animam reducit. *Generosa indolis* Patientia est: dolores absentes desiderat, venientes ultrò consalutat, majorumque avida pro accumulatis Benefico Numini gratias agit. Solemne est ipsi illud Andreæ Apostoli latum apophthegma: *Salve, o bona crux, diu desiderata, sollicitè amata, sinè intermissione quæsitâ, & tandem cupienti animo preparata.* Nihil magis in ore & corde habet, quàm illud S. Francisci Xaverii: *Amplius!* *amplius!* & illud S. Teresiæ: *aut pati, aut mori!* & illud S. Martyris Bonifacii inter atrocissima tormenta hoc solum exclamantis: *Gratias tibi ago, Domine JESU Christe, Fili Dei!* (14. Maji.) Atque has omnes genuinæ Patientiæ notas in Christo Patiento

perfectissime impressas observari licet. Nam & *injuris* & doloribus *laceßitus*, *silentium*, ut ait Ambrosius, (*Serm.* 17. *in Ps.* 118) *detulit triumphale*: & exinanienti semetipsum, factus est obediens usque ad mortem crucis: & cum ingenti desiderio desiderasset pravam Passioni degustare coenam, mediis deinde cruciatibusmersus plures ac plures sitire sese palam de cruce est professus. Ad hujus Patientiæ eclypon, Moribunde, quò propiùs imitatione accesseris, hoc tua Patientia spectabilior, fructus ipsius amplior, merces & corona in cœlis erit copiolior. Etenim, quod observavit S. Joan. Chrysostomus: *Cum tantam poenam lues, magnam hinc mercedem, multa premia, remunerationes, quas nemo verbis ullis consequi possit, splendidas, ac valdè florentes hujusmodi certaminum coronas expecta. Non enim duntaxat aliquid boni efficere, sed etiam aliquid mali perpeti, magnam mercedem, atq; ampla premia obtinet. Ita Os verè aureum.* (*epist.* 3. *ad Olymp.*)

CAPUT XIII.

Pater, dimitte illis: non enim sciunt, quid faciunt. Luc.

23. v. 34.

JESUS Christus, Rex & Magister noster, quot pendens de cruce protulit eloquia, totidem edidit, quibus ad felicem mortem institueremur, documenta. Quorum primo nos admonet, ut liqua adversus proximos

imos offensio facta est animi nostri, eam omnino ponere, & cum Inimicis in gratiam redire ante obitum studeamus. Quod quidem non modò ad ritè percipienda suprema morientium sacramenta, sed etiam pandendum vitæ beatioris aditum est perneceffarium. Cœlum sibi claudit, quisquis ad hostile virus ejiciendum pectus non aperit. Ita sentit D. Augustinus inquitens: *Dum nos invicem odio habemus, ita muros civitatis Jerusalem contra nos claudimus, ut nullus nobis aditus remaneat, per quem intrare possimus.* (Serm. 168 de temp.) Proto-Martyr Stephanus animam cœlo brevè illaturus; Ecce, inquiebat, cœlos apertos, & JESUM stantem à dextris virtutis DEI (Act. 7. 55.) Rogo, quid illi tam facilè pervios cœlos fecit? Charitas in malevolos. de qua ita Fulgentius: *Per charitatem Dei savientibus Judæis non cessit: per charitatem proximi pro lapidantibus intercessit. Per charitatem arguebat errantes ut corrigerentur: per charitatem pro lapidantibus orabat, ne punirentur.* (Serm. 2. de S. Stephan.) At enim quos sibi cœli aditus amore inimicorum Stephanus aperuit, hos suæ salutis propè apertos odio hostili Sapritius clausit. Infelix Sapritius! Jam gladio cervices objecerat, jam pro Christo daturus erat sanguinem, recepturus palmam: Sed quia contubernali offensam deprecanti noluit ignoscere; fit repente pro Martyre Apostata; fidem negat, qui negavit veniam; discedit à Christo, qui à Christiano dissensit; & lauream martyrij in Nicephorum, cui veniam denegarat, transtulit. (Ribad. Flor. Sanct. 9. Feb.)

Quare avertat DEus, ut in Morituri corde vestigium aliquod erga proximum rancoris residueat; frustra si- quidem cum Simeone in pace hinc dimitti cuperet, qui non cum Christo injurias sibi illatas dimitteret: neque divini vultus aspectum à morte ille sibi auderet promittere, qui oculo charitatis careret; de quo S. Bernardus: *Charitas est Oculus, quo videtur DEUS.* (de div. am. c. 6.) Equidem, ut arbitror, cujusvis Moribundi ad coelestem patriam adspirantis est illud desiderium: *Quis dabit mihi pennas, sicut columba, & volabo, & requiescam.* (Ps. 54. v. 7.) Quæ verò illæ pennæ, quibus hinc ad beatam requiem avola- mus? Respondet S. Bruno Astenfis: *Si habes chari- tatem in Deum, & proximum diligas, duas alas habes, quæ tibi ad volandum sufficere possunt.* (Sene. l. 3. c. 9.) Sed enim salutis nostræ hostis Alastor Tar- tareus, cui, ut ait Bernardus, *nihil desiderabilius, quàm extinctio charitatis, in eam perniciem omni- curâ incumbit, ut Moribundorum præcipuè illas cha- ritatis pennas vel odio quopiam inimicorum infringat, vel visco dissensionis inficiat, nè se hinc anima ad su- pernas regiones liberè attollat.* Id quod illi egregiè ad votum cessit in duobus quibusdam, parum hac appellatione dignis Religiosis, qui alas charitatis inte- gras illasq; servassent, nã illi pro Tartaro coelum petiissent. Tragicum eventum hunc in modum denar- rat P. Joannes Nadasi in Vita & Moribus Prædestina- torum. (Signo 6. c. 5. n. 23. pag. 237.) In Cœnobio quodam Italix duo Religiosi Deo serviebant. quos in- ter aliqua dissensionis scintilla coorta est usque ad

verba

verba injuriosa. Increvit illa usque ad triste, sed clandestinum, incendium, adeò ut jam nec alter alteri lequeretur, aut salutaret. Post duos menses, eorum alter morbo ad extrema deductus, & sacramentis iter ad æternitatem adornantium instructus, accito altero, non sine magnis redintegratæ charitatis significationibus, cum eò in gratiam & amplexum rediit. At fanaticus ille ingenio durior, dum rediret, amaro sarcasmo ad socios dixit: *Timebat sibi scilicet bonus iste; & idcirco à me veniam postulavit.* Scintillam in pyrium pulverem illapsam esse crederes. Nam auditâ illâ voce æger, adeò rursus exarsit, ut diceret: *Ain' tu, quod ex metu veniam à te petierim? & dederim?* Jam dico tibi: quod nec ignoscami tibi nec petam à te ignosce mihi. Dixit, & facultate loquendi amissâ, agonem ingressus, quidquid alii, ut doleteret, ut ignosceret, suggererent, nihil fecit; & ita expiravit infelix. Jam sepultus erat, cum ecce trichinium, ubi omnes vescebantur, ingressus est, capillo surrecto, accensis oculis. Tum universis spectantibus, tartareâ voce dixit: Propter pertinacem iram, à qua non resipui etiam monitus, ardeo in inferno, sempérq; ardebo. Verùm qui fuit socius iræ, non erit à pœna immunis. Et cum, quo cum similitates habebat aggressus; Surge, inquit, à mensa hac Maligne! causa malorum tantorum. Stet enim sententia Filii DEI, qui in suis sententiis errare non potest; & decrevit, ut, quia non volumus pacem in terra, simus in dissensione perpetua in inferno. eumq; arripuit, & vi è mensa extractum ita est amplexus, ut

duo hi, vivus & mortuus, in amplexu mutuo, instar tabidorum canum, alter alterum inqumorderit. Demum in omnium conspectu terra tremendo hiatu dehiscens se aperuit, & utrumq; glutivit, intolerabili foetore relicto per totum triclinium. Tunc interemptus sepulchro jam non egebat: alterius ante hunc mortui cadaver quassatum in sepulchro est, sed reperi- tum non est. Fatalem Dathanis atq; Abironis catastrophen in scena denuo productam vidisses. Nimirum, ut, ex mente veterum Anachoretarum; *Porta calis est injuriarum perpestio*, sic animorum, dissensio Porta est inferorum, quam miseri isti suis sibi simultatibus referarunt, æternum obferendam. Repeto, quod prædixi: *Claudit Patris indulgentiam, qui fratri negat veniam*; (*Aug. Enchir. c. 74.*) quantâq; possum vocis contentione in aures Moribundorum inclamo: *Dimittite, & dimittimini!* atque ita equidem dimittite, ut non tantum ad oculum & simu- latè dimisisse odium videamini, sed, quod Christus monet, *de cordibus vestris* dimisisse ab eo agnoscamini, qui scrutatur renes & corda. A quo Christi monito, quia descendit Civis ille Cordubensis, æternum interit. Cordubæ in Hispania graves inimicitie inter duos præcipuæ nobilitatis viros non exiguâ urbis offensione intercedebant, cum illorum alter in morbum lapsus Sacerdotem è Societate JESU evocat peccata confessorus. Sacerdos publicæ memor offensionis, negat posse se, nisi palam adversario concilietur, poenitentiae Sacramentum impartiri. æger paratum se ait ad omnia. Convenitur adversarius, qui

& ipse se ad ponendas inimicitias promptum exhibet. Ergo convocatis testibus odia ponuntur, amicitia utrinque firmatur, æger absolvitur, SS. Christi corpus recipit, & paulò post vivere desinit. Quis hinc non credidisset, virum felici vitam sine clausisse, & inter Beatos assumptum esse? Verùm cheu! alia sunt judicia DEI: alia hominum. Nocte, quæ proxima fuit ab elato funere, adsunt sub noctis ipsius medium cum facibus adolescentes duo, Collegii fores pulsant, Patrem qui defuncto fuisset à confessionibus evocant, rem esse magni momenti, quam ipsi communicatam velint. Sine mora præstò fuit Pater, & à duobus illis rectà ad templum, ubi viri corpus conditum erat, ducitur, datisque ab altero templi clavis, bono animo esse jubetur, aperire ostium, ad aram principem accedere, & ex tabernaculo pyxidem, in qua SS. Corpus asservabatur, educere, & cum pyxide sequi. Fecit ut jubebatur, pendens animi, quem tandem esset res finem habitura. Illi igitur per omnia facem prælucentes, Patrem ad defuncti Nobilis sepulchrum deducunt, itaque tandem affantur: Est hinc mihi Pater Nobilis istius sepulchrum, qui dudum visus est cum adversario, positis inimiciis, in gratiam redire, sed fecit ille fide omnia, mortale intus odium fovens: hoc statu infelicem animam ex mortali vita, ad æterna supplicia immortalem transmisit: sacra hostia nihil dum læsa, hæret in cadaveris faucibus; eam inde ablatam in theca repones, & altari restitues. Ita fati sepulchrum pede pulsatum momento aperiunt, erecto cadaveri os diducunt, Sacerdos inde Hostiam sacræ,

ut iussus erat, integram educit, & thecæ imponit. Sub hæc deturbatum magnâ vi in fossam cadaver videri desit, cò abreptum, ut est credibile, à dæmonibus, ubi jam anima torquebatur, quò antè SS. Corporis Christi præsentia auferri prohibuerat. Igitur composito iterum sepulchro, cùm Pater recondidisset sacram pyxidem, ad Collegium reducitur, iisdem continuò præeuntibus ad Collegii usque fores, quæ apertæ ut primâ Patrem receperant, duo illi Faciferi ex oculis Patris curiosè quâ redirent observantis subitò evanuerunt. Angelos fuisse est verosimile, qui ex sacrilegis hominis faucibus SS. Hostiam educi jusserunt, ut palàm esset omnibus, qui proximo injurias de corde non remittant, indignos esse Epulo Eucharistico, ne dicam aternâ divinitatis fructione repleri, quam pretiosi Corporis & Sanguinis Christi temporalis perceptio præfigurat.

CAPUT XIV.

*Amen dico tibi: Hodie tecum
eris in Paradiso. Luc. 23. v. 44.*

Qui semper fuerat in vitâ, neq; in morte liberalior esse destitit D. N. JESUS Christus. *se Nascens dedit socium, Convalescens in edulium, se Moriens in pretium, se Regnans dat in premium.* In cruce verò jamjam emoriturus dat Patri spiritum, nobis sanguinem, Joanni Matrem, militibus vestes, Longino fidem,

fidem, Centurioni pœnitentiæ gratiam, latroni Paradisum. nec differt: hodie, inquit, habebis quod spondeo, *hodie mecum eris in Paradiso.* Pulcherrimo sanè Moribundis omnibus, qui bonis fortunæ affluunt, exemplo, ut, cùm testamenta condunt in egenos, in animæ suæ posthuma præsidia, *in pias causas*, ut dicimus, & opera gloriam Dei magnificè promotura profusi sint atq; liberales. Hoc nimirum est divitias secum aliò etiam à morte asportare: hoc facere de mammona amicos, qui te, cùm defeceris, recipiant in æterna tabernacula. Sed de instituendis testamentis, etiam illorum, qui se Dei amore depauperavêre, alius erit commodior agendi locus; nunc de Spe & Fiducia in DEO collocanda, cùm moriendum erit, ex occasione recepti tam facilè in gratiam à Christo latronis, breviter agamus. Duo sunt præcipui scopuli, ad quos Moribundi cymbulam allidere nititur Diabolus: Præsumptio & Pusillanimitas. Ad illam ipse, ut est callidus cujusvis conditionis observator, inducere tentat eos, qui excelluere virtute; ad hanc, qui improbitate: illis exaggerat scelera, ut in desperationem; illis merita, ut in superbiam præcipitet. ad evitandum ergo præsumptionis scopulum accersenda humilitas, ad Pusillanimitatis, Fiducia. ità *medio tutissimè ibimus*; juxta illud Psalmographi: *Misericordiam & judicium cantabo tibi Domine.* (Psal. 100.) Istud, ne præsumam; illam, ne desperem. Et profectò poterisne de salute dubitare, ne desperare dicam, ô Moribunde, si Christi Crucifixi misericordiam in Latronem recogites? Si vitam latrocinii infamein

famem egisses, si cædibus & rapinis manus, si linguam blasphemis & maledictis, si corpus libidine & impudicitis, si animum totum inauditis criminibus contaminavisses; modò vitam sceleratam increpes ac rescindas, modò te nocentem, Christum innocentem fateàre, modò illum Regem, te subditum, illum Dominum, te mancipium verè recognoscas, modò tui oblitus totum te in amorem illius transferas; non est cur etiam *hodie* Paradisum desperes. *Non impeditur temporis angustia DEI misericordia.* Coæquatur omnipotentia DEI Clementia. quàm proum est illi muscam & elephantum creare, tam integrum huic, unum atq; infinita peccata ignoscere. Sera est, inquis, poenitentia mea. Audi Hieronymum: *Nunquam sera est conversio. Latro de cruce transit ad paradisum.* (ep. 7. ad Lai.) Multiplicata sunt super capillos capitis iniquitates meæ. Basilio crede: *Peccata & magnitudine & numero possunt definiri; miserationes autem Dei neq; magnitudine, neq; numero possunt circumscribi.* Gravitate scelerum fatiscit conscientia, Subleuet illam S. Leo Papa inquiens: (ep. 19.) *Misericordie Dei nec mensuras possumus ponere, nec tempora definire, apud quem nullas patitur venia moras vera conversio, dicente spiritu Dei per Prophetam: Cùm conversus ingemueris, tunc saluus eris. & iterum: Quia apud Deum misericordia, & copiosa apud eum redemptio.* At severus est, qui me paullo post iudicaturus est. Verùm qui postea Iudicem aget, modò patrem refert. quid hæres? qui te ad se per mortem vocat, Pater est, tui semper
amantis

amantissimus. An putas ab hoc Patre tunc te desertum iri, cum illius maximè auxilio indigebis? an, cujus paternam pietatem luculentè expertus es in vita, eàdem destituère in morte? Amabat te peccantem, non amabit relipiscentem? Certè non ita sensit M. Joannes Avila, cum scripsit: (*ep. 11.*) *JESUS meus me prius dilexit, quàm ego eum diligerem. Jam igitur cum eum diligam, is me non deseret, non deferet.* Pater ergo, Moribunde, Pater tuus est, JESUS. nil dubita. Etsi tu amiseris quod erat filii, ille quod Patris est non amisit. Quid trepidas? quin potius surgis Spei ope erectus, & citatis amoris affectibus vadis ad Patrem tuum? En in cruce brachia expandit, ut venientem ultro amplectatur; caput inclinat, ut te osculetur. Jam expedit stolam gloriæ, parat annulum æternitatis beatæ, instruit epulum voluptatis divinæ. Eò cum veneris, Beatos omnes ad gratulandum invitabit, dicetq;: Epulemur & exultemus, quia filius hic meus mortuus erat mundo, & revixit cælo. Et titubas adhuc? Unicus certè JESU Crucifixi aspectus, cujus cor ad fiduciam non erigat, is quidem mihi excors esse videtur. Cui enim ille tam uber sanguis omnibus è venis ebullit? cui tenduntur nervi? cui lanceà pectus aperitur, cui pedes perforantur & manus? cui Christus moritur, nisi tibi, Peccator, ut convertaris & vivas? Vide, quàm copiosa sit apud Dominum tua redemptio, & nihil ambige, daturum tibi cælum, qui dedit seipsum. Vadem tibi hujusce fidei statuo Joannem Avilam, magnum Hispaniæ Lumen, ita decernentem; (*ep. 3.*)

Cum

Cum sit res longè magis stupenda videre Deum in cruce, quàm te in cælo: Spera in ejus bonitate. qui jam fecit, quod plus est, faciet etiam quod minus est. Consignet hæc omnia plenum spei optimæ mellisflui Doctoris effatum, quod cuperem Moribundis omnibus esse usitatum: (Serm. 61. in Cant.) Peccavi peccatum grande: turbatur conscientia: sed non perturbabitur, quoniam Vulnerum Domini recordabor. Nempe vulneratus est propter iniquitates nostras. Quid iam ad mortem, quod non Christi morte salvetur? si ergo in mentem venerit tam potens, tamq. efficax medicamentum, nullâ jam possum morbi malignitate terreri. Et idèo liquet errasse illum, qui ait: Major est iniquitas mea, quàm ut veniam merear. Deniq. Prætendat alter meritum, sustinere se jactet pondus dei & astus: mihi adherere Deo bonum est, & ponere in Domino Deo spem meam. (Serm. 9. in Ps. Qui habitat.)

CAPUT XV.

Cum vidisset JESUS Matrem, & Discipulum stantem, dicit Matri suæ: Mulier, ecce filius tuus. deinde dicit Discipulo: Ecce Mater tua.

Joan. 19. 26.

DUm pretiosissimum, quod habebat, monile, carissimam Matrem Christus discipulorum suorum dilectis;

dilectissimo Joanni ultimâ voluntate relinquit, luculentè Moribundos instruit, quàm ritè testamenta condere, quàm piè colere SS. Virginem, quàm religiosè sanctos Coelites extremo morbo invocare debeant, quæ tria hujus Capituli argumenta erunt.

Testamenti institutio rectè se habebit, 1. Si fiat sensibus integris & vigente judicio, nec ad vitæ limites differatur. Aristoteles apud S. Maximum ita censet: (*Ser. 6.*) *Si quis in morbo testamentum scribat, similiter facit, ut qui in tempestate maris instrumenta navis incipiunt preparare.* 2. Dissolvendum ante omnia, si quod est as alienum, expungenda debita, deposita restituenda, cautiones repetendæ: ne querelis aut convitiis superstitum, à morte subjaceas. 3. Testamentum non priùs, quàm peccata confessus conscribere: vel certè conscriptum, compositis cum Deo rationibus, denuò ratum habe; memor, in nocte peccati neminem operari posse ad valorem meriti æterni. *Si non places, non placas*, ait S. Bernardus: nec placere Deo tuæ cleemosynæ possunt, nisi pœnitentiâ priùs eundem placaveris. 4. Executionem testamenti piis & notæ probitatis hominibus committes. Hoc rursus monet Bernardus: *si sapias, tuam committes animam diligentibus animam suam.* Lentos executores deligere, est sibi purgatorias pœnas protelare. 5. Habitâ liberorum, amicorûmque convenienti ratione, tuæ inprimis animæ, atque accelerandæ per eleemosynas pauperum, Missarûmq; suffragia salutis satage, quò verè cum S. Laurentio dicas: *Facultates meas in calum manus pauperum depersaverunt.* Si usquam, in

in hoc maximè negotio usurpandum memoriâ illud: *Miserere animæ tuæ placens Deo.* (Eccli. 30. 24.) & illud: (Matth. 16. 26.) *Quid prodest homini si mundum universum lucretur, animæ verò suæ detrimentum patiatur?* Nulla major Stulticia, quàm se neglecto, aliis cupere prodesse. 6. Immensum interest, Opulentorum præsertim, suas facultates, dum sani sunt, in egenos partiri, vel aliis piis causis applicare potius, quàm suis eas testamento legare post mortem distribuendas. Nam eleemosynæ, quæ à vivis erogantur, majoris meriti sunt, quàm si ad mortem differantur, quando quis nempe dat, quia diutius retinere non potest. Sic S. Lucia Eutychiæ matri dixit: *Non satis Deo charus est, qui illi hoc dat, quod se cum deferre non potest.* (Sur, 13. Dec.) Vis Deo gratus esse? hoc ei da, quo adhuc frui potes. Deinde hæredes, & testamentarii sæpe infideliter aut serò nimium pia legata exequuntur. denique per obscuram noctem gradienti plus confert vel una tax, quæ præfertur, quàm quatuor, quæ sequuntur, ac, si Senecæ fides: (de benef, l. 1. c. 5.) *Taræ velle nolentis est.*

Quod pertinet ad implorandum sub mortem SS. Virginis Matris Patrocinium, hoc idem sibi moribundus quisq; dictum existimet, quod Joannes ad crucem stans à Christo audivit: *Ecce Mater tua.* Quâ voce, quid, oro, dulcius, quid Morienti ad solatium accommodatius esse potest? Felix, qui MARIAM in morte Matrem habet: *in cujus manu, ut S. Bonaventura canit, (Ps. 71.) salus & vita consistunt; lætitia perpetua, & æternitas gloriosa.* Hæc duce, nullus iter æterni-

æternitatis malè iniit, hac protectrice nullus tentationibus Diaboli succubuit, hâc patrocinate nullus in Iudicio Divino condemnatus periit. *Filioli*, dulciter Bernardus, *hæc peccatorum scala, hæc maxima mea post Deum fiducia*. Horrida mors est, nihil dubito, sed præsentè *MARIA* dulcis & optabilis. *Gloriosum & admirabile est Nomen tuum*, canit rursus Bonaventura, (*Ps. 110.*) *qui illud retinent, non expavescunt in puncto mortis*. Ipsa suæ bonitatis testis est, Virgo Clementissima, dum S. Birgittæ se ità revelat : (*Revel. l. 1. c. 29.*) *Quamvis sic sublimiter sedeo, tamen audio amicos meos in terra existentes, mihi quotidie gemitus fundentes & lacrymas*. Ego charissima Domina eorum & Mater, obviabo eis, & occurram eis in morte, ut etiam in ipsa morte consolationem & refrigerium habeant, & collocabo eos mecum in sede cœlestis gaudii, ut in brachio dilectionis perpetua, & æterna gloriæ cum exultatione immensa æternaliter requiescant. Pleni sunt libri, plena exemplorum non modò vetustas, sed & hodierna ætas, quæ *MARIAM* clamant non opitulatricem solùm agonizantium, sed Matrem. Quem, quæso, hæc Domina in ultimo certamine invocata deseruit? cui opem non tulit, cujus ærumnas solatii aspergine non recreavit? *O si nōsses* (aiebat ad astantem Amicum P. Joannes à Campis S. J.) *si nōsses, mi Pater, quantum in morte asferat animo solatium*, *DEI* param singulari studio coluisse! (*Nadaf. Pret. occup. c. 10. n. 24.*) Similis huic vox erat P. Francisci de la Hamaide Dio-

nanti morientis; *Incredibile est, quomodo ista Misericordie Mater suos clientulos juvet in isto transitu. Ego certè sic ab illa me animatum sentio, ut licet corpore deficiam, animo tamen potentior fiam.* (*ibid.*) Maria nimirum sic Morientes adjuvat, ut opem, quam suis præstat in vita, patiatur ceteris quoque Sanctis esse communem, quæ autem in mortis auxiliis exhibet, sibi soli quodammodo ut propria vendicet. Aliàs succurrere, se dignum putat; hinc judicat, debere. Idcirco siquidem illa Filio morienti usque ad extremum interfuit, uti certè sciremus, ad illam propriè pertinere, adesse morientibus. Quod clarè perspexerat Alphonsus Salmeron, dum tom. 3. tract. 5. sic asseveravit: *Ob id, quod nascenti & morienti Christo MARIA adstitit, est digna facta, quæ filiorum Dei generationem, ut Mater piensissima, foveat, atq; morti nostræ in qua DEO per gloriam nascimur, singulariter succurrat.*

Ergo, Moribunde quæ esse toto vitæ tempore studiosè debuerat, extremo vel maximè, tibi cordi sit MARIA. Hæc tibi sit ad cælum scala, hæc maxima post Deum fiducia. Ignatius Azcbedius S. J. ab hæreticis odio fidei orthodoxæ in mare deturbatus, iconem B. V. manu apprehensam nec à morte dimisit. Omnia tibi licet auferat prædatrix Libitina: MARIAM tibi nemo de corde, nemo de pectore rapiat. Illud ad eam Justi Lipsii jam hinc emigrantis iterum iterumq; ingemina: *O Mater DEI adsis famulo tuo cum tota æternitate decertanti, & non me deferas in hac hora, à qua pendet anima mea salus æterna!*

eterna! Et quoniam vitæ tuæ navicula ad portum æternitatis appellit, ut vicinus cœlo, procursis naufragio, MARIAM Maris Stellam assiduè respice, aspectuq; illius propitio cursum tuum dirige, memor identidem cohortationis illius, quam ex Mellifluo Abbate desumptam, pauculis pro ratione statûs, in quo nunc versaris, vel mutatis vel additis, hîc tibi propono: (Hom. 2. super Missus.) O quisquis te intelligis in hujus seculi profuvio, magis quàm unquam antea, inter procellas & tempestates fluctuare; ne avertas oculos à fulgore MARIANI sideris, si non vis obrui procellis. Si (ut plerumq; hoc tempore fieri amat) si insurgant venti tentationum, si incurras scopulos tribulationum, respice Stellam, voca MARIAM. Si tactaris superbia undis; si vanæ gloriæ, si præsumptionis, si diffidentix, si blasphemix, si timoris immodici fluctibus agitaris, respice Stellam, voca MARIAM. Si criminum immanitate turbatus, conscientie fœditate confusus, judicii imminentis horrore perterritus barathro incipias absorberi tristitiæ, desperationis abyfso: cogita MARIAM. In periculo, in angustiis, in rebus dubiis MARIAM cogita, MARIAM invoca. non recedat ab ore, non recedat à corde. Ipsam sequens à cœlo non devias; ipsam rogans, veniam non desperas; ipsam cogitans à via salutis non erras. Ipsâ tenente ad ortum non corruis, ipsâ protegente, dæmonem non metuis; ipsâ duce in vitæ hujus exitu non fatigaris; ipsâ propitiâ ad optatam felicitatem pervenis; & sic in temetipso experiris, quàm merito dæctum sis: & Nomen Virginis MARIA.

Verùm & Joannis in cruce moriens D. JESUS meminit, ut non minùs Sanctos cœli Indigetes, quàm Sanctorum omnium Reginam in morte invocemus. Quo plures sunt hostes, eò plures necesse est esse defensores. Cùm ergo totus infernus in Moribundum conjuret, &, ut ait Simeon ille Mandrita, *in hora exitus nostri adsint Omnes contrarie potestates, Principes tenebrarum*; (Tom. 2. Bibl. PP. coll. 103.) totum contrà cœlum adversus legiones Tartareas erit evocandum. Huc faciunt Litanix Omnium Sanctorum, huc Patronorum illorum memoria, quos in menses sortitò accepimus; huc libellus, qui inscribitur: *Calendarium novum ad bene moriendum perquam utile*; in quo singulis anni diebus sancti aliqujus auxilium pro morte imploratur; huc, cujus Nomine lætamur, Sancti invocatio; huc singularis fiducia in Sanctos Quatuordecim Auxiliatores MM. propterea ità appellatos, quòd concessam sibi peculiarem à Deo prærogativam habeant, singulare in morte auxilium ferendi iis, qui mortem illorum pro Christo gloriosè latam religiosius coluissent. Sunt autem: Sancti Georgius, Blasius, Erasmus, Pantaleon, Vitus, Christophorus, Dionysius, Cyriacus, Achatius, Eustachius, Ægidius; Sanctæ verò Margarita, Catharina, Barbara. quæ postrema quantam vim habeat providendi Clientibus suis de supremis Sacramentis, orbi jam palàm est propè universo. Qui Ecclesiasticâ Dignitate eminent, Sanctos Apostolos sibi demereri deberent: qui verò DEO sub diversis Religionum labaris militavère, fundatores & Patriarchas

Patriarchas ſuos filiali pietate fiduciaq; invocent, ut hi paternam ſolicitudinem gerant eorum in morte, quos vitæ inſtituto morumq; ſimilitudine dignati ſunt habere filios. Deniq; quos Sanctos quiſq; peculiari cultu veneratus eſt vivens, nè deſerat moriens; nec dubitet habiturum ſe felicioris mortis præſidiarios, quos expertus eſt vitæ tutelares. P. Carolus Rolandus ſingulariter S. Mariæ Magdalenæ addiſtus, pridie feſti illius ex voto jejunabat, eo conſilio, ut ejus interceſſione in adu amoris divini moreretur. voto, ut apparebat, potitus: nam inter affectus flagrantiffimæ charitatis in Deum expravit. (*Preſioſ. Occupat. morient. c. 14. n. 18. p. 110.*) Certè inter bonæ mortis Patronos meritò referendus eſt ipſe S. Joannes Evangeliſta, qui unus ex Apoſtoliſ morienti Chriſto aſſeſe promeruit. Juverit proinde illum cum B. Virgine invocare illâ preculâ: *O intemerata, &c.* quam ſibi quotidianam cum nescio quâ cauſâ S. Edmundus intermiſiſſet, adfuit S. Joannes, & caſtigatâ clientis negligentia, penſum reddi juſſit. Jam S. JOSEPHUS Integerrimus Vir. DEIPARÆ Sponſus, quantum nobis illo in articulo opitulari poſſit vel exinde liquet, quòd unus ille in Jeſu MARIÆq; præſentia mortem obierit, ut certò ſtatuereſ, illius nos patrociniò, ſi conſtanter invocaveriſ, ſimili nos poſſe felicitate beari. Quòd ſi, S. Tereſiâ teſte, hujus Sancti proprium eſt *in omni neceſſitate ſuccurrere*; quantò magis erit in ea, de qua Vates alicubi: *Equâ lege Neceſſitas ſortitur inſignes & imos: omne capax movet una Nomen?*

Age Moribunde quidquid est vitæ super, quidquid vocis & virium in hoc acroama, impende: *Vivat JESUS, MARIA, JOSEPH!* Vis nôsse, quid tibi hæ voces in anagramma contextæ promittant, *JESUS, MARIA, JOSEPHUS?* Si peris, *hos ama: Vives.*

CAPUT XVI.

Deus meus, Deus meus, ut quid dereliquisti me? Math. 27. v. 42.

Vox ista, inquit S. Leo, *non querela, sed doctrina est*: erudiens nos, eousq; devenisse Christi dolores, ut noluerit eos etiam internâ DEI assistentiâ mitigare. Scilicet illum voluptatis torrentem qui ex visione beatifica redundabat, per summum miraculum ita repressit Dominus, ut ne unam quidem stillam in sensum admiserit, quâ enormes animi corporisq; cruciatus leniret. *Magnum est, & verè magnum*, ait Thom. Kemp. (l. 2. c. 9.) *quàm humano, tam divino posse carere solatio; & pro honore DEI libenter exitium cordis velle sustinere, & in nullo seipsum querere.* M. Joannem Avilam Virum Apostolici Spiritûs & Sanctitatis cum mortis Vicinum Rector Collegii accessisset, diceretq; non dubitare se quin magna tum solatia, Pater optimus animo perferentisceret: *Immò verò*, respondit ager, *magnas ob mea peccata anxietates.* Ex quo deducit Vitæ Scriptor Ludovicus Granatensis, hanc supremam

premam horam esse necessariò magni momenti, & iudicium illud, quod consequitur, esse debere admodum terribile, cum tantus DEI Servus illius exitum exhorruerit: magnam præterea cordis humilitatem illi Viro fuisse, quæ illum in Sancto timore eousque continuerit. Quid si in eum tu quoq; statum, Moribunde, devenias, ut extremis constrictus angustiis, omni humano solatio destitutus, etiam à DEO tibi desertus esse videaris? Non eo quidem modo (absit!) quo desperabundi se à Deo desereri, & nullam sui curam geri impiè blasphemant: sed si præter ariditates mentis, scrupulos, tristitias, ac tentationes, nullum insuper animum affectumq; sentias ad bene operandum, aut patiendum & resistendum, eò quòd intellectus nullas percipiat illustrationes; nullos voluntas pios motus, proposita, alacritatem, robur ac patientiam: ut sit, quando anima tota velut tetrus nubibus obducta, arida, & exsueca, non nisi summâ vi atq; cum dolore cor ad cælum potest attollere. Rariùs quidem bonus Deus sibi fideliter famulatos sic habet; imò quos in vita his modis exercuit, solatiis in morte singularibus in præmium plerumq; afficit: Si tamen id nostrum cuiquam, DEO ità disponente, contingeret; habemus quem in hac quoque ceteris omnibus maiore calamitate imitemur JESUM Ducem Dominumq; nostrum de infami ligno desolatum planè, nefandos inter dolores clamantem: Deus meus, Deus meus, ut quid dereliquisti me? Quemadmodum ergo ille in extrema illa desolatione constitutus, profundissimè si unquam

aliàs defixam animo suo prioris decreti propositiq;
radicem retinens, totum se rursus in Patris manus
& voluntatem transtulit: similiter & nos facere oportebit. Subscribo hic, quæ in rem præsentem sapienter sancteq; conscripsit Eusebius noster Nierembergius Vitæ divinæ cap. 26. n. 4. Isto, inquit, tam tristi perturbatoq; rerum statu, dare nihilominus operam oportet, ut sine dolore, certè sine querelis simus, & cum divina voluntate conformes, deq; tanta desertione minimè tristemur. Noxia etenim potest esse hæc talis tristitia, si ab amore proprio nascatur, & in maximam pusillanimitatem desperationemq; adducere. Sed neq; viribus industriâq; humanâ à Purgatorio isto spirituali, ubi animam Deus in hac vita attinet, eluctari quis potest & evadere. Illud unum tali in re ac tempore optimum factum est, ut magis se quis magisq; in profundum sui nihili demergat, inque divinas manus penitissimè resignet, & omni se bono indignum fateatur, infinitaq; gratiæ ac benevolentia divinæ adscribat, quod non pro eo ac merebatur, apud inferos ardeat! Ac licet in eo se loco quispiam & conditione constitutum esse deprehendat, ut neq; crare, neq; DEO gratias agere, neq; ullum alium internum actum exercere sibi posse videatur: hac se tamen ille cogitatione unâ soletur, D E I se, non suam implere voluntatem, & posse se semper velle, quod vult Deus. Licet etiam in actibus resignationis positivè & re ipsâ eliciendis parem molestiam difficultatèmq; experiatur: nunquam tamen Deo resistat, sed negativè se habeat, sinendo

nendo DEUM facere, quod ejus Majestati placet ; & coram ipso quàm profundissimè se demittat, prorsusq; annihilat. Examine se item, num quam culpâ suâ aliquâ causam desolationi huic (id quod majore cum periculo conjunctum est) præbuerit ; deq; ea culpa, non autem de pœna, sincerè apud animum suum doleat. Verùm desolationes istæ sæpe numero existunt absq; omni hominis culpa, singulari Providentiæ divinæ dispositione, Sanctorum quorundam fidelitatem probare volentis. Quare caveat diligenter Anima, quotiescunq; asperiores sibi Deum sentire videtur, nec propterea existimet, ejusdem se gratiâ benevolentiaque excidisse : Nam longè aliter res habet. atq; ut concedam ipsi & largiar, etiam excidisse, adhuc non habet, quamobrem honestè conqueratur : quandoquidem benigniùs molliùsq; tractari non meretur, quàm Filium sibi carissimum tractaverit Pater Æternus, quando desertus ab omnibus plañeq; desolatus, inter mortuales ærumnas de cruce pendeat, sèq; à Patre derelictum fuisse palam est professus. Hæc Nierembergii.

CAPUT XVII.

Sitio. Joan. 19. v. 28.

Magna evacuatio sanguinis magnam Christo sitim procreabat : quam tamen qui vel frigida oblatione restingeret, de multis hominum præsentium millibus inventus est nemo. Aceto demum

hysopóq; modico non tam reficitur, quàm vexatur exhaustus & moriens DEUS : ut discat Ægrotus inter ceteras morbi ærumnas sitim quoq; , quæ plerumque infirmis est domestica, patienter ferre, fastidia cibi potúsq; tolerare, non admittere pretiosas, gustui svaves, palatóq; arridentes sorbitiunculas, multò minùs appetere, aut, si desint, murmurare. Quæ quidem doctrina cùm Christianis omnibus deberet esse communis, tum Religiosis hominibus propria, ut qui se Christo Crucifixo peculiari ratione conformare decrêrunt. Nam si secùs fieret, verendum esset utique, ne & ipsi Christo sitienti aceti acrimoniam pro vini svavitate propinare censeantur. Censuit enimverò in suis de Rege Dolorum Meditationibus *Martinus Hincza* Provincialis Poloniæ S. J. (*Medit. 43. p. 3.*) ubi de Christo sitiente agens: *Huc etiam referuntur*, inquit, Religiosi nonnulli minimè profectò religiosi, qui legum suarum negligentes, suæ professionis atq; adeò sui ipsorum immemores, cùm Mater religio in cibo potúq; præbendo necessitati potius, quam voluptati obsequitur, cùm ægrotantium saluti magis quàm appetentiæ prospicit, tametsi majore, quàm sæculares amici soleant, sedulitate omnia præstet, illi tamen pauperis ac sanctæ Parentis piam aspernati charitatem dapes oblatas respuunt, retrudunt, aut in culinam remittunt; sumptuosa verò, opipara, & gulæ arridentia appetunt. Atqui Christus, cujus videlicet imitatores se præferunt, tam longo atq; difficili labore fractus, extremis laboribus penè exhaustus, jamq; moribundus aceto potus est,

ne imitatori verò in mediis laboribus deesset frangendi appetitus exemplum, nè servus illius suos labores difficili admodum pretio aestimaret, sed *quàm humillimè de suis meritis sentiret hic enim sita perfectio est.* Procul ejusmodi moribus, qui hîc meritò arguebantur, abfuit *Gosvinnus Nickel*, S. J. Generalis X. Nam cùm ardentissimâ siti morbi diuturni tempore plerumq; torqueretur, ita ut areret vehementer lingua: tamen oblatam aquam nive refrigeratam ad abluendum os & humectandas fauces gustare noluit, sed Davidis instar libavit eam Domino, dicendo; id merum esse blandimentum sensuum. Aliàs etiam ex præscripto Medici cùm tempore refectionis in summis caloribus apponeretur ei vinum frigidum nive, propter ardorem internum, conversus ad ministrantem: *Quomodo, inquit, hoc ego bibam cùm Communitas hujusmodi potu frigido careat? nec adduci potuit, ut admitteret.* Insistebat nimirum Pater optimus piis Antecessorum suorum vestigiis Francisci Piccolominei, cui recreando, cùm aqua recentior allata fuisset, aliquando totam effundebat, dicebátq;: *Libemus DEO! Hoc enim esset querere delicias in cruce, in qua me posuit Deus.* (Pret. Occ. c. 25. n. 11.) itémq; Vincentii Carafæ, cui in gravi quadam affectione, vitalibus pariter animalibusq; spiritibus destituto, cùm Medici decoctum ex carneo pulli cremore expressum ei fovendo præscripsissent; turbari Vincentius hujus medicationis nuntio, persuadere Medicis affectiones hujusmodi sibi non esse insolitas, utendum minimè primo morbi vestigio

vestigio tam exquisitis remediis, vulgaribus escis citius convaliturum. (*Vita l. 2. c. 1.*) Sed parendum fuit. quamvis deinde, decoctum illud rejiciente stomacho necesse foret illi levando viliores cibos præbere. Eidem aliàs cum violento capitis dolore laboranti cochlear sacchari rosacei porrigeretur, vehementer contristatus est. Fierine liquidem posse, ut ipse unus, ista in domo, his cupediis egeret? talèmne morbum esse suum, ut sine deliciis curari nequiret? *Quid enim aliud faciendum esse, si aut mors in foribus adesset, aut ipse unus aliquis ex Patribus eximis esset, quem vel servare vel amittere Societatis magni interesset?* ita ipse. Usque adeò ab omnibus fomentis Vir sanctus abhorrebat. Sic enim, ut scribit *Vitæ illius Author*, philosophabatur. Si quis fel Christo in cruce pendenti propinatum, immisto melle condire voluisset, haud dubiè svavitatem illius divinam obtudisset; neq; verò qui illam contemplando hauriunt, adeò probarent: ita si dolorum acerba delicatioribus remediis ac escis condire voles, peribit illis sapor ille ac svavitas, quæ sola placet palato animarum, quas cepit verus ac genuinus amor JESU Crucifixi. Vincentii Carafæ & assecutus mentem, & exemplum secutus est *Saneius de Aufa* S. J. religione Novitius, sed veteranus virtute. Cum enim Vallisoleti in longo 80. dierum morbo Siti æstualet, linguâ totâ exultâ & aridâ, licet aquam semper ad manum haberet, quâ os elueret, nunquam tamen bibit; ut obedientiâ suam patientiam redderet pretiosam; sitientem interea in cruce

cruce J E S U M pro patiendi regula contemplatus. Tulit operæ pretium ea Christi sitientis imitatio. Biduo ante mortem pendens in cruce Christus Sancio apparet, qui sibi videbatur vasculum liquoris pretiosi Crucifixo porrigere, ac illi dicere: *Domine mi, sumne ego inter electos tuos?* Affirmante Christo; adjecit æger: *Domine, accipiesne me tecum?* Tum Christus: *Ita fili, accipiam te mecum.* Et biduo post eò abiit, ubi torrente voluptatis suos potat Deus. (*Pret. Occurr. Nadaſi c. 25. n. 12.*)

Verùm enimverò aliud præterea mysterium illa Christi jamjam morituri sitis comprehendit. Docet nempe Ægrotos mortiq; vicinos fontem divinitatis sitire, ad cœlum toto pectore anhelare, beatæ patriæ desiderio extabescere. ad eum ferè modum, quo Propheta Regius rerum humanarum pertæsus, cœlestium cupidus æstuabat, dicens: (*Pſ. 62.*) *Sitivit in te anima mea, quàm multipliciter tibi caro mea.* Et iterum; *Quemadmodum desiderat cervus ad fontes aquarum: ita desiderat anima mea ad te Deus.* *Sitivit anima mea ad Deum fortem vivum; quando veniam & apparebo ante faciem DEI?* (*Pſal. 41. v. 3.*) Et alibi: *Quàm dilecta tabernacula tua Domine virtutum! concupiscit, & deficiit anima mea in atria Domini.* (*Pſal. 83. v. 2.*) Similibus horum desideriis si flagrarent ægroti atq; moribundi, nihil dubium, quin solatium in suis doloribus, in afflictionibus gaudium, jucunditatem in molestiis invenirent. Nam, si tanta est dulcedo future gloriæ, ut sentit *Serm. 8. de transfigur. S. Augustinus,*

nus, quod si una gutta in infernum deflueret, totam damnatorum amaritudinem dulcoraret: quidni vel ipsa tantæ voluptatis memoria cum spe adipiscendæ illius conjuncta possit hujus vitæ ærumnas delinire, morborumq; & mortis aculeos refringere? urebantur Martyres, secabantur, distorquebantur, tormentis exquisitissimis usq; ad tyrannidis defectionem mactabantur: & erat in animo tranquillitas, serenitas in vultu, risus in ore, gaudium in toto corpore. quæ tam limpidæ insolitaq; voluptatis vena? Cogitata impendentis gloriæ dulcedo, quæ illis amarorem omnem in amorem, acerbiter in suaviter convertit. Audiamus D. Augustinum de uno quodam horum Athletarum ita perorantem. *Hoc* (cœleste bravium) *attendens in agone suo gloriosus Christi Athleta, non exhorruit carcerem: ad imitationem capitis sui toleravit probra, sustinuit irrisiones, flagella non timuit: & quot ante mortem pro Christo pertulit supplicia, tot ei de se obtulit sacrificia. Contemplabatur enim, quantum in enigmate infirmitas humana oculum mentis in æternitate figere potest, quanta sint supernæ civitatis gaudia: & ea enarrare non sufficiens, admirando clamabat: Quid mihi est in cœlo? Quasi diceret: Excedit vires meas, excedit facultatem eloquentiæ meæ, transcendit capacitatem intelligentiæ meæ illud decus, illa gloria, illa celsitudo, quæ nobis à conturbatione hominum remotis, in abscondito faciei suæ IESUS Christus Dominus noster, reformabit corpus humilitatis nostræ configuratum corpori claritatis suæ.* Hujus perfectæ liber-
tatis

raris contemplatione nullum vitabat periculum, nullum horrebat supplicium; & si millies posset mori, non putabat se hanc dignè posse aliquâ ratione promereri. Hæc Augustinus. (*Serm. 44. de Sanctis.*) Et tamen quàm rari sunt, qui torrentem illum divinæ voluptatis ardentè sitiant, quique cogitationes suas ac desideria in cælum attollant. Quid mirum? Scitum Philosophorum est: Nihil posse contrariis motibus tempore eodem moveri, ac repugnare, ut lapis sursum simul ac deorsum feratur. Quia ergo plerique immodico hujusce vitæ tenemur desiderio, quia deorsum vergimus temporalium rerum amore abrepti, sit, ne possimus corda cælum versùs erigere. Quòd si sollicitè consideraremus (cum S. Gregorio loquor) (*hom. 37. in Evangelia*) quæ & quanta sint, quæ nobis promittuntur in cælis, vilescerent omnia, quæ habentur in terris. Si nobiscum ipsi accuratè reputaremus illa superna civitatis quanta sint gaudia; Angelorum choris interesse, cum beatissimis spiritibus gloriæ conditoris assistere, præsentem Dei vultum cernere, incircumscriptum lumen videre, nullo mortis metu affici, incorruptionis perpetuæ munere letari: dubio procul ad hæc bene perpensa inardesceret animus, jamque illic cuperet assistere, ubi se speraret sine fine gaudere. Nunc facilè nobis obrepit oblivio cœlestium, quia terrestrium memoria viret. Fastidiuntur æterna, cum caduca amantur. timemus mortem, quia cælum non appetimus. & quanquam de eo narrantibus libenter aures demus, nos tamen diutiùs vivere delectat. At verò da hominem

minem DEI verè amantem, da cœlestis patriæ siti-
entem, da mundanarum rerum fastidio affectum;
vocabit ille ultro mortem, salutabit venientem, *Le-
tantes imus! letantes imus!* cum B. Aloysio latus
cantillabit. Da Ægidium, da Ignatium, da Picco-
lomineum, da quemcunq; alium videndi DEI desi-
deriis inflammatum: videbis primum illum solâ Pa-
radisi voce in ecstasim abreptum; alterum ad men-
tionem mortis lacrymis liquescentem; tertium, inter
ægotandum, fenestram cubiculi sæpius unde liber
pateat in cœlum prospectus, aperiri jubentem, atque
suspirantem: *Heu quàm sordet terra, dum cœlum
aspicio! Paradisus! Paradisus! Brevi, brevi, spero
istic erimus!* (*Prei. Occ. pag. 215.*) videbis denique
quemvis alium cœli cupiditate flagrantem, ad mor-
tis propinquæ denunciationem toto animo exul-
tantem.

Tu quoque ut pariter exhilarescas, Moribunde,
vide etiam atq; etiam, ut hanc cœli sitim in te quan-
to potes studio accendas, foveas accensam. Pudeat,
si amator quispiam Sponsæ suæ desiderio majori
conflagret, quàm tu illius de qua B. Joannes. *Vidi,*
inquit, civitatem sanctam Jerusalem novam descen-
dentem à Deo, paratam sicut sponsam ornata viro
suo. (*Apoc. 21.*) Quò acrius dolores sævierint, hoc
vivaciùs cœlestis patriæ sitis exardescat. *Non do-*
let crux in nervo, dum animus est in cœlo. Ad
ultimum supplicium ducebatur Symphorianus, flos
adolescentiæ. de constantia filii sollicita mater, his
illum stimulis adorat: *Nate, nate, memento eterna.*

vita, cœlum suspice, & ibi regnantem Christum intueri: Tibi enim vita non eripitur, sed mutatur in melius. (22. Augusti.) Decretum divinitus nullique evitabile supplicium peccati mors est. Ad hoc quisquis properas, ut illud feliciter habeas, memento æternæ vitæ, cœlum suspice: huc vota; huc oculos, huc animum dirige: ibi regnantem Christum, tibiq; coronas nectentem intueri; cujus amore si flagras, si desiderio videndi exæstuas, tibi vita non eripitur, sed mutatur in melius: quandoquidem auctore Gregorio Magno (loco cit.) *temporalis vita æternæ vitæ comparata, mors est potius dicenda, quàm vita; & ipse quotidianus defectus corruptionis, nihil est aliud, quàm quædam prolixitas mortis.*

CAPUT XVIII.

Consummatum est. Joan. 19. 30.

Breve verbum, sed ingens documentum, *Consummatum est.* Quo scilicet Rex & Magister noster docere sanos voluit in bene cœptis constantiam, infirmos in morbis invictam patientiam, moribundos in doloribus extremis perseverantiam. Nec abulsi exemplum à verbo. quantis machinis oppugnabatur morientis constantia! Regem Israël, Salvatorem orbis, DEI Filium adoraturam clamat Judæorum concio, fidem pollicetur, si de cruce descenderet. Frustra. Perseveravit in cruce, Opus redemptionis urfit, laborem consummavit; *Consummatum est.*

L

Nempe

Nempe filiorum Dei est in ea cruce, quam cuiq; destinavit Deus, perseverare ac mori. Sit illa licet & diuturnitate longa, & gravis magnitudine; non deserenda tamen, quoad illam auferat, qui dedit. An esse quidquam sine constantia magnum, aut laude dignum potuit? absq; hac patientia in impatientiam, humilitas in superbiam, fiducia in pusillanimitatem, fortitudo in timorem degenerat. Authorem hujus assertionis habeo D. Bernardum ita perorantem: (*Serm. 22. de parvis.*) *Perseverantia sola meretur viris gloriam, coronam virtutibus. Profsus absque perseverantia nequi pugnat, victoriam; nec victor palmam consequitur. Vigor virtutis consummatio est; nutrix ad meritum, mediatrix ad premium: Soror est patientia, constantia filia, amica pacis, amicitiarum nodus, unanimitalis vinculum, propugnaculum sanctitatis. Tolle perseverantiam: nec obsequium mercedem habet, nec beneficium gratiam, nec laudem fortitudo. Deniq; non qui cœperit, sed qui perseveraverit in finem, hic salvus erit. Cujus salutis quàm es cupidus, tam eris amans perseverantiz, Moribunde. Quapropter ubi vis morbi invalescere, accumulari dolores, tædia decumbendi subrepete cœperint, fac animo forti, magnòq; sis; pectus obarma; tene, quod habes, ne alius accipiat coronam tuam; aspice in auctorem fidei & Consummatorem IESUM, qui proposito sibi gaudio sustinuit crucem, confusione contempta (ad Hebr. 12. v. 2.) ab hoc vires, & robur, & gratiam perseverandi postula, donec dicere liceat: Consummatum est; hoc est: Consummata*

summata ætas, consummatus vitæ cursus, consummatum promerendo cælo concessum tempus est. Perfeci à Deo commissum opus, exornavi animam, eiq; stolæ, quâ compta mens enitescit, pretiosa intextui ornamenta, ipsam scilicet J E S U & M A R I Æ vitam, quorum ego, quoad poteram, velligia insistebam. Imposui finem labori, quem tu, Conditor mei, mihi mandasti; exorbui calicem dolorum, quem propinasti: fac ergo, quæso, initium præmio, quod promisisti. Admitte hanc animam ad beatissimum præsentia tuæ conspectum, ut post innumerabilia beneficia, quæ in me effudisti, dicere compos tui possim: *Consummatum est.* Plus mihi dare jam Deus non potest, postquam se dedit. Consummatum est, quo fruor, bonum; extra quod nihil consummatum est, nihil bonum.

Jam verò post exemplum Christi Perseverantis in cruce, poterit quoque tuam, Moribunde, constantiam non parum stabilire recordatio vivarum Christi Patientis Imaginum; illorum, inquam, quorum invicta virtus in gravibus diuturnisq; morbis perferendis præclare enituit. Quid enim tu pateris dolorum, quod non ante te ipsi sustulissent? Tussis te exagitat? Tussi, obstructionibus & asthma multo annis affligebatur Venerabilis Beda; Plato Monachus duodecim annis cum hujuscemodi morbo conflictatus est, Stomacho laboras? Dolor ventriculi assidue torquebantur S. Chrysostomus, S. Teresa, S. Catharina Soror S. Birgittæ, quæ postrema ne sacrâ quidem Eucharistiâ refici potuit, cum maximè

L 2

vellet,

vellet. Podagra te cruciat? Excruciabat & S. Stephenum Episcopum, & S. Gregorium Papam, adeò, ut toto biennio ne ad momentum quidem de lecto potuerit surgere. Paralyfin sustines? sustinuit eandem, quoad vixit S. Servulus; qui pro templi Romani SS. Apostolorum jacens omni membrorum usu destituebatur. Putredine diffuis? Vermibus toto corpore scatebant Sancti Daniel & Simeon Stylites: & Simeon quidem siquem ex eo examine evagantem cerneret, loco reponebat, dicens: *Edite quantumlibet ex eo, vermiculi, quod vobis preparavit Deus.* Sancta verò Bona cum ex innumeris vermibus pectus & mamillas rodentibus perdiu, & restituendi conditione datâ petenti S. Dominico unum porrexisset, in unionem versus, redditusq; denuò in vermem rediit. Hydropse tumescis? Tumuit usque adeò Benjaminus Vir Religiosus, ut minimus illius Digitus unius manus ambitu circumdari vix potuerit. Diarrhæa tabescis? Hoc genere morbi annos quatuordecim laboravit S. Bernardinus; quo tempore toridem Concioniones de agonizantium doloribus scripsit. Deniq; longo nimium tempore decumbere, jamq; in Clinicorum ordinem tibi esse redactus videris? Atqui Maria Oegniacensis sex & triginta annos, S. Lidvina tricenos & octo, quadragenos S. Coleta, S. Nicoleta Virgo quinquaginta annos, octogenos deniq; Maria Diaria inter acerbissimas ægritudines extraxere: quæ postrema nihilo minus longiorem à Deo vitam exposcebat, quò plura ac plura pro eo pati liceret; Confer nunc tuam, Ægrote, cum horum harumq;

harumq; fortitudine constantiam, patientiam cum longanimitate, & si pusillanimitas tibi suggerere ceperit; non posse te amplius hoc illudve ferre, illo Augustini dicto suggestionem rerunde: *Poverunt isti & ista, & tu non poteris?* quasi verò ipsi virtute suâ, & non Dei adjutorio ista pertulissent. Interim fide Deo, *sustine sustentationes Dei: conjungere Deo, & sustine. Omne quod tibi applicitum fuerit, accipe, & in dolore sustine, & in humilitate tua patientiam habe;* (Eccli. 2. 3.) atq; certus esto novis doloribus nova Coronæ tuæ, quæ textitur in cœlis, incrementa, novos ornatus accedere. Quæris, Quandonam tandem diadema illud perficietur? Dicam, ubi, quid acciderit S. Guilielmo Abbati, nar-ravero. Ad centuriam annorum, quæ in summa vitæ asperitate, nec paucis ærumnis exegerat, duo tantum decrant grandævo Senecioni. Ad perennis vitæ fontes toto pectore anhelantem famulum suum volens tantisper recreare Dominus cœlum illi pate-re jussit, ibiq; Angelos coronam auro gemmisque distinctam texentes ostendit. Quam Senex ut vidit, *Cuinam pararetur*, quæsit: *Tibi*, inquiebat ex ala-tis Ephēbulis unus. Porro autem roganti Guiliel-mo, *Quando tandem illa perficienda esset;* Ange-lus reposuit: *Donec passus fueris satis.* Pro certo habe, tametsi non videas, Moribunde, Coronam tibi pariter in cœlo ab Angelis texti, tot gemmis illustrem, quot molestiis vitam trahis difficilem, cumulatam doloribus. Ergo age, bonum certamen certa, cur-sum consumma, ut, quæ tibi paratur, adipiscaris

Coronam justitiæ, quam tibi reddet justus Iudex in illa die, quâ sua cuique pro meritis præmia, pro demeritis poenæ decernentur. Quod si rursus quæras: Quando illa perficietur? Responsum idem quod Guilielmus habet: *Postquam passus fueris satis. Cum fuerit patiendi finis, tum erit principium vitæ, cujus nullus est finis. quando licebit, Consummatum est, dicere cum Christo, tum licebit regnare cum Christo.*

CAPUT XIX.

*Pater, in manus tuas commendo
spiritum meum. Luc. 23. v. 46.*

HOc fuerat ultimum Christi in cruce expirantis, Verbum, quod utinam esset familiare ægrotis, Moribundis omnibus extremum suspirium! Nihil hoc verbo dulcius dici, nihil cogitari salubrius potest. *Quid enim dulcius Patre, inquit S. Augustinus, & tanto Patre, tam dulcissimo atq; misericordissimo? (Lib. de Spir. & anima.)* Hoc verbo profitemur *Fidem*: quia Deum rerum omnium Principium, à quo procedunt omnia, & Finem ultimum, in quo conquiescunt omnia, agnoscimus: exercemus *Spem*, quia nos paternæ illius providentiæ committimus: *Charitatem & Resignationem* demonstramus, quia nos in sinum illius filiali quodam amore extendimus. Hoc verbum est à Spiritu Sancto singulari instinctu Regio Prophetæ inspiratum, atq; ab eodem

dem Propheta psalmo 30. sanctè usurpatum. Hoc verbum Sacerdotes, dum Horas Canonicas complent, quotidie semel, iterum, ac tertio pronunciant; utinam eâ pietate, quâ in morte vellent! Hoc verbo discimus majorem spiritûs, quàm corporis curam gerere, atq; evitare illorum praposteram, ne dicam, insanam sollicitudinem, qui de pompa funebri solliciti, corpus propediem in vermes abiturum splendide effèrri decernunt; quid futurum sit animâ, parum providentes. Hoc verbum cùm plurimis aliis, tum morienti Ludovico de Ponte S. J. Viro Sanctimonix laude ornatissimo fuerat postremum, qui coniectis in Christi Crucifixi simulacrum oculis, cùm creberrimè ingeminâset illud: *Domine, aum veneris judicare, nolime condemnare, in ea voce: In manus tuas, Domine, commendo spiritum meum.* vitam finit admirabilium virtutum heroicis exemplis illustrem. Cujus vestigia qui volet insistere, familiarem sibi verficulum eundem faciet, ac tum usurpabit potissimè, cùm se nocturnæ quieti, soporiq; dabit, ut in promptu quoque sit olim oculos in mortis somnum clausuro. In ipsa verò lethali ægritudine plurimùm profuerit, sumpto in manus Crucifixo, animoq; & oculis ad illum conversis hoc fere affectu versum illum condire: *Pater! Pater sancte, Pater juste, Pater benedicte; cujus potestas immensa, sapientia æterna, bonitas infinita; Pater piissime, cui proprium est misereri semper & parcere; Pater misericordiarum, & Deus totius consolationis; Pater amantissime, qui cùm diligis tuos, usq; in finem diligis eos: cùm*

veniat hora, ut transeam de hoc mundo ad te Patrem meum, & revertatur spiritus meus ad te, unde exivit: ecce in manus tuas commendo hunc spiritum meum; in manus, inquam, tuas, quæ me de nihilo creârunt, quæ me perditum recreârunt, quæ me stantem tenuerunt, ne caderem, lapsum erexerunt, ne jacerem, quæ mihi quidquid sum, quidquid possum, quidquid habeo, misericorditer tribuerunt; in sanctas ac venerabiles manus tuas, quæ tot ægrotos sanârunt, tot parvulis benedixerunt, tam miro prodigio panes multiplicaverunt; in illas tuas manus commendo spiritum meum, quæ propter me tamdiu laborârunt, pedes discipulorum laverunt, & tandem in cruce feralibus clavis confixæ fuerunt; in manus tuas, in quibus descripsisti me, in quibus positæ sunt sortes omnis felicitatis meæ; in quibus solis sita est mea quies, extra quas nulla quies; commendo fiducialiter, trado voluntariè, dono liberaliter, reverenter confecto spiritum meum à te creatum, pretioso tuo sanguine redemptum, innumeris gratiis cumulatū atq; ad æternam, uti spero, beatitudinem destinatum. Suscipe, Pater spiritum, quem dedisti mihi & beatorum spirituum societati conjunge, ut ibi te glorificet, ubi omnis spiritus te **DEUM** ac Dominum laudat in secula seculorum.

Hos inter, similésq; affectus Crucifixi vulnera manibus, pedibúsq; , ac lateri impressa reverenter dissvavietur Æger, & perinde ac si spiritum in illa suum immittere velit, fugienti animæ tanquam columbæ asylum salutis quærat in foraminibus petra,

in

in caverna maceræ. Hinc verò transeat ad benedictionis repetenda oscula, sive ut morientis Christi spiritum ipse excipiat, sive ut suum ipse in illum transtundat. Ad mentem videlicet B. Ambrosii, libro de Isaac & anima (cap. 3.) ita disserentis: *Osculum est enim, quo invicem amantes sibi adherent, & velut gratiæ interioris suavitate potiuntur. Per hoc osculum adheret anima Deo Verbo, per quod sibi transfunditur spiritus osculantiū: sicut etiam qui se osculantur, non sunt laborum prælibatione contenti, sed spiritum suum sibi invicem videntur infundere.* Quibus Ambrosii verbis congruit illa Guilielmi Abbatis meditatio Dominum suum ità alloquentia: *Qui se dulcius osculantur, mutuos sibi suos spiritus dulcius infundunt, quorum quibusdam odoribus dulce habent perfundi. Accipe tibi, Domine, nec respue totum spiritum meum, infunde mihi totum tuum.* Huc facit, quod de S. Wolfango Episcopo Ratisbonensi proditur eum, cū horam ultimam sibi adesse sentiret, evocasse ad se dilectum alumnum Tagmonem (qui postea Magdeburgi Archiepiscopus obiit) iussissetq; ori suo os componere, & fugientis sui Spiritūs inspirationem à Domino accipere, eidem vaticinantem, fore, ut post annos decem aut suis pares, aut certè majores honores adipisceretur. (*Baron. a. 1003.*) Quasi illi diceret, quod olim S. Macario Magnus Antonius: *Ecce spiritum requievit super te, erisq; mihi deinceps heres virtutum mearum.* (*Vit. PP. l. 8, c. 19.*) Jam, ut S. Wolfangi spiritum discipulus ore legit: sic

L 5

suum

suum Moyses super os Domini moribundus efflavit. Nam, ubi vulgata legit; *Mortuusq; est Moyses servus Domini iubente Domino; (Deut. 34.5)* Hebraica sic habet: *Mortuus est Moyses super os Domini*, sive *ad osculum*, vel, *in osculo Domini*. quasi hoc officio Deus erga dilectum sibi famulum fungi voluerit, osq; suum ori ejus apprimens, morientis spiritum intra se receperit. Utrumq; videlicet rarissimum optatae felicitatis pignus: Osculum Christo Morienti figere; sive ut illius spiritum haurias, sive ut illi tuum tradas. id enim si fiat, jam tutò dicere licebit; *In pace in idipsum dormiam & requiescam.*

CAPUT XX.

Inclinato capite tradidit spiritum.

Joan. 19.

VENITUR aliquando post cursum ad metam, post navigationem ad portum, post Præmissas ad Consequentiam, post Dictionem ad Perorationem, post mortis præparationem ad ipsam demum mortem; & à Moriente Christo exempla moriendi petuntur. Moritur ergo JESUS (ô grande Sacramentum!) moritur auctor vitæ, moritur Creator, Pater, & Redemptor noster: moritur Dominus, & mori recuset servus? Si ille innocens, impollutus, segregatus à peccatoribus, insuper & naturalis Dei Filius, nullo mortis debito obstrictus, tamen ut paternæ voluntati, & immenso suo erga nos amoris

satis-

satisfaceret, pro nobis morti subiecti voluit, ejusque gustare amaritudinem: quàm indignum erit, si nos, non tantùm naturâ servi, sed etiam filii iræ cùm simus, insuper & tam multa peccârimus, mortem nobis tot titulis debitam refugiamus, nec nisi agro atque averfanti animo excipiamus? Certè S. Ambrosius in libro de obitu Satyri fratris, negat moriendi conditionem à nobis recusandam, cùm ad solatium nostrî, filium suum unicum Pater pro nobis dederit ad mortem; aitq; esse magnum pietatis mysterium, ut mors corporis nec in Christo esset excepta: ac licet natura Dominus, carnis tamen quam susceperat legem non recusaret. Quod igitur (concludit) majus est solatium, quàm quòd secundum carnem & Christus mortuus est? Cùm præsertim mors antea terribilis ac minax, ipsâ Christi morte, jam quodammodo exarmata sit, ejusq; stimulus in Domini corpore retusus: Miseratione etenim Domini (ut iterum pulchrè S. Ambrosius) (L. 5. in Luc. c. 5.) cæpit quies esse, quod mors erat; quæ nobis soporem mortis vertit in gratiam voluptatis. Et alio in loco: Ubi resurrectionis fides est, non mors, sed species quietis est. (L. 6 in Luc. c. 9.) Moritur ergo Christus, & mori detrectet Christianus? Horreant mortem Ethnici, timeant Pagani, qui Christum non nôrunt; dicat de iis Seneca: *Quis sine querela moritur; quis non recusans, quis non gemens exit?* (L. 5. de benef. c. 17.) propria boni Christiani laus esto; sui Ducis exemplo libenter mori, & dispari licet commutatione, ei vitam suam promptè

prompte reddere, qui ei antea liberalissime donârit
 eam.

Jam verò pro quo moritur Christus? Respon-
 deat Apostolus Paulus: *Dilexit me, & tradidit se-
 metipsum pro me.* (Galat. 2. 20.) Dicat Nicæni
 Concilii Symbolum: *Qui propter nos homines, &
 propter nostram salutem descendit de calis, &c.
 Crucifixus etiam pro nobis sub Pontio Pilato, passus
 & sepultus est.* Cùm ergo ille pro nobis sit mor-
 tuus, eamus & nos, & moriamur cum eo, si nequi-
 mus pro eo. Si non possumus propter illum mori
 sanguinem fundendo, moriamur voluntati ipsius ob-
 sequendo; innumeras vitas si haberemus, omnes
 ipsius arbitrio parati profundere, quod quidem uni-
 cum erat in votis P. Thomæ Hollando, Anglo S. J.
 cùm mortem ab Hæreticis in odium fidei sibi infe-
 rendam sub furca in curru consistens, injecto jam in
 collum tunc præstolaretur: *Suscipe* (itâ precabatur)
*æternæ misericordiarum Pater, qualemcumq; me vi-
 des. Suscipe indignam hanc patientiam meam, &
 ea, quæ patior: quæ quidem omnia sanctissima Uni-
 geniti tui consociata Passioni totâ voluntate offero
 tibi, in unione & conjunctione omnium eorum, quæ
 passus est dulcissimus Redemptor meus JESUS, unâ
 eum meritis omnium, qui in lege naturæ, in lege
 Moysis, & in lege gratiæ Divinæ Majestati tue ac-
 ceperunt, sunt, & erunt gratiora, ut spero futura.*
*Ignosco, ignosco omnibus. Si tot mihi vitæ forent,
 quot capiti crines, quot oceano guttæ, quot cælo stel-
 læ, quot cælorum Domino perfectiones, illas ego*
 omnes

omnes pro sempiterna proximorum salute libentissime impenderem. (*Nadasi in Pretios. Occupat. mori. in societ. c. 30. n. 2. pag. 238.*) Ita P. Thomas, qui quoties mori pro salute proximorum optavit, toties Deo semetipsum offerre in Sacrificium studuit; satis gnarus, si pro Christo infinities moreretur, morientis ipsius amorem erga se minimè exaquaretur.

Quomodo enim (si hoc præterea quærimus) Salvator noster moritur? Si spectemus animum, ex amore erga nos moritur, cum desiderio plura pro nobis patiendi moritur. Patiebatur ille quidem in cruce magnam sitim, quam ei evacuatio sanguinis creabat; Sed major erat sitis plura patiendi. *Habuit* aliam sitim, inquit Bloſius, (*Explan. Pass. c. 13.*) putà ampliùs patiendi, atq; evidentius summo nobis amorem demonstrandi. Amor Christum in crucem egit, amor mori cœgit: quem alloquens Doctor Seraphicus: *Nimia fuit, inquit, dilectio tua: & in hoc apparet abyssus tue immense pietatis. Non enim in te video causam mortis, nisi superabundantiam charitatis.* (*Part. I. Stim. c. 2.*) Jam ego vos cupio valere, o Clavi, quorum retinaculis Christus in cruce fixus perseverat: aliis ille funibus, aliis vinculis hæret cruci illigatus, amoris nempe vinculis, funibus charitatis. *Corpus enim suscipiens,* ait Ambrosius, (*Serm. 3. in ps. 118.*) Dominus *JESUS* Christus charitatis se vinculis illigavit, & non solum se membris nostris & passionibus naturalibus, sed etiam Cruci vinxit. Quamobrem feliciter & amplius

amplius, qui inter selectissimos divini amoris affectus expirantes, etiam cum amore spirant, Christi; morientis amoris mutuo amore vices aliquas referre nituntur, quos non tam ægritudo corporis, quam vehementia charitatis conficit, quorum in ore & pectore illa Francisci Seraphici flammula continenter gliscit: *Absorbeat, quæso Domine, mentem meam ignita & melliflua vis amoris tui, ab omnibus, quæ sub cælo sunt, ut amore amoris tui moriar, qui amore amoris mei dignatus es mori!* Quo loco cujus ego aptius meminerim, quam tui, tot prolium DEO militantium Mater juxta, & Virgo, Teresa, cui velut Phœnici sancti amoris incendio conflaturæ melos illud concinit Ecclesia.

Regis superni nuncia Domum paternam deseris Christum datura aut sanguinem Terris Teresa barbaris: Sed te manet suavior Mors, pœna pascit dulcior, Divini amoris cuspide In vulnus ista concides. Sed redeamus ad Christum. Cujus Morientis exteriorem speciem si consideremus, *moritur in cruce.* Væ mihi, væ illi, si quis Paupertatis, Castitatis & Obedientiæ, clavis religiosæ Cruci semel affixus, excutere hos clavos, atque extra Crucem emori decerneret! In cruce salus; extra crucem, quid nisi perditio? Via ad cælum crux est; ab hac qui declinat, quomodo non à salute toto cælo aberrat? Scala est; sine hac quomodo in cælum conscenditur? clavis est; quomodo absq; hac cœli janua aperitur? Equidem, Auctor fidei & Consummator JESU, hoc unum est in votis, hoc solum in desideriis, vivere tecum &

mori

mori in cruce, in gratia perseverare & amore tui. At istud neq; volentis est, neq; currentis, sed misere-
rentis Dei. Recordor Saulis ex optimo pessimi, &
contremisco; reminiscor Judæ ex Apostolo Apostata,
& exhorresco; multos alios recogito, quorum prin-
cipium salus, sed finis interitus, & ne simile quidpiam
ego quoque patiar, extimesco. Quid agam? Perse-
verare in cruce donum tuum, & complementum
omnium donorum. Per tuas te miserationes omnes,
per tuam in cruce constantiam oro, da mihi hoc
donum, inéq; in tua cruce, in tui amore, in arrepto
vitæ sanctæ proposito perseverare facito, ac tandem
inter servos tibi fideles constitue. Amen.

Moritur præterea Christus in cruce *nudus* qua
de te ita Ambrosius: (in *Luc. c. 23.*) *Nudus cra-*
cem ascendit: talis ergo ascendat, qui seculum vin-
cere parat, ut seculi adjumenta non querat. Ob-
secutus tum Ambrosii monito, tum Christi exemplo
Franciscus Magnus Minorum Pater, istinc migratu-
rus *super nudam humum se totum nudatus prostravit.*
quatenus in hora illa extrema, in qua poterat adhuc
hostis irasci, nudus cum nudo luctaretur. (S. Bo-
nav. vii. c. 4.) Dignissimus sanè, quem, si non li-
cet, effectu, at affectu certè imitemur omnes, nosque
rebus mortalibus omnibus ante mortem ultrò exu-
amus. Semper hoc fuit proprium Servis DEI clo-
gium: Præter pios libellos usû detritos, à morte ni-
hil reliquisse. at Proprietariis, (prout cuidam horum
fecit S. Gregorius) sepeliendis pro sacro loco daba-
tur sterquilinum, cujus mantissa erat fulmen illud:
Pecunia tua tecum in perditionem.

Deinde

Deinde moritur Christus retentâ in capite spineâ coronâ. Singularum virtutum corone sunt, Ambrosio teste. (*Serm. 14. in ps. 118.*) Joseph coronam habuit castitatis, Paulus iustitiæ, Petrus fidei; æger & Moribundus coronam Patientiæ ad ultimum uiq; spiritum ne dimittat, quæ sola de spinis dolorum colligit rosas Christo spinis confixo gloriosas. Ita se ille visendum aliquando præbuit S. Mechtildi, (*Vit. l. 1. c. 24.*) ornatum coronâ variorum florum, quos sese collegisse dicebat ex variis doloribus, quos ipsa in capite pertulisset. Porro facilius dolorum aculeos feret Moriturus, si eos cum suppliciis Salvatoris contulerit. Etenim ingens ille capitis, aut aliorum artuum acutus dolor, ærumnæ illæ calamitatésq; (ut tu quidem appellas, ægrote) intolerabiles, spinula solum sunt ad illum aculeorum exercitum, qui denso agmine sacrum Domini tui caput oppresere. Ut enim ait S. Augustinus: (*in Ps. 36. p. 2.*) *Quantumcunq; patiaris, non pervenies ad illas insultationes, ad illa flagella, ad illam ignominiosam vestem, ad illam spineam coronam, ad illam postremo crucem non pervenies.* Graviter ab æmulis suis premebatur S. Gregorius Nazianzi Antistes; ærumnas verò suas ita solabatur: *Quota, inquit, hæc sunt pars injuriarum, dum conspueretur Dominus & caderetur? Omnia non uni conferenda corona spinea duco: per quam me quoq; vitæ asperitate coronari animadverto.* (*Oratio. 25.*) Gravia sint licet suo pondere quæ tu pateris Moribunde, sint numero multa, genere diversa, tempore diuturna; si tamen hæc

hæc in eadem bilance cum Christi cruciatibus ponderaveris, omnia ne uni quidem spineæ coronæ conferenda duces.

Adhæc, *extensis in cruce brachiis*, in mortem elanguescit Christus, qui gestus est protegere aliquem, inumbrare, in amplexum provocare volentis. Rue ergo vicissim in amplexum Dilecti tui, Moribunde, inter te pia cogitatione in ulnas Patris amantissimi, in illum sinum inexhaustæ misericordiæ, in illa brachia amplissimæ, immentæ, & interminatæ charitatis. Expectat enim te passis brachiis, paratus te vel ad cor apprimere, vel in suum etiam quodammodo pectus admittere, si tantum fidenter atq; amanter ipsius affectaveris amplexus. *Projice te securus in eum* (ajebat sese adhortans S. Augustinus) *noli metuerè: non se subtrahet, ut cadas.* (L. 8. Conf. c. 11.) Non se inquam, subtrahet, qui idcirco à terra elevatus est, & per ipsam crucem latè distensus, ut omnia trahat ad seipsum: & ne se subtrahat, ecce ut fixus inhæreat cruci, neq; tam clavis furoris nostri, quàm vinculis suæ charitatis adstrictus. Ac, ne tibi fortè adhuc ab æstu divini furoris timeas, *sepulchris suis obumbrabit tibi*, (Ps. 90.) id est, ut explicat idem Augustinus, *ante pectus suum te ponet, ut alis suis te protegat*: tu verò securè dicere possis: *In velamento alarum tuarum sperabo.*

Quid autem sibi vult, quòd *clamans voce magnâ* moriatur Christus? Illud, nisi fallor, ut quidquid locutus fuerit, quidquid egerit, quidquid perpessus fuerit Moribundus, sit quidam boni exempli clamor,

M

qui

qui non tam aures, quàm corda insipientium percellat, atque ad Deum laudandum perpellat. Clamet corpus decenter compositum modestiam, animus afflicti patientiam, cœlum suspiria, cor Deum, lingua pro obtinendis indulgentiis seu sodalitatibus MARIANÆ, seu Religionis, JESUM, MARIAM, JOSEPHUM. Hunc boni exempli clamorem à suis Alumnis Morientibus requisivit S. P. Ignatius, quando ita præscripsit. (*Const. p. 6. c. 4.*) *Ute in vita universa, ita & multo magis in morte unusquisque de Societate enim & curare debet, ut in ipso DEUS ac Dominus noster JESUS Christus glorificetur, ipsiusq; beneplacitum impleatur; & proximi edificentur saltem exemplo patientiæ & fortitudinis, cum fide viva, ac spe, & amore bonorum illorum eternorum, quæ nobis Christus Dominus noster tam incomparabilibus vitæ suæ temporalis laboribus, & morte promeruit & acquisivit.*

Moritur insuper inter latrones Christus, & cum iniquis reputatur, ut hæc infamiâ, tibi Moribunde, mereatur mortem coronâ comprecantium amicorum stipatam. Quòd si extra hanc, & inter sceleratos, aut desertum ab omnibus te mori velit Deus, nōne sic moriēre JESU tuo similior?

Ad extremum denique, dum moritur, caput inclinat Christus, relicto per annutum illum morientibus non uno documento. Caput enim inclinat, Patriq; mortem jam dudum decretam offerenti libens ipse annuit: ut sub vitæ finem superioribus, Patribus Spiritualibus, Medicis, infirmariis prompti obtemperemus,

peremus; sed Deo imprimis nos mori volenti ultro annuamus, dicamisque identidem: *Ita, ita Pater; quoniam sic fuit placitum ante te. (Matth. 11. 26.)* Caput inclinat, eoque gestu Patri æterno gratias agit pro omnibus in se, & in nos congestis beneficiis; ut nemo sit nostrum, quin priusquam obeat, Deo primum, ac deinde Præsidibus atque amicis gratias agat pro beneficiis, quibus erat ab iis in vita cumulatus. Inclinat caput; nosque omnes, Moribundos præsertim invitat ad osculum, ut in gratiam ejus nos esse receptos minimè ambigentes, audeamus ad delibanda in cœlo Sponsi cœlestis basia adspirare, suspirareque cum Sponsa: *Osculetur me osculo oris sui! (Cant. 1.)* Caput inclinat: quasi animæ Limbum Patrum adituræ iter præmonstret: Huc tende, huc: hic latet hostis, hic opima tenetur præda. itaque lata alacrisque anima corpore relicto aggressa hostem est. O si ita quisque nostrum vivere, si ita mori studeamus, ut, si nos à morte Purgatorii ergastulum subire contigerit, non tam poenas ibi luamus ipsi, quàm animas poenis illis ereptas unà nobiscum cœlo inferamus.



P A R S III.

De Præparatione ad mortem
Violentam.

Dixeram in libelli hujus Præfatione Mortis *violente* nomine me intelligere eam, quæ citra morbi alicujus diuturnitatem repente aggreditur hominem, nec spatium concedit iis utendi mediis, quæ ad assecurandam salutem plerumq; ab Infirmis usurpantur. Ad mortem hujusmodi feliciter obeundam tametsi plurimum juvent ea, quæ his Parte primâ attulimus; videbimus tamen, an aliquid præterea super, quo illam reddere securiorem possimus: prius verò nonnulla de conditionibus mortis repentinæ attingemus.

CAPUT I.

*Mors repentina hominibus
familiaris & frequens.*

TRAGÆDUS Poëta dum sibi miseram hominum conditionem ob oculos ponit, in illud non tam Poëticum, quàm Catholicum carmen erumpit:
*Ubiq, mors est. Optimè hoc cavet DEUS,
 Eripere vitam nemo non homini potest;
 At nemo mortem,*

Ubiq

Ubiq̃ue mors est. nullus locus, nullum tempus, nulla est occupatio, cui vacantem hominem mors aggredi nequeat: neque tot laqueis aves, tot casibus ferae, tot pisces insidiis patent, quot homo moriendi casibus. *Θανατορχία* sive *Oecumenicum in Mortales omnes Mortis Imperium* à Thanatophrasto conscriptum, qui volet, inspiciat, farraginem exemplorum leget, quibus cujusvis ordinis, sexûs, ætatis homines nullo non loco, tempore, negotio subito extincti memorantur. Unum hîc tantummodo referam, quod fuerat Viro cuidam melioris vitæ principium, ut nos quoq; similia subito morientium exempla, si quando occurrerint in morum correctionem trahamus. (*Hist. Soc. p. 2. l. 3.*) Henricus II. Galliarum Rex datâ Philippo II. Hispaniarum Regi in uxorem filia, Philiberto autem Allobrogum Duci in matrimonium sorore concessâ, dum omni genere publicæ hilaritatis nuptialem pompam cohonestat, ut erat animi excelsi, viriûmque robustarum, inire ipsemet voluit ludicrum hastâ certamen. Inter ea belli simulacra cum facinora rege digna multa fecisset, laxato diuturnâ concertatione oris integumento hastæq; ab amulo impaciæ fragmine, quâ viam reperit, subeunte, graviter in oculo idus, interiit. Sic lusus quamvis lætus, leïtho, lugubrique lesso mutatus est. Interfuit huic spectaculo civis Florentinus acri judicio Vir, & genere nobilis, qui mortem vago errore fugitans peregrinas percurfabat oras. ubi enim pro gracilitate corporis, & valetudinis tenuitate, adhuc tristiore habitu ingenii, disertè Medicus ei de-

nunciavit, nisi ab solitudine in hominum se congressus, hilarioremque convictum daret, haud diu luce usurum, tale vitæ genus instituit. Aliquot sodalium fidissimorum assumptis, quibus etiam, ut erat copiosus, ad impensam suppeditabat, cum iis varias obire regiones instituit, ita temperans iter, disponensque mansiones, ut in quemcunque locum in id tempus occurreret, is ei locus vel amœnitate præcipuâ, vel religiosâ celebritate, aut humanâ hilaritate ac pompâ visendum aliquid fruendumq offerret. In hunc modum Italiâ propemodum omni, tum Hispaniâ, & aliquot ad Septentrionem peragratæ provinciis, nuptialis, quem dixi, apparatus famâ, quæ longe manârât, excitus, ad tempus Lutetiam venit. Hic verò cum multa sanè magnificâ ac mira spectâset, ad extremum regio illo casu ita est commotus, ut curâ ad se conversâ scitè animadverterit, ubique mortem hominibus esse paratam. Itaque totum se DEO in Societate JESU mancipavit. Ludovicus Corbinellus hic fuit, cui multum Societas universa & Collegium nominatim Romanum debet. (*Hist. Soc. p. 2. lib. 3.*) Cujus exemplo si plures incertam mortis horam secum ipsi arbitrarentur, haud dubiè, quamvis aforti ad meliorem protinùs frugem converterentur. *Optimè hoc cavit DEUS*, dum moriendi legem nullo certo tempore vel loco circumscripsit: nimirum ut visis inopinis mortalium casibus cautiore facti, vel aliorum periculis saperemus. Nam, quæ toties accidere aliis experimento compertum habemus, *Cur nobis (inquit Clichtovæus) etiam accidere posse non audiamus?*

namus. (c. 8 de doctr. morien. c. 38.) Memor es-
to iudicii mei (inquit Ecclesiasticus) sic enim erit & tu-
um. Mihi heri, & tibi hodie. *Haud dissimiliter*
grispian ex his, qui improvisâ morte sublatis sunt,
dicere nobis poterit: Mihi hodie, scilicet contigit ex
hac luce repenti tolli; cras tibi idem fortasse contin-
get. Et quamvis divinâ bonitate, ut confidimus,
sub umbra alarum suarum nos protegente, id nobis
forsitan non sit eventurum; bonum tamen est, & sa-
lutare id ipsum vereri & timere, ne eveniat, ut si
quando evenerit, nos imparatos nequaquam surripi-
at. Ità Clichtovius. Parisiensi Doctori suffragatur
Cancellarius Joan. Gerson illo epiphonemate: (serm.
Dom. Septu.) O fallacissimas spes! ô expectationes
vanissimas! quot peremerunt adolescentes? quot ad
caelum evoluturos juvenes, in aeternae damnationis
præcipitium rucere coegerunt? Non vos moveant
inertium sermones: quoniam qui manè dedit, nec me-
ridiem, nec ipsam quidem tertiam sponondit: sed ut
Sapiens sapienter affirmat: omnia in futurum servan-
tur incerta. Quam multi praelixos vitæ annos aut
sonnantes, aut sibi promittentes uno die, unâ horâ,
unâq, momento miserabiliter perierunt! Videtur
hunc mortis repentinæ terrorem DEI nomine ini-
quis Iudiciis incutere velle Regius Propheta, dum
violatæ iustitiæ reis ità pœnam interminatur: Vos
autem sicut homines moriemini: (Ps. 81.) Iudicia-
riæ potestatis prærogativâ in divinam quandam di-
gnitatem evedtos laudaverat: *Ego dixi: Dis estis,*
& filii Excelsi omnes: Sed quia jus in iniquitatem de-

M 4torserant,

torferant, quia concessio sibi munere neque castè, neque integre fungebantur, poenam illis severè denunciat, quòsq; vitæ longævitate diis immortalibus similes esse voluisset, in ordinem mortalium redgendos minatur: *vos autem sicut homines moriemini.* Verùm quid habet terriculamenti ista comminatio? *Omnes morimur, & tanquam aqua calabimur super terram.* ac, si Plutarchum (*Quæst. moral.*) audimus; *quemadmodum nemo miratur liquatum, quod est liquabile: sectum, quod est sectile; combustum, quod est combustibile: ita nihil mirandum nos omnes emori, cum simus mortales.* Si dixisset Propheta: *moriemini sicut pecora, & ut proverbio fertur, sine lux, sine crux peribitis;* fuisset gravissima terroris incutiendi ratio: homines, hominum more mori, nulla poena videtur. Immò verò maxima. Volucres, pisces, feræ, omniq; propè animalia certum quoddam spatium vivendi præstitutum habent, nec facilè, si habent, quo vitam sustineant, pereunt, plerâque humanis usibus & commodis cadunt; soli homines in rerum omnium abundantia, nullis insidiis appetiti, cum minimè putant, ex hac vita decedunt, nullus est illis locus, nulla ætas, nullum tempus à morte immune, proprium est iis repentinò mori. Quando igitur sceleratos Judices *sicut homines morituros prædicit, repentinæ morti cessuros in spolum comminatur Propheta.* quod genus supplicii nisi grave esset, neque illud deprecaretur David ipse dicens: *Ne revoces me in dimidio dierum meorum;*

(Psal.

(*Psal. 101. v. 25.*) neque Ecclesia tam sollicitè Deum exoraret : *A subitanea & improvisa morte libera nos Domine.*

CAPUT II.

Mortem repentinam improbis maximè metuendam esse.

Ratio in procinctu est , ex manifesto damnationis æternæ periculo deprompta : Siquidem eodem puncto , quo Peccator moritur , gurgite orcino mergitur : nunquam emerfurus. De hoc hominum genere est illud Jobi vaticinium. *Tendent tympanum , & citharam , & gaudent ad sonitum organi. Ducunt in bonis dies suos , & in puncto ad inferna descendunt.* (*c. 21. v. 12.*) Ut igitur qui glaciem inambulatur , eò est meticulosior , quò illa tenuior : ita Peccatori hoc magis est timenda repentina mors , quò hæc illi infestior. Esse autem improbis insidiosam mortem subitanæam sapientissimus Regum sensitse videtur . dum ait : *Nescit homo finem suum.* (*Eccl. 9. v. 12.*) Gracè *ναρὴν* unde Hieronymus : *Nescit homo tempus suum.* & Symmachus , *Opportunitatem suam.* Nimirum si homo nosset ultimam illam suæ vitæ periodum ; quàm hæc illi foret opportuna ! vix unquam salute suâ periclitaretur . Nunc autem later homines illa salutis opportunitas ; & quia latet , multi , qui procul eam putant esse ,

M 5 dum

dum semper eam excipere negligunt, pereunt. *Fronte capillatâ, retro est occasio calva.* Subdit Ecclesiastes. *Sicut pisces capiuntur hamo, & sicut aves laqueo comprehenduntur: sic capiuntur homines in tempore malo, cum eis extemplò supervenerit.* Enucleemus singula. *Sicut pisces capiuntur hamo.* Qui *piscium* nomine, nisi mali signantur, qui securissimi mortis, in mediis voluptatum fluctibus dum lulant, lethalem mortis hamum vorant, subitòq; expirant. ? Quò facit Chaldaicus paraphrastes, qui non quosvis pisces, sed, *pisces maris* vertit: ut enim his est maris falsedo: sic illis peccati turpitudine comes. *Sicut aves laqueo comprehenduntur.* In Hebræo est *Tsi-phorim*, quæ vox propriè *passeres* significat, Salacissimos avium, quarum naturam moribus exprimentur impii, eòq; etiam earum instar laqueo comprehenduntur. *Sic capiuntur homines in tempore malo.* Septuaginta vertunt: *illaqueantur homines;* illi videlicet maximè, de quibus Apostolus: *carnales estis, & secundum hominem ambulatis.* Hi namque vel maximè passerum similes sunt; furtis & rapto viventes, liberè vagantes, nullis adstricti legibus Errores, canoris dediti nugis, nunc viridi membra sub arbuto strati, nunc ad aquæ lene caput sacra voluti, nunc in aprico campi gramine supinati; multi temporis, multarumq; opum prodigi alienarum; quoniam non ferunt, neque metunt, in labore hominum non sunt, & cum hominibus non flagellabuntur; sed deniq; subitæ mortis, tanquam aucupis insidiis excepti, tenaci voluptatum visco impliciti suâ cute rem solvunt aucupi, nequidquam perennis incendi

dii poenam deprecari. Hanc enim facile vitare potuissent, nisi præcipites in exitium, Antabatarum more, ruiſſent, nisi oculos clauſiſſent, ne viderent cœlum, retēq; extenſum. Fruſtra enim jacitur rete ante oculos pennatorum. *Cum eis exemplo ſuper-veniret.* Prudenter hîc Cajetanus & Pineda noſter obſervant inevitabilem repentinæ ſupplicii neceſſitatem deſignari, quæ à ſuperioribus cauſis impendeat. Porro quæ ſuperiora ſunt, præterquam quod ineluctabilem perniciem aſſerant, illud etiam habent, quod vix videantur, & caveri nequeant, quod minimè ſint oculis ſubjecta. Eodem facit interpretis Chaldaici paraphraſis: *Quod ruiturum eſt ſuper eos puncto uno calitus.* Quæ verba non ſucceſſivum quendam motum (ut loquuntur Philoſophi) ſed celeritatem fulmini cœlitus devolanti ſimilem, & iſtantanæam mutationem ſignificant. In hac autem neq; conſilio ullus eſt locus, ut irruens periculum evitari poſſit. Eſt igitur, quod ſibi à ſubita mortis irruptione metuant improbi, quando ipſa illorum peccandi libertas eos moriendi periculis objicit; perinde ut pullos galinaceos falco vel accipiter tum facile abripit in prædam, cum illi corte caveaq; egreſſi, procul domo vagi ad libertatem camporum aſpirant. Pleni ſunt annales exemplis eorum, qui vel in ipſo peccandi aſtu, vel obruti ſceleribus, vivere ſubito deſierunt. Liceat de plurimis unum alterumve deligere. Vir in Aſſatia de Comitum genere, dum pro more à meridianâ quiete generoſo vini hauſtu parat ſomnum abluere, videt ante ſe craterem cryſtallinum repente diſſilire.

disilire. Rei novitate contritus, alterum Scyphum vino impleri jubet; quo item fracto, mortis præfagus, Confessarium inclamat, dissimulantibus eam curam domesticis. Rupto deniq; jam tertio vitro, atq; ad extrema declinante Hero, Bruntrutum ad P. P. Societatis Confessarii evocandi causâ excurritur. Sed dum famulus itinere sibi notissimo, sylvulâ interjacente totam noctem oberrat, Herus ante noctem mediam fit funus. (*Stengelius de Ovis Paschal. emblem. 74.*) Quàm verè Augustinus: *DEUS pœnitentibus veniam promissit, peccantibus pœnitentiæ spatium non promissit.* (*Tr. 33. in Joa.*) Et Poëtarum quidam:

Cui pœnitere cùm licet nunquam libet,

Huc pœnitere cùm libet, nunquam licet.

Hoc Comite haud paullò infelicior fuit Princeps Salernitanus (nomini parcitur) qui fortè conspicatus Vesuvium montem flammæ eructantem: *Dubio procul*, inquit, *sceleratus quispiam dynasta propediem extinguetur.* Solet enim Vesuvius, quoties alicujus flagitiosi dynastæ mors imminet, flammæ ejectare. Sibi ipse Princeps infelix, malum omen cecinit. Mox enim eâdem nocte cùm illicitis cujusdam lupæ complexibus securus indulget, expiravit. (*Damianus l. 1. ep. 9. ad Nicol. Pont.*) Minimè profectò morus fuit Thomas ille Morus, quando sic sentiebat:

Siquis ad infernos properat descendere Manes

Huc iter accelerant balnea, vina, Venus.

Debet suam huic versiculo experientiam Mystes quidam in Gallia, non tam Numini, quàm Veneri devotus, quantò ditior, tantò vanior, qui sui sacer-

dotii

dotii votique vel immemor, vel contemptor, primum domestico infamis pellicatu, mox etiam (velut avo nostro Lutherus Hærenarcha) publicis nuptiis celebratis, sacrilegum vesperi thalamum subiens, dum suæ misceretur adulteræ, repenti Sacrilegam animam exhalavit. Sic, sic remunerari debuit (epiphonema est Cardinalis Petri Damiani) qui de *Sacrario Domini ad exolitum lupanar suumq; volutabrum transire decrevit.* (Petr. Dam. ep. 14. c. 6.) Quæ profectò tragica in flagranti, ut ajunt, scelere morientium exempla, quid aliud peccatorem monent, quàm ut ipse quoque, quorum vitam imitatur, exitus perhorrescat? Quàm facile est vitrum humi allisum frangi, tam facile hominem derepenti mori. *Non magno negotio*, ait Gregor. Nyssenus, *utrem spiritum exinaniri cernis, si vel modicum pandatur os, aut spiraculum pateat: neq; est difficile hominem momento temporis animam emittere.* (contra differ. bapt.) ut proinde nihil æquè cordi Mortalibus esse expediat, atque illam Sapientis admonitionem: *Noli esse stultus, ne moriaris in tempore non tuo.* (Eccle. 7.) Ubi *stultitia* nomine Peccatum intelligi, ex plurimis aliis Paginæ sacrae locis possumus conjicere. Cum igitur dicit: *Noli esse stultus*; perinde est, ac si dehortetur; *Noli peccare, noli peccato inhærere, noli salutem in discrimen vocare.* Quæ verò hujus dehortationis potissima ratio? *ne moriaris in tempore non tuo.* id est, quantum fas est assequi, nè fortè subito, improvise, & imparatus hinc abripiâre. Duo namq; sunt tempora morti nostræ statuta. alterum à Deo,

Deo, alterum à nobismetipsis, Tempus à Deo decretum est verum & infallibile. *Posuisti terminos ejus, qui prateriri non poterunt. (Job. 14.) & Mensurabiles posuisti dies ejus: (Psal. 38. 6.)* Id verò quod à nobismetipsis imaginatione nostrâ constituitur, fallax est & incertum. Homo plerumq; diuturnam sibi vitam pollicetur, & hoc est tempus ipsius; quod si à morte præventus subito ex hac vita tollatur, moritur in tempore non suo, atq; ita imparatus moritur, supplicio deputandus æterno. Quamobrem quisquis ista legis, noli esse stultus, ne moriaris in tempore non tuo. Noli sceleribus indulgere inducias, noli vitam longam & diuturnam sperare; sed potiùs time mortem repentinam, & ad moriendum omni tempore paratus esto; cùm fieri possit, ut hoc ipsum tempus, quo vivis, sit tuæ morti à Deo constitutum. Ita videlicet quàm maximè sapias, & propulsatâ stultitiæ notâ, repentinam illam calamitatem effugies, quam refractariis peccatoribus minatur vindex Deus apud Salomonem: *Vocaui, & renuistis: extendi manum meam & non fuit qui aspiceret. Ego quoq; in interitu vestro ridebo, & subsannabo, cùm vobis id, quod timebatis, advenisset, cùm irruerit repentina calamitas.*

(*Prov. c. 1. v. 24.*)



CAPUT III.

Morti repentinæ Iustos etiam obnoxios esse.

Usitatum est divinæ justitiæ in sceleratos homines subitâ morte, tanquam commérito dignoq; ipsis supplicio animadvertere secundum illud Psalmographi *Mors peccatorum pessima*; (Ps. 33. v. 22.) & illud D. Cæsarij Ep. *Percutitur hac animadversione peccator, ut moriens obliviscatur sui, qui vivens oblitus est DEI.* Hinc pessima mortis nomine Theodoretus attendens proprietatem verbi Græci *πῶρος* intelligit *prævum & malum* genus mortis, quæ scilicet non sit communis reliquis hominibus, sed amplius aliquid & gravius habeat, sicuti Assyriorum interitus, qui mortem formidabilem subire usq; adeo repente & inopinatè Angeli cæde prostrati, Ità ferè Theodoretus. Quare commonetur impius tanti discriminis illis Sophoniæ verbis: (cap. 2. v. 1.) *Convenite, congregamini gens non amabilis, antequam pariat insusio quasi pulverem transeuntem diem, id est, antequam repentino turbine & sava tempestate subito exorta & pulvere excitato obruamini, repentino nimirum interitu, qui velut æstiva tempestas vos momento prosternat, & brevissimè transeat, nullâ longioris morbi præcedente molestia.*

Quæ quidem utrunq; se sic habeant: non semper tamen aut vindictæ divinæ, aut improbitatis humanæ

manæ argumentum erit repentinus ex hac vita exitus. imò verò singulare divinæ providentiæ munus reputandum, si eo tempore mors hominem abripiat, quo is Dei gratiâ vestitus, jus habet adeundæ hæreditatis æternæ. Non disiteor multa esse lentæ mortis, com-
moda, quippe quæ spatium indulgeat saluberrimis Sacramentis muniendi animum, de rebus suis rectè disponendi, exercendi patientiam in morbo, præmit-
tendi egregios virtutum omnigenarum actus: si ta-
men ita salutem nostræ consulere statuit suavissima Dei providentiæ, ut eam subita morte securiorem reddat, quid amplius requiramus, nescio; cùm Sacramento-
rum ipsa perceptio eò spectet, ut in divina gratia perseverare possimus. Adde, quòd hinc subito mi-
grantes liberi sint à gravissimis tentationibus & insi-
diis, quibus lento in agone positos summâ vi, & ex-
tremis conatibus demones impugnant. (*Eccle. 9. 12.*)
Nescit homo finem suum, nescit quod mortis genus, lentumne, an violentum sibi magis ad salutem profi-
ciat. *Omnia in futurum servantur incerta*; tum sciet, cum placuerit supremo Numini revelare. S. Joan-
nem Eleemosynarium Patriarcham Alexandrinum, Mercator adierat, oblati eidem septem auri libris, multumq; rogans, preces pro filio funderet, iisdemq;
felicem navis onerariæ ex Africa reditum à Deo impe-
traret. Fecit quod rogabatur piissimus Præsul, cùm interim filius moritur, navis rerum omnium, salvæ tamen vectori-
bus, ex tempestate patitur jacturam. Tristissimo casu perturbatum navis Dominum con-
solaturus S. Patriarcha, secundum quietem eidem
comparcet;

compareret, itaq; affatur. *Quid tu ita mores? Sal-
vum volebas filium: est verò salvus, & à vita malis
illesus. Quòd si diutius vixisset, evasisset improbus,
eòq; indignus, qui eum creaverat. Porro navis, ni
orasssem ego, una cum tuo fratre, & vectoribus omni-
bus perisset.* (Ribad. Flore Sanct. part. 2. 23. Jan.)
En, ut profit interdum derepentè, ac pramaturè mori.
Mors mala non est, ait August. *quam bona vita præ-
cessit. Neq; enim facit malam mortem, nisi quod se-
quitur ipsam mortem* (lib. 1. de civ.) Pessima mors
est, quam socia mortalis delicti culpa damnat; preti-
osa, optandaque, quam divina stipat gratia. De-
precatur, scio, Ecclesia mortem subitanèam: Sed
non simpliciter, verùm improvisæ conjunctam. *A
Subitanea*, inquit, *& improvisa morte libera nos
Domine.* Subitanea mors bona esse potest, improvi-
sa nunquam. Improvisa enim aliud nihil est, quàm
non prævisa, imparata, ex inopinato superveniens,
& hominem ad piè moriendum paratum non reper-
iens. Talis autem mors quoniam semper mala est, id-
circo Ecclesia non ait absolutè, *A subitanea morte*,
verùm adjungit, *& improvisa.* Ad rem appositè S.
Anselmus: *Non nocet bonis si occidantur, vel subita
morte rapiantur. Non enim subito moriuntur, qui
se semper cogitaverunt morituros.* Quis omnes recen-
seat etiam è Sanctorum catalogo, quos repentina mors
hiscè terris surreptos cœlo inferuit. Sanè Sancti Ama-
tus, Cassius, Faustus, Virgilius, Garganus, Leontinus
Felix, Juventius, Vincentius, Galdinus, Decorosus,
Gaudentius, Agathonicus, Belinus, Catharina Virgo

sancta Birgittæ filia, Demetria, Theoclia, Sabina, Hilaria, ac alii aliaq; in sacris fastis repente obiisse traduntur. Illud, quod de S. Simeone stylita memorant, non parum habet admirationis Columnæ insistentis multos annos inter perpetuas Dei adorationes extraxerat, mirum cœlo & hominibus spectaculum factus, cùmque se colundique videret, petiit à Deo fulmine tolli, tanquam eâ morte à Deo vindice plecteretur. impetravit. cœlum tamen eodem momento petiisse cognovit Julianus Stylita, dixitque: *Ecce frater meus Simeon à fulmine dejectus interiit, & anima ejus transit cum trépudio & exultatione.* Quæ ubi narravit Raderus, meritò illud epiphonema subscripsit: *Itaq; reprime judicium, quando hic, ille, & quicunq; aliis atroci mortis genere sublati dicuntur. Nullum mors facit impium, sed impia vita deprehensos ustat à viâ ad lethum ducit; nec id semper, Sape scelerati pacatè obeunt, innocentes cum ingenti tormento.* Hæc Raderus. Legitur de quodam literato (ait Holckot lettione 48. & Kaisersberg Domin. Septuag.) quòd mortuus inventus fuerit sedens inter libros suos in sella, & habens in gremio suo librum apertum. Cùmque alii compatiētes advenirent, & multum de tam subita morte contristarentur; considerantes diligentius, invenerunt manum illius libro injectam, & indicem extentum in illud sapientiæ: *Justus si morte præoccupatus fuerit, in refrigerio erit.* (Sap. 4.) Justi nimirum præoccupantur ne diutius vivant, injusti, ne vivere deterius pergant. illos præoccupat mors ad refrigerium, hos ad incendium.

illi mortem obeunt subitanæ, isti improvisam: ac
idecirco mors illorum pretiosa, horum pessima. In-
ter pretiosas, quantumvis repentinæ mortis, referen-
dam esse mortem P. Francisci Cardosi è Societ. JESU
Sacerdotis & vitæ antea actæ integritas, & mortis oc-
casiō, & ejusdem circumstantiæ facilè persvadent.
(*Annua Coll. Ulyss. anni 1604.*) Is propter egregias
animi dotes omnibus apprimè carus, Concionator di-
cendi gratiâ præstans, ac virtute, modestiæ præsertim
præstantior, utpote cum summa voluptate ad puero-
rum, lixarum, mancipiorumq; institutionem sese de-
mittens, pridie suæ mortis de filio viduæ, qui defun-
ctus extra portam civitatis Naim efferebatur, Ulyssi-
pone dixerat tanto animorum motu, ut cum semper
extimè diceret, nunquam dixisse melius putaretur.
Horis item pomeridianis eandem de morte incudem
repetens, infinitam hominum multitudinem suspen-
sam attinuit, qui cygnæam illam vocem non sine do-
lore postea recordabantur. Ergo vir ille tantus post
canonicam precum recitationem in cubiculo mensæ
suæ assidens repertus est ab ædituo illum ad sacrifici-
um evocante repentè extinctus, tanto dolore omni-
um, qui eum noverant, ut fuerit, qui mœrore ni-
mio morbum sibi mortemque consciverit. Felicem
fuisse illum repentinum obitum ipse indigitasse visus
est. (*Nadasin Pret. Occup. c. 37. n. 9.*) Nam alii ad
extinctum acciti reperère porrecto in apertum librum
digito, impressa istis hæc verba monstrantem: *Beati*
mortui, qui in Domino moriuntur. Beati utique, &
iterum beati, quicumque seu lentè, seu violentè, dum-

modò *in Domino*, id est, DEO cari, nullâ lethiferi criminis maculâ exosi, cœlo angelisque grati moriuntur; quique nullis nominibus Inimico obnoxii, sed ad DEI solius jura pertinentes, gloriari possunt cum Apostolo: *Sive vivimus, sive morimur, Domini sumus.* (ad Rom. 14. v. 7.)

CAPUT IV.

Prima ad mortem repentinam præparatio, Vigilare.

Quandoquidem, ut vidimus, Justi æquè ac Injusti mortis repentinæ telis sunt expositi, disquiramus nunc, quibus illa clypeis refringi queant, ut ne incautos opprimant. Minus enim jacula feriunt, quæ prævidentur, ait M. Gregorius, & nos tolerabilius mundi mala (quorum extremum mors) suscipimus, si contra hac per præscientiæ clypeum munimur. (hom. 35. in Eu.) Porro præstantissimum adversus præcipientes Libitinæ ictus præsidium esse *Vigilantiam*, in *Arte moriendi* non minùs piè, quam eruditè docuit Robertus Card. Bellarminus, cujus Viri quantò major est in Ecclesia universa autoritas, tantò ampliorem fidem & gravius pondus verba ipsa apud omnes invenient. Sic igitur ille l. 2. c. 14. *Quibus extra morbum consuetum imminet mortis discrimen, & mors illis impendet improvisa, nullum aliud remedium habent, nisi quotidianam, vel potius continuam mor-*
sis

tis memoriam. Atq; ad hos propriè pertinet gravissima illa Domini Salvatoris admonitio: *Vigilate, quia nescitis diem, neq; horam.* Gravis quidem, sed pretiosa necessitas, quæ ad optimam & utilissimam compellit. Si diceret Dominus, *Vigilate nudi in aere frigidissimo, donec congeletis, & disruptis undiq; carnibus extingamini, ut Quadraginta Martyres olim vigilaverunt; nōne id faciendum esset, ut securi ad æternam felicitatem & læti perveniremus?* Et si diceret, *Vigilate nudi & craticula alligati, donec à subiecto igne ardenti cum intimo & accerrimo dolore consumpti de vita recedatis, ut quondam cum S. Laurentio actum fuisse legimus; nōne id quoq; alacri animo faciendum esset, ut gehennam ignis æterni evaderemus?* At non hoc jubet Dominus Deus noster omnibus nobis; sed ut vigilemus, ne dormientibus nobis fur nocturnus adveniat, & aurum charitatis vel gemmam pretiosissimæ castitatis, vel thesaurum fidei, aut alia veræ virtutis bona nobis in peccato dormientibus eripiat; & somno peccati lethalis oppressi, & morte præoccupati, regni cælestis jacturam faciamus, & in gehennam igne inextinguibili ardentem projiciamus. Hæc ille. Quibus consimilia adfert lib. 1. c. 4. ante finem, atq; ita dixerit. Officium servi fidelis est, ut semper vigilet, incertus quando Dominus veniet. Beati servi illi; quos, cum venerit Dominus, invenerit vigilantes: (Luc. 12.) Noluit Dominus noster id efficere, ut homines omnes certo tempore de vita discederent, ne toto tempore præcedente indulgerent crapulæ & ebrietati, ludis & jo-

N 3

cis,

cis, aliisq; operibus malis, & paulò ante mortem converterentur ad Deum. Vult igitur divina providentia ut nihil esset incertius horà mortis, dum alii moriuntur in utero matris, alii vix nati, alii in extremo senio, alii in flore juventutis: & rursus alii diu languent, alii repente moriuntur, alii à morbo gravissimo ac panè incurabili convalescunt; alii leviter agrotant, & cum videntur à morte securi, crescit morbi vis, eosq; extinguit. Ad hanc incertitudinem designandam Dominus noster in Evangelio dicit: (Luc. 18.) Et si venerit in secunda vigilia, & si in tertia vigilia venerit, & ita invenerit, beati sunt servi illi. Hoc autem scitote, quoniam si sciret paterfamilias quà horà fur veniret, vigilaret utiq;, & non sineret perfodi domum suam. Et vos estote parati; quia quà horà non putatis, Filius hominis veniet. Porro ut intelligeremus, quanti momenti sit nobis persuaderi incertitudinem temporis, in quo Dominus ad iudicandum veniet, sive in morte singulorum, sive in fine mundi; nihil sepiùs scriptura sancta repetit, quàm vocem illam, *Vigilate*, & similitudinem furis, qui venire solet, quando minimè creditur esse venturus. Verbum, *Vigilate*, repetitur passim in Evangeliiis Matthæi, Marci, & Luca; & similitudo furis non solum in Evangeliiis, sed etiam in Epistolis Apostolorum, & in Apocalypsi. Unde intelligi potest, quanta sit negligentia & ignorantia, ne dicam dementia & stultitia maxime partis hominum, qui toties admoniti ab ipso Spiritu veritatis per Scriptores sanctos, qui mentiri non poterant, ut præparemur ad mortem,

ut ad

ut ad negotium maximum & difficillimum, & à quo pender sempiterna & summa felicitas nostra, vel sempiternum summumq; exitum; tamen pauci sint, qui ad voces, vel potius tonitrua sancti Spiritus excitentur. Hucusq; sanctus pariter ac doctus Card. Robertus.

Ex quibus illud conficitur, unumquemq; hominem, cum incertæ morti atq; repentinæ subiaceat, ita esse vigilem, ita semper circumspectum debere, ut in omnes peccandi occasiones attentus, diligenter caveat, nequâ viâ sese peccati lethiferi vipera in anum ingerat; imiteturq; militem aliquem belli tempore pro excubiis vigilantem. Hastâ ille, vel gladio, vel scuto munitus, & quaquaversus circumspiciens, capitale putat, si à somno vincatur: si quem observet obvium, sine mora, *quisnam ille sit*, clamore explorat; confiteri nolentem in prodicionis suspicionem vocat, armis, ut hostem aggreditur, planèque de medio tollit. Pariter miles Christi semper pro rationis specula excubet necesse est, nulli se negotio, actioni, aut animi remissioni ita immergat, quin ad id, quod agit animo sit vigili atq; expectato, ad minimum tentationis irrepentis strepitum illicò asurgat, cogitatum omnem, & voluntatis impetum severè examinet, & illud Josue inclamans, *Noster es, an adversariorum?* (*Jos. 5.v.13.*) discernere satagat inter impuritatis fuliginem & honestatis lucem: tum, si quid observet, quod ad illicitam actionem trahat, arma spiritalia subito expediat, & conatus hostiles actutum profliget. Quibus

verò armis instructus esse debeat, S. Augustinus insinuat, (*De verb. Dom. Serm. 23.*) quando ad vigilantiam ita nos hortatur. *Vigilate, quia nescitis diem, neq; horam. Sic clausi Evangelium: Corde vigila, fide vigila, spe vigila, charitate vigila, operibus vigila: & quando corpore dormieris, veniet tempus, ut surgas. Cum autem surrexeris, prapara lampades. Tunc non extinguantur, tunc in interiore conscientia oleo vegetentur: tunc sponsus ille incorporeis nexibus amplectatur. tunc te introducat in domum, ubi nunquam dormias, ubi nunquam possit tua lampas extinguì. Ita S. Doctor.*

CAPUT V.

Altera ad mortem repentinam Preparatio, Conscientiam sedulò discutere.

HOc quoque consilium, seu potiùs antidotum adversùs mortis repentinæ virus exhibet modò laudatus Card. Bellarminus, (*de Art. mort. l. 1. c. 4.*) qui eodem capite, quo mortales omnes, ac præsertim subitæ morti obnoxios ad Vigilantiam adducere studuit, ejusmodi Quæstionem proponit: *Sea dicet aliquis, Quid consilii nobis suggeris, ut vigilemus sicut oportet, & vigilando ad mortem feliciter obeundam præparemur? Tum ità respondet. Nihil utilius mihi occurrit, quàm ut frequenter per serium consci-*

conscientiæ examen ad mortem nos præparemus. Et quidem Catholici homines singulis annis ad confessionem peccatorum accessuri non omittunt conscientiæ examen, Et rursus cum agrotare incipiunt, ex decreto Pij V. Pont. Maximi prohibentur Medici agrotos secundo invisere, nisi per confessionem peccata, præmisso conscientiæ examine, expiaverint. Denique, nulli ferè sunt in Ecclesia Catholica, qui morte imminente, præmisso conscientiæ examine, peccata sua non consteantur. Sed quid dicemus de illis; qui morte repentinâ abripiuntur? quid de illis, qui phrenesi laborant, vel in delirium incidunt ante confessionem? quid de illis, qui morbi gravitate oppressi, ne cogitare quidem possunt, quot & quæ peccata commiserint? quid de illis, qui moriendo peccant, vel peccando moriuntur, ut qui in bello injusto, vel singulari certamine, vel in adulterio deprehensi interficiuntur? Ad hæc & similia prudenter & religiosè vitanda nihil utilius excogitari potest, quàm, ut, qui salutem suam æternam cordi habent, bis diebus singulis, manè videlicet & vespere, conscientiam suam diligenter discutiant; quid videlicet nocte vel die præcedente egerint, dixerint, cupiverint, cogitaverint, in quo peccati labes intervenerit: & si quid ejusmodi repererint, præsertim quod lethale videri possit, non differant veræ contritionis remedium querere, cum proposito primo quoque tempore ad Sacramentum pœnitentiae accedendi. Itaque petant à Deo contritionis donum, recogitent gravitatem peccati, detestentur ex animo culpam suam, discutiant serio

quis quem offenderit, homunculus videlicet DEUM omnipotentem, & servus inutilis Dominum cœli & terre; non parcat oculus lacrymis, nec manus unctioni pectoris; deniq, propositum verum & efficax concipiant, DEUM nunquam amplius peccato irritandi, neq, Patrem optimum offendendi. Hoc examen si manè & vespere, aut saltem semel in die rite frequentetur, vix fieri poterit, ut quis moriendo peccet, vel peccando moriatur, vel ut delirio, vel amentia, vel casibus aliis preveniatur. Atq, ex hoc fiet, ut bene ad mortem comparatis nobis neq, incertitudo mortis officiat, neq, vitæ perpetuæ felicitas desit.

Hæc omnia eruditus Bellarmini calamus. Quibus si quid addam de meo, vereor, ne pulcherrimo phrygiâq; acu picturato tapeti vilem pannum assuam, ornatûmq; minuam. Hoc unum tantummodo rogare est animus, ut, quisquis hæc legit, tam facili salutis remedio uti ne gravetur, quod rite frequentatum, ex mente Bellarmini, & mortem repentinam reddere felicem, & perpetuam felicitatem assecurare potest. Nam quod de Salute, seu honestate morum Romanus Sapiens, (Ep. 25.) hoc idem ego de salute æterna asserere possum: *Initium est salutis*, inquit, *notitia peccati*. Nam qui peccare se nescit, corrigi non vult. Deprehendas te oportet, antequam emendes. Tu existimas aliquid de remedio cogitare, qui mala sua virtutum loco numerant? Ideo quantum potes, teipse coargue. inquire in te. accusatoris primum partibus fungere, deinde judicis, novissimè deprecæ-

deprecatoris. aliquando te offende. Id est, pœnam tibi pro peccatis statue, flagella in cute, pectus plange, lacrymis indulge, &c, quod aliquando sivalit S. Xaverius: (*Lsb. 2. ep. 2*) *collectum culparum acervum damnans ultero ipse prior, & intimo dolore abominans, absolve divini amoris igne, qui solus vim habet iis ablueendis parem: & verâ contritione, ex Dei summè amabilis perfectâ super omnia charitate penitus concepta, erade quantum potes, ac funditus dele, toto in id connitens conatu cordis. Hoc examinis quotidiani clypeo nisi se adversus repentinæ iñtium munisset, periisset æternum adolescens ille, de quo Nadaſi in signis prædestinationis (*Sign. 12, n. 2. cap. 1.*) Jam vesperi decubuerat, cùm inter disquisitionem conscientie venit in memoriam peccati lethalis à se die illo patrati. Exhorruit, & illicò accitum è famulis unum ad Confessarium præmisit, nuncians brevi se secuturum. Necdum concesserat cubitum Confessarius. Adfuit mox ipse juvenis cum suis: & conscientia rite expiatâ domum redux lectulo se reddidit, qui ei supremus somnus fuit, quippe manè è dormiente repertus est mortuus, famulis rei consciis atq; demirantibus. Eat nunc qui volet, & retentâ in sinu mortalis noxæ viperâ somno se committat; tibi, Lector, in more contrarium esto, nec prius in dulcem declinent lumina somnum, quàm, juxta monitum D. Basilij, *arcános recessus, & conclave cordis tui solerti indagine perscruteris.* (*in c. 1. Isai.*) Hoc profectò agere Electorum est, Reproborum negligere. Id quod disertè docet M. Gregorius*

(25. Mo-

(25. Moral. c. 6.) hâc oratione: Debet unusquisq; & causas suas apud Dominum, & causas Domini contra se sollicitâ disquisitione discutere: debet cautè pensare vel quæ ab eo bona perceperit, vel quæ mala bonis illius perversè vivendo responderit. quod Electi quidem quotidie facere omnino non cessant. Reprobis verò esse proprium solet, semper prava agere, & nunquam, quæ egerint, retractare. Omne enim quod faciunt, cæca mente pertranseunt, factumque suum, nisi cum puniti fuerint, non agnoscunt. At contra Electorum est, actus suos quotidie ab ipso cogitationis fonte discutere, & omne, quod turbidum profluit, ab intimis exsiccare. Quisquis igitur Electorum syllabo accenseri peroptas, hâc Eorum notâ vide nè careas. Si nos ipsos iudicaremus, non utiq; iudicemur, (1. Cor. 11. 13.) Qui Trapezita rationes suas rectè semper compositas habet, quocunque has tempore Dominus reposeat, paratus est reddere. Diligentius DEum omnia cooperantur in bonum. (Rom. 8. 28.) Etiam repentina mors tibi in salutem proveniet, si per quotidianam conscientiaë discussionem tuas cum Deo rationes rite composueris. Hoc te factò & Deum diligere ostendes, & ab eo vicissim amabere. Nam, ut ait mellissius Abbas: DEUS diligit animam, quæ in conspectu ejus, & sine intermissione considerat, & simulatione dijudicat semetipsam. (Serm. 3. de adv.) Non est ratio melior aut effugiendi divini iudicii, aut æternæ pœnæ, quàm accusare seipsum, seipsum punire. Quæ fuit sententia S. Fulgentij ita submonentis: Intra (quotidie)

*in secretarium cordis tui. Ibi te accusa, ut valeas
accusatione defendi: ibi te convince, ibi te puni, si
vis ab æternæ punitionis supplicio liberari. Serm.
in Micheæ cap. 6.*

CAPUT VI.

Alia ad mortem repentinam Præ- paratio, Quotidie mori.

DE usurpanda in dies, imò in singulas penè horas
pravarum omnium affectionum coercitione, quæ
hominem suis passionibus efficit mortuum, estq; re-
motà quidem, sed perutilis ad mortem lentam præ-
paratio, egimus part. I. cap. 5. Nunc illud sva-
demus, ut qui mortì violentæ seu repentinæ intrepido
pectore cupit occurrere, partem sibi aliquam diurni
temporis deligat, quâ sese à medicis depositum &
morti jamjam succubiturum consideret, iisque animi
sensibus & affectibus, quibus extremo illo tempore
uti vellet, seipsum exerceat. Cui exercitationi ap-
primè, ut opinor, serviet *Commendatio animæ*, ab
Ecclesiâ moribundis Fidelibus prælegi solita, hîc verò
pag. 192. eatenus tantùm, ut à sanis usurpari pos-
sit, immutata.

Quæ si minis arriserit, aut si varietatis gratiâ
plures ejusmodi exercitationis methodos præstò quis
habere voluerit, eo apparatu quotidianæ mortis ut-
atur, quem Franciscus le Roy in *Occupatione animæ
Crucifixo devoto* hunc ferè in modum proponit.

Primò:

Primò : Suprà in manus aut sinum Christi in cruce pendentis effigie, & mortis horam veluti præsentem cogitatione fingens, agnosces imprimis sub illa figura Dominum Creatorem ac Salvatorem tuum, qui amore tui per summos dolores & opprobria in infami illo paribulo mori sustinuerit, quo te à diaboli servitute eriperet, & morte suâ amarissimâ vitam tibi beatam æternâq; gaudia compararet.

Secundò : Teipsum & anteaactam vitam respiciens, recogitabis illi omnes annos tuos in amaritudine animæ tuæ, dolebisq; vehementer, quòd hæcenus negligenter & remissè, seu etiam nequiter sceleratèq; vivendo adversus tantum amorem ingratus, non modò amorem amoris non reddideris, sed ipsum benignissimum Dominum tuum criminibus tuis (quod in te fuit) rursus crucifixeris, divinûmq; ejus sanguinem tam amanter & largiter pro te fusum quodammodo conculcaveris.

Tertiò : In hujus vecordiæ tuæ cogitatione, timore, dolore, verecundiâ, horrore confusus, te veluti reum, & quovis dignum supplicio ad ipsius pedes abjicies, oculisq; in terram defixis, tanquam si offensi Redemptoris vultum non sustineres, admissorum tuorum veniam postulabis; rogans, ut infelicem animam tuam mundare dignetur pretioso suo sanguine, & te veluti prodigum filium de regione longinqua deniq; revertentem recipere in gratiam & brachiis immensæ suæ charitatis amplecti.

Quartò : Deinde cum animo tuo considerans, Christum JESUM ad hoc venisse ut peccatores qua-

reret,

reret, ac pro iis salvandis (ac pro te nominatim) mortuum esse; in eum amanter te projiciens, omnem spem tuam atq; salutem in ejus sacris vulneribus ac sanguine constitues; certus, hujus pretium in immensum excedere quamcunq; tuorum peccatorum gravitatem. Quorum memoria si supervacuè te sollicitet: colliga ea in fasciculum, & in incensam illam charitatis fornacem, in Salvatoris cor, ad comburendum immitte. Fidenter dic aeterno Patri: Pater, peccavi in coelum, & coram te: sed pro me interpellat, & pacem exorat Unigenitus tuus. Pro me vulneratus, pro me crucifixus, pro me mortuus est. Habes quondam grandis debiti reum: sed chirographum obligationis meæ filii tui sanguine deletum est. En apocham meæ liberationis. Attende Unigeniti vulnera, & obliviscere peccata mea.

Quintò: Inter hos, similésve affectus, Salvatoris in cruce discenti nunc hæc, nunc illa membra complectere: Rosea ejus vulnera identidem disfaviare: in ipsius corde vulnerato, ceu sanctæ fiduciæ ara, & divini amoris officina libenter ac diutiùs immorare: os ejus divinum ori tuo, tanquam aut illius morientis spiritum excepturus, aut tuum in illum transfusus, amanter apprime.

Ad extremum: In ipsius manus, corpus, animam, vitam, & ipsam aeternam salutem tuam fidenter committes; paratus ad omnem ejus nutum & placitum, seu te porrò vivere, seu mori velit: & totum quod es, aut totum quod habes, opes honores, titulos &c. ad pedes Crucifixi deponens & quasi restituens;

tuens; quòd hæcenus & vitam, & ista vitæ seu com-
moda, seu ornamenta liberaliter tibi præstiterit, ei
gratias ages. Tandem veluti pertæsus istius mortalis
vitæ, atq; æternorum incensus deliderio, anhelabis
subinde ad conspectum ejus, & his B. Gertrudis vo-
cibus ad illum suspirabis: (*Blos, in piis prec.*) *O*
7 E S U mi chare, quando corpus meum revertetur in
pulverem, & anima mea liberè refluet in te suam
originem? Atq; hæc est illa quotidie ante mortem
moriendi methodus, cujus serius ac diligens usus non
parum conferet etiam ad vitam ipsam purè & sanctè,
adeòq; tranquillè ac beatè transigendam. Bene si-
quidem viveret, qui bene mori didicerit: sicut è diverso
verum est illud Senecæ: *Malè vivet, quisquis ne-*
sciet bene mori. (*de tranq. anim. c. 11.*) Neque
verò ulli hoc studium, aut præposterum aut intem-
pestivum videbitur, si cum animo suo reputaverit
hinc humanæ vitæ incertitudinem, inde verò rei,
de qua agitur, magnitudinem & pondus æstimave-
rit. Quippe cùm ejusmodi exercitatione discamus
bene mori, & ars bene moriendi sit artium omnium
longè præstantissima; ingens sanè operæ pretium is
fecisse censendus est, qui ei disciplinæ quotidie se-
dulam operam navavit, cui perdiscendæ omnem utiq;
vitam æquum sit impendi. Audiatur modò laudatus
Romanus sapiens hac de re ad amicum Lucilium
præclare, & tantum non Christianè scribens: *Magna*
res est hac, inquit, Lucile, & diu discenda, cum
adventat illa hora inevitabilis, æquo animo abire,
(ep. 30.) Et rursum: *Fix tota vita sufficiat, ut hoc*
ànnum

unum discas, vitam contemnere. (ep. iii.) Et alio tractatu: *Vivere totâ vitâ discendum est, &, quod magis fortasse mirabere, totâ vitâ discendum est mori.* (de brev. vit. c. 7.) Ut jam neminem deceat vel aliquam ocii diurni partem in hanc exercitationem non conferre, vel occupationum multitudinem excusationi prætere. Quotusquisq; enim tam est egens temporis, quin illius portionem aliquam, non modò honestæ remissioni, sed rebus etiam supervacaneis donare possit? aut quæ tandem occupatio ei negotio anteferenda est, quo non jam tempori (quod ajunt) servitur, sed æternitatis Saluti Consulitur? Demus semel, obsecro, S. Augustino impugnantî manus, consulenti assensum; & facilè omnem illum curarum temporalium obtentum, æternæ salutis desiderio, mortisq; nobis insidiantis timore generosè disturbabimus, *Deputentur tempora*, monet S. Præsul, *distribuantur horæ pro salute animæ. Percant omnia, & dimittamus hæc vana & inania; conferamus nos ad solam inquisitionem veritatis. Vita hæc misera est, mors incerta: si subitò obrepat, quomodo hinc exhibimus? Et ubi nobis discenda sunt, quæ hic negleximus? An non potius hujus negligentiae supplicia luenda sunt?* (Lib. 6. Conf. c. 11.) Luenda profectò. Nullâ enim suppliciorum immunitate gaudebit, qui quamdiu potuit, ea quæ ad bene moriendum faciunt, discere neglexit. Hic locus Sapientiæ, hic sibi prospiciendi opportunitas: at verò nec opus, nec ratio, nec sapientia, nec scientia erunt apud inferos, (Eccl. 9. 10.) quarum adminiculo vel quærendæ, vel assecurandæ salutî consulatur.

Porro hujus, quam tantopere commendamus disciplinæ vel utilitatem vel necessitatem liquidò perspexisse visus est Venerabilis Pater Cæsar de Bus, is qui Religionis Patrum, quos vocant, Doctrinæ Christianæ, in Gallis autor atq; conditor fuit: qui sive ut morti, etiamsi repentina ingrueret, paratus occurreret, sive ut se assiduè ad sanctiorem vitam incitaret, quendam sibi tanquam sui funeris apparatus, aut veriùs pietatis scenam, istum in morem adornabat. (*Lib. 2. vit. c. 8.*) Aquæ sanctæ vasculum cum peniculo lustrali statuebat in scabello ad lectuli caput; ad pedes verò in scabello altero lucernam collocabat per noctem arsuram: tum sese in strato industrie componens, sumptoque inter manus Christi cruci suffixi signo, piis precationibus commendabat illi animam suam, perinde atque si eam sibi noctem supremam fore intelligeret, aut confestim sibi è vita discedendum esset. Inter quas pias commentationes somno deniq; cedebat; ac luce postera eo in habitu evigilans, diem illam sibi singulariter ad sui emendationem à Deo concessam interpretabatur; eamque proinde in lucro ponens, perfectionis vitæ studium arripiebat ardentius, quasi se idcirco ab ipsis inferis divinitus ereptum, vitæque redonatum intueretur. Itaq; vir pius (quod sapienti faciendum præcipiebat Seneca) *nullo non die se extulit.* (*Ep. 12.*) Cumq; ex asceticæ vitæ præceptionibus ad quotidianam Spiritûs renovationem sanctumq; forvorem concipiendum, duo hæc plurimum valeant; diem omnem, vel tanquam primam religiosi studii, vel tanquam supremam

nam aspicere, uno illo invento utrumq; fecit: omni quippe die sese componens, rursus omni die tanquam superflus sibi vivens, quotidie cœpit de integro Deo vivere, quotidie postremum vixit. Quis jam tali viro Elogium illud modò laudari Senecæ attribuendum negaverit: *Ille beatissimus est & securus sui possessor, qui crastinum sine sollicitudine expectat. Quisquis dixit, Vixi; quotidie ad lucrum surgit.* (Epist. 12.) Habuit verò Casar egregium sui imitatore P. Martinum Stredonium notæ sanctitatis in Provincia Bohemiæ S. J. virum, Brunæ Præpositi Provincialis munere & vitâ defunctum. (26. Aug. 1649.) Is enim per quinq; ultimos vitæ suæ annos singulis noctibus è lecto sese ad B. V. imaginem conferebat. Ibi per Beatam DEI Matrem pro felici morte supplex abjectus in genua, se in eo Statu collocabat, juxta S. P. Ignatii consilium, in quo ii esse solent, qui ultimo vitam inter mortemq; singultu migrantem jam animam trahunt, & jacent ad fores æternitatis infinitæ. Ex iis precibus, quas tunc frequentabat una erat: *Rex meus & Deus meus! dona mihi animam meam pro qua oro, & beatam ex hac vita migrationem, pro qua obsecro.* Ita quotidie factitantem Virum optimum mors denique non sine bonorum omnium luctu Provinciæ sustulit. quam quidem ille mortem tot ac tantis pietatis exquisitæ exemplis ornavit, ut ad eam sanctè obeundam vix aliquid præterea desiderari posse videretur. (*Vide Vitam & Nadaß. Præf. Occup. c. 32.*) Ut ere consimili exercitatione, Christiane Lector, & quod de paupertate imaginaria animo proponenda svadet

Romanus Philosophus, hoc tu tibi de morte facendum statue. *Neceſſarium* inquit, *iudico*; id quod tibi ſcripſi magnos Viros ſepe feciſſe, aliquos dies (imò ſingulos) reponere, quibus nos imaginariâ paupertate (nos dicamus, morte) *exerceamus ad veram.* (ep. 20.) Id proſectò ſi feceris, præter alios hujus Exercitationis fructus, illum quoq; referes, ut vel repentinam mortem non modò non ſis formidaturus, ſed cum P. Joanne Sigefreiter ita provocaturus: *Venias, o mors optata; non me terrebis. Ego jam paratus ſum, quantum tamen Religioſus (Chriſtianus) paratus eſſe poteſt. Te mors non timeo. Tamen me plus parabo, ſi plus temporis Deus mihi conceſſerit.* (Idem ibid. c. 34. n. 5.)

CAPUT VII.

Alia item ad mortem repentinam præparatio, Testamentum condere.

Quos divina liberalitas multis hujus vitæ commodis inſtruxit, auxit opibus, fortunis ditavit, quid eos in conficiendo ante obitum teſtamento ſervare oporteat Part 2. cap. 12. inſinuavimus: in præſenti de illo teſtamenti genere agemus, quod condere illi quoque poſſint qui ſe omni facultatum Dominio propter Deum ultro exſpoliaverunt, quòdque in ſpirituale bonorum libera quadam abdicatione conſiſtit, eorúmque;

eorumq; hæredem Deum ipsum constituit ultimæ voluntatis & motorem & testem. Erit autem hujusmodi testamenti confectio & frequens ratihabitio non leve adversus mortem repentinam præsidium: cum enim hæc omnem deliberandi, deq; rebus nostris statuendi facultatem præcidat; solent prudentes Viri suæq; salutis amantes his testandi modis insidias illius antevertere, &, quamdiu incolumes sunt, earum rerum, quas animus possidet, dominium in Deum transferre, quæq; tandem sit illorum ultima voluntas, mortis interventu, quæ sola legitimum facit testamentum, declarare. Hujuscemodi testamentorum paradigmata hic aliqua tum à Religiosis, tum à Secularibus Viris conditorum proponam, ubi prius formulam testamenti Religiosis idoneam in medium adduxero, à R. P. Daniele Pawlowski, S. J. Theologo nuper Calissij editam in lucem. (*Locut. Dei ad Cor die 4. pag. 75.*)

Praxis Testamenti Religiosi.

EGO NN. volo facere Testamentum ultimæ voluntatis meæ in omnem vitam & mortem meam, & in æternitatem valiturum, ad majorem DEI mei gloriam, & recreandum gustum, cor, beneplacitumq; divinum, ut consulam animæ meæ securitati: quod ex libera & beneplacente voluntate facere desidero, quantum mihi, ô SSS. Trinitas, Deus meus, per gratiam tuam & Domini mei JESU Christi, Preiosissimæq; ejus Parentis, & Sanctorum intercessionem, licitum est.

(Atq; hîc inprimis prævios actus huic Testamento accommodatos expedi; nempe actum Fidei, Spei, Charitatis, Contritionis, Gratiarum actionis pro beneficiis totius vitæ, Resignationis in omnem Dei voluntatem, Desiderii videndi SSS. Trinitatem; affectus erga B. V. &c.

Deinde ipsum Testamentum
sic aggredere.)

Ego mi Deus, amore tui, per gratiam tuam spoliavi me omnibus bonis terrenis, omni substantiâ etiam speratâ & concupitâ, spoliavi me omni honore mundano & capacitate ipsius; omnibus voluptatibus etiam per jus naturæ licitis; omni demum libertate propriâ ad faciendum, quod liberet meæ voluntati. His igitur jam pridem in sancto sinu tuo depositis, quæ mihi residua sunt ex dono tuo, de his, juxta beneplacitum tuum ita dispono.

1. Esse physicum corporis & animæ meæ tradendo omnium creatrici omnipotentæ tuæ, & protestor, te esse primum principium rerum omnium. Parce, si in primo usu rationis ad te non sum conversus.

2. Jus extremæ necessitatis defendendi vitam meam, trado svavissimæ Providentiæ tuæ, & protestor, te esse Dominum vitæ & necis, subdôq; me tibi ad omne genus mortis.

3. Dotem illam, cujus virtute per potentiam ordinariam secundum materiam & animam meam in nihilum recidere nequeo, trado divinæ immortalitati tuæ, & protestor me nolle esse, nisi propter te, & ut amem te.

4. Po-

4. Potentiam obedientialem meam trado effectori miraculorum potentia tua, & protestor, te Authorem omnium supernaturalium esse.

5. Alias tam corporis, quam animae potentias trado virtuti & potentia Humanitatis Christi, cui unionem hypostaticam gratulor.

6. Virtutes & habitus naturales, in anima residentes trado aeternae Sapientiae tuae, ei; me in aeternum discipulum devoveo.

7. Passiones omnes, & propensiones meas trado inclinatissimae in genus humanum propensioni tuae, cui in aeternum adhæreo.

8. Libertatem illam absolutam, quâ hoc momento maximus peccatorum esse, ipsumq; Luciferum adæquare malitiâ possum, subdo eminentissimae Libertati tuae, cui me in aeternum demancipo.

9. Famam & honores omnes, siqui mihi aliquo jure debentur, trado inprimis Supremae Dignitati tuae; deinde linguis & vilipensionibus, & obrektionibus hominum, ita ut nec post mortem ab hac obligatione eximi velim.

10. Merita omnia, si quæ habeo in Religione, ratione laborum meorum, trado Religioni meae; nec ab ea quidquam volo, nisi ut me tractet tanquam mancipium, & me inutile pondus post mortem in sterquilinio sepeliat.

11. Gratias omnes à te mihi, mi DEUS, collatas, & habitus omnes supernaturales in anima residentes trado & depono in manibus pretiosissimae DEI Matris, protestorq; me per manus ejus omnia accepisse, & hæc est aeterna protestatio mea.

12. Virtutes omnes supernaturales & acquisitas, si quæ sunt, trado infinitæ Bonitati tuæ, & peto, ut tandem consumat omnem malitiam meam.

13. Fructum adoratorium, & gratiarum actionum omnium actionum mearum trado eminentissimæ Majestati tuæ ad subdendos tibi omnes infideles & hæreticos

14. Fructum impetratorium omnium actionum & passionum mearum trado Misericordiæ tuæ pro existentibus in peccato mortali & agonizantibus.

15. Fructum omnem Satisfactorium tam mearum omnium actionum & passionum, quàm alienarum in vita, & post mortem ad me spectantem trado animabus purgatorii plenè & totaliter.

16. Sic me nudum exspoliatumq; in mero nihilo meo coram te statuo. Et sic, te solo contentus, mori volo, agonem meum agoni Christi uniens.

Sic me ex hac vita transfer, & misericordissimè fac me esse id, quod vis, Amen.

Sapiunt hæc omnia haustam è cœlo doctrinam R. P. Gasparis Druzicki, Posnaniæ An. 1662. cum magnæ Sanctitatis fama defuncti, cujus in spiritu discipulus & Vitæ Scriptor fuit. P. Daniel Pawlowski. Illius Vitæ capite 19. continetur prædicti P. Gasparis Testamentum, cujus exordium hoc est: *Ego volo testamentum pro vita & morte mea facere, propter maximam gloriam purissimamq; gustum DEI, propter certam salutem meam faciendam, quam certam facere ita ex mea libera voluntate volo, sicut ex Dei placito teneor, & sicut me gratia Dei, meritum*
JESU

*JESU Christi, suffragium Pretiosissime Parentis
MARIE adjuvat.*

Sequuntur deinde selecti ignitiq; in Deum Af-
fectus, quos in locum studiosè reservo: lubet nunc
Testamentum P. Georgii Sigismundi S. J. Viri ab in-
nocentia vitæ & Instituti observantiâ commendati
proferre, quod propria illius manu conscriptum in
hæc verba reperi.

Testamentum Georgii Sigismundi S. J.

IN nomine Domini N. JESU Christi. Ego Geor-
gius Sigismundi, annorum 38. mensium 7. cùm
jam magnis passibus viam universæ carnis ingrediar,
& non dubitare possim; quin velox & sit depositio
corporis mei, ita de mea domo per hoc Testamen-
tum, quod sanus mente & corpore condo, dispo-
nere decrevi.

Primò igitur. Cùm de manu Dei acceperim
omnia, & ipsius sint infinitis titulis, hac meâ su-
premâ volunrate me meaq; omnia illi quantâ possum
gratitudine restituo, & eam hæredem instituo, illi
ex nunc in æternum cor, corpus, animam, cogita-
tiones omnes, verba, & opera dico & dedico. Cre-
do, spero, diligo, & amplector Deum meum in
æternum.

2. Protestor coram Deo, & curia ejus univer-
sa, quòd cupiam in fide catholica Apostolica & Ro-
mana vivere & mori &, si quo casu intercepta voce
eloqui mea desideria non potero, jam peto ad pecca-

torum meorum veniam, Sacramentum Poenitentiae, Unctionis extremæ ad luctum, & Communionis Panem Angelorum ad viaticum, quod vehementer opto & sitio, sicut cervus ad fontes aquarum. Quod si mea recensere peccata nequivero, fateor me dolere ex sincero DEI amore ob ingratitudinem meam, ob teporem in Dei servitio, ob temporis perditam jacturam & alia peccata mea, & absolutionem Sacramentalem peto. Si tentatio spei me invadet, spero in Deum, & nolo desperare, donec videam & comprehendam illum. Si tentationem fidei suggeret hostis diabolus, ecce testes cœlum & terram & Te, SSS. Trinitas, hanc alienam esse à me, paratus fidem signare sanguine ac morte cum SS Martyribus. Abrenuncio Satanae, & pompis ejus: Deo verò soli adherere volo in æternum.

3. Ago gratias, ô Deus meus, quod me publicum & canem mortuum præ tot aliis derelictis primò ad Catholicam Ecclesiam, deinde etiam ad ipsam Filii tui Societatem elegeris. Laudate, obsecro, pro me Dominum vos Angelici Spiritus, & Patroni mei. Tu etiam dulcissima Mater hujus beneficii præcipua promotrix, age, quaeso, pro me ingrato servulo Patri misericordiarum & Filio tuo gratias in æternum.

4. Offero tibi Deus, quidquid reliquum est vitæ, fortè unius horulæ. Tibi enim posthac vivere, tibi mori volo. Tibi mea poma nova & vetera soli reservo, in tui honorem singula opera facere decerno, ac si ultima essent, & quidem in unione amoris tui ô

JESU,

JESU, MARIA. Mundo, carni, satanæ ne quidem horulam impensurus.

5. Vos Benefactores & amatores mei, maxime verò Tu ô mei amantissima Societas, à qua velut à matre tot annis tractatus fui: certa sis, quòd ubi venero in terram viventium & societatem triumphantium, uti spero, rogabo Dominum & nunc rogo, ut vobis reponat in millia. Rogo etiam ut adhuc sacrificiis, precibus, indulgentiis juveris animam meam, nequa remora in limine æternitatis felicissimæ fiat, sitienti ad fontem aquarum viventium.

6. Siqui verò, quod absit, adversarii estis mei, qui me aliquando offendistis, condono vobis coram Deo, qui scrutatur renes meos, de corde puro, propter amorem Dei mei: pacem vobis cum Domino JESU relinquo: quia tendo ad Principem pacis. Vos item, quos quacunq; ratione ego offendi, donate mihi obsecro, sicut Christus donavit nobis. Lego vobis & opto ex animo à Domino Deo, quidquid possum, quod ad salutem vestram esse possit; nec cessabo orare, donec vos in portu salutis æternæ complectar, & pariter cantemus Domino canticum novum in terra Beatorum.

7. De filiis meis spiritualibus & discipulis, quorum curam habui, sic dispono. Rogo Deum, ut ex illis ne quisquam perdat. Obsecro per viscera misericordiæ Dei, ut maneant constantes, ne separemur æterno chao & cœlo; & qui fide, spe, & charitate fuimus conjunctissimi, ne odio dividamur sempiterno. O mi Deus! protege illos, excita, dirige in omnibus

omnibus, sicut ipse novisti ad illorum perseverantiam optimè expedire: & Tu, ô Virgo, sis illis pientissima Mater. Ignosce mihi Domine, si, quod infirmum fuit, non consolidavi; quod ægrotum, non sanavi; quod contractum non alligavi; quod abjectum, non reduxi; quod perierat, non quæsi. Ignosce ô Domine, si quando linum fumigans extinxi, & calamum conquassatum contrivi.

8. Vota mea, quæ distinxerunt labia mea, millies coram te, Domine, repeto, &, si nunquam emissem, jam emitterem, eo affectu, quo possem, imo majori, eo scilicet, quem optare possum, & debeo, ut perfectè tibi placeam, & pretiosa sit in conspectu Domini mors pauperuli servi tui.

9. Obsecro Superiores meos, ut mihi obedientiæ defectus, judicii proprii excessus ignoscere dignentur. Obsecro Fratres & Patres, ut meos impatientiæ inordinatos motus, & cetera prava exempla obliviscantur.

10. Ceterùm, cum ego gratiâ Dei infinitâ reliquerim omnia & secutus sim Christum & præter voluntatem, quam mihi dedit & amorem, quo illum amplecti cupio, nihil ulli offerre possim; rogo iterum omnes & singulos Patres & Fratres, maximè verò illos, quorum aliquando indignus Magister fui, ut pro me aliquas preces, sacrificia, & indulgentias applicari curent suo nullo onere, magno meo & suo solatio, ne me corpore exutum diutiùs morari contingat, donec Deo meo satisfaciam ad ultimum quadrantem.

II. Quæso vos, quibus sepulchri mei cura incumbet, ut in novissimo loco cum Domino JESU, qui pro me in cruce suspensus fuit, recumbere mihi liceat, & expectare beatam spem, & adventum gloriæ magni Dei.

12. Testes hujus voluntatis meæ sit in cælo Deus, testis Mater Dei, Patroni mei & Angelus Custos, S. P. Ignatius cum omnibus Sanctis Sociis suis, S. Barbara, S. Cæcilia, & ceteræ SS. Virgines, quibus, ut coronâ, omni die, sed maximè in extremâ hora cingi opto & propugnari. Adeste quæso, omnes humillimè invoco, quotquot aliquando vel à me electi fuistis, vel mihi in Patronos sorte obtigistis. hæc est suprema voluntas mea, & per Dei gratiam æterna. Hanc in hora mortis ratam esse volo, & verò DEI (quod humillimè imploro) auxilio futuram spero. Ego Georgius Sigismundi, ut suprà, instituo, lego, testor omni meliori modo, manu propriâ consigno, &, si Deo placet, morte; ut æternum illi vivam. Anno 1627. mensè Novemb. die 28. horâ 2. dum versarer in Recollectione annua.

Hoc Testamentum cum mortuus fuero, meis imponi manibus desidero, & ut fiat, R. P. Rectorem, vel quemcunq; Superiorem, aut P. Spiritualem humiliter rogo.

Venio nunc ad akeram mei propositi partem, & duorum è Statu Politico præstantium Virorum Testamenta allego; alterum Serenissimi Archiducis Austriæ Leopoldi, alterum Illustrissimi & Excellentissimi Domini Bernardi Ignatii Comitis à Martiniz,
Supre-

Supremi in Regno Bohemiæ Burggravii An. 1685.
6. Januarii in Domino mortui. Prior ita decernit.

Paſtum cum Teſtamento Sereniſſ.
Archiducis LEOPOLDI.

NE ſit otioſa, quam Deus mihi conceſſit, facultas cum ſuæ gratiæ opitulatione, ob exceſſum ei placendi finem, illum amandi, majorem ejus gloriam & honorem in omnibus quærendi, cum magis magiſq; adorandi, colendi, eiſq; ſerviendi; eo nomine, quia Eſt qui Eſt, Er̃itq; ſemper; gratum animi eidem exhibendi: ob tot beneficia eximia mihi præſtita, ſpecialiter quò verbum ſuum Æternum & in eo infinitum bonorum omnium pretium mihi contulerit, proq; omnibus, quæ ſanctiſſimæ Humanitati Verbi, Beatiffimæ ſuæ Matri, omnibus Angelis & Beatis in cœlo, omnibus creaturis in terris conceſſit, impetrandi deniq; à divina ſua bonitate tum creaturis omnibus, tum miſero mihi tam in vita, quàm in, & poſt mortem auxiliorum gratiarumque abundantiam; *Sancto cum divina Majeſtate Paſtum perpetuum* de minimo quocunq; motu interno & externo animæ, & cordis, corporiſq; mei, de omni aspiratione & reſpiratione mea æquè dormientis ac vigilantis, uſque ad ultimum vitæ halitum (ut infrà apertiùs explicabo) deq; omnibus & ſingulis omnium quæ ſunt, & erunt, creaturarum motibus, influentiis & affectibus cœlorum, animalium, quæ ſunt, erunt, & fuerunt; rerum creatarum, creandarum; motibus naturalibus, artificialibus, & violentis, quotquot ſunt

sunt & fuerunt de guttis aquæ in labentibus de cœlo pluviis, in fontibus, fluminibus, Oceano: de frondibus, floribus, foliis & fructibus arborum ac plantarum, quos unquam terra germinavit aut germinabit: de arenulis, quæ sunt sive in terra, sive in aquis: de atomis, qui sunt & erunt in aëre: de momentis temporis præteriti, præsentis, & per totam æternitatem futuri; & in præsentis de motibus tympanorum: de verbis & actionibus per omnia bella publica & privata, & regnorum ac Principum discordias exhibitis & exhibendis. Quod fœdus hoc decreto initum volo, ut cum divina gratia in totam æternitatem extendatur. Quod præcipuè intelligi volo de singulis actibus adorationis, amoris, laudis, gratiarum actionis, doloris, & alterius cujuscunq; virtutis hoc fœdere exprimendis: quos unquam exercuerunt vel exercebunt Angeli, Beati, SS. Dei Mater, Christi Humanitas ac Deus ipse, præsertim erga seipsum. in his omnibus & singulis (quæ appello *signa mea*) intendo cum gratia divina, & in virtute hujus *Protestationis* per omnem æternitatem actu, quantum ab homine fieri potest, exercere, renovare, & exhibere divinæ Majestati supra dictos perfectissimos actus unitim omnes; omnia fœdera, signa, pacta, obligationes spirituales, inventiones amoris, directiones spiritûs, præparationes ad Venerabilem Eucharistiam, & post eam gratiarum actiones & oblationes, musicas, cantica, laudes spirituales, Psalmos, hymnos & benedictiones; actus, opera, obsequia & cruciatus Deo gratos; & quidquid huic *Pactò* conforme est unquam inven-

inventum, scriptum atq: typis mandatum: singulariter quotquot in DEUM directi sunt actus cognitionis, æstimationis, cultûs & reverentiæ, adorationis, amoris, gratiarum actionis, laudis, & benedictionis.

His adjicio actus & protestationes fidei, spei, amoris, contritionis, oblationis, resignationis, gratiarum actionis, petitionis, qui unquam sunt inventi, excogitati, dicti, scripti, elicti, typis mandati ab omnibus totius mundi creaturis, justis, Angelis, & Beatis, SS. Dei Matre, & ipso JESU Christo DEO meo, cum omnibus affectibus & effectibus amoris, quos expressit in sua Sanctissima Humanitate per opera heroica, quosq; exprimere non potuit, eò quòd par non esset infinito voluntatis affectui robur corporis & facultas.

Adjicio deinde, quidquid fecit & faciet Deus, quâ Deus est, me secundum mensuram gratiæ ab ipso mihi datæ (quam unicè desidero & imploro) facturum, sed etiam, quoad potero actualiter renovabo & exhibebo cum omnibus sublimissimis motivis & perfectissimis finibus, qui suæ divinæ Majestati plus complacentiæ & gloriæ adferre possunt; iis dico, quos Deus ipse invenire potest; & dirigo ad honorem & gloriam suam majorem, ad venerationem Augustissimæ ejus Matris, Dominiæ meæ, omnium Angelorum & Beatorum; ad liberationem animarum de pœnis Purgatorii, ad salutem omnium creatorum & creandorum hominum & miserrimæ animæ meæ; ad conversionem Turcarum, Maurorum, Hæreticorum, Infidelium & peccatorum qui sunt & fuerunt;

erunt; & si liceret efficere, ad inferni cruciatus damnatorum, eorúmque blasphemias & desperationes aver-
tendas; pro meis aliorúmque peccatis, passionibus,
pœnis, tentationibus & distractionibus; pro quibus
omnibus & singulis cum obviare aliter non possim,
intendo vi præsentis Protestationis plus millies &
millies divinæ suæ Majestati virtualiter, multò verò
maximè actualiter offerre, renovare, ac exhibere in
tempore & æternitate, omnes suprà dictos actus; cum
Desiderio intimo, ut malè commissa commutentur
in vivos & serios affectus infiniti amoris, obsequii,
& laudis divinæ; cum humillima petitione veniæ, il-
luminætionis, ac veræ emendationis, præsertim meâ
plus ceteris ærumnosi; cum affectu dictis oblationi-
bus & renovationibus plus delectandi divinam Ma-
jestatem, quam unquam ullo peccato offendatur;
quem cum exprimere non possim, utor signis meis,
cum efficere non valeam, ut facta sint infecta, quod
equidem ardentissimè desiderarem, vitamque ipsam
& sanguinem ad extinguendum quodlibet peccatum
profunderem.

Atque hoc *Fœdus* cum Deo meo erectum, vi hu-
jus Protestationis ac Decreti, extendo non solum ad
vitam, sed etiam ad mortem, & securam æterni-
tatem, observandum in quolibet prædictorum signo-
rum in perpetuum. Desidero enim, cum putre hoc
corpus in terram diffluet, & anima piacularibus flam-
mis cruciabitur, gratiam te non offendendi Deum meum,
sed magis ac magis semper amandi & laudandi in
virtute tuæ singularis gratiæ, ac hujus *Fœderis*, esse

acerbissimis cruciatibus, ac etiam aternis citra vel levissimam offensam Tui, me torquere placuerit. Ecce me promptissimum obsequi, dummodo infinita tua Bonitas per hasce meas oblationes, signa, & renovationes diligatur magis ac laudetur, ampliôrque gloria ac animarum Salus resultet.

Quoniam verò ubi *Testamentum* est, mors necesse est intercedat Testatoris: Testamentum enim in mortuis confirmatum est; Volo, ut hoc meum Desiderium, & voluntatis decretum, gratiâ tuâ, Deus, excitante conceptum, & hâc Protestatione expressum, non solum in vita, & mortis hora vigorem habeat, sed etiam post mortem meam, & tunc vel maximè plenæ executioni mandetur.

Deniq; suprà dictos omnes actus repono in cor & manus Domini mei JESU Christi, & SSmæ. ejus Matris, in quibus ad majorem perfectionem & sublimitatem, ad majus beneplacitum & eorum gloriam, quam unicam quæro evehantur: cum qua perfectione ac sublimitate volo eos divinæ suæ Majestati à me toties quoties & semper renovari, non tantum meo unius nomine, sed omnium etiam futurarum creaturarum loco, quæ id unquam sunt præstituræ, ita ut quælibet harum renovationum vim habeat omnium simul conjunctarum. Nam quidquid gratiæ & honori Dei mei præstiturus sum, volo id magis ac magis, & in infinitum crescere in singulis actibus & punctis temporis; magis verò *in articulo mortis*; ac multò maximè si quâ vi morbi, aut quavis aliâ causâ mens mihi eriperetur, ut, quod efflictim desidero præstare

non

Allia item ad mortem repentinam preparatio, &c. 213

non possim, nunc pro tunc & semper protestor sanctissimè. Amen.

Potuitne hoc Pietatis exercitio vel ad demonstrandum erga Deum amorem, sublimius, vel ad exprimendam religionis puritatem defœcatus, vel ad faciendum omnis virtutis compendium etiam ab exercitissinio Asceta excogitari aliquid opportunius? Tamen tanta pietatis lux mentem piissimi Principis curis bellicis, gravissimisq; negotiis obductam irradiaverat. Quàm eleganter ac verè Gregorius, considerans illud: *Per vicos & plateas quæram quem diligit anima mea*; (Cant. 3. 2.) docuit non tantùm per vicos Religiosorum arctè habitantium, sed etiam per plateas secularium latè incedentium, Dilectum quæri oportere. Quia, inquit, *sunt nonnulli etiam vite secularis, qui imitandum aliquid habent de actione virtutis.* (Hom. 25. in Evang.) A qua laude quàm non longè abfuerit Illustrissimus Comes Bernardus à Martiniz conditum ab eo *Testamentum animæ* loquatur. Sic habet:

In Nomine Patris, & Filii, & Spiritus Sancti. Amen.

PRImò; pro fundamento salutis meæ; Protestor & confiteor in præsentia Dei Omnipotentis Patris, Filii, & Spiritus S. trium Personarum, & unius solius DEI; Beatissimæ Virginis, & totius cælestis Curia; omniumq; Vestrùm, qui hanc Protestationem seu legetis, seu audietis aliquando; quod vivere velim, & mori obediens filius sanctæ Romanæ Ecclesiæ;

firmiter credendo omnes duodecim fidei articulos, quos sancti Apostoli docuerunt; cum interpretatione & declaratione à sancta Sede Apostolica desuper facta; & quidquid hæc sancta Sedes in Ecclesia Catholica à Spiritu S. gubernata docuit, definivit, & declaravit.

Protestor me credere totum illud, quod bonum Catholicum Romanum Christianum credere oportet; in qua sancta Fide volo & gaudeo mori. ita, ut quidquid contra illam (quod absit) dubitarem, sentirem, dicerem, vel facerem, per Diaboli suggestionem, aut alio quocunq; modo tentatus; id ipsum nunc pro tunc Protestationis hujus vigore revocem, annullum, annihilum, neq; dictum unquam aut factum velim, imò execrer & anathematizem. E contrario quidquid bono Religionis præstare seu teneor vi officii, seu possum virtute DEI; pro ejus conservatione & propagatione cum Dei gratia præstare velim, & nil magis (quantum in me erit) optare, quàm hoc totius sanguinis mei, & vitæ impendio exequi & contestari.

Deinde per hanc enixam voluntatem meam *Protestor*, quòd in morte mea velim & desiderem Sacramentum poenitentiae, vel Confessionis, quam (casu quo habere vel facere non possem) nunc pro tunc vigore præsentis ex corde facere percupio, & vi hujus Protestationis absolutionem mihi dari efflagito, si ore confiteri per apoplexiam, aut aliter impedirer; agnoscens culpam meam maximam, omnium peccatorum meorum tam cogitatione, quàm verbis, opere,

atq;

atq; omiffione tum contra Deum, tum contra proximum meum commifforum; de quibus omnibus doleo, & Spatium defidero pœnitentiæ, ut illa poffim amariffimè plangere, confiteri, & debitam facere fatisfactionem; non tam inferni, vel alterius cujuscunq; pœnæ timore, quàm quòd fummum Bonum offendèri, quod fuper omnia amare, & cui fervire debebam. Id nunc firmiter propono me facturum, cum ejus gratia, nunquam illum toto vitæ meæ tempore ampliùs offendendo, ex puro ejus, & finceriffimo amore, etfi fcirem me Præfcitum.

Proteftor etiam, quòd fub finem vitæ meæ defiderem fandiffimum Viaticum fumere, ut me perfèdè unire, & reconciliare poffim Domino Deo meo, mediante hoc divino Sacramento; quod ipfum (casu quo tunc recipere non poffem) me nunc pro futuro illo tempore recipere declaro, faltem corde fpiritualiter; illud adorando, & mihi uniendo, atq; supplicando, ut mecum efle dignetur in tam periculofò itinere, ab infidiis latronum infernalium me defendendo, & in fecurum æternitatis beatæ portum deducendo; ut cùm non merear vivere propter me, vivam propter illum, quem qui piè manducat, vivet in æternum, & refuscitabitur ab Eo in noviffimo die, habens pignus futuræ gloriæ.

Proteftor quoq; quòd cupiam ex hac vita decedere armatus finali extremæ Unctionis Sacramento, quod (casu quo tunc obtinere non poffem) nunc etiam pro tunc pofco, & defidero. Divinam rogans Majeftatem, ut dignetur mihi omnes fensus meos in-

ternos & externos ungere oleo infinitæ suæ misericordiæ; ignoscendo mihi peccata mea, quæ vel oculis, aut linguâ, gustu, odoratu, auditu, & tactu, aut alio quocunq; modo commisi.

Protestor etiam præsentibus, quod per nullam unquam tentationem desperare velim de divina pietate, propter multitudinem peccatorum meorum; quibus etiam si fatear infernum me promeruisse multoties: nequaquam tamen infinitæ illius diffido misericordiæ, habens super hoc Syngrapham proprio ipsius firmatam Verbo, in Sacrosancto Evangelio, ubi fatetur, quod non venerit vocare justos, sed peccatores. Igitur tametsi me occiderit, in hoc ego sperabo, gnatus, quod multa flagella sint peccatoris; sperantem autem in Domino (sed non præsumentem) misericordia circumdabit; nemo enim speravit in Domino, & confusus est.

Profiteor etiam, quod nesciam me unquam opus aliquod bonum vitæ æternæ certò meritorium fecisse, cum nesciam, an fecerim id in gratia, an rectâ intentione, an non vanâ gloriâ opus etiam ex se bonum depravaverim; & si quod fecissem, confiteor, non id cā me, quā decuit, Diligentiam fecisse; maledictus autem homo, qui opus Dei facit negligenter; neque me sine divina gratia facere quidquam potuisse. Erubescat tamen & confundatur Dæmon; neq; enim præsumo mereri solūm rebus ejusmodi Paradisum, sed per merita maximè, & sparsum in Cruce pro me misero peccatore sanguinem Redemptoris. Mihi enim absit gloriari, nisi in Cruce Domini nostri

Alia item ad mortem repentinam preparatio. &c. 217

ſtri J E S U Chriſti, in quo eſt ſalus & reſurrectio.
in hoc ſigno vincam & vivam :



Proteſtor quoq; me cum gratia Dei patienter
ferre velle omnem infirmitatem, tentationes, deſola-
tionem, ariditatem, & dereliſtionem, atq; dolorem
mortis; uniendo hanc dereliſtionem & dolorem an-
goremq; mortis cum dereliſtione, doloribus, & an-
goribus Chriſti Domini mei, nunc pro tunc; in qua
dereliſtione ſi contingeret (quod D E U S nolit) ut
vel morbi, vel extremi angoris vehementiâ, vel dia-
bolicâ tentatione in aliquam laberer in patientiam, vel
blaſphemiæ & murmurationis contra Deum veſa-
niam aut aliquod aliud mali exempli ſignum ede-
rem; illius, nunc pro tunc me vehementer pœnitet,
& reprobo quidquid mali vel dicere, vel facere poſ-
ſem; Divinam implorans clementiam, ne me in tam
doloroſo & periculoſo conſlictu deferat omnino;
niſi ex hac ipſa dereliſtione pro gloria ſua facere
proventum vellet.

*Condo*no etiam vigore præſentium, omnes in-
jurias & offenſiones à quocunque mihi unquam illa-
tas in fama, vita, facultatibus, aut alio quocumq;
modo; Deum rogans, ut illis ignoſcat & opituletur
omnibus, bonumq; illis retribuat pro malo, quod mi-
hi voluerunt, aut fecerunt: quemadmodum deſidero,
ut mihi fiat ab illis, ſi quibus unquam offenſionis
anſam præbui, aut revera illis nocui, ſive activo, ſive
paſſivo ſcandalo fui, quòd meis fortè non ſatisfec-
rim obligationibus, ſed vixerim peſſimè.

Protestor etiam me infinitas reddere gratias divinx suæ Majestati pro omnibus in me collatis beneficiis, tam occultis, quàm manifestis, prò ! quàm ingentibus atq; innumeris, & quàm immerenti, imò ingratissimo mihi præstitis, quibus ô quantum abusus fui : & singulariter pro beneficio creationis, redemptionis, & vocationis ad illius sanctam agnitionem, alimentionis spiritualis, atq; etiam corporalis, & vi illius datâ arrhâ æternæ Electionis, cùm passus fu-
erim Frumento Electorum ; super omnia verò, quòd me tam longo tempore ad poenitentiam expectaverit, cùm mihi vitam tollere meritò potuerit, quando id minimè cogitabam, dùmq; in peccatorum sordibus hærerem. Misericordia Domini, quòd non fuerim consumptus !

Benedicta sit igitur infinita ipsius Charitas, longanimitas & patientia, quòd Spatium dederit poenitentix ! ô det etiam mihi gratiam efficacem, ad faciendos dignos fructus poenitentix, maximè finalis. hoc rogo Patrem æternum in nomine ejus Filii, nempe ut in me impleatur Voluntas paterna DEI, Sanctificatio mea finalis, orando humillimè : Cor mundum crea in me Deus, id est, da gratiam sanctificantem. O Pater æternæ, nihil munditiei est in corde meo, sed tu creare potes, scis, & vis : sic enim dilexisti mundum, ut Filium tuum Unigenitum dares ; non fuit Mundus hic mundus, sed ut ex immundo mundum faceres. Et Spiritum rectum innova in visceribus meis, rectificando intimas intentiones detortas, & incurvatas ab amore & egoitate propria.

Nè projicias me à facie tua ô Fili Redemptor mundi, Deus, qui respiciendo Petrum ab infidelitate sanâsti: & Spiritum Sanctum tuum nè auferas à me & gratiam sanctificantem; sed Spiritum Sanctum mitte, & creabuntur annihilatæ virtutes: redactus enim sum in nihilum, & nescivi. Imò redde mihi lætitiâ salutaris tui, ô Spiritus Sancte DEUS, DEUS Amor, DEUS totius consolationis, & Spiritu principali confirma me, qui postulat pro nobis gemitibus inenarrabilibus, tribue mihi gratiam confirmantem, quæ est idem cum dono perseverantiæ seu gratiæ Finalis, quam uti de condigno mereri nequeo, ita de congruo possum humili oratione impetrare, & à Christo Domino de condigno mihi pretio sanguinis ejus ita emptam confido, ut eam hausturus sim de Fontibus Salvatoris, è quibus una stillula Theandrici sanguinis totum mundum saluum facere quit ab omni scelere.

Volo etiam, imò summè desidero, & humillimè supplico, ut hujus meæ ultimæ voluntatis Protecrix sit gloriosa Virgo MARIA, Refugium & Advocata Peccatorum, Salus Infirmorum, & Solatrix Afflictorum, quam specialiter supra omnes Sanctos & Sanctas, Patronos & Patronas meas cultu Hyperdulix colo & veneror. Invoco autem singulariter S. Josephum, S. Joachimum, & S. Annam; utrumq; S. Joannem Baptistam nimirum & Evangelistam; Omnes Sanctos B. B. Spirituum ordines, præsertim S. Michaëlem, Gabrielelem, Raphaëlem, & S. Angelum meum Custodem; S. S. Patriarchas, Prophetas, Apostolos, maximè S. Petrum, Paulum, Andream, Jacobum & Philippum,
P S Mathiam

Mathiam & Thaddæum ; Omnes SS Martyres, Confessores, Virgines ; Omnes S S. Patriarchas omnium sacrorum Ordinum, Patronos Bohemiæ, Austriæ, Moraviæ, Silesiæ & Germaniæ ; Omnes S S. occultos, SS. 4. Franciscos, Antonios & Benedictos ac Bernardos ; omnes SS. Conversos Peccatores, S. Mariam Magdalenam, S. Zachæum, S. Matthæum, ipsum S. Latronem conversum in cruce : & inter Sanctas S. Ursulam, Barbaram, Catharinam, Dorotheam, Gertrudem, Omnes SS. quorum Fastos annuè mihi legi curavi. Deniq; totam Curiam cœlestem, & Electos omnes in militante Ecclesia per Communionem Sanctorum imploro, ut in hora mortis meæ mihi adsint, seu me prece juvent ac consolentur ; & Unigenitum suum Filium pro me singulariter roget immaculatè Concepta Virgo MARIA, cum hac tota Sanctorum Universitate, ut Spiritum meum in pace recipiat DEUS, & Indulgentiis plenariis munitum me faciat decedere ; sibiq; sine mora in Amore conjungi, ut ex puro amore DEI moriar, oriâq; illico felici Æternitati, ad quam eâ solùm intentione aspiro, ut videre, amare, laudare, adorare, & glorificare valeam sacrosanctam, & Individuam, sempérq; Tranquillam Trinitatem, Patrem, & Filium, & Spiritum Sanctum : hic enim ad quem creatus sum, ultimus meus finis est : Major nempe Dei Gloria, in Ejus Potentiæ, Increatæ Sapientiæ, & Bonitatis æterna laude, & glorificatione ; quoniam gloriam suam alteri non dabit DEUS, nisi ei, qui in ipsum Authorem illam totam est refusurus ; non verò ipsi, qui illam sibi esset arrogaturus.

Vide similiter & hisce constituo ac rogo Angelum meum Custodem, Defensorem & Procuratorem Animæ meæ in tremendo illo iudicio, quando accurata fiet Discussio, & postrema feretur vel vitæ, vel mortis æternæ sententia, humiliter flagitans, ut quemadmodum misella hæc anima mea illius tutelæ & custodiæ à Creatore commissæ est; illam defendat, protegat, & in illius Manus deducat, defectusq; excuset, ut ea sententiam evadat damnationis.

Rogo etiam per sacratissima JESU Christi viscera eos, quibus id commisi, ut (quamvis ignorem, quæ me fors maneat) cum propter peccata mea, si non æternam in inferno Damnationem, longissimam saltem in purgatorio moram justè promeritus sim; ipsi me operibus suffragatoriis juvare velint. Miseremini mei, miseremini mei, saltè vos Amici mei! quod hodie feceritis mihi, cras fiet vobis: Sanctissimo præfertim Missæ Sacrificio, tanquam Medio magis efficaci ad liberandas animas ex iis pœnis, ex quibus si unquam contigerit vestris operibus bonis suffragantibus me liberari, pro tanto beneficio me non ingratum fore polliceor: etsi firmissimè confidam me auditurum à JESU meo Crucifixo illud: Hodie mecum eris in Paradiso; quia nunc pro tunc dico cum bono Latrone: Nos digna factis nostris recipimus, hic autem nil mali gessit Christus Jesus; qui omnia bene fecit. Addo: Memento mei Domine, cum jam veneris in Regnum tuum. Ingentem fiduciam habeo sine hæsitazione ulla in potestate Clavium, adeoq; Indulgentiis plenariis; quarum ut fiam particeps, jam nunc pro tunc dico
corde,

corde, quàm possum contrito; JESUS, MARIA! addo JOSEPH, Joachim & Anna dulcissimi Amores JESU, Amoris mei infiniti: in manus vestras commendando Spiritum meum; sic in pace dormiam & requiescam, in te JESU salus mea, quoniam singulariter in Spe constituisti me; nam qui invocaverit nomen JESU salvabitur.

Volo etiam, & desidero, ut anima mea, quamprimum è terreno hoc carcere educta fuerit, in amorosum dextri Pedis JESU Christi vulnus sepeliatur, in illa vivifica sepultura jaceat, & perpetuò beata vivat in requie æterna; crudelissimum illum Clavum millies benedicens, qui acuti Scalpelli instar tam dulce fecit mihi in amato Salvatoris vulnere monumentum; maneo cum Magdalena apud Pedes, non audeo scandere altiùs, gnarus summæ indignitatis meæ: immergo me in Vulnus sanctissimi Pedis dextri, tum quia felix Latro ab ea parte fuit exauditus, & illic etiam, ut piè credo, stabat Mater dolorosa: tum quia Electi stabunt à dextris: ideò volo me abscondere in dextro Pede tuo ô JESU, donec pertranseat furor tuus, & constituas mihi tempus Hodie, Hodie in quo recorderis mei, qui Hodie audiens vocem tuam, nolo obdurare cor meum.

Deniq; *Protestor* me libenter & amanter acceptare mortem, qualicunq; illa modo mihi obtigerit, velle meum cum divina voluntate planè conformans; suscipiens illam cum patientia in satisfactionem peccatorum meorum, & gratiarum actionem pro vita à Divina Majestate mihi concessa; quam si mihi magis pro

Alia item ad mortem repentinam preparatio, &c. 223

pro gloria sua producere voluerit, sit millies & iterum millies benedictus DEUS ! det velle, quod jubet, & jubeat, quod vult ; tollat tantum voluntatem ad peccandum pronam, & ponat voluntatem efficacem ad ipsum immutabiliter & incessanter amandum in tempore & æternitate, gratis propter ejus infinitam Bonitatem per se, cetera ullum respectum ad me. Si verò noluerit me diutius vivere ; Ecce animam, corpus, vitam & mortem tam ad pœnam temporalem, quàm æternam, voluntariè, sine ulla exceptione, ex toto corde resignatam, in ejus dispositionem sanctissimam projicio, enixè rogans, concedat, ut supradictam voluntatem meam nunquam mutem, sed in ea perseverem usq; in finem. Sciens, quòd S. Gertrudi insinua-
veris, ô clementissime JESU, fidelissime Sponse animæ meæ, Te pia desideria, quæ à sanis adhuc & vegetis sunt directâ pro articulo mortis servare in semper florenti cordis tui divini, & Ecclesiæ Sponsæ tuæ Viridario floridissimè, ut nequeant arescere aut marcescere, sed fructum valeant asserre (divinâ tuâ gratiâ vegetante) in tempore opportuno : nam neq; qui seminat, neq; qui plantat, neq; qui rigat, est aliquid : sed qui incrementum dat Deus Amor meus ; cui honor est, gloria, & benedictio in secula seculorum à me à Vobis mihi superstitibus in Unitate Ecclesiæ, & Christi visceribus mihi dilectissimis, pro me hîc, ut petii, oraturis in Ecclesia militante, ut ego pro vobis orare valeam in triumphante. Diligite Dominum. Impleamini Benedictione, sequamini me, sed tardè, & valete. Amen.

In cuius Fidem Ego N. hocce feci Protestationis, Confessionis, & Resignationis Instrumentum, in præsentia Sanctorum Patronorum meorum velut Testium ad id rogatorum; & volo, ut hoc ipsum valeat nunc & semper cum vi & vigore Testamenti, Codicilli, & Donationis mortis causâ; Confirmans illud denuo mente & corpore sanus existens, propriæ manûs Subscriptionem; gestans deniq; dictam Protestationem pro maiori claritate continuo mecum, cum qua etiam volo & desidero post mortem meam sepeliri.

Ego

B. I. I. M.

Habes, Christiane Lector, tot adversus mortem repentinam antidota, quot Paradigmata Testamentorum à Viris probitate, prudentiâ, dignitate conspicuis conditorum. Aude aliquid consimile, & ita maturè de tuis rebus dispone, ut tamen te ex insidiis mors aggrediatur, composita apud tot omnia, parata, ordinata inveniat. Prævenire satius est, quàm præveniri.



CAPIT VIII.

CAPUT VIII.

Rursum alia ad mortem repentinam Præparatio. De morte meditari.

Qui se adversus Serpantium idus præstare tutos cupiunt, dicuntur serpentino adipe manus illinere, easq; innoxias & indemnes ab omni periculo veneni conservare. Simile mihi quidpiam facere videntur ii, qui non contenti obiter & cursim mortis meminisse, in ejus meditatione prolixius hærent. Cujus idum ne saluti suæ mortiferum noxiūmq; sentiant, si præsertim illa ex improvviso iciat, mortem ipsam Meditationis acie veluti exenterant, omnes illius circumstantias, causas, effectus, sequelas, occasiones acutè dispiciunt, itaq; contra ipsam mortem sibi medicinam parant, & unde periculum metuere poterant, ibi antidotum quærunt. Quòd si ex veneno à viperis desumpto confici theriaca potest, quæ contra venenatorum animalium morsus efficax est antidotum; quidni ex ipsa mortis meditatione existere possit adversus ipsam mortem præsens alexipharmacum? Certè Lactantius (*Lib. de ira DEI.*) docet cineres combustæ viperæ præstans esse contra morsiones illius remedium. Quid verò mors, nisi virulenta vipera, quæ una mortales omnes sine ullo discrimine necat? at illius morsum vix ullo meliore remedio elidas, quàm si eam meditationis igne in cineres mortuales

mortuales redigas, iisq; præterea sæpe caput aspegas, id est, cogitationem de ea longiusculam seriâmq; assumes. Id quod nobis Symbolicè videtur innuere ipsa Mater Ecclesia, dum cineres capitibus nostris inspergendo monet: *Memento homo, quia pulvis es, & in pulverem revertèris.* Huc item facit, quod S. Ambrosius de basilisco memorat, eâ videlicet cum esse indole, ut si hominem intueatur, enecet, sin autem ab eo prior visus fuerit, moriatur. Eadem est poenè circa mortem venenatam ratio. Nam si illam, antequam adveniat, fixâ mente aspicias, & accuratè perpendas, occidis eandem, nève tibi sempiternum exitium afferat, procuras: at si illa priusquam illam videris & considerâris, ad te venerit, te aspexerit, te imparatum invenerit, miserum te profectò! æternam tibi necem inferet iste Basiliscus. Sunt alia plurima Mortis Meditationem nobis suadentia; sed quia pleraq; quæ Parte I. de mortis memoria scripsimus, (cap. 9. 10. 11. 12.) huc spectant, *Thema* hîc solummodo *Meditationis de morte* proponere placuit. Et quia omnis vel felicitas mortis vel infelicitas ab *Judicio particulari*, ut vocamus, pendet, de hoc quoq; congruum Meditationis Argumentum hic subiciemus. Excole, per DEUM, his animum exercitiis, si piget in dies, in singulas certè Septimanas, Lector, & mortem mihi crede, etiam repentinam, hilaris excipies. Neq; fallit Seneca, dum ait: *Mortem venientem nemo hilaris excipit, nisi qui se ad illam diu composuerit.*

MEDITATIO.

De Præparatione ad Mortem.

(Ex Anton. Gaudier.)

Preludium I. erit, Audire Christum sæpe nos com-
monentem de hora hac. (*Luc. 12.*) *Estote parati:*
quia quâ horâ non putatis, filius hominis veniet. Vi-
gilate, quia nescitis, quâ horâ Dominus vester ventu-
rus sit. (Matth. 24. 42.)

Prelud. II. Petere à Domino Deo, ut rem-
tanti momenti, quanta est bona ad mortem Præpa-
ratio, cùm sit singulare ejus Donum, pro sua pietate
infinita impertiri dignetur, ne mors nos aut impara-
tos occupet, aut malè paratos.

Punctum I. Considera, quòd, cum Præparatio
ad mortem, & consequens judicium sit actus excellen-
tissimus prudentiæ Christianæ & supernaturalis, ad
eam requiratur præter Dei auxilium hominis conatus,
quo intimâ Dei gratiæ luce perfusus apprehendat ho-
ram istam mortis, prout sibi contingere potest: tunc
enim ad eum finem rectè constituit media: Quare pri-
ma Præparatio est, ut intimè concipiat animo, quid
sibi velit, *Mori*. *Mori* duo continet, ut exprimit Job:
Homo cùm mortuus fuerit, & nudatus atq; consum-
ptus, ubi quæso est? (14. 10.) Primum est *Privatio*
vitiæ hujus, id est inferioris mundi & omnium loco-
rum, urbium, regionum, domorum; item omnium
hominum, actionum hujus vitæ, quibus vel peccare,
vel mereri possumus ac Deo servire, ut ministeriorum

licet

Q

licet utilium Ecclesiæ Dei in medio cursu &c. Deniq; à corpore separatio, ejusq; consumptio. Secundum est *Transitus ad alteram vitam*, eamq; æternam, felicem vel infelicem, sed quàm incertam ! Conabor eam mei mutationem procerto futuram apprehendere, & petam à Deo, ut in eum finem suâ me continuò luce perfundat. Nam ex eo principio facilè multas conclusiones practicas eliciam, quibus me totâ vitâ ad mortem præparabo.

Punctum II. Exposito principio deducere : conari me omni studio debere, ut anima mea in eo puritatis gradu continuò perseveret, ut in momento, quo migrabit, nulla sit labes, ob quam à beata vita excludatur in æternum : in eo enim summa rerum est. *Ecce venio* sicut fur, beatus, qui vigilat, & custodit vestimenta sua, ne nudus ambulet, & videam turpitudinem ejus. (*Apoc. 16. 15.*) Quare scrutabor conscientiam meam, & si quid sit, non tantùm meas rationes ita componam, ut securus sim ; sed statuam ita vivere, ut quantum licuerit, semper me extra periculum & dubium ponam. Possum enim subitò mori, vel de sensu mentis dejici, vel usu sensuum privari, aut vi morbi impediri, aut justo Dei judicio ob meam ingratitude in eo gratiæ auxilio, quod in hora mortis ad res meas in tuto collocandas esset necessarium, destitui, si eò usque differam. Quare me omni ope à peccato conservabo immunem. quòd si quam labem contraham, eam statim eluam, ac sincero examine, dolore, & lachrimis, nullâ re mihi parcens, & suo etiam tempore confessione accuratâ, perinde ac si ea ultima esset abolere

Rursum alia ad mortem repentinam preparatio. 229

abolere conabor; rogabóq; Deum, ut mihi det gratiam, ut actiones meas quotidianas & sermones disponam in iudicio, nullámq; abire sinam, quam non de-
fleam.

Punctum III. Cogitabo, non tantum eluendas esse culpas peccatorum, ut in tuto me collocem, sed statim mihi esse faciendos fructus dignos pœnitentiæ ad satisfaciendum pœnis tot & tantorum meorum peccatorum. Nam, quàm parum pro illis satisfeci? quantum mihi solvendum restat, & quàm mihi est facile quotidianis vitæ meæ laboribus, fervoréq; charitatis ignem illum, cui ad multos annos fortè tradendus sum, evitare.

Punctum IV. Perpendam, quòd magnam & securitatem & consolationem sim habiturus in ea hora, si, quæ mihi tunc reliquenda sunt, maturè, dum vivo, reliquero. Itaque concludam mihi toti mundo moriendum, & mihi ipsi. Statuámq; omnia bona externa, & oblectationes hominum, item vanos favores, amicitias, honores contemnere; iis etiam me privare, quæ alioqui licita & honesta esse possent: imò optabo multas tribulationes & misérias in hac vita; studebo mortificationi sensuum & corporis, & propriæ imprimis voluntatis & iudicii. Nam, *non omnes, qui dicunt mihi Domine, Domine, intrabunt in regnum cœlorum, sed qui fecerit voluntatem Patris mei.* (Matth. 7. 21.) Quàm securus animi esse poterit, qui poterit dicere: quicquid egi, quicquid volui, Domine, tu iussisti. Ergo Deo soli vivere incipiam, cui in æternum sum victurus.

Punctum V. Multum consolationis afferet in eo transitu firma *Fides, Spes, Charitas, & Humilitas*. Quare multum proderit in vita diu multumq; versari
 1. in meditatione mysteriorum *Fidei* cum alta & magnifica illorum æstimatione, piòq; voluntatis affectu.
 2. in iis cogitandis, quæ ad *Spem* & fiduciam de DEO concipiendam excitare possunt; qualia sunt Christi Domini Vita, Passio, Merita; B. Virginis patrocinium, SS. Patronorum cultus, &c. 3. in *Amore* & mutua conjunctione & familiaritate cum DEO, & imitatione Christi. 4. in *retundenda nimia fiducia*, quam de nostris bonis operibus solemus concipere, & comprimenda nimia æstimatione nostrî, & occulta præsumptione; id quod assequemur per nostrî cognitionem. In his, si ita seriò versatus fuero, in eo transitu mihi opportunè subvenient: contra, difficile mihi erit ea arma eo momento & acquirere, & bene tractare, quibus rarò, vel vix unquam antea bene usus fuero.

Punctum VI. Revocabo mihi in memoriam mortem aliquorum Sanctorum v. g. S. Ambrosii, Augustini, Martini, Hilarionis, & aliorum, quos fortè vidi morientes; & ex iis omnibus, quæ ipsi in hac hora gesserunt, formam aliquam ac veluti exemplar bonæ ac piæ mortis in animo fingam. Reflectam item animum in mortem ipsiusmet Christi Salvatoris mei; & statuam meam vitam ex hoc tempore ad modum vivendi ejusdem aptare, Deumq; sæpe rogabo, ad eum modum ut & vivere me velit, & à vita migrare. Idem petam à B. Virgine frequenter, præsertim cum recitabo

Rosarium

Rursum alia ad mortem repentinam preparatio. 231

Rosarium ad ea verba : *nunc & in hora mortis nostra.*
Amen.

MEDITATIO.

De Judicio Particulari.

P*Preludium I.* Rem ipsam mihi repræsentabo :
quo modo nimirum anima mea, statim ubi vinculis corporis soluta erit, coram Judice Christo Domino comparebit, ultimam ab eo sententiam auditura.

Prelud. II. Deum rogabo, ut mihi lumen cæleste & gratiam conferat, ut possim seriò apprehendere, quæ tunc mihi evenient ; & aggredi, quæ me tunc fecisse optavero.

Punctum I. erit, In memoriam revocare, quæ de animæ à corpore separatae statu Fides & SS. Patres docent. *Primo* quidem accipit novum quendam & inusitatum modum cognoscendi sinè corpore, per quem tota ejus vita, & minutim singula & verba & cogitata ei repræsentantur velut in tabella. Penetrat, quid sint res creatæ omnes ; & statum suum præsentem, novamq; rerum suarum faciem agnoscit, & se coram suo Judice, quem præsentem videt, nudam, solitariam, desertam, ab omnibus, cum solis bonis & malis operibus apprehendit. *Secundo.* Hinc oritur longè aliud judicium de suis rebus, & omnibus creatis & externis bonis, quàm cum esset in corpore. *Tertiò.* Voluntas ejus mutatur. Nam evanescit omnis boni creati amor. & ejus loco solum remanet pondus illud & inclinatio, quam habet vehementissimam & incitatis-

nam in Deum, ut finem suum; quæ sublato corporis impedimento tantâ vi illam rapit, ut jam vix retardari & retineri possit, quin uniatur ei sine ingenti violentia, & proinde molestia & afflictione gravissima, quam defactò patitur, quando ob mortalis vitæ imperfectiones ab illa unione impeditur. Ex hoc principio conabor deducere conclusiones practicas, quibus meam voluntatem impellam, ut suam cœcitate deflectat; quòd quasi carneos tantùm oculos habuerit, ea tantùm hæcenus cogitârit, quæ ad præsentis vitæ statum pertinent, & tot sibi per tam crebras imperfectiones quasi ferrea vincula injiciat, quibus à Dei unione tunc impediatur, & per amorem creaturarum illud pondus in summum Bonum retardet.

Punctum II. erit, *Memoriâ repetere*, quæ de ipso judicio Fides docet. nimirum statim post mortem sistendam animam coram Christo DEO & Homine, qui nunc quidem amabilissimus, & sui sanguinis pretio largissimè donato benignissimus est Redemptor, at verò tunc Judex justissimus exactam rationem deposcet, ab ipso primo momento usûs rationis ad ultimum vitæ instans, de minimis cogitationibus, & verbis etiam otiosis, operibus & omissionibus; de finis intentione, ad quem creati sumus, & de mediorum tum supernaturalium, tum naturalium, quæ nobis concessit, usu neglecto, vel abusu. Ex hoc principio vivâ fide apprehenso, reflexis in statum meum internum oculis, ratio- cinabor, quanta mihi esset securitas, si hæc Discussio jam fieret à Christo. Nam quomodo dies, menses, annos transegi? quàm incurius mei finis, salutis
nempe

nempe & perfectionis consequendæ? quàm negligens in usu mediorum supernaturalium? quam effusus in abusu mei & creaturarum per tot & inutiles & malas cogitationes, verba, & opera, quæ in statera divini iudicii reprobabuntur? quàm multa peccata puto me per poenitentiam & Sacramenta delevisse, quæ fortè manent adhuc, saltém quoad totum poenæ debitum. Ex quo discursu excitandi Affectus sancti timoris Dei, confusionis, propositi prospiciendi vitæ meæ & præteritæ & futuræ, ut securior ibi possim comparere.

Punctum III. erit, In memoriam revocare, quam sententiam prolaturus sit Iudex. Si enim tam severa erit discussio, certum est, quòd sententia iustissima erit, definitiva, immutabilis, & incredibili quadam efficacità ab ipso Iudice pronunciata, & intimata animæ; quam proinde certum est ingenti horrore concutiendam, & gravissimis suprà quàm credi potest, angustiis comprimendam. Quod enim majus pondus esse illi potest, quàm audire, &, collustrante divino lumine, clarè intelligere, quam de illa Deus habeat ultimam æstimationem & iudicium? præsertim si exigentibus peccatis & negligentis videat se illi minùs esse gratam & acceptam, & ideò arceri & retardari ab unione strictiori cum illo, in quem, ut in centrum suum, tam vehementer fertur. Ex hoc enim principio ratiocinabor, mihi nunc dandam esse operam, tum ut me iudicem, & sententiam crebrò contra me feram, præveniámq; atq; adeò leviozem reddam illam, quæ tunc pronuncianda est; tum ut per vitæ perfectionem me Deo uniam, ut me severitas illius sen-

tentiæ minùs percellat, quò me minùs ab illo separabit.

Punctum IV. erit, in memoriam itidem revocare ità latæ sententiæ executionem citam, rigorosam, exactam. Nam misera anima suis inimicis tradita, & subjecta eorum potestati in infernum trahetur, vel ducetur in Purgatorium; ubi ponderanda *pœne damni* gravitas. intolerabile enim erit vel ad unum momentum DEO privari; quantò magis ad multos annos, aut, si ità res ferat, in æternum! *Pœnam autem sensus* quis assequi satis potest? Ubi tunc omnia bona mundi, & commoda vitæ, quæ ità mortales consecantur? Ubi mala & incommoda, quæ jam refugiunt? Ex hoc principio deducam, ut prius, conclusiones practicas, quibus voluntatem stimulabo ad exequendum contra me rigorem justitiæ ob peccata pristina; ad renuntiandum omnibus vitæ pompis & mundi commodis; ad sustinenda dura & adversa quæq;, & igne tum charitatis, tum mortificationis purgandam exactè animam meam ab omnibus inordinatis affectionibus, ut nihil in ea purgandum remaneat, nihil quod à Deo me separet vel ad momentum.

Colloquium ad Christum de cruce pendentem; magno affectu petendo, ut se mihi tunc benignum Judicem exhibeat, & quæ ad hoc necessaria sunt, jam in hac vita præstet. Idq; etiam per B. Virginem, & sancta Patronorum suffragia postulabo.

Pater & Ave.



CAPUT IX.

*Postrema ad mortem repentinam
Preparatio, Exercitiis S. P. IG-*

NATII animum excolere.

PROximè antecedens Caput huic præsentī occasio-
nem præbuit. Si enim ad mortem & lentam, &
violentam piè obeundam multum confert, unâ quan-
doq; meditatione de morte vel iudicio mentem exerce-
re; quanto magis conferet plures non horas tantum,
sed & Dies considerandis Novissimis omnibus, iisque;
quæ ad instituendam rectè vitam faciunt, inquirendis
quietè serioq; vacare? Si scintilla accendere potest,
quid aget exaggerati ignis vehementia? Si candela il-
luminat, quomodo illustrabit fax? Ac mihi quidem
hic animus non est; in laudes Exercitiorum longè ex-
currere; satis illa commendavit Paulus III. Pont. Max.
(Anno 1548.) dum eadem Apostolicâ auctoritate
approbando, edidit, *esse pietatem & sanctitatem plenam, &
ad edificationem & spiritualem profectum Fidelium
valde utilia & salubria*; satis Paulus V. dum Religio-
sos iisdem per dies decem utentes, (1600.) Alexander
verò VII. (1657.) omnes promiscuè personas per
octiduum vacantes plenâ peccatorum remissione im-
pertiit; satis ex ipso Archangelorum cœtu Gabriel,
dum personæ cuidam magnæ probitatis in Hispania
asseruit, per horum Exercitiorum usum singulare Vir-
gini Deiparæ præstari obsequium, ut quæ in iis scriben-
dis S. Ignatio author fuerit & adiutrix; (*Lud. de Ponte*

in *Vit. Balth. Alvarez. c. 43.*) ad solam te experientiam provoco, Ingenue Lector, & svadeo, ut, si probe vivere, si sanctè mori (quanquam subito moriaris) velis, hanc Pietatis Palæstram, hoc *humani generis Tirocinium* (ità Exercitia appellat Ludovicus Strada Vir è S. Bernardi familia eximius *Lyreum Apophth. p. 100.*) vel semel quotannis frequentes; idque tibi hoc amplius svadeo, quò hæc una ad mortem seu maturam, seu immaturam Præparatio reliquas omnes hoc libello propositas, tanquam nux Iliadem compendio teneat, &, si hac unâ te munias, sis reliquas omnes faciliè complexurus. Constant Exercitia tribus Partibus, quas *Ascetæ Vias perfectionis, Purgativam nempe, Illuminativam, & Unitivam* vocant. *Prima* Finem Homini ad quem sit à Deo conditus proponit, Peccati gravitatem ex ejusdem effectis & pœnis, itémque Luciferi, Adami, aliorúmque deplorando lapsu elucescentem demonstrat. *Alter*a consideratione vitæ & mortis Christi ad imitandum eundem provocat. *Tertia* ex contemplatione gloriæ Christi & Divinarum Perfectionum hominem ad perfectum Dei amorem manuducit. Hic igitur, quod sparsum hoc Opusculo, ut bene mori liceat, docebamus, Deum proximúmque amare, abnegare vinceréque nos ipsos, ad gloriam Dei diligenter operari omnia, quàm creberrimè mortis meminisse, eamque meditari, orare, examinare conscientiam, Christum Ducem in terris versantem, próque nostra salute extrema quæque Passum imitari discimus. hic purgare à peccatis animum, pœnis voluntariis culpas abolere, sacro sese Epulo convenienter reficere, Testamentum

Postrema ad mortem repentinam preparatio. &c. 237

in ocio & quiete condere, hic de statu vitæ, qui cuiq; sit bonæ tum vitæ, tum mortis principium, deliberare nullo interpellante, licet. his deniq; Exercitiis, quis, ut oportet, excolitur, quamvis antè vitam duxerit homine indignam, tamen (quod de statu Religioso asserit Bernardus) deinceps *vivit purius, cadit rariùs, surgit velociùs: incedit cautius, erroratur frequentius, quiescit securius, MORITUR* confidentius *purgatur citius, remuneratur copiosius,* Quas utilitates inesse sacris Exercitiis cùm non ignorarent Viri Sapientes, non satis habebant ex hoc Pietatis fonte haurire vitæ Sanctimoniam, nisi etiam piæ mortis felicitatem indidem quæsisent. Primas horum teneat S. Carolus Borromæus Cardin. & Archiep. Mediolanensis, qui etiamnum penes Avunculum suum Pium IV. summum Pontificem Romæ degens, in Vaticano, ex his ipsiis Exercitiis & initia atq; incrementa admirandæ & numeris omnibus absolutæ sanctitatis hausit adeoq; bis quotannis ea iterabat; semper aliquo nostris præsentè, à quo non tantùm quoad interiores animi motus, & exteriores actiones dirigeretur, sed ipsa etiam Meditationum puncta, ante quamlibet meditationis horam, sibi tradi volebat. (*Lyram Apophth.* S. *Jon. l. 1. c. 9.*) quod & immediatè ante mortem præstitit pro felice ex hac vita ad æternam illam & felicem emigratione: usus hac in re operâ Confessarii sui ac Patris spiritualis Francisci Adorni, in cujus manibus sanctam & innumeris meritis plenam Deo animam reddidit, & cui statim gloriosus quoq; apparuit, mortemq; ejus brevi secuturam verissimè prædixit.

S. Ca.

S. Carolum imitari voluisse videtur Marrinus Stredonius Provinciæ Bohemiæ S. J. gubernandæ bis Præpositus, de quo *in Pretiosis Occupationibus morientium in Soc. JESU* Joannes Nadasi istud annotavit. (*cap. 32.*) Unum mensem ad obeunda S. P. N. Exercitia petebat, pro *Preparatione ad mortem*. Impetrârit illa atq; exercuerit, nec ne, reticuit author; exercuisse ante mortem ipsam scio P. Georgium Osterman Plachy Kuttenbergæ A. 1664. religiosè defunctum, Virum à Religiosa observantia, scientiarum opulentia, & defensa per illum Anno 1648. Vetro-Pragâ, cui occupandæ, obtentâ per prodicionem Micro-Pragâ, jam tum Svecus incubuerat, etiam nunc in popularium animis memoriâq; viventem : quem ego (& liceat) meis quoq; humeris ad S. Barbaræ Basilicam elatum esse gloriâ, & vel idcirco felici morte sublatum confido, quòd tam sanctæ Occupationi immortuum gaudeo. Sed & P. Joanni Hieronymo Hispali, præstans ad mortem apparatus fuere sacra Exercitia. Invitati sacrâ Clementis VIII. beneficentiâ ad Indulgentias Nostri, se S. P. N. Exercitiis excoluere. Inter primos fuit P. Joannes. eo successu, ut illic vir aliàs modestissimus ac prudentissimus, dixerit se vidisse SSS. Trinitatem in throno, cui hinc Regina gloriæ cum omni Cælitum corona. inde S. Michaël cum hierarchicis Ordinibus Angelorum assistebat. Ibi se plenam peccatorum veniam accepisse : & dulcissimâ electionis arrhâ cordi suo impressâ donatum. Postulanti autem sibi, ut vel in gratia confirmatus peccare non posset, vel de vita tolleretur, preces non irritas cecidisse. Impetravit

travit posterius. Nam brevi in morbum per octo dies mirè savientem incidit, nullâ vitæ, votis, vel aliter prorogandæ mentione admissâ; cùm diceret, se nunquam paratorem fore ad mortem. (*Nad. Pret. Occup. c. 7. n. 9. pag. 46*) Ita ille octo Dies Exercitiis, octo alios morbo dedit & morte spei plenâ excessit ad videndam, & amandam æternum SSS. Trinitatem. Parem felicitatem spera, si parem Occupationem vel semel quotannis exercendam assumpseris, Moriture Lector. Quod ut facias, si ego non persvadeo, persvadeat adhortatio Pauli III. in eo Diplomate, quo hæc Exercitationes S. IGNATII, ad perpetuam memoriam ratas sanctâsq; esse voluit, in hæc verba loquentis: *Hortamur plurimum in Domino omnes & singulos utriusq; sexûs Christi fideles, ut tam piis Documentis & exercitiis uti, & illis instrui velint; impetret ipsius S. P. Ignatii deprecatio, quam ille interponit in quadam Epistola ad Emmanuelem Mionam Sacerdotem gravissimum, quo usus ipse quondam Compluti Confessario fuerat, Parisios datâ; ubi cùm petisset ab Emmanuele significari sibi successum Exercitiorum, si ea expertus esset, continuò subjicit: Sin autem expertus nondam es, per Filii Dei amorem ac reverentiam, & acerbissimam necem, quam causâ nostrî obiit, peto, quesq;, ut in ea te des. Tum verò si te facti pœnituerit, præterquam quòd pœnam nullam recuso, putato me planum atq; irrisorem, & quidem personarum, quibus tantum debeo. Iterum, atq; iterum, & quoties valeo, ad DEI obsequium id ipsum flagito, ne ad ultimum divina Majestas requirat ex me, quòd non urserim,*

urserim, neq; cunctis meis viribus postularim id, quod in hac vita equidem possum sentire, & excogitare optimum, tum ut homo sibi ipsi proficiat, tum ut fructus ferat, profiq; ac proficiat aliis multis. Ita S. Ignatius. Venetiis Kal. Novemb. 1536.

CAPUT X.

In Eventu subitæ mortis quid facto sit opus.

R. P. Andreas Schambogen S. J. Vir ascescos ap- primè peritus, & ab administrata, cum laude Bohemiæ Provincia, illiusq; primariis Domibus multum commendatus, hâc quoque inter doctrinas ceteras, spirituales filios imbuebat, ut, quieti cessuris, non antè obreperet somnus, quàm ipsi certos in se Affectus excitarent. ita si assvescerent, & repentè contingeret mori, facile futurum, ut in eosdem ex usu erumperent, magno salutis lucro. Pios hosce affectus quinq; literis, quæ SS. nomen JESUS conficiunt, designabat memoriæ causâ.

I. J. JESUM, MARIAM, JOSEPHUM piè inclamare. Apud homines profanos, aiebat, in repentinis casibus nihil est usitatus, quàm exclamare; *Heu! quid hoc? E heu!* aliâque ejusmodi; at proborum verò, alius est usus. SS. Nomina sunt illis in corde, sunt sæpe in ore. Felices! nam, ut alicubi legisse me memini,

Hæc

*Hæc tria Nomina
Sunt bona omina,
Et mundi lumina,
Et cœli limina.*

2. E. Elicere conari actum Contritionis. Ita David: *Peccavi Domino!* & mox audit. *Domini* quoq; *transulit peccatum tuum à te.* Et Publicanus: *Deus propitius esto mihi peccatori!* & justificatus descendit. Verè Chrysostomus: *Non impeditur temporis angustia Dei misericordia.* in Psal. 50.

3. S. Signa doloris de peccatis exhibere, v. g. Confessionem expetendo, oculos levando in cœlum, pectus percutiendo, manus in cœlum levando, &c. Eo videlicet, ut ejusmodi signis etiam per alios cognitis, superveniens Confessarius, Moribundum absolvere à peccatis valeat. Attritio namq; absolutioni juncta peccatorem justificat; extra Absolutionem sola Contritio, quam inveteratis peccatoribus elicere difficile est.

4. U. Voluntatem suam cum divina plenè conformare, se suaq; omnia DEO integrè committere, mortem licèt acerbam & subitam de manu Illius libenter acceptare, pro peccatis offerre, bene de DEO sperando, cui nihil sit repentinum, nihil improvisum, quémq; diligentibus omnia cooperantur in bonum.

5. S. Spiritum in manus Patris cœlestis affectuose commendare.

Ita quidem in subitis mortis repentinæ casibus quemvis agere par est. Sed nisi in vita istis assuescimus, excident in morte, cùm quotidianâ experienciâ constet,

conflet, totum hominem tunc in eo esse, ut à mortis periculo liberetur. Quare suadebat suprà laudatus Pater; ut homo salutis suæ cupidus horologiario cymbalo admonitus sese tantisper colligat, atq; intra se his aut horum similibus affectibus vacet: 1. JESUS, MARIA, JOSEPH. 2. *Ab doleo! ab diligo.* 3. (pectori manu admota) *Deus propitius esto mihi Peccatori!* 4. *Sicuti tu scis ac vis ita fac mecum Domine in vita, in morte, in eternitate.* 5. *Pater, in manus tuas commendo Spiritum meum.*

Quia verò in subitis moriendi periculis terror ingravescens plerumq; hominem sic à mente dejicit, ut sibi salutiq; suæ consulere vix aut ne vix quidem possit, Christiana charitas circumstantes permovere debet, ut hos illi Pietatis Affectus insinuent, utq; sine mora sese proripiant ad evocandum Confessarium, qui periclitanti succurrat. Nam si uspiam, hîc profectò locus est sacræ illi paginæ: *Unicuiq; Deus mandavit de proximo suo.* (Eccli. 17. 12.) Est enim interdum videre, ad hominem cum morte luctantem ingentem fieri hominum concursum, quorum tamen nullus ad accersendum Sacerdotem procurret, an ex obliviosa quadam alienæ salutis incuria, an ex DEI ita justè disponentis permissione, nihil definio. Quodsi tamen ad periclitantem evocetur Sacerdos, meminerit ita sibi accelerandum esse, ut festino per plateas cursu nihil suæ auctoritati derogandum sit, imò juxta Theologorum sententiam consecratas etiam in Sacrificio Missæ sacræ Species (quibus interim custodiendis fidelis quispiam præficiatur) tantisper deferere, tum ubi Moribundo, prout

pr ut par erat, succurrit, ad consummandum sacrificium reverti debeat. Quæ doctrina est P. Elia Stanislai Ottho in *Ministerio Angelico*, desumpta ex Zambrano p. 5. tr. 3. resol. 70 quem refert Diana tom 2. tract. 1. de cebra. Miss. resol. 136 Usque aded pretiosæ sunt DEO nostræ animæ, ut ob earum salutem suo quasi jure cedere ad tempus non recuset, honoréinq; suum à sacrificio promanantem interrumpi, permittat. Eusebius Gallicanus tanquam in ecstasi positus illud edixerat: (*Hom. 6. de Pasch.*) *Tam copioso munere ipsa redemptio agitur, ut homo DEUM valere videatur*; hinc tanta est divinæ Majestatis commoditati hominis sese postponi patientis modestia, ut non tantum *homo Deum valere*, sed (sanè loquendo) *prevaleat Deo* videatur. Habeat sibi sane Christianorum quilibet commendatam illam cautionem: *Si offers munus tuum ad altare & recordatus fueris, quia frater tuus habet aliquid adversus te; relinque ibi munus tuum ante altare, & vade prius reconciliari fratri tuo: & tunc veniens offeres munus tuum*; (*Matth. 5. 23.*) Sacerdos profectò ad Moribundum vocatus id sibi dictum putet: *Si offers DEO munus sacro-sancti Sacrificii ad altare, & monitus fueris, quia frater tuus cum morte luctatur; relinque ibi munus tuum ad altare, & vade prius Deo reconciliare* (per confessionem, absolutionem, unctionem) *fratrem tuum, & tunc veniens offer munus tuum.* Jam si DEO tam acceptum munus, quo cogitari nullum acceptius potest, ob instantem Proximi necessitatem interrumpi convenit, reputet secum ipse prudenter

R

denter Sacerdos, possitne esse aliquid, quod illum à ferendo Periclitantibus auxilio spiritali remorari, ne dicam, retrahere queat? Nihil esse poterit profectò, si præsertim ad se eo maximè tempore pertinere iudicet illam admonitionem: *In omnibus operibus tuis esto velox*; (*Eccli. 31. 27.*) & quoniam Sacerdos *Angelus Domini exercituum est*, habito præ oculis illo stimulo: *Ite Angeli veloces*, inducat in animum, ad succurrendum Morientibus Seraphicas charitatis alas asumere sese, nec tam currere, quàm volare debere. Ingens esse hujuscemodi celeritatis præmium in altera vita pœna tarditatis demonstrat. Quam vel ex Philippo Servio colligere licet, (*Amici fideli p. 1. pag. 15.*) qui commemorat sacerdotem quendam in Provincia Gallobelgica post mortem alteri item è Societate spectatum dixisse: diu se gravissimam pœnam dampni passum, & exclusum à conspectu DEI: quia, inquebat, *in visendis juvandisq; Moribundis, dum vita sinebat, tardior fuerim, ac negligentior. quam tarditatem ac negligentiam, ut expiarem, iussit DEUS, ut animam agentibus præstò essem, eosq; in morem Angeli Tutelaræ adjuvarem. Sunt, non modò ex nostro, sed etiam ex aliis Ordinibus bene multi, qui etiamnum indiligentiam suam in visendis, solandisq; moribundis, simili modo expiant.* (*Nadas. Occup. pret. mor. in Societ. c. 38. n. 3.*) Sic ille. Ergo sancte DEI Minister, simul atq; intelligis morte repentinâ, seu etiam Lentâ periclitari proximum, (*Eccli. 38. 24.*) *Consolare illum in exitu Spiritus sui, ad amorem DEI, ad dolorem de peccatis, ad voluntatem Deo consecran-*

consecrandam excita, seu verbo seu nutu poenitentem
absolve, si potes, extremum unge, sacro Viatico com-
muni, nec quidquam omitte, quo extremum pericli-
tanti prosis. Sic nimirum ad unguem explebis D.
Ambrosii monitum, inquentis : (*De bono mortis c. 8.*)
Si quem in extremis possumus viderimus, non relinqua-
mus. Occurrat & nobis dicere : Benedictio morituri
in me veniat. (Job. 29. 13.) Landet & te unusquisq,
morbo absumptus, & jam morti proximus. Hic ver-
sicalus quantos benedixit fecit ? quoties mihi pudorem
incussit, si moriturum prateris, si non visitavi gravi-
ter agrum ? Ita Ambrosius. Beati, qui sic in morte
consolantur alios, quoniam & ipsi morientes conso-
latione replebuntur, & quod prastiterunt aliis, sibi
quoque exhiberi videbunt. Pignus felicitis mortis est
charitas & misericordia, in Moribundos præsertim.
Unde Augustinus peramantem monet : Amate miseri-
cordiam, quia nunquam vidi piū hominem malā
morte finire. (To. 10. f. 6.) Et alibi : Habe charita-
tem : tunc pervenies ad eternitatem, ubi
invenies securitatem. (Serm. 69.
de diversis.)



P A R S IV.

Orationes, Affectus, Aspirationes.

Ad impetrandam felicem mortem
accommodatæ.

CAPUT I.

ORATIONES.

§. I. *Oratio Dominica & Angelica
Salutatio.*

Pincipatum semper teneant Oratio Domini-
ca, & Angelica Salutatio: quarum priorem
cū simus indignissimi, tamen præceptis sa-
lutaribus moniti, & divinâ institutione formati aude-
mus dicere, Deūmq; rerum omnium Creatorem ac
Dominum vilissimi vermiculi Patrem appellare: sive
autem illa ad morbum, sive ad mortem accommode-
tur, præstantissimos Virtutum præcipuarum affectus
(quos tamen ab orante necesse est intendi) illi tempo-
ri convenientes continet. Quid enim præclarius, aut
ægotanti morientiq; consultius, quàm *paterna DEI*
providentiæ filiali fiducia de integro sese committere?
ad *caelestem Patriam* anhelare? optare & petere, ut
per morbum & mortem illius, DEI nomen laudetur,
sanctissi-

sanctificetur & glorificetur? ut ad regni æterni possessionem quamprimum admittatur? ut *sancta Dei voluntas*, perinde ut *in cælo* fit, de ipso, per ipsum, in ipso perfectissimè impleatur? ut *Panc illo supersubstantiali* Deitatis, quo solo anima satiari potest, hodie & quantumvis perfruatur? ut quidquid vel ipse in Deum, vel in illum proximus deliquit, id à Deo utriq; misericordissimè *condonetur*? ut illum periculosus in exitu vitæ Diaboli *tentationibus* succumbere Deus non patiatur? ut deniq; ab *omni malo* in hac vita culpæ, in altera pœnæ & purgatoriæ & Tartaræ liberetur? Salutatio verò Angelicæ tum profectò salutem nostram in tuto collocat, cum nobis efficax Dulcissimæ Dei Matris patrocinium *in hora mortis* exorat. Itaq; non immeritò has ego Orationes tanti facio, ut ad impetrandam felicitatem mortis sufficere putem: quia tamen humanum fastidium varietatem desiderat, multiplices alias hîc subjiciemus, iterum, iterumq; monentes, ne illas in extremum vitæ rejiciamus, sed quamdiu valemus, jam nunc pro tunc usurpemus, nobisq; ipso usu familiares reddamus. Inertia ferruginem armis, usus splendorem conciliat.

§. II. *Commendatio animæ serviens
bene valentibus.*

Enge animo, quàm potes vivacissimè te à Medicis depositum in momenta singula mortem expectare, cereum etiam accensum, ut moribundis datur, in manum, si lubet, accipe, & corde contrito ac humili sic ipse te alloqueretur.

Proficiscere, ô anima mea, de hoc mundo, quando-
 docunq; DEO ita visum fuerit, in nomine DEI Patris
 omnipotentis, qui te creavit: in nomine JESU Christi
 Filii Dei vivi, qui pro te passus est: in nomine Spiritûs
 S. qui in te effusus est: in nomine Angelorum & Ar-
 changelorum: in nomine Thronorum, & Domina-
 tionum: in nomine Principatum & Potestatum: in
 nomine Cherubim & Seraphim: in nomine Patriar-
 charum & Prophetarum: in nomine sanctorum Apo-
 stolorum & Evangelistarum: in nomine sanctorum
 Martyrum & Confessorum: in nomine sanctorum
 Monachorum & Eremitarum: in nomine sanctarum
 Virginum, & omnium Sanctorum & Sanctarum Dei:
 fit illo die in pace locus tuus, & habitatio tua in sancta
 Sion. Per eundem Christum Dominum nostrum.
 Amen.

DEUS misericors, DEUS clemens, DEUS qui se-
 cundum multitudinem miserationum tuarum pecca-
 tum poenitentium deles, & præteritorum criminum
 culpas veniâ remissionis evacuas: respice propitius
 super me famulum tuum, & remissionem omnium pec-
 catorum meorum totâ cordis confessione poscentem
 deprecatus exaudi. Renova in me piissime Pater,
 quidquid terrenâ fragilitate corruptum, vel quidquid
 diabolicâ fraude violatum est: & unitati corporis Ec-
 clesiæ membrum redemptionis annecte; Miserere
 Domine gemituum, miserere lacrymarum mearum;
 & non habentem fiduciam, nisi in tua misericordia ad-
 tuæ sacramentum reconciliationis admitte. Per Chri-
 stum Dominum nostrum. Amen.

Commendo te omnipotenti DEO, Anima mea, & ei, cujus es creatura, committe, ut cum ex hoc corpore morte interveniente exieris, ad auctorem tuum, qui te de nihilo creaverat, revertaris. Egrescenti itaq; tibi de corpore splendidus Angelorum coetus occurrat: judex Apostolorum tibi senatus adveniat: candidatorum Martyrum triumphator exercitus obviet: liliata rutilantium te Confessorum turma circumdet: jubilantium te Virginum chorus excipiat: & beatæ quietis in sinu Patriarcharum te complexus adstringat: mitis atq; festivus Christi JESU tibi aspectus appareat, qui te inter adsistentes sibi jugiter interesse decernat. Ignoret omne quod horret in tenebris, quod stridet in flammis, quod cruciat in tormentis. Cedat tibi teterrimus Satanas cum satellitibus suis: in adventu tuo te comitantibus Angelis contremiscat atque in æternæ noctis chaos immane diffugiat. Exurgat Deus, & dissipentur inimici ejus: & fugiant qui oderunt eum à facie ejus. Sicut deficit fumus deficiant: sicut fluit cera à facie ignis, sic pereant peccatores à facie Dei: & justii epulentur, & exultent in conspectu Dei. Confundantur igitur & erubescant omnes tartaræ legiones, & ministri Satanæ iter tuum impedire non audeant. Liberet te à cruciatu Christus, qui pro te crucifixus est. Liberet te à morte æterna Christus, qui pro te mori dignatus est. Constituat te Christus Filius Dei vivi intra paradisi sui amoena virentia, & inter oves suas te verus ille Pastor agnoscat. Ille ab omnibus peccatis tuis te absolvat; atq; ad dextram suam in electorum suorum te Societate constituat. Redemptorem tuum facie ad fa-

ciem videas, & præsens semper assistens manifestissimam beatis oculis aspicias veritatem. Constituta igitur, ô anima mea inter agmina beatorum, contemplationis dulcedine potiari in secula seculorum. Amen.

Suscipe me Domine indignissimum servum tuum in locum sperandæ mihi salvationis à misericordia tua. Amen.

Libera Domine in morte animam meam, ex omnibus periculis inferni, & de laqueis poenarum, & ex omnibus tribulationibus. Amen.

Libera Domine in morte animam meam, sicut liberâsti Henoch & Eliam de communi morte mundi. Amen.

Libera Domine in morte animam meam, sicut liberâsti Noë de diluvio. Amen.

Libera Domine in morte animam meam, sicut liberâsti Abraham de Ur Chaldæorum. Amen.

Libera Domine in morte animam meam, Sicut liberâsti Job de passionibus suis. Amen.
Sicut liberâsti Isaac de hostia & de manu patris sui Abrahæ. Amen.

Sicut liberâsti Lot de Sodomis, & de flammis ignis. Amen.

Sicut liberâsti Moysen de manu Pharaonis regis Ægyptiorum. Amen.

Sicut liberâsti Daniele de lacu leonum. Amen.

Sicut liberâsti tres pueros de camino ignis ardentis, & de manu regis iniqui. Amen.

Sicut liberâsti Susannam de falso crimine. Amen.

Sicut

Libera, &c.

Sicut liberasti David de manu Regis Saul & de manu Goliath. Amen.

Sicut liberasti Petrum & Paulum de carceribus. Amen.

Et sicut beatissimam Theclam virginem & martyrem tuam de tribus atrocissimis tormentis liberasti: sic liberare digneris animam meam in morte, & tecum facias in bonis congaudere cœlestibus. Amen.

Commendo tibi Domine jam nunc pro extremo articulo mortis animam meam, & precor te Domine JESU Christe Salvator mundi, ut propter quam ad terram misericorditer descendisti, Patriarcharum tuorum Sinibus insinuare non renuas. Agnosce Domine creaturam tuam non à Diis alienis creatam, sed à te solo Deo vivo & vero: quia non est alius Deus præter te, & non est secundum opera tua. Latifica tunc Domine animam meam in conspectu tuo, & ne memineris iniquitatum mearum antiquarum, & ebrietatum, quas suscitavit furor sive fervor mali desiderii. Licet enim peccaverim, tamen Patrem, & Filium, & Spiritum Sanctum non negavi, sed credidi: & Zelum Dei in me habui, & Deum, qui fecit omnia, fideliter adoravi; atque etiam nunc viva fide credo, & profundissima submissione adoro.

Delicta juventutis, & ignorantias meas, quaeso, ne memineris Domine: sed secundum magnam misericordiam tuam memor esto mei in gloria claritatis tuæ. Aperiantur mihi in hora mortis cœli, collatentur mihi Angeli. In regnum tuum Domine me servum tuum suscipe. Suscipiat me beatus Petrus

R 5

Apostolo-

Apostolus, cui à te claves regni cœlestis traditæ sunt. Adjuvet me S. Paulus Apostolus, qui dignus fuit esse vas electionis. Intercedat pro me S. Joannes electus Dei Apostolus, cui revelata sunt secreta cœlestia. Orent pro me omnes sancti Apostoli, quibus à Domino data est potestas ligandi atq; solvendi. Suscipiat me cum rota Societate triumphante S. N. P. Ignatius, cujus me Domine filium esse voluisti. Ad-sint mihi Sancti NN. quos ut in salutis Patronos deligerem, me edocuisti. Intercedant pro me omnes Sancti & Electi Dei, qui pro Christi nomine tormenta in hoc seculo sustinuerunt : ut vinculis carnis exutus, pervenire merear ad gloriam regni cœlestis : præstante Domino nostro JESU Christo : Qui cum Patre & Spiritu Sancto vivit & regnat in secula seculorum. Amen.

Subvenite in egressu animæ meæ Sancti Dei, occurrere Angeli Domini : suscipientes animam meam : offerentes eam in conspectu Altissimi. Suscipiat me Christus, qui redemit me, & in sinum Abrahamæ Angeli deducant me : suscipientes animam meam, offerentes eam in conspectu Altissimi.

Oremus.

Tibi Domine, meo & totius Ecclesiæ tuæ nomine, jam nunc pro ultimo vitæ momento commendo animam meam, ut, cum defunctus fuero huic seculo, tibi vivam : & quæ per fragilitatem humanæ conversationis, aut meam malitiam, peccata commisi, tu veniâ misericordissimæ pietatis absterge. Per Christum Dominum nostrum. Amen.

§. III. ORATIONES.

Sanis, & agrotantibus servientes.

OMnipotens & misericors DEUS, qui humano generi & salutis remedia, & vitæ æternæ munera contulisti: respice propitius me famulum tuum, *infirmi-
mitate corporis laborantem* (sanus dicat: *cum infir-
mitate corporis laboravero*) & animam refove, quam creâsti; ut in hora exitûs illius, absq; peccati macula tibi Creatori suo per manus sanctorum Angelorum representari illa mereatur. Per Christum Dominum nostrum.

Alia.

Suscipe, queso Domine Sancte, Pater omnipotens, æternæ Deus Vitæ, Passionem & Mortem Unigeniti Filii tui D. N. JESU Christi, quam tibi offero pro me indigno famulo tuo in extremo vitæ aliquando futuro; & concedo: ut per illam universa mea delicta purgentur: ut quum tuæ dispositionis flagellis in hac vitâ fuero attritus, in futura requiem consequar æternam. Per eundem Christum Dominum nostrum. Amen.

Alia.

ROgo clementiam tuam omnipotens Deus, ut per virtutem Passionis Dominicæ me famulum tuum gratiâ tuâ confirmare digneris: ut in hora mortis meæ non pravealeat contra me adversarius, sed cum Angelis tuis transitum habere merear ad vitam. Per eundem Christum Dominum nostrum. Amen.

Alia.

Alia.

DEUS, cui proprium est misereri semper & parcere, tibi in finem misericordiae commendo animam meam: ut cum eam de hoc seculo migrare iusseris, non tradas eam in manus inimici, neq; obliviscaris in finem, sed jubeas eam à Sanctis Angelis suscipi, & ad patriam paradisi perducì per Christum Dominum nostrum.

Alia.

Quæso, Domine, ut egressuram de hoc corpore animam meam Sanctorum atq; electorum consortio jungas, eiq; rorem misericordiae tuae perennem infundas, & si quæ illi maculae de terrenis contagiis adhæserint, remissionis tuae gratiâ delere digneris. Per Christum.

Alia.

Inelina Domine aurem tuam ad preces humilitatis meae, quibus clementiam tuam suppliciter deprecor, ut animam meam, ubi de hoc seculo migraverit, in pacis ac lucis regione constituas; & Sanctorum tuorum jubeas esse consortem. Per Dominum.

Alia.

Abolve, quæso, Domine statim post mortem animam meam ab omni vinculo delictorum: ut in resurrectionis gloria, inter Sanctos & electos tuos resuscitatus respirem. Per.

Alia.

Alia.

INveniat, *quæso*, Domine, à morte anima mea lucis æterna consortium: cuius perpetuæ misericordiæ consecuta est Sacramentum. *Per.*

§. IV. Protestationes S. Caroli Borromæi Ecclesiæ Cardin.

1. **I**N nomine SSS. Trinitatis Patris, & Filii, & Spiritus Sancti. Ego infelix & miser peccator, *Protestor* in præsentia tua, ô Angele Dei assignate mihi à divina tua Majestate pro ductore, cum primùm natus sum; velle & desiderare me mori in ea sola vera, & Catholica fide, quam sancta Romana & Apostolica tenet, & profitetur Ecclesia, & in qua omnes Sancti, quotquot fuerunt unquam ulpiam, mortui sunt; nec desidero diutius vivere, quàm placeat Deo meo, cui omnem voluntatem meam integrè ex toto subijcio.

2. *Protestor* etiam ô Angele DEI, desiderare & velle me sub tua sancta custodia ac protectione discedere ex hac vita cum spe divinæ misericordiæ, sine ulla titubatione in fide, non obstante quacumque multitudine & gravitate peccatorum meorum; certò sciens ac firmissimè credens, etiam unam solam guttam pretiosissimi Sanguinis D. N. J. Christi sufficientem futuram fuisse non solum me salvandi, sed universum etiam genus humanum, quin & mille mundos, si ita placitum fuisset divinæ suæ Majestati.

3. Similiter *protestor*, ô Angele Sancte, petere me ex intimo corde participem heri misericordiæ Redemptoris

demptoris & Domini mei JESU, remissionemq; omnium peccatorum meorum consequi, scientem, quod ipse eam nulli peccatori quantumvis gravi & abominabili neget ritè contrito & confesso, idq; per & propter merita amarissimæ suæ passionis & mortis, & virtutem pretiosissimi Sanguinis sui, pro me indignissimo in ligno crucis copiose effusi, per merita demum sanctissimæ Matris suæ Virginisq; MARIÆ, & omnium Sanctorum & Angelorum.

4. Iterum *protestor*, Sanctissime mi Custos, supplicare me divinæ pietati, ut dignetur me recipere in numerum eorum, quos ab æterno prædestinavit in suam gloriam; etiamsi oporteret me pati ob peccata mea in Purgatorio ad novissimum usq; judicii diem, dummodo tandem per ipsius infinitam misericordiam consequar vitam æternam.

5. Sanctissime & vigilantissime mi Custos *protestor* demum, constituere me, te Procuratorem Testamenti, ultimæq; voluntatis meæ, ad impetrandum mihi à Domino meo JESU tres gratias.

Primo ut mihi donet unum solùm lacrymosum suspirium ex infinitis illis, quæ habuit ipse, dum per tres horas vivus fuit in cruce, quorum efficaciam & virtute mitigentur lacrymabiles illi singultus cordisq; pressuræ, quibus in hora mortis affligar. Et ut gloriosissima Mater DEI MARIA, dignetur me vel unico etiam aspectu ex iis, quos ipsa sub cruce stans habuit, defigendo in unicum Filium suum virgineos oculos, suscipiendo me in numerum eorum, qui ejus precibus & meritis in die judicii obtinebunt salutem,

ac vitam sempiternam. *Secundo*, ut tu fidelissime Custos meus in illa potissimum hora mihi succurras, quando anima mea separabitur à corpore meo, ut inveniam benignum Judicem, merito flagrantissimæ illius charitatis, quâ paternum ipsius pectus in cruce fuit inflammatum pro salute peccatorum. *Tertiò*, ut tu idem piissime Custos meus, animam meam tibi habeas commendatam, eamq; de ergastulo corporis egressam, dextera tuâ potentiâ Redemptori meo cileras, ut eum unâ tecum & cum sanctis omnibus in cœli gaudiis videam, perfectè amem, eoque æternaliter fruor; cui sit laus, honor, & gloria in omnem æternitatem. Amen.

§. V. Ad Christum Crucifixum.

Ex P. Francisco Poirè.

O Lignum sacrum, ô arbor gloriosa, quæ vitæ fructum portasti, & instrumentum salutis meæ extitisti, te adoro, & quàm possum humillimè coram te me demitto. O JESU, summe mi Pontifex, qui solus inventus es dignus, qui divinum hoc altare conscenderes, & æterno Patri sacrificium expiationis offerres, meaq; peccata tuo sanguine ablueres; pro hoc, aliisq; omnibus beneficiis tibi quantas possum gratias ago. Tuus sum absq; ulla comparatione magis, quàm egomet mei ipsius, liquidem tu mihi te dedisti, vitæq; tuâ infigiti pretii me redemisti. Quo titulo servitutis summè delector, pluriusq; illum facio, quàm quemcunq; alium, cujus possem esse capax, meamq; tibi libertatem totupliciter reddo, quoduplicibus à te beneficiis sum affectus. O adorandum Salvatoris
mei

mei *Caput*. longè mihi es carius & amabilius cum tua spinea corona quàm si omnia mundi diademata gestares. O sancta *Capitis vulnera*, sanctaq; instrumenta spinarum, quæ divinum hoc caput transfixillis: vos, vos agnosco, fateorq; veros esse canales, per quos salus mea defluxit. O sanctum *O.S.* ex quo emanârunt oracula æternarum veritatum, & omnis omnino bonorum certitudo, quæ unquam possum sperare: per quod infusæ sunt omnes gratiæ, omnesq; cœli suavitates: à quo etiam expecto ultimum æternitatis meæ decretum; ô si auderem tibi osculum figere! quidni hoc osculum pacis, & tutamen posthac mihi futurum ab omni timore arbitrarer? O *oculi* ipsis cælorum astris millies lucidiores, ex quibus profluxerunt tractus & illectus amoris, qui innumeros peccatores converterunt, atq; pertinaciam & obstinationem cordium vel maximè induratum infregerunt; ô si vel unicum favorabilem è vobis proficiscentem jactum emitteretis; cor meum peccatis obduratum quamprimum emollesceret, & in sinum vestrum resiliret. O benedictæ *Manus*, quæ cœlum & terram fabricâstis, in quibus clausum continetur pretium nostræ sanctificationis; facite, ô facite vel unicam guttulam pretiosi illius sanguinis, quem pro me fuditis, defluere super me, & tunc nihil verebor æterni Patris tribunali me sistere. O *Cor* JESU, scaturigo vitæ, fons amoris, promptuarium omnis gratiæ, & thesaurè infinitæ bonitatis, fac, ut remissionem peccatorum, quam mihi moriens comparâsti, à te percipiam. O si vel unicum tuorum spiritorum mihi concederes! illud mihi satis abunde esset.

esset, non solum ad obtinendam veniam meorum,
sed omnium totius etiam mundi delictorum. Dum
Sanctuarium hoc apertum est, patere me eò ingredi,
ô Salvator mi! Si enim ad hoc asylum pertigero,
nullæ dæmonum vires poterunt me inde avellere.
Largire mihi hanc gratiam, ut in sinu cordis tui me
abscondam, usq; dum ira Patris tui mitigata con-
quiescat. O sacri *Pedes*, qui tot vias ambulâstis ad
me requirendam Ovem, quæ perierat; quomodo
nunc dum vobis sponte occurrit, velletis eam rejicere?
Vos complector Columnas cœli, deliberatum habens
vos non derelinquere, nisi postquam audivero dulce
illud verbum, quod Salvator meus dixit Magdalenæ,
dum illa vos suis lacrymis irrorabat: *Remissa sunt*
tibi peccata tua. Quod si de lacrymis tantopere
agitur, disrumpe, mi amabilissime JESU duritiem
cordis mei, & fac, ut ex eo erumpant scaturigines
aquæ vivæ. transfige & eventila omnes venas meas, &
educ de oculis meis etiam sanguineos rivus lacryma-
rum. Si neq; amorem, neq; verè pœnitentis tuæ
Magdalenæ, neq; unguentum, quod te unxit, habeam;
vel unica tua lacrymula cœlum & terram condiet, &
plus amoris mihi, quàm ipsi Seraphim habeant, in-
stillabit. O Pater juste, Pater sancte, Pater æternæ,
en redemptionis meæ pretium: vide, obsecro, Filii
tui latus. vide membra plagis sauciata, vide caput pro
me inclinatum, vide totum quantum corpus dilacera-
tum, & ne mihi in extremis constituto deneges redem-
ptionis gratiam, quæ Filio tuo tam caro constitit.
Si mea crimina me indignum reddunt, quò minus

veniam in tuum conspectum, nolo me respicias, sed solum ut oculos tuos in faciem Filii tui conjicias. Poterisne autem tu quidquam denegare Agno. qui pro me immolatus est? Si respectus & reverentia, quæ debebatur illius divinæ personæ, te obligat ad concedendum, quidquid petit in cruce; dignare obsecro recordari, quod salus mea, una fuerit ex petitionibus, quas tibi tunc fecit. Non propter proprium aliquod meritum salutem meam spero, sed quia JESUS benedictus Filius tuus illam pretio sui sanguinis acquisivit. En vox ejusdem longè potentior, quàm Abelis, etiam nunc resonat in auribustuis, clamans: *Pater, remitte illi!* Audi hanc vocem, & jam in pace dormiam, & requiescam. Eripe Domine hanc pauperculam animam ex unguibus infernalis leonis, ut in perpetuum glorietur se à Leone de Juda ereptam, sitq; ea unus à fructibus victoriarum Filii tui, teq; in sua & Spiritûs Sancti individua Societate tamdiu benedicat, quamdiu in Trinitate Personarum, & Unitate unius & ejusdem Essentiæ regnaturus es DEUS in secula seculorum. Amen.

Ad singula membra Crucifixi.

Salve tremendum cunctis potestatibus *Caput* Domini nostri JESU Christi Salvatoris nostri pro nobis spinis coronatum & arundine perculsum. Salve speciosissima Salvatoris nostri JESU Christi *facies*, pro nobis sputis illita, & alapis cœsa. Salvete benignissimi Domini nostri JESU Christi Salvatoris nostri *Oculi*,
pro

pro nobis lacrymis perfusi. Salve mellissimum *Os*,
gutturq., suavissimum Domini nostri J E S U Christi,
 pro nobis felle & aceto potatum. Salvete *Aures* no-
 bilissimæ Domini N. J. Christi Salvatoris nostri, pro
 nobis contumeliis & opprobriis affectæ. Salvete ve-
 nerabiles D. N J. Christi *manus & brachia*, pro no-
 bis in cruce extensa. Salve *pectus* mitissimum D.
 J E S U Christi Salvatoris nostri, pro nobis in passione
 conturbatum. Salve *latus* gloriosum D. N. J. Ch.
 pro nobis lanceâ militis perforatum. Salvete D. N.
 J. Ch. Salvatoris nostri sacra misericordiæ *genua*, pro
 nobis in oratione flexa. Salvete D. J. Ch. Salvatoris
 nostri *pedes* adorandi, pro nobis clavis affixi. Salve
 totum *corpus* JESU Christi pro nobis in cruce suspen-
 sum, vulneratum, mortuum, & sepultum. Salve *San-*
guis pretiosissime de corpore D. N J Christi Salvato-
 ris nostri, pro nobis effuse. Salve sanctissima D. N.
 J. Christi *anima*, in cruce pro nobis in manus Patris
 commendata.

In eadem commendatione tibi commendo hodie
 & quotidie, & in hora mortis meæ animam meam,
 cor, & corpus meum, omnes sensus & actus meos;
 omnes amicos, benefactores, & consanguineos meos;
 animas parentum, fratrum, sororum, & omnium ami-
 corum, & inimicorum meorum: ut nos protegere,
 liberare, & defendere digneris ab omnibus invidiis
 inimicorum nostrorum, visibilibus, & invisibi-
 bilium, nunc & in perpetuum.

Amen.

Salutatio Vulnerum Crucifixi, ex more Sanctæ Mechtildis.

O Sacratissima Domini mei Jesu Christi pro me crucifixi Vulnera salвете, salвете. Salвете in omnipotentia Patris, qui vos dedit: Salвете in sapientia Filii, qui vos sustinuit: Salвете in benignitate Spiritûs Sancti qui in vobis opus Redemptionis perfecit. Salвете monumenta charitatis: Salвете testimonia obedientiæ: salвете solatia fidelis animæ: salвете pretia redemptionis humanæ: salвете pignora futuræ gloriæ. Salвете fortitudo Martyrum: salвете patientia Confessorum: salвете gloria Virginum: salвете gaudium Angelorum: salвете corona Sanctorum omnium. Salвете! saluate, sanate, mundate, purgate, sanctificate. Sanctificate animas nostras in potentia Patris; sanate mentes nostras in sapientia Filii: mundate corda nostra in bonitate Spiritûs Sancti: salvate nos ab æterna damnatione: purgate nos ab omni iniquatione: sanctificate nos in vestra dilectione; cum abundantia vestrarum gratiarum in hac vita, & cum plenitudine gloriæ in altera. Amen.

Sanctæ Gertrudis ad JESUM.

O JESU mi charissime, quando corpus meum te permittente revertetur in pulverem, & anima mea refluet in suam originem? Quando in te, pax mea, obdormiam & requiescam, ut apertè contempler tuam ineffabilem gloriam? quando plenè aspirabit mihi mellifluæ divinitatis tuæ fragrantia, & exorietur

tuz

tuae manifestae visionis Dies sempiterna? O quàm bonum est, dilecte mi, te clarè videre, te habere, & in æternum possidere! Eja tu mihi concede, ut miseram hanc vitam in tua gratia & amicitia feliciter finiam. In hora exitûs mei benedic animæ meæ, & mortem involve vitali morti tuæ, quæ est charissimum foedus firmissimûmq; pactum reconciliationis meæ. Tunc mitte fidelem adjutricem **MARIAM** Virginem Matrem tuam amabilem, stellam maris inclytam, ut conspectâ hac præclarâ rutilantiq; aurorâ cognoscam te solem justitiæ mihi jam propinquum esse. Dic in morte animæ meæ: Salus tua ego sum: ego creator & amator tuus, per angustias mortis quæsi & acquisivi te: semper tecum eris, noli timere. Eja tunc recipe me in beatam domum æternitatis & claritatis tuæ. Ibi ô salus mea unica visû mellifluæ præsentiae consolare me. Ibi gustu charæ acquisitionis tuæ, quâ me redemisti, recrea me. Ibi inspiramento suavissimi spiritûs tui attrahe me; & imbebe me. Ibi per osculum perfectæ unionis in perpetuam tui fruitionem immerge me: ut vivam de te, & exultem in te, tibiq; hostiam laudis reddam sine fine. Amen.

Ad SS. Nomen JESU.

Dignare benignissime JESU per hoc sanctum Nomen tuum esse mihi Jesus, & date mihi spiritum Nominis JESU. Insere cordi meo hoc amabile nomen tuum, ut ejus dulcedine pascar, ejusq; amore ita ardeam, ut *Moriar* & vivam in te JESU mi dulcissime, JESU mi suavissime, JESU mi dilectissime: in-

vocato semper, maximè in hora mortis nœæ, hoc
jucundissimo, hoc mellifluo, hoc salutifero nomine
tuo **JESU, JESU, JESU!**

Oratio ad Christum.

S. Ignatio Confels. familiaris.

Anima Christi sanctifica me,
Corpus Christi salva me,
Sanguis Christi inebria me,
Aqua lateris Christi lava me,
Passio Christi conforta me,
O bone Jesu exaudi me,
Intra vulnera tua absconde me,
Ne permittas me separari à te,
Ab hoste maligno defende me,
In hora mortis meæ voca me,
Et jube me venire ad te,
Ut cum sanctis laudem te,
In secula seculorum. Amen.

Oratio eadem paulò auctior.

Anima Christi sanctifica me in veritate:
Corpus Christi salva me in perfecta & vera chari-
tate:
Sanguis Christi inebria me dulcissimâ tuâ suavitate:
Aqua lateris Christi lava me ab omni impuritate:
Passio Christi conforta me in mea imbecillitate:
O bone Jesu exaudi me ad te clamantem in omni
necessitate:

Intra

Intra vulnera tua absconde me à paternæ iræ gravitate :

Ne permittas me separari à te quacunq; sceleris impietate :

Ab hoste maligno defende me, & ejus crudelitatem :

In hora mortis meæ voca me in pace & tranquillitate :

Et jube me venire ad te ex hac misera captivitate :

Ut cum sanctis tuis laudem te in perpetua felicitate :

In secula seculorum, totâ beatissimâ aternitate.

Amen.

Ad Christum in Cruce morientem.

Domine JESU Christe propter illam amaritudinem, quam pro me miserrimo sustinuisti in cruce, maximè in illa hora, quando nobilissima anima tua egressa est de corpore tuo, miserere animæ meæ in egressu suo, & perduc eam in vitam æternam. Amen.

Ad eundem S. Franc. Seraphici.

Absorbeat, quaeso, Domine JESU Christe, mentem meam ignita & melliflua vis amoris tui ab omnibus, quæ sub cælo sunt: ut amore amoris tui *Moriar*, qui amore amoris mei dignatus es mori. *Qui vivis.*

Dicenti devotè genibus flexis Orationem frequentem S. Augustini, concessit Bonifacius VIII. octoginta millium annorum indulgentiam. Eandem verò per continuos 40. Dies orantibus, & confessis

fessis ac verè contritis plenariam. Ita Joan. Nadaſi diurno div. amor. c. 19. pag. 187.

Quæ indulgentiæ ſi ſunt revocatæ, magnam tamen Oratio habet efficaciam, utpote Paſſionis Dominicæ memorativa.

DEUS, qui pro redemptione mundi naſci voluiſti. circumcidi, à Judæis reprobari, à Juda traditore oſculo tradi, vinctis alligari, ſicut Agnus innocens ad victimam duci, atq; conſpectibus Annæ, Caiphæ, Pilati & Herodis indecenter offerri, à falſis teſtibus accuſari, flagellis & colaphis cædi, opprobriis vexari, conſpui, ſpinis coronari, arundine percuti, facie velari, veſtibus ſpoliari, cruci clavis affigi, in cruce levari, inter latrones deputari, felle & aceto potari, & lanceâ vulnerari. Tu Domine, per has ſanctiſſimas pœnas, quas ego indignus recolo, & per ſancſtam crucem & mortem tuam, libera me à pœnis inferni, & perducere digneris, quò perduxiſti latronem tecum crucifixum. Qui cum Patre & Spiritu Sancto vivis & regnas in ſecula ſeculorum. Amen.

Ad Chriſtum Patientem.

Orationes, ex *Rituali Pragenſi.*

I.

Domine JESU Chriſte, per tuam ſanctiſſimam agoni-
am, & orationem, quâ orâſti pro nobis in
monte Oliveti, quando factus eſt ſudor tuus, ſicut gut-
tæ ſanguinis decurrentis in terram: obſecro te, ut
multitudinem ſudoris tui ſanguinei, quem præ timoris
angusti-
angusti-

angustia copiosissimè pro nobis effudisti, offerre, & ostendere digneris DEO Patri Omnipotenti contra multitudinem omnium peccatorum meorum, meq; liberare in hora mortis meæ ab omnibus pœnis & angustis, quas pro peccatis meis me timeo meruisse. Qui cum Patre, & Spiritu Sancto vivis & regnas DEUS in secula seculorum. Amen. Pater. Ave.

II.

DOMINE JESU Christe, qui pro nobis mori dignatus es in cruce; obsecro te, ut omnes amaritudines passionum & pœnarum tuarum, quas pro nobis miseris peccatoribus sustinuisti in cruce, maximè in illa hora, quando sanctissima anima tua egressa est de sanctissimo corpore tuo, offerre & ostendere digneris DEO Patri Omnipotenti pro me peccatore miserrimo, meq; liberare in hora mortis ab omnibus pœnis & passionibus, quas pro peccatis meis me timeo meruisse. Qui cum Patre, & Spiritu Sancto vivis & regnas DEUS in secula seculorum. Amen. Pater. Ave.

III.

DOMINE JESU Christe, qui per os Prophetæ dixisti: *In charitate perpetua dilexi te, ideò attraxi te miserans*; obsecro te, ut eandem charitatem tuam, quæ te de cœlis in terram ad tolerandas omnium passionum tuarum amaritudines attraxit, offerre, & ostendere digneris DEO Patri Omnipotenti pro me miserrimo Peccatore; meq; liberare ab omnibus passionibus, & pœnis, quas pro peccatis meis me timeo meruisse.

ruisse. Et salva animam meam in hora exitus mei. Aperi mihi januam vitæ, & fac me gaudere cum sanctis tuis in gloria æterna. Et tu piissime Domine JESU Christe, qui redemisti nos pretiosissimo sanguine tuo miserere animæ meæ, & eam introducere digneris ad semper virentia & amœna loca Paradisi, ut vivat tibi amore indivisibili, & à te, & ab Electis tuis nunquam separari possit. Qui cum Patre & Spiritu S. vivis & regnas DEUS in secula seculorum. Amen. *Pater noster. Ave Maria.*

Oratio.

Pro felici morte. *P. Petri Canisii S. J.*

Domine JESU Christe, vitæ & necis Princeps, cui & vivimus, & morimur, per sacrosanctam & amarissimam in cruce mortem tuam precor, ut adventus in mea morte tuus me non uti dormientem, impartum, & inertem, sed vigilantem & frugi servum inveniat. Ne permittas, quæso, me impœnitentem ex hac vita migrare, & improvisâ morte præoccupari: sed moriturum maturè confirmes ac munias catholicâ fide, verâ pœnitentiâ, purâ confessione, dignâ satisfactione & sacratissimo Eucharistiæ viatico, oleiq; sancti perceptione. Cùm cetera me omnia deferent, quæ caduca & fluxa in hoc mundo possidentur, tu, qui cum Electis tuis perpetuò manes, me non deferas: præsertim in extremo illo vitæ agone, quando cum infestissimo Satana vel maximè luctandum est. Assistent mihi tum in morte Angeli tui, & migraturum ad ver-

adversus tentationes omnes protegant tum in doloribus consoletur, atq; confirment. Vigean in me tunc fides, spes, charitas, & patientia: in manus tuas me animo præsentem commendem, atq; in pace sancta obdormiam: ut in regnum tuum, quod nobis tanto pretio comparasti, securè transire possim. Memento mei Domine, qui regnum tuum poenitenti etiam serò Latroni promittere, ac pro summa clementia tua donare dignatus es. Amen.

§. VI. ORATIONES.

Ad dulcissimam DEI ac nostram Matrem
Virginem MARIAM.

Litaniæ Lauretanæ huc apprimè serviunt: item hymnus, *Stabat Mater dolorosa, Ave maris stella, Salve Regina* &c. quæ passim habentur.

Orationes Sæ. Mechtildis.

O Domina mea sancta MARIA, sicut Deus Pater per omnipotentiam suam te potentissimam effecit ità mihi quæso adfûs in hora mortis, expellendo à me omnem contrariam potestatem. Ave MARIA.

O Domina mea S. MARIA, sicut Filius DEI tantâ te cognitione & claritate illustrare dignatus est, ut totum cœlum illumines: ità in hora mortis animam meam cognitione fidei sic illustres & corroborea, ut nullo errore aut ignorantia pervertatur. Ave MARIA.

O Do.

O Domina mea S. MARIA, sicut S. Spiritus suum amorem plenè tibi infudit: ita tu in morte dulcedinem amoris divini instilla mihi, ex quo omnis amaritudo mihi reddatur suavissima. *Ave Maria.*

Ad B. V. ex Fr. Poirè.

O Virgo & Mater DEI MARIA, in qua sunt omnia amoris illicia, cujus cor est asylum omnium peccatorum; quæ me ab infima mea ætate in materna tua bonitate confidere docuisti: fateor me tibi tot obligationum titulis deberi, ut nulla lingua eas efferre valeat. Tibi sum acquisitus tot nominibus, quot momenta sunt in vita mea. Verùm, si unquam tempus aliquod extitit, in quo tuo auxilio & solatio indigui, nunc verè est, dum nihil aliud expecto, quàm ut citer ad comparandum ante tribunal DEI. Quomodo autem comparere audebo, nisi tuam protectionem obtineo? Heu quid ad omnes accusationes, quas salutis meæ inimici contra me producturi sunt, respondere potero, nisi tu causam meam suscipis defendendam? In materna tua bonitate, post Salvatorem meum, omnem spem salutis meæ collocavi. Virgo sancta, si hac vice mihi defueris, de omnibus gratiæ favoribus, quos hactenus mihi præstitisti, actum est: actum est item de anima mea, quæ te plusquam sè, plusquam vitam suam amare desideravit, & tot præstare obsequia, quot omnes sancti simul tibi exhibere possunt. Si defui, ut verè defui, officio meo, in deferenda tibi reverentia & amore, quem debebam; eni me coram te accuso, & mihi ignosci humillimè peto. Vellem,

Vellem, ut te tantum amâssem, quantum tua merita requirunt, & quantum ego potui ac debui. Quare in supplementum hujus meæ negligentiae offero tibi sincerissimos sensus, gratissimâq; servitia, quæ sancti unquam tibi præstiterunt atq; obtulerunt. Offero tibi insuper omnia honoris testimonia, quæ honoratissimus Filius tuus unquam tibi detulit. Desidero, ut omnes creaturæ me tibi offerant, & rogo, ut digneris me recipere re & nomine infimæ servitutis, cujus tu me intelligis esse capacem. Desidero deniq; ut omnes cælorum incolæ cognoscant, post D E U M, omne id quod sum, & quidquid unquam futurus sum, me tibi debere. O Mater amoris, obsecro, nè sinas, ut dicatur, audiatûrve, te in necessitate deseruisse animam illam, quæ in tua fide bonitate, eiq; manum subtraxisse, quâ salvari poterat. Dic solum Filio tuo, me unum etiam ex illis esse, quos de cruce in persona dilecti Discipuli tibi commendavit, & tunc negotium feliciter meum peragetur. Si enim adverterit, te meam salutem desiderare, quidquid pro me ab eo peteris, impetrabis.

Virgo benedicta, si aliqui sunt in cælo, (ut esse innumerabiles non dubito) qui specialiter ferantur ad D E U M laudandum eo nomine, quòd singulares gratias & favores tibi ipse præstiterit, ô quàm me felicem existimarem, si unus ex eorum numero esse possem ! ô quàm libenter expanderem omnes cordis mei sensus ad te laudandum, & benedicendum illum, qui te talem fecit, qualis es : nimirum coronam sanctorum, miraculum naturæ, gratiæ & gloriæ, & admirationem

rationem omnium seculorum. O incipiam sincero ex corde dicere: Benedictus venter, qui Salvatorem mundi portavit, & ubera, quæ eum lactaverunt. Fac ô fac per gratiam tuam, ut nunquam hoc finiam canticum: fac, ut quamdiu triumphabis Regina cœli, te Filiam Patris, te Matrem Filii, te sponsam Spiritûs Sancti omnibus possibilibus encomiis celebrem cum beatis clientibus tuis in secula seculorum. Amen.

Ad B. V. ex Pret. Occupat. p. 325.

O Dulcissima Dei & nostra Mater Virgo MARIA, per pretiosissimam mortem tuam, & illos actus amoris Dei, quos tunc elicuisti, & per omnem misericordiam tuam, quâ ulli hominum succurristi, memento mei nunc, & in hora mortis meæ. Gere curam mei finis, ut tuâ defensione munitus ingrediar beatam æternitatem. Experiar te matrem pulcherræ dilectionis, & timoris, & agnitionis, & sanctæ spei. Virgo fidelis era pro me. In te post JESUM est gratia omnis viæ & veritatis; in te omnis spes vitæ & virtutis. Spiritus Filii tui & tuus, super mel dulcis, & hæreditas illius super mel & favum. Per te accepi gratias, per te reddo gratias: in manus, & per manus tuas commendo & offero spiritum meum DEO meo, ut illum videam & amem, ô amem in æternum. O Jesu, rogo te per Mariam, ô MARIA rogo te per Jesum; ô Jesu & MARIA rogo vos per SSS. Trinitatem, ô SSS. Trinitas rogo te per amorem, quo Jesum & Mariam, & Teiplam amas, miserere mei, & concede, ut feliciter moriar ad majorem tuam gloriam,

riam, & ex amore tui; ut Te cum JESU & MARIA
amem in æternum. Amen.

Oratio tritissima ad B. V.

Quam R. P. Vinc. Carafa à puero septies
quotidie flexis genibus recitabat. Vitæ
l. 2. c. 12. p. 434.

O Domina mea S. MARIA, in tuam benedictam
fidem ac singularem custodiam, & in sinum mi-
sericordiæ tuæ, hodie, & quotidie, & *in hora exitus*
mei, me, & animam meam, & corpus meum tibi com-
mendo; omnem spem meam, & consolationem
meam, omnes angustias & misérias meas, vitam, &
finem vite meæ tibi committo: ut per tuam sanctissi-
mam intercessionem, & per tua merita omnia mea
dirigantur opera, secundum tuam, tuq; Filii volun-
tatem. Amen.

Ad B. V. & S. Joannem Evangelistam.

O Intemerata, & in æternum benedicta, &c.

Ad Matrem dolorosam.

Interveniat pro nobis quæsumus Domine JESU
Christe, nunc, & *in hora mortis nostræ*, apud tuam
clementiam B. Virgo MARIA Mater tua, cujus sa-
cratissimam animam in hora tuæ passionis doloris
gladius

gladius pertransiuit. Perte JESU Christe Salvator mundi. Qui cum Patre.

§. VII. Orationes ad Angelum
Custodem, & sanctos, præsertim
Patrones.

Huc referendum S. Angeli Custodis officium, cujus Completorium est :

In pugna mortis ultima Adsis mihi fortissimè,
Peracta de num fragili Vitâ, Ductor amabilis:
Me protinus æthereis Infer benignè sedibus.

Huc item valent Litanix Omnium Sanctorum;
& illar, quas Moribundis in Commendatione animæ
præorat Ecclesia.

Oratio ad SS. Patronos.

O Glorioso Spiritus Angele mi Custos, vosq; Beatissimi ceteri cœlorum Incolæ & Patroni mei N. N. quorum singularem protectionem hæcenus expertus, confiteor, dum oculis vestris me præsentor, magnopere me erubescere, quod tam negligenter in vita mea vos coluerim, tam rarò vestræ memoriam habuerim, tam segniter vobis serviverim, tam obiter, & nullâ seriâ adhibitâ consideratione beneficia à vobis mihi præstita pertransierim. quam meam ingratitude mihi ignosci humillimè rogo. Debueram, fateor, tota cordis viriûmq; latitudine propter tot ac tanta beneficia vos honorâsse. At si vestro adjutus auxilio (quo me indignum agnosco) ad societatem vestram aliquando

aliquando admittar, promitto me in omnem æternitatem promulgaturum beneficia, quibus me vobis devinctum tenetis. Interim bonitatem vestram suppliciter obtestor, ne velitis respicere mea demerita, sed vel pro me favore & præsidio, propter communem nostri Salvatoris amorem, & gratias omnes, quas ille vobis contulit, adjuvare. Nunc, nunc inimici mei me circumdant, & summos adhibent conatus, ut me extremæ suæ infelicitatis & miseriæ efficiant consortem. Opponite vos, ah! opponite quæso, perniciosis illorum conatibus, invadite eos, ut victimas æternæ morti destinatas, & ut fugam arripiant, efficite. Custodite omnes animæ meæ potentias, ne ullum ipsis patefaciant aditum. Estote cordi meo loco custodiæ, ne alias admittat cogitationes & affectiones, quàm divinas & cœlestes. Ultimam vitæ meæ horam vobis commendatam habete, & potestatem, quâ apud Deum valeatis, ad impetrandam mihi meorum delictorum remissionem ostendite, ac demum gratiam benedicendi vobiscum sanctum ejus Nomen, in congregatione ceterorum Sanctorum omnium, qui illum in omne ævum laudabunt, impetrate. Amen.

Ad S. Barbaram V. & M.

O Sanctissima Virgo BARBARA, quodcumque Sponsi tui viribus potes, mihi in mortis articulo, obsecro, ut suppedites. Adjuva me miserum, ne in peccatis moriar. Ellectum tunc habeat tuâ intercessionem primitus à Christo tibi facta promissio, cum fidem ejus tuo sanguine consecraret. Redeat in me.

T moriā

moriam Sponso virgineus collo tuo exuberans sanguis. Recordetur ardentissimæ tuæ charitatis, nec animam meam à corpore exire permittat, nisi confessione expiatam, & sacrosancto Eucharistiæ, atq; Extremæ Unctionis sacramento munitam. Amen.

Oratio

Iconi S. JOSEPHI subjecta.

Coelesti nos, quæsumus Domine, famulos tuos protectione defende, ut tibi fideliter servientes, in obitu nostro JESUM, MARIAM, & JOSEPHUM cum sanctis Angelis tuis mereamur habere præsentem atq; propitios. Per eundem Dominum nostrum.

CAPUT II.

AFFECTUS.

§. I. Affectus Blasii Palmæ & Pauli de Barry.

Medulla devotionis consistit in Affectibus, quibus non tam ore, quàm corde prolatis animus ad Deum erigitur, eidemq; intimè unitur. Quo in genere cum nihil præstantius adhuc viderim *Thesauro indeficiente* Blasii Palmæ, & *Pauis Hagrophila* Pauli de Barry, ivaserim, ut quisq; illos Affectus sibi familiares faciat, magnum inde in morbo & morte subsidium habiturus. Vellem, inquires, hæc essent in promptu.

promptu. Verùm *non omnis fert omnia tellus* ; neq; illos libelli hujusce admisit exilitas & deerat reimprimendi facultas. Feci tamen, quod potui, & paucis versiculis in nucleum redegi omnes ; tum futuros usui, siquis cum Deo ita conveniat, ut velit toties à se elictos esse, quoties versiculos istos piè recitaturus sit. Ceterùm appositus per cifras numerus, pagine indicat prædictorum *Affectuum*, prout Anno 1683. Pragæ sunt recusati, & Abbati Strahoviensi Hyacintho Hohman in strenam dicati.

Actus interni Virtutum Blasii

Palmæ.

PRincipium & Finis Deus Augustissime rerum Te
solum intendo, cogito, specto, volo. (1)

Me nosco & sperno. (25.) Propono. (31) Gaudeo.
(47) Credo. (3)

Compator. (45) Doleo. (28) Diligo. (7)

Spero. (18) Peto. (33)

Offero (14) do grates. (12) Laudo. (10) De-
lector. (20) Adoro (5)

Mortifico (37) Adspiro (42) Complaceo (43)

Timeo (24)

Cassus, (37) Inops (39) Promptus volo vivere
(40) Mèq; Resigno (16)

Suppleo (46) Zelo animas (22) Tangor ho-
nore Tui (22)

Gratulor (0) &, bene facta Probo, (47) malè
facta Retracto (48)

Respiro quoties, hæc toties repeto. (71)

Affectus ejusdem ex Attributis divinis.

GAudeo, Magne Deus, quòd sis Quod es (*eodem libello pag. 50*) atq; Benignus (60)
Et Bonus (56) & Sapiens (54) Providus (63)
atq; Potens (53)
Sanctus item (58) & Clemens (65) & Justus (68)
Metâq; rerum (69)
Te quia non capio, me Deus ipse cape.

Pacta Hagiophilæ P. Barry.

Distincto libello Pragæ 1682. recusa.

AStimo (pag. 8) Credo (19) Flagro (60) Re-
novo (53) me Sperno (63) Religno (59)
Compatior (55) Doleo (57) Diligo (24)
Spero (21) Sequor (65)
Offero (37) Protestor (39) méq; Unio (66) Do-
no (47) Recordor (67)
Complaceo (32) Obtestor (44) Gaudeo (10)
Laudo (12) Queror (26)
Abdico (49) Do grates (34) Benedico (16) fi-
démq; reservo (41)
Abnego (51) Commendo (46) Miror (5)
Adoro (1) Peto (42)
Languéo (29) Glorifico (14) verbo complector ac
uino.
Omnia, dum dico corde, vel ore: DEUS! (68)

§. II. Affectus P. Gasparis Druzbecki
S. J. Testamento inclusi, de quo facta
mentio Part. 3. cap.

1. Agnitio, Fides, Spes, Amor SSS.
Trinitatis.

SANCTISSIMA Trinitas, Deus omnium & meus natura-
lis Dominus supernaturalisq; Finis; Te ego in hac
& mortis meæ hora agnosco, à Te spero, Te adoro,
Te amo, ac æstimo super omnia, Dignitatiq; Tuæ me
devoveo ac devotum facio: quia verè dignissimus, &
ipsa Dignitas es, & quia ego omni ratione servus, man-
cipium, jumentumq; tuum sum.

2. Dolor, Retractatio peccati, Ra-
tificatio boni.

PECCAVI in te Deus meus; hoc est peccavi in Es-
sentialiam, Præsentiam, Potentiam, Bonitatem, Chari-
tatem, Gratiā, Dignitatem, Voluntatem, Sapien-
tiam tuam. Peccavi & in meipsum, totāq; portio-
nem naturæ & gratiæ, à Te mihi datam. Peccavi &
in omnem creaturam, mihi ex bonitate Tua perpetuò
servientem. Peccavi, inquam, ego homo, ego nihil,
ego peccatorum primus, peccavi super numerum mo-
mentorum vitæ meæ. Doleo, mi D E U S, dolore,
quo & quanto dolore me vis, ideò tantum, quia vis:
vellem vitasse, volo vitare peccata omnia, per vitæ
meæ momenta omnia. E contra verò mi D E U S,
rata nunc habeo bona omnia, quæcunq; in tota vitæ
T 3 mea

mea, ex Te, circa Te, propter Te habui; ratos habeo pios motus ac sensus & actus meos omnes, sub omni latitudine illorum & sublimitate, eisdem nunc elicitos à me volo, imò illos, quos possum elicio, atq; illos tuæ gratiæ, JESU CHRISTI sanguini, Pretiosissimæ Parentis, & omnium Sanctorum meritis adjunctos, Tibi offero, pròq; iis, tanquam tuis donis, Tibi gratias ago.

3. Confessio & Induitio JESU CHRISTI.

Dulcis JESU CHRISTE, DEUS & Redemptor meus, Fili DEI & Hominis: Te agnosco, credo, amo, vitam, veritatem, viam, pretium meum, amplector ideam vitæ Tuæ, & à me expressam cupio. Approprio mihi merita tua omnia & facio illa mea, isq; unio & dignifico omnia bona mea. In balneo Sanguinis, Vulnerumque Tuorum, abluo ac demergo omnia mala mea. Glorior veste omnium Dignationum tuarum. Includo me & incarcerationi, ac sepelio in Theandrico corde Tuo. Instanti pretiosissimæ mortis tuæ, instans mortis meæ unio & commendo, & deniq; totus in totum Te transformari, & indivinari desidero.

4. Gaudium & gratitudo de Bonis DEI ad intra & extra.

Gratulor, & congaudeo tibi mihi DEUS omnia bona, quæ es in omni creatura. Et ago tibi gratias primùm pro omnibus bonis meis, beneficiis Tuis. Deinde ago tibi gratias pro omnibus proximorum, atq;

atq; adeò creaturarum omnium omnibus bonis, partim quia etiam sunt bona mihi in illis : ego enim sum aliquid unum cum illis, & ideò meum bonum est omne beneficium tuum, quod contulisti, confers, & conferes illis. Ob quod ego te amo, & Tibi gratias ago, sicut pro ipso me, ita pro omnibus illis, ut tibi Deo meo nusquam, & nunquam non sim bonus, sicut Tu Deus meus, tam intrà, quàm extra te ; tam intrà, quam extra me, mihi es bonus. Ob quam etiam rem, omne omnino bonum profiteor esse Tuum, illudq; Tibi attribuo tanquam Tuum ; & si quod unquam usurpavi mihi, vel ulla creatura usurpavit sibi, id omne totum ego & pro me, & pro omni creatura restituo tibi,

5. Invocatio Sanctorum.

VOs in hac hora invoco omnes Angelorum atq; hominum Sanctos Ordines, Dominos atq; Patronos meos ; præcipuè verò ac nominatim vos, quibus quacunq; societate associatus fui, quos peculiariter dilexi, quos media prædestinationis habui, quos mihi Patronos ac Sodales divina Providentia dedit : quos nemo nominatim honorat & invocat, quibus in æterna gloria à Dei gloria associandus sum.

6. Resignatio in DEI voluntatem.

DEUS meus nihil mihi sum, nihil esse volo, nisi terra sterilis. Me apud Te, & propter Te negligo. In te jactatio mea semper, Tibi ego derelictus à me : paratum cor meum Tibi, paratum cor, & cura mei voluntati Tux. Quid de me ? Quid me vis pati, aut

agere? Ecce ego præstò sum, Fiat voluntas Tua in me, de me, per me, propter gustum tuum, propter nullum præmium meum. Ecce ego servus Tuus. Da quod jubes, & jube, quod vis. Fac me Tibi in quem vis, in quem scis, in quem potes gustum cordis tui Miserere mei, sicut scis, & vis. Fac mecum voluntatem tuam, ad voluntatem Tuam.

7. Amor Pretiosissimæ Parentis & V. MARIÆ.

MARIA, Parens Pretiosissima, Domina Mater, Hares, Hæreditas, Sponsa, amoris mei vita, amor vitæ meæ Tu es: ego autem mancipium, filius, hæres, hæreditas, sponsus, jumentum tuum sum. Agnosco te, agnosco me in hac hora, & in hoc instanti mortis meæ, quod ego unio & commendo instanti mortistux. Ultimam tibi reddo tributum, atq; censum mei, nempe meipsum. fac mecum Tuam, & Filii tui voluntatem, orna me tuis, & Filii tui meritis. Tene me maternis (in quibus me depono, & quibus me SSS. Trinitati præsentari cupio) manibus tuis: non sinas autem mori me, nisi augeas in me amorem tui, parem amabilitati & Pretiositati, Dignitatique Tuæ.

8. Sitis DEI & divinorum.

Sitio mi DEUS omnitudine meâ amorem & æstimationem Seraphico-Marianam omnitudinis Tuæ. Sitio honorem & gloriam tuam parem tibi. Sitio noticiam IESU Christi, & adæquatam meritis ejus efficaciam

caciam meritorum ejus, in omnibus redemptis ejus. Sitio cruce, stultitiâ, Dignationibus, incessabili amore, Indivinationis gratiâ, sacrificio, Sacramento, Viatico Eucharistico, imitatione, moribus, merito JESU Christi, nihilitatem meam vestiri, saginari, dignificari. Sitio Pretiosissimæ Parentis amorem. Sitio salutem animarum. Sitio Zelum & sitim salutis animarum. Sitio Zelatores salutis animarum & Zelum sitimq; Zelatoribus earum. Sitio deleri & anathema esse pro fratribus meis. Sitio SSS. Trinitatis, & JESU Christi Humanitatis, Pretiosissimæ Parentis, & cujuslibet Societatis meæ, & universæ Beatorum multitudinis conspectum, consortiûmq; æternum. Sitio autem mihi & omnibus, quibus SSS. Trinitas vult, quia vult. Deniq; sitio & cupio dissolvi, & liberari de corpore mortis hujus. Deus meus cupio. In manus tuas spiritum meum commendo, & reddo.

Affectus alii.

Quos idem P. Gaspar voto & juramento Pestiferis serviendi A. 1622. inclusit.

Vit. c. 12.

Deus radices desideriorum exaudi.

1. **C**Redo sicut S. Ecclesia credit, & credo eam Fidem quam Ecclesia, sancta, Romana docet esse veram, tenendam, divinam: quare in illa, pro illâq; mori tot mortibus, quot possibiles sunt, volo & paratus sum, ac ero.

2. De Justitia, meritis, dignitate mea despero:

T 5

spero

spero autem in sola Dei bonitate & gratia, in Christi meritis & morte, in Pretiosissimæ Parentis Dei & meæ patrocínio, in Communione Sanctorum.

3. Amo & æstimo D E U M meum super omnia, quæ Deus non sunt, amo autem gratis, quia scilicet Deus dignus est; & amo, ut amem.

4. Omnem DEI voluntatem internam, externam, substantialem ita approbo, ita amo, ita exosculor, sicut in ea D E U S ipse complacet: quod potissimum applico huic voluntati Dei quâ me Deus mori hac præfenti infirmitate, hoc præfenti tempore decernit, si decernit.

5. Decretum mortis à divina manu eo animo excipio, quo animo excepit Christus J E S U S decretum mortis suæ pro me in instanti conceptionis suæ in Crucis morte. Item eo animo amplector, quo animo excepit Incarnationis expressitq; illis verbis: *Fiat mihi, &c.* Pretiosissima Dei & mea Mater MARIA. Item eo animo que vel ego, vel quilibet Sanctorum excipiet in die Judicii illud beatum: *Venite benedicti, &c.*

6. Omnia opera totius vitæ meæ, quanta quanta sunt, & à quacunq; potentia mea profecta, mala & imperfecta retracto & corrigo ad Dei placitum: bona verò approbo, & rata habeo.

7. Quacunq; unquam Deo bene proposui, promisi, vovi, juravi; ea omnia nunc denuò propono, promitto, voveo, ac juro ad gustum divinæ voluntatis.

8. Gloriam do Deo, vanitatem do diabolo: mihi purum merumq; nihil reservo.

9. Quàm

9. Quàm perfectè & omnimode subiectus fui tunc DEO, quando primùm à DEO in hac rerum natura producebar, & in fieri eram, tam perfectè me nunc adorandæ Dei voluntati subdo, & subdere æternùm volo.

10. Quântum, & quo motivo DEUS odit peccata mea, tantum & ex eodem motivo ego detestor eadem.

11. Deum beatificè videre non merui, nec merebor in æternum: cupio tamen videre, & me visurum spero: quia ille me ad hunc finem condidit, redemit, perducere vult, gratiam dat, & merendi per Christi sanguinem, facultatem.

12. Statum Religiosum, quem hucusque tenui, approbo, amplector, & ex nunc ingredior; totiusq; mundi res & spes, pro Dei amore & servitio calco; Crucisq; Christi probrum omnibus ejus pompis, affectu & animo Ducis mei JESU Christi Crucifixi, prapono & eligo.

13. Si de salute mea æterna certus essem, imò si eam haberem, & placeret Deo, me hîc cum incertitudine salutis vivere, aliquid autem insigne ad Dei gloriam & voluntatem perficere, præligo hoc posterius illi priori, purè propter gustum Dei, & propter adorandæ voluntatis, gloriæq; æstimationem.

14. Pro omnibus & singulis beneficiis DEI, mihi quomodocunq; in tota vita mea, & ante vitam præstitis & post vitam præstandis DEO gratias ago, quantas possum, ago quantas debeo, ago quantas Christus pro suis obtulit, quantas Pretiosissima Parens, quantas omnes Sancti obtulerunt aut offerent, quantas divina voluntas ea beneficia conferens, meretur.

15. Etsi scirem, quòd damnandus sim, Deo servire cum omni, quæ Creatori debetur, servitute vellem, & volo, tantò etiam magis, quantò hoc spatium brevius mihi esset, & hujus tantùm vitæ spatiis clausum.

16. Opto anathema fieri pro fratribus meis, hoc est, proximis, qui Deum nesciunt, qui Deum offendunt, qui negligenter illi serviunt. Opto autem eo sensu & affectu, quo id Moyses, quo Paulus optavit, quo optari ad gustum Dei potest.

17. Doleo de omnibus peccatis, quæ in DEUM quomodocunq; vel à me, vel à quocunq; facta sunt, fiunt, fient unquam, eo affectu, quo Christus de illis doluit.

18. Spiritum meum non alibi, quàm in svavissima Dei Voluntate, JESU Christi latere, Pretiosissimæ Parentis meæ manibus, Ecclesiæ Romanæ Catholicæ fide, Societatis JESU Religione, emittere, atq; deponere exeuntem ex hoc corpore volo, atq; cupio.

19. Cupio toto cordis affectu usq; ad finem mundi in gravissimis laboribus & ærumnis, omnium hominum saluti æternæ deservire, & me ad hunc laborem, ex nunc sanctissimæ DEI voluntati, quæ omnes salvos fieri, vult, humillimè offero, sicut sese Christus Dominus meus obtulit.

20. Hos omnes actus, quatenus à me sunt, agnosco nullius esse apud Deum momenti, sed eos in medullas gratiæ voluntatisq; , & in viscera meritòrum & sanguinis Christi immergo, ut
valeant.

§. 3. Ad Christum in cruce morientem.

Affectus ejusdem. Vit. c. 19. p. 229.

1. JESU in cruce agonizans & moriens pro me;
 Immitte quæso spiritum tuum in cor meum,
 illôq; animam meam vivifica; quoniam teste & dante
 te, tuo solo spiritu vivere volo, tam in hujus præsentis
 vitæ meæ tempore, quàm in mortis meæ articulo.

2. JESU in cruce agonizans, & moriens pro me;
 adoro Te adoratione Patriæ debita Majestati tuæ di-
 vinæ, insuperq; mori totis viribus cupio, ut morte meâ
 quàm citissimè & condignissimè agonizantem & mo-
 rientem Te pro me in cruce, venerer, ac morte meâ,
 quoad possum, compensem mortem Tuam.

3. JESU in cruce agonizans, & moriens pro me;
 per hunc agonem Tuum, & per spiritum, quem in ma-
 nus Patris æterni commendasti, obtestor Te, ut instans
 mortis Tuæ influat in mortis meæ instans, illudq; di-
 gnificet, & in conspectu sanctissimæ Trinitatis gratum
 atq; pretiosum reddat, Instanti igitur mortis tuæ,
 agoniq; Tuo pretioso instans mortis meæ agonemq;
 meum humillimè recomendo, repræsentò, unio,
 consecro.

4. JESU agonizans & moriens in cruce pro me,
 ibidemq; orans pro Crucifixoribus Tuis Patrem, obse-
 cro, ut ores quoq; eundem pro me crucifixore tuo, im-
 petresq; mihi mortem sanctam, & charitate perfecta
 consummatam.

5. JESU agonizans, & moriens in cruce pro me,
 stillantem, repentemq; amore mei sanguinem Tuum
 colligo;

colligo, & lambo devotus, optans simul ac petens à Te, ut in hora mortis meæ adesse, mihi præsens cum gloriosa Matre tua sanctisq; Tuis digneris, adnumererq; me saltem ultimis redemptis & electis Tuis. & in illo decretorio agonis mei momento, secundum magnam misericordiam, copiosamq; redemptionem Tuam misereris mei.

6. JESU agonizans, & moriens in cruce pro me; nullam omnino spem salutis æternæ aut nunc habeo in vita, aut habere volo protestorq; in morte mea, præterquam in sacratissimis Vulneribus doloribusq; Tuis, & in mortis tuæ instanti, quo Redemptionem nostram consummasti. O mi JESU, sit mors tua, vita mea: Mors Matris tuæ dignificet mortem meam: Mors sanctorum omnium pretiosam coram Te faciat mortem meam.

7. JESU agonizans, & moriens in cruce pro me, Te ego pauperculus servus tuus, per Trihorium Agonemq; Tuum, quo cum doloribus mortis in cruce colluctatus es, obsecro, ut te talem in hora mortis meæ cognoscam, credam, imiter, venerer, diligam, atque corde meo morti succumbente, & ex sanguinibus labiis meis Te personem, invocem, demurmurem; ac laudandi invocandiq; Te conatui ultimatè tandem immoriar.

8. JESU agonizans, & moriens in cruce pro me; cupio, propono, & abs Te peto, ut instans ultimum vitæ mortisq; inæ consummativum, sit ardentissimus Tui amor, quo cor meum & accensum ignescat, & vulneratum immorietur, & consumptum incineretur, & concrematum favillescat.

9. JESU

9. JESU agonizans, & moriens in cruce pro me, amo te, quàm possum ignitissimè, & astuosissimè, quomodo te etiam amare volo statuôq; in mortis meæ agone, in quo ut cor meum amoris tui ignibus Scephicis, Marianisq; ac insuper Tuis aestuet, palpitet, concutiat ac emoriatur, Tu mi JESU, propter agonis mortisq; Tuæ instans, misericordissimè facito. Amen.

Conformitas cum voluntate Dei.

DEUS meus, amor meus, absit, ut quod tu vis, ego nolim, aut quod tu non vis, velim ego. tua voluntas, mea voluntas: imò jam amplius mea non est, quia tua esse cœpit, imò tua jam mihi sequenda est, quia mea esse cœpit. Idem ego velle debeo, quod tu: & verò etiam, ô Domine volo. Vis me ægrotare? volo. vis me depauperari? volo. tabescere? volo. doloribus affligi? volo solatiis destitui? volo. adversis plurimis exerceri? volo. mori etiam? & hoc volo. Vis me cœlo adscribere? volo quàm maximè, interis ad dicere? Ah bone JESU, ut tu hoc velles, volebam ego & merebar: ut ego hoc nollem, & volebas tu, & merebaris. Atq; si fieri posset (uti sanè non potest) horum alterutrum: aut sanctissimam tuam voluntatem irritam esse, ut ego beatus sim; aut me damnatum esse, ut sanctissima tua voluntas rata sit, proclamo: Melius est damnari me, & servari, quod tu vis ô Deus! sed, ô Bonitas, mortem meam, scio non vis: qui Filii tui mortem ideò volebas, ut posses non velle meam. Per illam ergo Filii mortem te rogo, ô Pater, à morte æterna

aterna me eripe. En vulnera, en sanguinem, quo tibi pro me litatum est filio nolebas parcere, ut polses servulo. Quia ergo & potes, & vis misereri, ô immensa, ô tremenda Majestas, miserere mei, parce mihi, peccavi, negare non possum; sed tu potes condonare, quidquid peccavi. Serva me, Deus, quem creasti: opus tuum sum, quod te meum Opificem videre & aeternum laudare cupio. Potes quidem instar figuli me luteum vasculum, & sub sui auctoris manu parum obsequens frangere, & (quod pridem meritus sum) inflammas abjicere, sed quia major est tua bonitas, quàm malignitas mea; parce Domine, parce, parce, vivam amando te, qui brevi moriar, hoc per ultimum halitum rogando te: MISERERE.

Aspiratio ad Cœlestem Patriam B. Petri Damiani Cardinalis.

AD perennis vitæ fontes mens sitivit arida, claustra carnis præssò frangi clausa quærit anima, Gliscit, ambit, eluctatur, exul frui Patriâ.

Dum pressuris ac arumnis se gerit obnoxiam,
Quam amisit, dum deliquit, contemplatur gloriam, Præsens malum auget boni perditæ memoriam.

NAm quis promat summæ pacis quanta sit Læticia,
ubi vivis margaritis surgunt ædificia, Auro cella micant tecta: radiant triclinia.

Solis gemmis pretiosis hæc structura nectitur: Auro mundo tanquam vitro urbis via sternitur; Abest limus, cœst finis, Lues nulla cernitur.

Hiems

Ileus horrens, æstas torrens, illic nunquam sæ-
viunt, flos perpetuus rosarum ver agit perpetuum,
Candent Lilia, rubescit crocus, sudat balsamum.

Virent prata, vernant sata, rivi mellis influunt : Pi-
gmentorum spirat odor, liquor & aromatum :
Pendent poma floridorum non lapsura nemorum.

Non alternat Luna vices, Sol vel cursus siderum :
Agnus est felicitis Urbis Lumen inocciduum : Nox
& tempus desunt ei, diem fert continuum.

Nam & Sancti quique velut Sol præclarus rutilant :
Post triumphum coronati mutuo conjubilant : Et
prostrati pugnas hostis jam securi numerant.

Omnī Labe defœcati carnis bella nesciunt, Caro
facta spiritalis, & mens unum sentiunt : Pace mul-
ta perfruentes, Scandala non perferunt.

Mutabilibus exuti repetunt originem : Et præsen-
tem veritatis contemplantur speciem : Hinc vita-
lem vivi fontis hauriunt dulcedinem.

Inde statum semper iidem exeuntes capiunt : Clari,
vividi, jucundi nullis patent casibus : Absunt morbi,
semper sanis senectus juvenibus.

Hinc perenne tenent *Esse* : nam *transire* transit :
Inde vigent, virent, florent, corruptela corrui-
t : Immortalitatis vigor mortis jus absorbuic.

Qui Scientem cuncta sciunt, qui nescire nequeunt :
Nam & pectoris arcana penetrant alterutrum :
unum volunt, unum nolunt, unitas est mentium.

Licet cuiq; sit diversum pro labore meritum : Charitas hæc suum facit ; quod, dum amat alterum, Proprium sit singulorum, commune sit omnium.

Ubi corpus, illic jure congregantur aquilæ, quo cum Angelis & Sanctæ recreantur animæ : Uno pane vivunt cives utriusq; Patriæ.

AVidi & semper pleni, quod habent desiderant : Non Satietas fastidit, neq; fames cruciat : Inhiantes semper edunt, & edentes inhiant.

NOvas semper melodias vox canora concrepat, Et in jubilum prolata mulcent aures organa ; Digna, per quem sunt victores, Regi, dant præconia.

Felix, cœli quæ præsentem Regem cernit anima : Et sub sede spectat alta : orbis volvi machinam, Solem, lunam, & globosa cum planetis sidera.

CHriste Palma Bellatorum, hoc in municipium Introduc me, post solum militare cingulum : fac consortem donativi beatorum Civium.

ADde Vires Laboranti inexhausto prælio, ut feliciter emenso vitæ hujus stadio, Promerear te potiri sine fine præmio, Amen.

Affectus S. Franc. Xaverii
DEUM amantis.

AMO DEUM ! sed libere
Amo ! sed hoc amore

Quem

Quem corde sœvit scribere.,
Qui dignus est amore.

Amo ! sed hæc incendia
Vos astra non paratis ;
Non appetit stipendia
Qui vult amare gratis.

Non me movet cœlestibus
Fundata Spes in hortis :
Nec his adurunt æstibus
Perennis antra mortis.

Amor cœmptus nullus est ;
Amabo nil petendo ;
Amor coactus nullus est ;
Amabo nil timendo.

Tu, mi Redemptor, horridos
Enecte per dolores,
Tu cor mihi tam torridos
Resolvís in calores.

Crux, probra, clavi, tubera.,
Tot flagra tot cruores,
In corde sicut ubera.,
Hos nutriunt amores.

Istis amoris ignibus
Mens rota concalescit.,
Dum mortis ex insignibus
Te cognitum stupefcit.

Extingve cœli Lumina ;
Adhuc, adhuc amabo :

Extingve ditis flumina ;

Adhuc, adhuc amabo.

Spes nulla sit si diligam ;

Adhuc, adhuc amabo :

Styx nulla, si non diligam ;

Adhuc, adhuc amabo.

Nil das ? adhuc amaberis :

Spes nulla me titillat ?

Damnas ? adhuc amaberis,

Nec sic amor vacillat.

Ruente cœli Lumine ;

Orcôq; deflagrante ,

Manente solo Numine ,

Amabo, sicut antè.

CAPUT III.

Preces jaculatoriæ, sive Aspirationes.

Difficile est & durum ab ægrotis longas Preces exigere. Breves illis maximè conveniunt, eôq; usurpandæ ferventiùs, quò dolor acriùs vexat. Neq; necesse est omnes simul vel linguâ vel animo volvere, una sufficit, quæ si ex sincero animo & sapius proferatur, magnum infirmo robur, solatiùmq; adferet, cumulat merita, illùmq; Deo conjunget. Multas hîc tamen, & varias ejusmodi Affectuum formulas subijicimus, ut, cùm eis bene valentes eliciendis assueverimus,

mus, ægrotis quoq; & moribundis in promptu esse possint.

§. I. Aspirationes Fidei.

Credo & confiteor Fidem illam sanctissimam, quam Christus Salvator meus docuit, Apostoli prædicârunt, quam sancta Romana tenet Ecclesia.

Agnosco, Deus meus, lumine fidei, quod sis Dominus meus, & supernaturalis ultimus Finis meus.

Credo, mi Deus, quia es, & quia Remunerator es: & morior in adoratione patriæ SSS. Trinitatis.

Trinitatem in unitate, & Unitatem in Trinitate corde credo ad justitiam, & ore confiteor ad salutem.

In vera, Catholica, & Apostolica Fide desidero, vivere & mori.

Desidero hanc Fidem per totum orbem terrarum quàm amplissimè dilatare.

Utinam haberem fidem omnium Apostolorum, & omnium Martyrum!

Utinam omnium Martyrum tormenta pro hac Fide possem sustinere.

Credo Domine: sed adjuva incredulitatem meam.

Credo quidquid in Symbolo Apostolorum, in Symbolo S. Athanasii, in Symbolo Nicano, in Professione Fidei Tridentina credendum proponitur: & hanc veram Catholicam Fidem integram & inviolatam usque ad extremum vite spiritum constantissimè,

Deo adjuvante, me velle retinere & confiteri spondeo, voveo, ac juro !

Credo, quòd Redemptor meus vivit, & in ovis-
simo Die de terra surrecturus sum, & rursus ar-
cundabor pelle meâ, & in carne mea videbo DEUM
Salvatorem meum, quem visurus sum ego, & non
alius, & oculi mei conspecturi sunt.

*Domine etiamsi me oportuerit mori tecum, gra-
tiâ tuâ (quam peto) adjutus, non te negabo.*

Dulcissimam DEI & nostram Matrem Virginem
MARIAM absque originalis peccati macula Con-
ceptam esse piè credo, teneo, & assero. (*Quod si
quando tuenda Immac. Conceptionis voto te obstrinxi-
sti, adde*) meq; publicè ac privatim velle piè tenere &
asserere spondeo, voveo, ac juro ; donec aliter à sede
Apostolica definitum fuerit.

*Credo Pater aeternæ, quidquid de Te, & Filii
tui aeternæ Generatione, rerumq; omnium visibilium
& invisibilium creatione, & omnibus circa Te myste-
riis credit & sentit sancta Mater Ecclesia.*

Credo Fili Dei, quidquid de Te, ut DEO & Ho-
mine, & humani generis Redemptione, & omnibus
circa Te mysteriis credit & sentit S. Ecclesia.

*Credo Spiritus Sancte, quidquid de tua à Patre
& Filio Processione, & omnibus circa Te Mysteriis
credit & sentit S. Mater Ecclesia.*

§. 2. Spei.

Spero in abyssis infinitæ misericordiæ tuæ, ô mi
DEUS!

Spero

Spero in omnipotentia tua Pater aeternae: quia potes me salvare.

Spero in tuo pretiosissimo Sanguine, tua Vita, Passione & Morte, JESU amantissime: quia hæc omnia impendisti, ut me salves.

Spero in tua dulcedine, bonitate, & benignitate Spiritus S. Deus: quia vis me salvare.

Spero in tuo Patrocinio, ô Peccatorum Scala, & maxima mea post Deum fiducia, ô MARIA.

Spero in vestro auxilio & intercessione Omnes Sancti & Sanctæ Dei. Spero, dum spiro!

Domine, etiamsi peccata totius mundi haberem, adhuc in Te sperare vellem.

Domine major est Misericordia tua, quàm iniquitas mea: Major Bonitas tua, quàm mea malitia. Miserationes tue super omnia opera tua!

Domine DEUS meus, tu es Spes mea ab uberibus matris meæ: in te projectus sum ex utero: in manibus tuis sortes meæ: in te speravi, non confundar in æternum.

Misericordias Domini in æternum cantabo: Si mater aliqua obliviscatur infantem uteri sui: tutamen, Domine, mei non oblivisceris.

Etiamsi me occideris, in te sperabo Domine.

Qua est Expectatio mea, nonne Dominus?

Suscipe me Domine secundum eloquium tuum, & vivam: & non confundas me ab expectatione mea.

Mihi adhaerere Deo bonum est, ponere in Domino spem meam.

Ad te levavi animam meam, Deus meus, in Te confido, non erubescam.

Et si ambulavero in medio umbræ mortis, non timebo mala, quoniam tu mecum es.

Misericordiæ tuæ Domine, non est numerus : & bonitatis tuæ infinitus est thesaurus.

Deus, cuius proprium est misereri semper, & parcere ; parce peccatus meis, & miserere mei.

Magno pretio redempti sumus !

Rursum circumdabor pelle mea, & in carne mea videbo Deum Salvatorem meum : reposita est hæc spes mea in sinu meo.

Non venit Redemptor meus, non venit vocare Iustos, sed Peccatores, quorum primus ego sum. Venit querere, & salvum facere, quod perierat.

Impium te, ô homo, quæsitivus DEUS, ut redimeret ; an ergo redemptum deseret, ut perdat ? S. Aug. in ps. 66.

Conserve me Domine, quoniam speravi, spero, & sperabo in te.

Melior est misericordia Domini super vitas.

JESUS meus prius me dilexit, quam ego eum diligere. Jam igitur cum eum diligam, is me non deseret, non deseret, non deseret. Avila ep. 3.

§. 3. *Charitatis.*

Diligo te, Domine JESU Christe, plus quam me : quia tu creâsti, redemisti, & dotâsti me.

Da hoc nobis, Domine, ut te super omnia ; Proximum autem nostrum propter te, sicut nos ipsas sincerè diligamus.

Utinam te possem amare illo amore, DEUS, quo

quo te amârunt, amant, & amabunt omnes Angeli & Beati in cœlis, omnes Iusti & Electi in terris.

O si omnia mea suspiria non sint nisi divini amoris jacula! O si omnes cordis mei motus, essent divine charitatis intensissimi actus!

JESU! amore amoris tui moriar, qui amore amoris mei dignatus es mori!

Amorem tui solum, Domine, cum gratia tua mihi dones, & dives sum satis, nec aliud quidquam ultra posco. S. Ignatius C.

Domine, tu nôsti omnia, tu scis quia amo Te.

Quis nos separabit à charitate Christi? tribulatio? an angustia? an fames? an nuditas? an periculum? an persecutio? an gladius? Gratia tuâ adjutus Domine, certus sum, quia neq. mors, neq. vita, neq. Angeli, neq. Principatus, neq. Virtutes; neq. instantia, neq. futura, neq. fortitudo, neq. altitudo, neq. profundum, neq. creatura alia poterit nos separare à charitate Dei, quæ est in Christo JESU Domino nostro. ad Rom. 8.

Quis mihi hoc tribuat, mi JESU, ut ego moriar pro te, & expirem in te, & respirem per Te!

Accende Domine, in medio cordis mei flammam amoris tui beatissimi. S. Phil. Neri.

Serò te amavi pulchritudo tam antiqua, & nova, serò te amavi. Væ tempori illi; quo te non amavi! S. August.

Deus meus, amo te: & si parum amo te, da ut amem validius.

Rogo te, Domine JESU, ut vel fidei Martir

moriar, vel certè martyr charitatis. Ardeam divini amoris incendio, & desiderio Tui extinguar.

Da mihi, mi Deus, ut plus amem te, quam unquam sis offensus à me, vel ab ulla creatura.

O DEUS! ego amo te, non ut in cœlo salves me: Aut ne æternùm damnes me, nec præmii ullius spe: sed sicut tu amasti me, sic amo, & amabo te, solùm quia Rex meus es. Et solùm quia DEUS es. S. Xaver.

Hæc est mors Sanctorum, expirare amando, & amare expirando. Utinam sic amem, & expirem!

Aut pati, amore tui desiderio, DEUS, aut mori.

Moriar Domine, ut amem te: & amem, ut moriar. O sim holocaustum amoris tui, Deus!

Ah quàm velim tanto erga Deum amore ardere, quanto amore digna est illa tanta Majestas! B. Aloysius Vit. l. I. c. 16.

Tuo amori, honori tuo, amabilis Deus, animam hanc meam, vitam hanc meam, tui amoris igne sacrificio. Sit ista tibi oblatio munda. sit sacrificium incruentum, cruento illi Filii Tui morientis sacrificio conjunctum: sit holocaustum in odorem suavitatis æternæ, cum JESU, & per JESUM, Tibi, & propter Te, Pater Æternæ, Deus.

Toto me, toto Te, amo Te, mi Deus. Amo, quia amo, & amo, ut amem. Amo Te, quia Es, qui Es; & ut sis, Qui es.

§. 4. Contritionis.

DEUS meus, cùm tu sis infinitè dignus omni amore, & servitio, siquidem tu es, qui es; doleo quantum possum

possum maximè, de omnibus meis peccatis, illaq; detestor super omnia mala: peto humillimè veniam, facioq; firmissimum propositum, nunquam offenderedi tuam, bonitatem in æternum. Tibi soli peccavi, miserere!

O me omnium mortalium ingratissimum, Deus? Tu fecisti mihi omnia bona, ego tibi feci omnia mala. Tu certasti mecum beneficiis, ego tecum peccatis.

Hæcine reddidisti anima mea stulta & insipiens, hæcine reddidisti Domino, pro omnibus, quæ retribuit tibi?

Miserere mei Deus secundùm magnam misericordiam tuam. Magnam misericordiam tuam imploro, quia magnam iniquitatem meam agnosco.

Secundum magnam misericordiam tuam memento mei Tu, propter bonitatem tuam Domine.

Ne projicias me, Domine, à facie tua, & Spiritum Sanctum tuum non auferas à me.

Si hinc Peccati pudorem, illinc cernerem Inferni horrorem, & necessariò uni illorum deberem immergi; prius me in infernum mergerem, quàm peccatum committerem.

Delicta juventutis meæ, & ignorantias ne memineris Domine.

Ab oculis meis libera me Domine, & ab alienis parce sermo tuo.

Domine miserere mei. Sana animam meam, quia peccavi tibi.

Malo millies mori, quàm peccato fœdari.

Protestor me non consentire, neq; consensurum, unquam

*unquam in ullam rem, quæ fiat cum offensa divina
Majestatis tuæ, Domine Deus meus.*

JESU amantissime, Tene ego ausus sum flagellis cadere, spinis coronare, clavis confingere, pedibus conculcare, morte afficere, ?

O Crucifixe JESU, ego, ego causa tui doloris, ego culpa tua occisionis. Ego rapui, & tu exolvebas!

Quis det capiti meo aquam, & oculis meis fontem lacrymarum, ut plorem die ac nocte quia peccavi nimis in vita mea.

Si iniquitates observaveris Domine, Domine, quis sustinebit ?

Non intres Domine, in judicium cum servo tuo : quia non justificabitur in conspectu tuo omnis vivens.

Peccavi Domine ! Exue Personam Judicis, & indue Patriæ.

Sit sanguis tuus, Domine JESU, spongia peccatorum meorum.

O quantum bonum perdidisti, dum in peccatum cecidisti !

Amote, mi Deus, volôq; tibi bene super omnia : quia divina tua Majestas ita meretur. Et idè doleo, quòd te offenderim, super omnia : quia tua Majestas id non merebatur.

Quia plasmasti me, miserere mei.

Deus propitius esto mihi peccatori.

§. 5. Actus adorationis.

Adoro Te SSS. Trinitas, Pater, Fili, & Spiritus Sancte, Tres Personæ, & unus Deus.

Adoro

Adoro Te infinita Dei mei Majestas, & Fontem bonorum omnium agnosco.

Laudamuste, benedicimus te, adoramus te, glorificamus te: gratias agimus Tibi propter magnam gloriam tuam, ô Beata Trinitas.

Adoro te Patrem Ingenitum, Filium Unigenitum, Spiritum S. Paraclitum, unum solum, verum, eternum, incommutabile Bonum, Deum meum.

Adoro te, Deus, Creatorem meum, infinito amore, honore, & servitio dignissimum.

Deus meus, spes mea, amor meus, lumen meum, vitamea, gaudium meum, omne bonum meum, adoro te.

Dejicio me in abyssum mei nihili, sub conspectu divinæ Majestatis tuæ; Tibiq; illum honorem, quem creatura exhibere potest, defero, ô beata Trinitas!

Sanctissimam Virginem Mariam, cum Angelis & Beatis omnibus, & omnibus creaturis ratione præditis ad Te adorandum, colendum, & honorandum, & amandum invoco, Deus meus, ô beata Trinitas.

Te JESU amantissime, ut Dominum, Patrem, Magistrum, Redemptorem meum adoro.

Adoro tuum dulcissimum nomen Domine JESU Christe, & intimè desidero, ut nomine JESU omne genu flectatur cælestium, terrestrium, & infernorum. Omnis terra adoret te & psallat tibi Domine JESU Christe.

Adoro tua sacratissima vulnera in manibus, pedibus & latere impressa Domine JESU Christe.

Sanctissimum Eucharistia sacramentum profundissimè

fundissimâ humilitate adoro, milliesq; & millicies proclamo: Laudetur, adoreretur, glorificetur sanctissimum Sacramentum.

§. 6. Gratiarum actionis.

GRatias tibi ago Domine Deus meus, quòd me de nihilo creare ad imaginem & similitudinem tuam, & æternæ beatitudinis capacem efficere dignatus es.

Gratias tibi ago, Deus amantissime, quòd me hucusq; conservare, & ab innumeris animæ corporisq; periculis defendere dignatus es.

Gratias tibi ago Domine JESU CHRISTE, nunc & semper, ex toto corde, & ex omnibus viribus meis, quòd propter nos humanitatem assumere, nasci, cum hominibus conversari, & propter nostram salutem pati & mori dignatus es.

Gratias tibi pro ago institutis, nobisq; relictis sanctis Sacramentis, præsertim adorando SS. Eucharistiæ Sacramento.

Gratias tibi ago Domine Deus meus, quòd me ad baptismum, & agnitionem veræ Catholicæ fidei perducere dignatus es.

Gratias tibi ago misericordissime Deus, quòd me peccatorem tamdiu tolerare, & tam paternè ad te revocare dignatus es.

Gratias tibi ago benignissime Deus, quòd me ad tibi serviendum in statu Religioso vocare, eligere, perducere, in eòq; ad hoc usque tempus conservare dignatus es.

Gratias tibi ago, clementissime Deus, quòd mihi
corres

*toties peccata mea multa & gravia, quibus aeternas
pœnas promerui, parcere dignatus es.*

Gratias tibi ago, Providentissime Deus pro
omnibus animæ & corporis adversitatibus, quibus me
totâ vitâ probare & paternè castigare dignatus es.

*Gratias tibi ago, amabilissime Deus, pro univer-
sis beneficiis, quæ SS. Humanitati JESU Christi, Vir-
gini Mariæ, Angelis, Beatis, Electis, & Reprobis, &
inimicis meis omnibus, & toti mundo conferre digna-
tus es.*

Gratias tibi ago dulcissima mea Mater & Virgo
Maria, quòd me hucusq; maternâ tua pietate fovere ;
Tibi S. Angele Custos, quòd me fideliter custodire ;
Vobis ô Sancti Dei, quòd pro me apud Deum interce-
dere voluistis.

Gloria tibi Domine de rebus omnibus.

S. Chrysost. expirans dicebat. Nicephor. l. 13. c. 37.

§. 7. Affectus Oblationis.

Offero tibi, Deus dignissime, corpus & animam
cum omnibus potentiis ejus.

*Offero tibi meipsum totum ; paratus mortem
amarissimam potius subire, quàm tuam Majestatem
in minimo offendere.*

Offero, dono, trado me tibi totum, Deus aman-
tissime, fons & scaturigo omnium bonorum. Et ideo
nolo habere oculos, nisi ad te videndum ; neq; aures,
nisi ad te audiendum ; neq; linguam, nisi ad loquen-
dum de te ; neque cor, nisi ad te amandum ; neque
memoriam, nisi ad recordationem tuæ dulcedinis ;
neq;

neq; intellectum, nisi ad agnitionem tuæ Majestatis ;
neq; manus, nisi ad tuum obsequium ; neque pedes,
nisi ad te inveniendum ; neq; corpus, nisi tibi ad victi-
mam ; neq; vitam, nisi tibi in sacrificium.

*Offero tibi DEUS, omnes cogitationes, verba, &
opera ad majorem tuam gloriam.*

Offero tibi, Domine, vitam meam, quam pro fide
Catholica, si tibi placeret, vellem libenter profun-
dere.

*Offero tibi Dignissime Deus, omnes laudes cul-
tum, honores, gratiarum actiones. que Tibi ab omni-
bus creaturis unquam delatæ sunt, aut deinceps de-
ferentur.*

Offero tibi, Pater æterne, vitam, Passionem, &
mortem, & sanguinem & merita Filii tui Domini no-
stri Jesu Christi pro mea & totius mundi salute.

*Offero tibi omnes dolores, afflictiones, & mole-
stias meas, unitas cum molestiis & doloribus Domini
nostri JESU Christi, ad majorem tuam gloriam.*

§. 8. Gaudii Spiritualis.

GAUDEO Deum esse, quod est.

*Gaudeo Deum esse unum in Essentia, & Tri-
um in Personis,*

Gaudeo Deum esse infinitè potentem, sapientem,
bonum, Sanctum, Misericordem, Justum.

*Gaudeo Deum à nulla creatura comprehendi
posse.*

Gaudeo, quòd Deus à seipso comprehendi, ama-
ri, estimari sufficienter possit.

Gaudeo

Gaudeo Deum à seipso esse beatum, & fontem esse omnis beatitudinis.

Gaudeo de infinita Dei sanctitate, gloria, beatitudine, & infinitis Perfectionibus.

Gaudeo de omnibus bonis & gratiis, quas Aeternus Pater Humanitati Christi, B. Virgini & omnibus Electis suis contulit.

Gaudeo de complacentia, quam Pater æternus in Filio suo, & animabus Justorum, & Peccatorum conversione habet.

Gaudeo, quòd Deum omnes Sancti & Electi ejus ament, laudent, glorificent; & amaturi, laudaturi, & glorificaturi sint in æternum.

§. 9. Affectus Patientiæ.

Auge Domine, auge dolores: sed auge & Patientiam.

Aut pati pro te, Deus, aut mori desidero!

Subjecta esto DEO, anima mea, quoniam ab ipso patientia mea. Expecta Dominum, viriliter age, & sustine Dominum.

Tu es Patientia mea, Domine Deus meus.

Noli putare, anima mea, te à Deo esse derelictam. Patienter sustine, & videbis magnam potestatem ipsius. 2. Mach. 7.

Domine, qui habes Scientiam, manifestè tu scis, quia duros corporis sustinuo dolores. Secundum animam verò propter amorem tuum libenter hac patior. 2. Mach. 6.

Domine, ante te omne desiderium meum, & gemitus meus à te non est absconditus.

Per patientiam, anima mea, curramus ad propositum nobis certamen.

Domine JESU, ecce quem amas, infirmatur.

Peccavi! digna factus recipio. Et primumquam humiliarer, ego deliqui.

Domine hinc ure, hinc seca, modò in æternum parcas. Pati, non mori!

Nolo, Domine, nolo vivere sine vulnere: quando te video pro me vulneratum.

Pudeat sub spinoso capite membrum esse delicatum.

JESU Patientissime, miserere mei. Conjungo dolores meos doloribus tuis.

Domine, tu me percutere ego Psalmum dicam: Miserere!

Malo hos dolores pati, quàm esse Angelus, quàm esse Archangelus: quia patiendo Christum imitor, quod Angeli non possunt.

Domine fer opem super lectulum doloris mei: universum stratum versum in infirmitate mea. Calicem salutaris accipiam, & nomen Domini invocabo.

§. 10. Actus Resignationis.

Sicuti tu scis ac vis, ita fac mecum Domine. Domine in omnibus, non tua voluntas, sed tua fiat.

Fiat voluntas tua, Pater, sicut in cælo, & in terra: pater in anima, ita & in corpore.

Quid ego velim, aut quid volo extra te? Tu Deus corporis mei, & pars mea Deus in æternum.

Ultimam viam in me perfectissimè adimpleri voluntatem Dei.

Nihil

Nihil volo, nisi quod tu vis : nihil nolo, nisi quod tu non vis, ô DEUS !

Domine, si me vis esse sanum, sis benedictus ; si infirmum, sis etiam benedictus. Si me vis diutius vivere ; sis benedictus : si citius mori, sis etiam benedictus.

Non mea voluntas Pater, sed tua fiat. Nec quod ego volo, fiat, sed quod tu : nec sicut ego volo, fiat, sed sicut tu.

Domine, nec vivere renuo, nec mori detrecto. Si Proximus tuus sum utilis, aut necessarius, non recuso laborem. Fiat voluntas tua.

Sanctissima tua voluntas, Domine, est mea limpidissima voluptas.

Sanctissimam voluntatem tuam meae sanitati, vite meae, meis meritis, ipsi caelesti gloria antepono, mi Deus !

Paratum cor meum Deus, ut vivam : paratum, ut moriar. Fiat voluntas tua. Tuum est jubere, meum obedire.

Sicut fuerit voluntas Dei in coelo, sic fiat.

Dominus est : quod bonum est in oculis suis, faciat.

Domine IESU, tecum paratus sum, & in carcerem, & in mortem ire.

Domine, quid me vis facere ? quid pati ; Fiat, fiat sanctissima, iustissima voluntas tua.

Nunc Domine, secundum voluntatem tuam fac mecum, & praece in pace recipi spiritum meum, expedit enim mori magis, quam vivere. Tob. 3.

Domine, si vis, potes me sanare. Fiat voluntas tua.

Da mihi, Domine Deus meus sanctissima voluntatis tue agnoscenda, & perfecte adimplenda gratiam.

Da Domine, ut sim vir secundum cor tuum, qui faciam omnes voluntates tuas.

Domine, quidquid vis, quamdiu vis, quomodo vis, ita fiat. Fiat voluntas tua.

Fiat Domine sanctissima tua voluntas de me, in me, per me, circa me, & circa mea omnia, in vita, in morte, in æternitate.

§. II. Desideria cœlestis patriæ.

P. Gaspar Druzicki S. J. ita suspirabat.

Vita c. 19. pag. 226.

O Cœlum, toto me desidero te!

O cœlum cœli toto me festino ad te!

O Domus Dei, quando inhabitabo te?

O terra viventium, quando vivam in te?

O Patria! quando revertar ad te?

O Civitas Dei, quando ero Civis tuus?

O templum Dei, quando visitabo te?

O tabernaculum admirabile, quando ingrediar Te?

O visio pacis, quando pacificabor in te?

O Portus, quando tenebo te?

O bravium, quando apprehendam te?

O Sion! quando videbo Deum æcorum in te?

O requies opulenta, quando dicabor in te?

O fons vite perennis, quando sitim meam extinguam in te?

O beata

O beata æternitas, & æterna beatitudo, quando perennabo in Te?

O Meridies, quando meridiabor in te?

O gloria Domini quando apparebis, ut satier in te?

Cupio dissolvi & esse cum Christo.

Educ Domine de custodia animam meam, ad confitendum nomini tuo. Me expectant Iusti donec retribuas mihi.

Quemadmodum desiderat cervus ad fontes aquarum, ita desiderat anima mea ad te Deus.

Convertere anima mea in requiem tuam: quia Dominus benefecit tibi.

Unam peti, hanc requiram, ut inhabitem in domo Domini omnibus diebus vite mee: ut videam voluptatem Domini, & visitem templum ejus.

Quis dabit mihi pennas sicut columbæ, & volabo, & requiescam.

Sitivit anima mea ad Deum fortem vivum: quando veniam & apparebo ante faciem Dei?

Infelix ego homo, quis me liberabit de corpore mortis hujus?

Quàm dilecta tabernacula tua Domine virtutum: concupiscit & deficit anima mea in atria Domini.

Beati, qui habitant in domo tua Domine, in secula seculorum laudabunt te.

Domine dilexi decorem domus tue, & locum habitationis glorie tue.

Quàm magna est domus Dei, & ingens locus possessionis ejus!

Melior est dies una in atriiis Domini super milia.

Credo, spero, & intimè desidero videre bona Domini in terra viventium, in terra te videntium, & amantium, DEUS.

Hes mihi, quia incolatus meus prolongatus est: multum incolavit anima mea.

O quando transibo in locum tabernaculi admirabilis, usq; ad Domum Dei?

Quàm sordet mihi terra, dum cælum aspicio!

Desidero te millies, mi JESU quando venies, me lætum quando facies, ut tuo vultu saties.

Dimitte me Domine servum tuum in pace: ut videant oculi mei salutare tuum.

O quando veniet hæc beata & desiderabilis hora, ut tuâ me saties præsentia, & sis mihi omnia in omnibus?

Voca me Domine, ut videam te, & in æternum potiar te. Jube me venire ad te, ut cum sanctis tuis laudem te.

JESU mi bone sentiam amoris tui copiam; da mihi per præsentiam, tuam videre gloriam.

Satiabor, Domine, cum apparuerit gloria tua.

Ibi mea fixa sunt vota ubi vera sunt gaudia.

Eja Domine, moriar, ut te videam: videam, ut hic moriar. Mori desidero, ut videam Christum; vivere renuo, ut vivam cum Christo.

O felicitas mea, quando sublati omnibus impedimentis

dimentis me tecum unum spiritum facies, & tibi inseparabiliter agglutinabis?

O dilecte mi, quem solum quero, quando mihi pulsanti & gementi aperies? quando te ipsum mihi manifestabis, & dices: Salus tua ego sum? quando me totum in te rapies, absorbebis, & abscondes?

§. 12. Aspiraciones ad Crucifixum.

HOrâ mortis meus flatus, Intret JESU tuum latus;
In hac fossa me reconde, Meum ibi cor absconde.

Domine JESU Christe Fili Dei vivi, pone Passionem, crucem, & mortem tuam inter judicium tuum, & animam meam.

Domine JESU Christe, dum veneris judicare noli me condemnare.

Obsecro te, Domine JESU Christe per quinque Vulnera tua, qua tibi in cruce nostri amor influxit, subveni mihi famulo tuo, quem pretioso sanguine redemisti.

Respice, Domine JESU, positam in angustiis animam meam, pro qua non dubitasti manibus tradi nocentium, & crucis subire tormentum.

Ave lignum crucis, ave crux pretiosissima; me tibi totum dedico in perpetuum.

Inter brachia Salvatoris mei, & vivere volo, & moriscupio.

Rex tremende Majestatis qui salvandos salvas gratis, salva me fons pietatis.

Quærens me sedisti lassus, Redemisti crucem passus, Tantus labor non sit casus.

JESU quem in cruce hic aspicio, Oro fiat istud, quod iam fuis, ut te revelatâ cernens facie, visu sim beatus tue glorie.

Intrâ vulnera tua absconde me, ô bone JESU exaudi me. Confirma me in hac hora!

§. 13. Aspiraciones ad B. V.

MARIA mater gratiæ, mater misericordiæ, tu nos ab hoste protege, & horâ mortis suscipe.

Mater Dei memento mei!

Opitulare Domina! Domina non opitulaberis? Monstra te esse Matrem!

Consolatrix afflictorum ora pro nobis.

Salus infirmorum, ora pro nobis.

Refugium peccatorum! ora pro nobis.

O clemens, ô pia, ô dulcis Virgo Maria, nobis post hoc exilium JESUM benedictum ostende.

MARIA tuo filio nos reconcilia, tuo Filio nos commenda, tuo Filio nos representa.

In manus tuas, Domina, commendo spiritum meum, totam vitam meam, & diem ultimum meum. S Bonav. psal. 30.

Vide Domina, quoniam tribulor: expande manus tuas, succurre pereunti. Ne moreris propter gratiam nominis tui, ut efficiaris mihi in gaudium & salutem. Psal. 70.

In manu tua salus & vita consistunt, lætitia perpetua, & æternas gloriosa. Resperge cor meum dulcedine tua. Psal. 71.

Fac Domina ut vivamus in gratia Spiritûs Sancti,

Sancti, & perduc animas nostras, & introduc nos in requiem eternam. Ps. 94.

Gloriosum & admirabile est Nomen tuum, MARIA, qui illud retinent, non expavescent in puncto mortis. *Psal. 110.*

In exitu anima mea de hoc mundo, occurre illi Domina & suscipe eam. Esto illi scala ad regnum celorum. Psal. 113.

Pia Mater, & humilis, naturæ memor fragilis, in hujus horæ fluctibus, nos rege tuis precibus.

§. 14. Ad Angelos, & Sanctos.

S. Michaël Archangele defende nos in prælio, ut non pereamus in tremendo judicio.

Angelus nostræ Medicus salutis. Adsit è cælo Raphaël, ut omnes sanat egrotos dubiosq, vitæ dirigat actus.

In pugna mortis ultima adsis mihi fortissimè, peractâ demum fragili vitâ ductor amabilis, me protinus æthereis infer benignè sedibus.

Omnes Sancti Beatorum Spirituum ordines, orate pro nobis.

Omnes Sancti & Sanctæ Dei intercedite pro nobis.

Omnes Sancti Patroni mei, estote Custodes anime meæ nunc, & in hora mortis.

Omnes Sancti, SSS. Trinitati, Venerabili Sacramento, Et Beatissimæ Virgini singulari olim pietate addicti, Estote Custodes, &c.

Omnes Sancti Innocentes, Pœnitentes, & à
X 5 quibus

quibus aliquod beneficium unquam accepi, Estote custodes animæ meæ, nunc & in, &c.

Omnes Sancti, quibus in morte Christus, vel B. Virgo, vel Sanctorum, aut Angelorum aliquis comparuit, Estote Custodes, &c.

Omnes Sancti, qui aliquando morientibus adfuisse, Estote Custodes, &c.

Omnes Sancti, qui ad beatam vitam sine Purgatorii poenis transivistis, Estote &c.

Omnes Sancti, quos unquam in vita aliquo pietatis genere colui; de quibus aliquid legi, dixi, scripsi, aut in quorum honorem aliquid egi.

Omnes Sancti multa pro Deo passi, & diuturnis gravibusq; morbis afflicti, Estote, &c.

Omnes Sancti cœlestibus in morte deliciis à Deo singulariter cumulati, Estote, &c.

Omnes Sancti, Christo Patienti, & Matri Compatienti singulari pietate addicti, Estote Custodes animæ meæ, nunc, & in hora mortis.

Omnes Sancti in cultu Immaculatae Conceptionis B. V. & S. Iosephi in vita eximii.

Omnes Sancti eodem morbo, ex quo ego laboro, mortui, Estote custodes animæ, &c,

Omnes Sancti quorum Reliquiæ in nostro Templo, & toto orbe terrarum coluntur.

Omnes Sancti eodem die, quo ego ex hac vita migrabo, defuncti, & felici aternitate à DEO donati, Estote custodes animæ meæ, &c.

S. P. Ignati cum omnibus in cœlo filiis tuis, fratribus meis & tota cœlesti Curia triumphante; omnes
item

item Purgatorii anima Deo dilecta, & ad eternam felicitatem predestinata. Estote Custodes anima mea nunc, & in hora mortis mea, & omnium, qui eodem die mecum morituri sunt, & Deum in eternum laudaturi.

CAPUT IV.

Quæstiones ægrotis proponendæ.

DEus est, cui sola voluntas loquitur, & animi nutibus cordis secreta panduntur. Quare si æger usque adeo fractus est, ut prædictos affectus etiam paucis verbis contentos elicere difficulter possit, *Quæstionibus* modò proponendis, suaviter, & per intervalla (nè importunitate fatigetur) adjuvandus erit: quibus si vel uno verbo, vel nutu, vel signo voluntatis assensuerit, tantundem præmii apud DEUM merebitur, quantum si affectus vel preces longo verborum ambitu circumscriptas funderet.

Observandum hic autem, *cujus statûs* æger sit, & pro conditione illius *Quæstiones* illi proponendæ. Juerit præterea, quod toties monui, & iterum moneo, ut quamdiu quisq; sanus est, ejusmodi *Quæstionibus* seipsum conveniat, & ad eas respondeat sibi, ut penitus illas penetrando, cùm ipse quoq; inter moribundos reputari cœperit, iisdem uti facilius, seq; ad obeundum alacrius præmunire possit.

Quæstio-

Quaestiones.

1. **C**harissime Frater appropinquat hora, quâ transeas ex hoc Mundo ad coelestem Patrem, & Spiritum illi tuum, à quo accepisti, reddas. Quo nuntio non modo nihil turbari, sed maximo etiam solatioaffici debes, quòd te Divina bonitas per hanc infirmitatem mortis præmoneat, spatiûmq; concedat, ut te possis, ad piè felicitèrque moriendum disponere. Quæ dispositio cùm potissimùm in susceptione Sacramentorum consistat, visne *Sanctis* hisce *Sacramentis muniri*! peccata confiteri? Sanctissimum Viaticum suscipere? Extrema unctione ungi? *R. Volo.*

2. Nunquid *credis*, quidquid credit, aut credendum præcipit Sancta, Romana, & Apostolica mater Ecclesia? *R. Credo.*

3. Visne mori, ut verum, & vivum JESU Christi membrum, & verus filius Sanctæ, Matris Ecclesiæ? *R. Volo.*

4. Vellésne si DEO ità placuisset hanc mortem in contestationem fidei, per martyrium, & extremos cruciatus inter barbaros, & infideles, DEI gratiâ adjutus, subire? *R. vellem libentissimè.*

5. Nunquid *speras* per infinitam misericordiam, per vitam, Sanguinem, Passionem & mortem D. N. J. Christi, per Patrocinium B. V. MARIÆ, & per omnium Sanctorum intercessionem, te vitam æternam certò consecuturum? *R. Spero.*

6. Nunquid *amas* DEUM ex toto corde tuo, ex
tota

tota animâ tua, & ex omnibus viribus tuis? R. *Amo.*

7. Nunquid *desideras* in amore, & ex amore erga Deum purissimo mori? R. *Desidero.*

8. Nonne *desideras* amare Deum amore, si fieri possit, omnium Angelorum, Beatorum, & amore omnium justorum? R. *Desidero.*

9. Si neq; Cælum, neq; infernus existeret, nunquid tamen DEUM ex toto corde super omnia diligere velles? R. *Vellem.*

10. Nunquid ex amore DEI sincerissimè doles, quòd Divinam Majestatem omni honore dignam graviter offenderis? R. *Doleo.*

11. Nunquid velles si posses, Pœnitentium omnium, præsertim Sancti Prophetæ Davidis, S. Petri, & S. Mariæ Magdalenæ lachrymis peccata tua de flere? R. *Vellem.*

12. Dic, Charissime, non tam ore, quàm corde sincerè cum S. Davide: *Nè proicias me Domine à facie tua, & Spiritum Sanctum tuum nè auferas à me.* Et cum Publicano: *Deus propitius esto mihi peccatori.* Et cum Filio Prodigio: *Pater peccavi in cælum, & coram te. Non sum dignus vocari filius tuus!*

13. Nunquid has omnes, & singulas infirmitatis molestias, dolores, puncturas, tædia, desolationes de manu DEI te castigantis gratanter acceptas? R. *Accepto.*

14. Nonne DEUM Vitæ, & necis Dominum agnoscis, & adoras? R. *Agnosco, & adoro.*

15. Nonne latam à DEO in te, & Universum genus huma-

humanum mortis Sententiam libenter acceptas? R. *Accepto.*

16. Visne DEO animam tuam de hoc seculo migrare jubenti parere, adeoque mori ex obedientia? R. *Volo.*

17. Nunquid te plenè quoad locum, tempus, modum, & omnes mortis circumstantias Divinæ voluntatis resignas? R. *Resigno*

18. Nunquid non desideras vel puncto temporis diutius vivere quàm placeat DEO tuo? R. *planè non desidero.*

19. Nunquid omnes tuos dolores, & molestias cum doloribus, & Passione Christi unitas offers DEO in satisfactionem peccatorum tuorum? R. *Offero.*

20. Nunquid ex una quidem parte doles, quòd per morbum non possis ad templum ire, Horas Canonicas (*si Sacerdos est*) orare, sacrificare, mortificationes corporis obire, Gloriam DEI, & proximi salutem procurare? ex altera verò parte DEO irà disponenti (ut qui bonorum tuorum non eget) plenè acquiescis, ejusque te voluntati etiam in his perfectè resignas? R. *Resigno & acquiesco.*

21. Conjugisne mortem tuam cum morte Christi, B. V. & Sanctorum omnium? R. *Ita.*

22. Nunquid Divinam Bonitatem humillimè rogas, ut tibi peccata omnia dimittat; ut per mortem tuam glorificetur DEUS: ut statim à morte DEUM videas? R. *Rogo quàm humillimè.*

23. Parcisne omnibus ex corde, qui te, quâcumque demum ratione tota vita laeserunt: idque eo modo, quo tibi

tibi peccata tua à DEO ignosci desideras ? R. *Parco ex toto corde.*

24. Nunquid gratias agis Divinæ Providentiæ, quòd inimicorum injuriis, & persecutionibus, tanquam flagello ad te castigandum uti voluerit ? R. *Agō gratias.*

25. Nunquid inimicis tuis omnem benedictionem, gratiam, & felicitatem in hac vita, in altera sublimissimos cœlestis gloriæ gradus ex animo exoptas ? R. *Sincerè exopto.*

26. Nunquid vicissim petis humiliter, ut ceteri quoq; omnes tibi offensas, quibus quoscunq; & quacunq; ratione lassisti, ignorent ? R. *Peto humillimè.*

27. Nunquid libenter moreris propterea, quòd per mortem constituaris extra periculum peccandi, Deumq; offendendi summum, æternum, Incommutabile Bonum ? R. *Libenter morior.*

28. Nunquid de toto animi affectu desideras statim à morte DEUM tuum videre, amare, possidere, illumq; cum omnibus Sanctis æternum laudare ? R. *Utinam ! ah desidero.*

29. Nunquid desideras, ut omnia tua suspiria non sint nisi divini Amoris jacula & omnes cordis motus, non sint, nisi perfectissimæ erga DEUM charitatis actus ? R. *Unicè desidero.*

30. Nunquid omnia, & singula vitæ adhuc restantis momenta Divino Amori consecras ; & ut similiter vitæ præterita omnia momenta soli DEO consecrata fuissent, ardentè exoptas ? R. *Consecro & exopto.*

31. (*Inter porrigendum Crucifixum*) Agnoscisne hunc

hunc Redemptorem tuum J E S U M Christum pro te crucifixum ? amasne illum ? adcras ? & exoscularis ?
Rz. Agnosco, amo, & exosculor.

32. Nunquid in illo totam Salutis Spem reponis ?
Rz. Repono.

33. Nunquid intra vulnera illius, à facie itæ Paternæ, abscondi desideras ? *Rz. abscondi desidero.*

34. Nunquid in sacratissimas illius manus Spiritum tuum commendas ? *Rz. Commendo.*

35. (*Inter porrigendam B. V. imaginem*) Ecce charissime, ecce Mater tua ; nunquid in maternam ipsius misericordiam, te totum commendas ? *Rz. Totum me commendo.*

36. Nunquid illi pro omnibus Beneficiis, quæ tibi toto vitæ tempore concessit, gratias agis ? *Rz. Humilissimas ago illi gratias.*

37. Nunquid enixè rogas, ut illos suos misericordes oculos ad te convertat, & JESUM benedictum Fructum ventris sui tibi post hoc exilium ostendat ? *Rz. Ah rogo, quàm maxime !*

38. Nunquid in illa primariò post DEUM tuam de consequenda salute fiduciam collocas, ac desigis ? *Rz. Colloco, ac desigo.*

39. Si mille corda haberes, nonne mille cordibus MARIAM amares ? *Rz. Mille cordibus Mariam amarem.*

40. (*Inter exhibendam Sancti Patroni imaginem, quem eger singulariter in vita coluerit.*) En Imaginem S. Patroni tui, Sancti N. quem singulari pietate studebas, dum sanus eras. prosequi ; nunquid rogas,

ut tibi cum Angelo tuo Custode morienti benignè succurrere, & adesse dignetur? R. *Rogo enixissimè.*

41. (*Religioso exhibeatur ad osculum, & venerationem Sancti Patriarchæ, seu Fundatoris Icon, & queratur ex eo.*) Ecce Parens tuus, Charissime; nunquid ex animo doles, quòd illum, ut par erat, in vita non colueris? quòd ea, quæ ipse tibi in Regulis, & Instituto præscripsit, negligenter servaveris? quòd ipsius cultum apud alios pro viribus procurare neglexeris? R. *Doleo! ah Doleo!*

42. His tamen non obstantibus, nunquid filiali affectu te in paternam illius charitatem & protectionem commendas? R. *Omnino me totum commendo.*

43. Nunquid illum suppliciter rogas, ut animam tuam à morte suscipere, Deo præsentare, suisq; in Cælo filiis, tuis quondam Fratribus, ejusdemq; Instituti Cultoribus aggregare dignetur? R. *Hoc unice desidero! hoc à meo S. Patre N. indignus licet filius, humillimè peto.*

44. Visne te participem facere omnium Indulgentiarum, quæ verè contritis, & sanctissima JESU, & MARIE nomina corde vel ore pronunciantibus sive Socialibus Marianis, sive religiosis N. sive hoc vel illud Numisma, Sancti vel Sanctorum habentibus in extremo mortis articulo conceduntur? R. *Volo, & adhuc finem dolens de peccatis ex amore DEI pronuncio Sanctissima nomina dicòq;: JESUS MARIA! amores mei, dulcissimi amores mei! patiar ego, moriar ego, amore vestri. Sim totus vester, & nullo modo meus.*

45. Estne aliquid Charissime, vel in fama, vel in pecunia,

pecunia, vel in rebus aliis quibuscumq; quod injustè retineas, quòdq; aliis restitui oporteat? *R. Est hoc N. vel illud N. vel: Quod sciam, nihil est.*

46. Estne testamentum ritè confectum? *R. Est, vel: Non.*

47. Estne aliquid præterea, quod conscientiam tuam gravet; & cum quo non velles coram supremo Tribunali DEI Iustissimi Judicis comparere? *R. Laus DEO nihil est. vel: Est hoc N. vel: illud N.*

Conclusio.

IAm igitur Charissime Frater, cùm per DEI Gratiam, sis omnibus Sacramentis munitus, in paternas DEI manus plenè resignatus, cum DEO, proximo, & Conscientia reconciliatus; nihil præterea restat, nisi, ut mortem à DEO tibi ordinatam magno, fortiq; animo excipias, in Divina Bonitate, & Redemptoris tui JESU Christi meritis, & Passione confidas, calicem dolorum tibi à Christo propinatum usq; ad ultimam, quæ super est, guttam generosè exhaustas, abjectâ omni rerum temporalium curâ solam salutem cogites, ad Beatitudinem cœlestem aspires, mentem in DEO fixam assiduè habeas, in vulneribus Christi Crucifixi habites, deniq; Sanctissima JESU, MARIE, & JOSEPHI Nomina corde, & ore volutes, ut illa sint Tibi ultima meta vitæ, & principium felicitatis æternæ: ad quam te perducere dignetur JESUS Christus, Dominus Creator, & Redemptor tuus, qui vivit, & regnat
DEUS in secula seculorum.

Amen.

CAPUT

CAPUT V.

Orationes ab Adstantibus pro moribundo dicende.

Videmus interdum Moribundos lethali symptoma-
te oppressos eò recidere, ut solâ spirandi facultate
præditi per horas complures nihil videant, nihil au-
diant, intelligant nihil, nullum pietatis indicium ede-
re, ne dicam orare, animûmq; ad deum elevare vale-
ant. Quid hîc factô opus? Adstantes Moribundi vicem
suppleant oportet, & sepositâ inutili comploratione,
ac inconditis clamoribus, ad Orationem, tanquam ul-
timum & commune refugium se conferant, deûmq;
ac dominum nostrum pro felici Morientis excessu ar-
denter deprecantur. Quod duobus modis præstari
potest. alter est, ut quis ipsam Moribundi in extremo
agone constituti personam induat, & Preces, Aspira-
tiones, Affectus hætenus propositos nomine ipsius eli-
ciat. alter, ut pro Moribundo, seu fratre sibi charissi-
mo, ut quorum uterque matrem eandem S. Ecclesiam
agnoscat & veneretur, de o preces offerat, tum eas po-
tissimûm, quæ in *Commendatione animæ* præscribun-
tur; tum quas *Directorium morientium* INNOCENTII
LAMESSE Carthusiæ Prioris, & totius Sacri Carthu-
sienfis Ordinis Generalis Ministri ex *Dionysio*
Carthusiano subministrat. Sunt autem
illæ hujusmodi,

Oratio.

SVavissime Domine JESU per illum ineffabilem amorem, qui te dignissimum, innocentissimum, & delicatissimum paternæ charitatis Filium pro nobis factum hominem, vulnerari, ac crudeliter mori pro hominibus redimendis fecit: indulge clementissime Domine JESU, huic famulo tuo omne, quod cogitatu, verbo, & facto, affectionibus, moribus, & sensibus animæ, & corporis deliquit, & veram omnium peccatorum suorum remissionem concede. Sacratissime Domine JESU, tribue illi spirituale lumen tuæ ardentissimæ Charitatis, qua totius Mundi culpas diluisti: ac in plenam suppletionem omnium negligentiarum suarum, meritum tuæ sacratissimæ Passionis adde: & insuper tribue illi fructum omnium bonorum operum, per electos tuos, qui tibi placuerunt, factorum.

Oratio.

GLoriosissime Domine JESU, in unione ferventissimi amoris, qui te coegit incarnari, & anxio Spiritu in cruce mori, ad medullam dulcissimi amoris tui pulsamus, ut famulo tuo omnia peccata, quæ omnimodo commisit, dimittas: & tuo per dignissimo passionis merito omnia suppleas, faciasq; illi secundum super abundantissimam multitudinem miserationum tuarum: disponas eum placidissimo tibi modo, sibi utilissimo, suavipatientiâ verâ pœnitentiâ, plenâ remissione, rectâ fide, Spe firmâ, ardenti charitate, & perfectissimo statu: quatenus inter dulcissimum amplexum, & suavissimum osculum tuum, ô clementissime Domine

Domine JEsu, ejus anima letanter expiret ad tuam eternam Laudem, & gloriam laudandam, cognoscendam, & fruendam.

Oratio.

Sacratissime domine JESU Ch-riste, in manus inextingvibilis misericordix tuæ commendamus spiritum hujus famuli tui, secundum amoris tui magnitudinem, quò se anima tua Sanctissima in cruce glorioso Patri commendavit: suppliciter deprecantes: quatenus per illam ineffabilem charitatem, quâ divina paternitas in se totam traxit illam sanctissimam animam tuam, in ista hora famuli tui in eodem ferventissimo amore spiritum suscipias. Eja dulcissime domine JESU Ch-riste animarum Redemptor, benignissime domine, per illam lacrymabilem vocem, quâ secundum humanitatem pronobis moriturus, laboribus, & doloribus passionis adedò consumptus es, ut te à Patre derelictum ter clamares: nè longè, svavissime JESU, facias à famulo tuo tuæ miserationis auxilium in hac hora afflictionis suæ, præ defectione, & consumptione Spiritûs te invocare non valente: sed per triumphum sanctæ Crucis, & per virtutem salutiferæ passionis, & gratiosæ mortis tuæ: cogita de eo cogitationes pacis misericordix, consolationis, & non afflictionis: Et libera eum ab omnibus angustiis, & tua solita benignitate bone JESU dulcissime pater, erue illum à tormentis sibi deputatis, & ad aternam requiem illum perducere digneris cum voce exultationis. Amen.

Oratio.

Misericordissime Domine JESU Christe Fili DEI vivi, in unione illius commendationis, quā tuam sanctissimam animam in cruce moriens, Patri tuo celesti commendasti, misericordissimam bonitatem tuam humiliter exorantes petimus: quatenus per omnem honorem, & meritum ejusdem anime tue sanctissima, per quam omnes salvantur anime, & a morte perpetua liberantur, anime famuli tui miserearis, eam misericorditer liberans ab insidiis diaboli, & a miseriis, & pœnis: & illam per sanctissima passionis tue meritum, & Beatissima, ac Gloriosissima Virginis, & Matris tue intercessionem, ad contemplationem tue beatissima Visionis perducere digneris.

Oratio.

O Piissime Domine JESU Christe, Rex sæculorum, qui in cruce existens, pro tuis crucifixoribus Patrem rogasti, dicens: Pater dimitte illis, quia nesciunt quid faciunt; Deprecamur Majestatem tuam Domine JESU Christe, ut in mente hujus servitui, tuæ orationis effectum renovare digneris: quatenus omnes ejus offensas, illi dimittas: Et sicut tunc tu exauditus es, sic nunc cum Patre ipsum, nosq; pro illo exorantes exaudire digneris: nescit enim quid faciat, dum ex fidei tarditate tepidus coram Te existit. Exoramus Te Bone JESU, ut in hoc obitu suo omnia peccata illi dimittas; Et pro tuæ sacratissima Passionis merito ad Angelorum Societatem eum clementer perducas.

Oratio.

Oratio.

O Gloriosissime Domine JESU Christe, dulcedo Angelorum, qui in cruce pro nobis pendens veram fidei Lucem in cor latronis infudisti, ut te verum Deum, & hominem cognosceret, dum clamavit memento mei Domine, dum veneris in regnum tuum: Majestatem tuam suppliciter exoramus, ut in hoc famulo tuo in extremis laborante, venerabile fidei Sacramentum, & dignitatem consecrare digneris: quatenus tua sanctissima Passione mediante, sic in cor ejus tuum amorem imprimas, ut in suo obitu, tuo ardens amore ab immundis spiritibus liberetur, & ad tuam beatam gloriam cum júbilo perducatur. Amen.

Oratio.

O Clementissime Domine JESU Christe, Verbum æterni Patris, ac filius gloriosissimæ Virginis Mariæ Matris: qui mundum visibiliter deserens, & maternæ sollicitudini compatiens, ei prædilectum discipulum tuum in filium adoptasti: supplicamus humiliter Majestatem tuam per merita passionis tuæ, per preces, & merita ejusdem dilectæ Matris tuæ, & prædilecti Discipulitui: quatenus digneris in animam hujus servi tui spiritum tuæ charitatis infundere, quò tibi cohærens, DEO Patri adoptetur in filium. Committe quæsumus Domine de throno gloriæ tuæ curam hujus animæ, gloriosæ matri tuæ: quatenus in mortis agone aspectus dæmonum non paveat: sed in te lætâ mente confidentem clementer suspicias, & ad cœlestem gloriam deducente sacratissima Matre tua pervenire facias. Amen.

Oratio.

O Piiſſime JESU Chriſte DEI, & hominum Medi-
 ator, qui pro ſalute noſtra penas nobis debitas
 in tuo paſſibili corpore ſuſtinuiſti: & ut graviores pe-
 narum amaritudines guſtares, ſponte voluiſti in hora
 tue paſſionis à tua Humanitate dulcedinem unitæ tibi
 Deitatis ſubtrahere, cùm clamàſti: Eloi Eloi lama
 Sabachani: oramus clementiam tuam quatenus
 ſuaviſſime Domine JESU Chriſte huius Servi tui ani-
 mam protegendo tua ſuavi conſolatione lætiſces, nam
 ſi ipſum ipſe Paſtor deſeris, mox adverſarius tuus in
 idipſum irruet, & occidet. Si propter demerita ſua
 tribulari, & deſeri meretur, quaſumus ſuaviſſimam
 bonitatem tuam, ne illum adverſariis tradis diſſidentia,
 & deſperationis tenebris tribulandum: nec inſenſibi-
 lem ad gratiam facias, ſed per charitatis tue gratiam
 vivens, & tue abſentia amaritudinem ſentiens, piâ
 voce gemendo ad te clamet: Deus meus, Deus meus
 ut quid dereliquiſti me! Tu autem piſſime Pater,
 & Paſtor, tua ſuavi pietate ei ſubveni, quem pretioſo
 ſanguine tuo redemiſti, nec tua gratia diu ipſum in hoc
 obſtupatiatur affligi, donec ad cœleſtem patriam tuo-
 rum meritô dolorum, clementer perducas. Amen.

Oratio.

O Svaviſſime Domine JESU Chriſte DEI & homi-
 num mediator, qui inter cœtera tormenta, quæ
 in cruce pertuliſti corporaliter, ſitire voluiſti vehemen-
 ter dum clamàſti: Sitio: Deprecamur Majeſtatem
 tuam, quatenus animam ſervi tui, in illo nunc igne di-
 gneris urere, quem in terras mittere veniſti, quô cun-
 ctis.

etis vitiis desiccatis illius anima, & caro charitatis tuæ igne succensa, te solum sitiât, te diligat, te quærat, reperiât, & fruatur : Et ipsam ad æternam beatitudinem sanctissimæ passionis tuæ meritò, jubilosè digneris adducere. Amen.

Oratio.

O Sacratissime Domine JESU Christe, omne bonum consummans, qui cum acetum gustasses, dixisti : consummatum est : & inclinato capite Spiritum emisisti : obsecramus Majestatem tuam pro anima hujus famuli tui in extremis existentis, quatenus gratiæ tuæ dulcedinem, & splendidum fidei lumen infundas illi, ut extremam horam in sanctæ Charitatis tuæ brachiis finire, & tibi dicere valeat : Ecce clementissime Domine JESU nunc ad te venio, tuâ suavi voce, jube suscipe Spiritum meum in æternam tuam charitatem. Amen.

Oratio.

O Sacratissime Domine JESU Christe coronacertantium, qui in cruce pro nobis pendens, docuisti nos compendiosè in extremis nostris orare, dum tu nobis exemplum tribuens clamâsti : Pater in manus tuas commendo Spiritum meum : exoramus Majestatem tuam, quatenus in virtute Spiritus Sancti eandem digneris C. rationem in corde hujus famuli tui imprimere, ut eam personet, & in hac ejus extrema hora illius sentiat effectum, in tuas sacratissimas manus animam suam humiliter recommendando. Amen.

Oratio.

O Misericordissime Domine JESU Christe, reparator humani Generis, qui in die Passionis tue in nervorum, & ossium contractione, pœnam acerbissimam sensisti, & pretiosissimum caput tuum spinarum densitate punctum fuit, & latus tuum lanceâ perforatum, unde fluxit Sanguis, & aqua : deprecamur Majestatem tuam, quatenus animam hujus famuli tui virtutum luminoso splendore illustres, & tribuas illi tuarum acerbitalis spinarum meritiò, de offensis ab eo tibi illatis vehementer dolere, & pœnam habere : ut omnia ejus delicta, tuæ pretio Sacratissime Passionis, deleantur, & ad Angelorum Societatem, te trahente, pervenire valeat. Amen.

Oratio.

O Clementissime Domine JESU Christe, solamen miserorum, qui peccata nostra in tuo corpore portasti, verè tu es Deus qui dolores nostros tulisti, & à perpetua morte nos liberasti, quia in sacratissimo corpore tuo à plantapedis usq; ad verticem non fuit Sanitas, & qui eras præ filiis hominum speciosus, quasi leprosus reputatus fuisti : Deprecamur suavissimam charitatem tuam, quatenus omnia hujus servi tui peccatorum vulnera sanes, ut omnibus vitiis emundatus ad te clementissimum Patrem, & Dominum spirituali solamine roboratus, latanter pervenire valeat : Et quia tuo pretiosissimo Sanguine est redemptus, & tuæ passionis insignia gestat : ad gloriosissimam visionem tuam omnium passionum tuarum meritiò, concomitantibus sanctis Angelis deducere eum digneris. Am.

Oratio.

Oratio.

O *Suavissime Domine JESU, Beatorum requies, & omnium in te sperantium jucundissima salus, qui in nocte passionis tuæ ad Patrem orâsti: Pater si possibile est transeat à me calix iste, verum tamen non mea voluntas sed tua fiat; & illâ horâ in tanta angustia fuisti, ut de corpore pretioso tuo Sanguis efflueret: deprecamur te bone JESU, quatenus solâ pietate tua adjuves animam hujus famuli tui, ut pro delictis, & offensionib9, quæ commisit terreatur, & moveatur ad veram penitentiam: ut in hac extrema hora in occurso adversarii non paveat, aut in adventu, & aspectu tuo iudex tremende, accusante conscientia, contremiscat: sed potiùs faciem tuam in iubilo videns delectetur, præstante Domino nostro JESU Christo, cujus passione redemptus est. Amen.*

Oratio.

O *Dulcissime Domine JESU Christe, misericordiarum Pater, & totius consolationis Deus: qui in nocte tuæ amarissimæ passionis ab Apostolis derelictus fuisti, & inter hostes tuos solus remanisti: supplicamus tibi Domine JESU Christe. ut nunc in obitu hujus servi tui animam ejus non derelinquas in manibus demonum, sed ad locum quietis, & tuæ beatissimæ Visionis ipsam per tuæ mortis virtutem perducas. Amen.*

Oratio.

O *Sacratissime Domine JESU Christe Salvator Mundi, qui ob peccata nostra abolenda crudeliter verberari spinis turpiter coronari, ab emulistiis enormiter illudi, & in cruce nudus ut latro affigi voluisti:*
exoramus

exoramus te Domine JESU Christe, per has passiones tuas, ut animam hujus famuli tui in extremis laborantis, vera contritione in peccatorum commissorum dolore compungas, & tuo timore corones, & in cruce tua omnes ejus mentales sensus crucifigas: quatenus sictus à te spiritualiter vulneratus, suorum vulnerum meritò, omnium delictorum suorum veniam consequatur, & ad gaudia cœlestia pervenire mereatur. Amen.

Oratio.

OJESU DEUS noster, oculos hujus famuli tui illumina, nè in morte obdormiat, neq; inimicus ejus dicat: pravalui adversus eum. Exaudi Domine Jesu Christe orationes nostras pro eo. Illumina Domine Jesu animam ejus. Signa Domine Jesu Christe lumen vultus tui super eum. Humilem latitiam Domine Jesu infunde in cor ejus. Vocem nostram Domine Jesu Christe, clamamus ad te pro eo. Bone JESU de excelsu gloriæ tuæ exaudi nos pro eo orantes. Susceptor ejus esto Domine Jesu Christe in obitu suo. Angelorum præsentia Domine Jesu Latifica animam ejus. Amen.

Oratio.

OJESU Christe Domine Deus noster, voces Orationis nostræ pro hoc famulo tuo intende. Rex noster bone JESU cor ejus illumina, & letetur Domine JESU anima servi tui, quia sperat in te. Domine JESU semper exultet de te. Speret bone JESU hic famulus tuus in te. Domine JESU saluum fac ipsum ex omnibus persequentibus eum, & libera eum. Ut quid bone JESU recessisti longe? Domine JESU Christe nè despicias

despicias servum tuum in opportunitatibus, & tribulatione. Secundum misericordiam tuam Domine JESU, animam servi tui vivifica, ut bone JESU nomini tuo psallat in ævum. Amen.

Oratio.

O JESU Christe Domine DEUS noster, nè in furore arguas servum tuum, neq; bone JESU in ira tua corripas illum. Exultet bone JESU in te salutaris tuo servus tuus. Bone JESU libera eum ab interitu dæmonis. Salvum fac bone JESU servum tuum, quoniam spiritus ejus deficit, & veritates tuæ ab anima ejus diminutæ sunt. Vide Domine JESU animam servi tui in obitu laborantem, & de manu peccatoris, libera eam. Serva Domine JESU animam servi tui, & custodi illam à generatione mala in ævum. Amen.

Oratio.

O JESU Christe Domine DEUS noster, animam hujus famuli tui conserva, quoniam sperat in te: illustra cor ejus ut jubilosè ad te veniat. Exultet o bone JESU cor servi tui morientis in te: cantet, & psallat tibi Domino DEO suo in æternum. Sub umbra alarum tuarum Domine JESU Christe hunc famulum tuum protege à facie impiorum, qui illum affligunt. Usq; quo avertes faciem tuam ab eo? Salva Domine JESU Christe ex ore Leonis animam hujus famuli tui, & à cornibus unicornum bone JESU misericorditer libera eum. Amen.

Oratio.

O JESU Christe Domine DEUS noster anima hujus famuli tui requiescat in te, esto illi nunc refugium,

gium, & liberator. Exurge bone JESU in adjutorium servi tui, dæmonem præveni, & expelle, ne animam famuli tui rapere valeat. Sit bone JESU nomen tuum dulcissimum benedictum, ex hoc nunc, & usq; in sæculum. Vocem nostram, bone JESU, ad te pro servo tuo clamamus: Salva illius animam in hac hora. Salvam fac Domine JESU animam famuli tui, & libera eam bone JESU, quia DEUS ejus est tu. Amen.

Oratio.

O Dulcissime JESU Christe, Domine Deus noster, animam hujus servi tui salvam fac: ut de tua presentia semper letetur. Exultet in te piissime JESU servus tuus: psallat, & cantet tibi in ævum. Speret in te Domine JESU hic famulus tuus: eripe illum ne pereat. Vias tuas Domine JESU famulo tuo ostende: & semitas tuas doce illum. Secundum magnam misericordiam tuam clementissime JESU Christe miserere servo tuo: & propter ineffabilem bonitatem tuam animam illius illumina. Amen.

Oratio.

O JESU Christe Domine Deus noster, humilitatem, & laborem famuli tui vide: & omnia ejus delicta dimitte. Exaudi bone JESU vocem nostram, quâ pro anima servi tui ad te clamamus, miserere illi, & salva illum. Salvam fac animam famuli tui Domine JESU, & de cælo benedic illi. Velociter bone JESU preces nostras pro servo tuo exaudi, quia illius spiritus deficere incipit. Secundum misericordiam tuam Domine JESU animam famuli tui vivifica, ut sanctæ fidei lumen jubilose custodiat. Amen.

Oratio.

Oratio.

O Jesu Christe Domine Deus noster, judica anima hujus servi tui nocentes, expugna ocyus impugnantes illam. Effunde bone Jesu frameam tuam adversus illos, qui persequuntur animam famuli tui: dic animæ ejus, Salus tua ego sum. Salus Domine Jesu esto anima servi tui, & ejus protector in omni tribulatione. Vide bone Jesu afflictionem famuli tui, nè si- leas, & nè discedas ab illo. Salvator animarum bone Jesu, exurge in adjutorium servi tui, nè à te, aspectus demonis separetur. Amen.

Oratio.

O Jesu Christe, Domine Deus noster, intende ani- mæ famuli tui, & libera illam, & propter terro- rem inimici tuo splendore illustra illam. Exaudi bo- ne Jesu servum tuum, quoniam benigna est misericor- dia tua, secundum meritum gratiæ tuæ libera illum. Salvum fac bone Jesu servum tuum: illius mentem tuâ gratiâ illumina. Vocem servi tui Domine Jesu exaudi in hac hora, & propter nomen sanctum tuum protege illum. Salus electorum bone Jesu tu es: lumine tuo lætifica animam famuli tui, ut ad te perve- niat. Amen.

Oratio.

O Jesu Christe Domine Deus noster, secundum mi- sericordiam tuam judica servum tuum, ut qui oderunt eum non super gaudeant illi. Exurge bone Jesu, adjuva servum tuum, & propter nomen tuum re- dime eum. Salutaris noster bone Jesu, ad te conver- te servum tuum, & ostende illi gloriosam faciem tuam.

Verita-

Veritatem, & lucem tuam Bone JEsu emitte famulo tuo, & ipsa illius animam deducant, & adducant in montem sanctum tuum, & in tabernacula tua. Spiritum tuum Domine JEsu infunde servo tuo, ut vivat in eternum. Amen.

Oratio.

O JESU Christe Domine Deus noster, susceptor esto famuli tui, & libera eum ab omni malo. Exurge bone JESU, salvum fac servum tuum, ut non timeat dæmones circumdantes animam ejus. Servus tuus Domine JESU angustatur, subveni illi, ut tuâ præsentia consoletur. Vide Domine JESU tentationes, quas famulus tuus patitur, & succurre illi nè pereat. Sentiat anima servi tui Domine JESU auxilium gratiæ tuæ, & perpetuò gaudeat in te. Amen.

Oratio.

O JESU Christe Domine Deus noster, adjutor esto famulo tuo, & lumen sanctæ fidei illi infunde, ut latè veniat ad te. Exurge bone JESU in adjutorium famuli tui, exurge, & ne repellas illum à te. Suscipe Domine JESU Christe animam servi tui, & vivat: & non confundas illum ab expectatione sua. Virtutum amator bone JESU, converte faciem tuam ad famulum tuum, & ab omni dolore libera illum. Super servum tuum Domine JESU deprecabilis esto, & salva illum ab omni malo. Amen.

Oratio.

TE summa DEUS Trinitas omnipotens æterne DEUS, qui es semper per omnia DEUS benedictus in sæcula, quem omnis Spiritus laudat, suppliciter exoramus:

mus: quatenus per merita illius ineffabilis, & excellentissimæ Charitatis, quâ dilectissimus filius tuus Dominus noster Iesus Christus, homo fieri dignatus est, quâ etiam pro salute nostra, vincula, opprobria, convitia, flagella, alapas, coronam spineam, ac immanissimam mortem amorosè passus est: ac etiam per meritum gloriosissimæ, & beatissimæ Virginis MARIE, & omnium Sanctorum, qui tibi ab initio Mundi placuerunt: nec non per virtutem clavium spiritualium, quas clementissime bone Iesu, Ecclesiæ tuæ Ministris tradidisti, ut huic famulo tuo in extremis laboranti misericorditer indulgere digneris omnia peccata sua, quæ ab hora sacri baptismatis usq; ad præsens quoquo modo, malitiâ, miseriâ, ignorantia, ac fragilitate commisit: & ipsum per sanctas indulgentias, & absolutiones ex thesauris tuæ immensæ charitatis indultas, reddere digneris in illa puritate, innocentia, ac spiritali claritate: quæ in baptismo donare dignatus es: dignare etiam suavissime Domine Iesu ab omni aspectu, & terrore dæmonum ipsum tueri; & propter gloriosi nominis tui honorem, ipsum in conspectu divinæ Majestatis tuæ gratum reddere: quatenus dulcissime Pater, ac amabilissime Redemptor bone Iesu, meritò omnium Sanctorum tuorum, & præsertim sacratissimæ passionis tuæ animæ ejus in ulnas sanctæ Charitatis tuæ clementer suscipias, te perenni jubilo in Cælorum beatissimo regno fruituram. Amen.

Oratio.

Domine DEUS Omnipotens, qui trinus & unus es, tuâ eximiâ compulsi charitate: te humiliter
 Z exoramus,

exoramus, pro anima servi tui nunc in extremis laborantis, quam sacratissime Domine commendamus piissima omnipotentia tua; ut illam ab aspectu, & terrore demonum custodias, & tuearis, nè desperationem labatur, nec diffidentie tentationibus obnubiletur, ac præteritarum culparum recordatione maculetur. Exaudi nos Domine gloriose tuam suavissimam bonitatem interpellantes pro illa: & exaudi per Orationes Patriarcharum, per merita Prophetarum, per suffragia Apostolorum, per Victoriâ Martyrum, per fidem Confessorum, per castitatem Virginum, per devotam intercessionem omnium, qui tibi ab initio placuerunt. Suavissime Domine ab istius anima repelle jactantiam, & compunctionem tribue; superbiam minue, & perfice humilitatem; fletum suscita, & cor ejus mollifica: ab omnibus insidiis inimici illam clementer libera; & in lumine fidei conserva illam: lumen gratia tua infunde illi, ut de omnibus peccatis veram contritionem obtineat. Clementissime Domine omnia desideria mala tolle ab ipsa, omnia Diaboli tela ignea extingue: Dona illi lachrymas ex tuo ardenti affectu, quæ peccatorum suorum dissolvant vincula. Audi Domine quæ petit, & celeriter exaudi: Si despicias prorsus perit, si prospicias vivit. Si Justitiam requiris, ante te mortua fuerit: Si cum Misericordia respexeris, ipsam peccatis foentem de desperationis barathro suscitâs. Quod in ea odis, longe fac ab ipsa, & Spiritum tuum Spiritualis letitiæ illi tribue. Bone JESU anime ejus parce malis, criminibus, & peccatis. Visita illum infirmum, egrotum cura, languidum sana. Domine

JESU

IESU da illi cor quod timeat te, sensum, qui intelligat te, & oculos spirituales, qui videant te. Domine **I**ESU miserere illi, & de sede Majestatis tuae clementer respice, & anime ejus tenebras tui splendoris radio illumina. Clementissime Domine **I**ESU à te peccatorum ejus remissionem humiliter petimus, à quo, & per quem est omnis propitiatio. Sancta & immaculata Virgo Maria Domini nostri **I**esu Christi Mater te obnixè deprecamur: quatenus pro anima hujus servi tui intervenire digneris apud illum, cujus templum effici meruisti. Sancte Michael, sancte Gabriel, sancte Raphael, sancte Angele custos ejus, cum omnibus choris Angelorum, Patriarcharum, Prophetarum, Apostolorum, Martyrum, Confessorum, Sacerdotum, Levitarum, Eremitarum, Doctorum, Monachorum, Virginum omniumq; Justorum per eximium Domini nostri **I**esu Christi amorem, qui vos elegit, de cujus contemplatione gaudetis, vos orare audeamus, ut pro hujus fratris nostri anima supplicare dignemini: quatenus de diaboli faucibus, & de morte perpetua, liberari mereatur. Domine **I**esu perpetuam vitam secundum magnam misericordiam tuam ei largire digneris. O clementissime Domine **I**esu, qui omnium misereris, famulum tuum à tua misericordia fieri alienum non patiaris: quatenus in sacratissima passionis tue merito ab omnibus peccatis suis abluatur, & secum eternaliter in Cælorum regno beatissimo gloriatur. Amen.

Oratio.

O Maria beatissima, propter illius terroris commotionem, quo cor tuum contremuit, quando filium
 Z 2 tuum

tuum dulcissimum Dominum nostrum *Jesum Christum* filium *DEI* vivi ab impiis captum, ligatum, ad supplicia tractum, & ab omnibus derelictum audisti: adjuva nunc servum tuum in extremis laborantem: quatenus de præteritis delictis veram contritionem habeat, & dolorem: & cor illius illustratum superno splendore sit in fervida pœnitentia: nè fortè in hoc obitu suo in occurſu adversarii paveat, aut in adventu, & aspectu tremendi Judicis, accusante conscientia, contremiscat: sed potius precibus tuis intervenientibus, ipsius faciem in jubilo videns delectetur. Amen.

Oratio.

O Virgo dulcissima *DEI* Genitrix *Maria*, propter planctus, & lachrymas quibus afficiebaris, quando filium tuum Dominum nostrum *Jesum Christum* filium *DEI*, vidisti Præsidi præsentari, ab iniquis innocentem accusari, & opprobriis affici: impetra huic famulo tuo lachrymarum gratiam, & sacre fidei indelebile lumen, quo offensionis maculas abluere valeat: Et tu Mater gloriosa cum nunc adjuva, nè *Satanas* ei illudere possit, ac diversis tentationibus pro libitu suo flagellare, devictumq; reum statuere terribili Judici: sed potius seipsum in lumine fidei judicet in præsentem, ac disciplinis vera pœnitentiæ devotè flagellet. Amen.

Oratio.

O *MARIA* suavissima *DEI* Genitrix, ob cruciatus, & angustias, quæ sustinuit cor tuum, quando filius tuus Dominus noster *Jesus Christus* filius *DEI* vivi, clamantibus Judæis crucifige, morti adjudicatus & crucis

cis supplicio condemnatus est: Subveni piissima Mater huic servo tuo in extremis laboranti: Quia corpus illius dolore infirmitatis torquetur, & anima hinc per dæmonum insidias, hinc per terrorem districtæ discussionis angustiatur: Subveni, inquam, suavissima Domina, nè æternæ mortis Sententia contra illum feratur, aut flammis æternalibus tradatur perpetuò cruciandus: Verùm, te pro ipso intercedente, ad coelestem gloriam potius pervenire mereatur. Amen.

Oratio.

O Virgo clementissima DEI Genitrix Maria, ob illius doloris gladium, qui tuam felicissimam animam pertransiit, quando cernebas Filium tuum delectatissimum Dominum nostrum Iesum Christum Filium DEI vivi nudum in cruce levatum, clavis perforatum, cruore perfusum, ac plagis, & vulneribus laceratum: adjuva nunc Beatissima Domina animam huius famuli tui, ut compassionis gladius eam perforat, divini timoris & amoris lancea vulneret: ita ut omnis peccati sanguis noxius à pectore effluat, à vitisq; mundetur, & divinis virtutibus decoretur: quatenus desiderio, & toto affectu terrena despiciens, ad cælestia sublevetur: ad quæ te deducente júbilose pervenire mereatur. Amen.

Oratio.

O Maria Virgo sanctissima, ob tormentum, & gravamen, quod cor tuum sustinuit, quando filium tuum sanctissimum Dominum nostrum Iesum Christum filium DEI vivi, præ dolore voce magna clamantem, te Matrem dilectam Joanni commendantem, deficientemque

ficientemque attendebas: ita ut præ nimio dolore loqui non posses: subveni ô gloriosa Domina famulo tuo nunc, quia lingua ejus ad te invocandam se movere non potest, oculi ejus lumine privantur, aures ejus surdesunt, & obturantur, omnesque vires ac sensus deficiunt. O piissima Mater exaudi preces nostras, quas ad aures tuæ pietatis fundimus: & subveni huic famulo tuo in hoc obitu suo, ac suavissimo filio tuo ejus Spiritum commenda: quatenus tu pio interventu à terroribus, & tormentis libera, ad desideratam celestis patriæ requiem te comitante jubiloſe pervenire mereatur. Amen.

Oratio.

O Maria Virgo castissima, ob acerbi ejaculatus planctum, quem de profundo pectoris erumpentem abscondere non valebas, quando in amplexu filii tui ruebas: cujus genas ante nitentes, & ora, mortis palloribus perfundi conspiciebas: auxiliare suavissima Mater huic servo tuo, quatenus de delictis commissis sic doleat, ut anima ejus mellifluis osculis, & amorosis amplexibus Domini nostri Jesu Christi in cælorum beatissimo regno dignè valeat perfrui. Amen.

Oratio.

O Maria Virgo gloriosissima, ob singultus, & suspiria indicibiliâque lamenta, quibus afficiebatur virginum cor tuum, quando cernebas filium tuum Dominum nostrum Jesum Christum filium DEI vivi, animæ tuæ unicum solatium sepeliri: adjuva ô sacratissima Mater, animam servi tui in hac lachrymarum valle laborantem, ut cum à corpore egressa fuerit, tuis suffragantibus

gantibus meritis, cum corusco charitatis lumine, te concomitante Domino nostro Jesu Christo glorificanda à te presentetur. Amen.

Oratio.

O Maria Virgo suavissima huic servo tuo morienti miserere, & orationem nostram pro eo pia Mater exaudi. Ad te gloriosissima Virgo Maria oramus pro famulo tuo: Mater sacratissima nos orantes pro eo velociter exaudi. Respice beatissima Virgo Maria in servum tuum, & miserere illi, quia gloriosa Mater unicus, & pauper est. In pace tua suavissima Virgo Maria huius famuli tui anima dormiat, & requiescat. Auribus gloriosa Virgo Maria percipe verba orationis nostræ pro famulo tuo, & intellige clamorem cordis nostri pro eo beatissima Mater. Amen.

Oratio.

O Maria Virgo piissima servo tuo miserere, quoniam infirmus est: animam ejus suavissima Mater sana, quia omnia interiora ejus conturbata sunt. Animam servi tui gloriosa Virgo Maria, de manu satanæ eripe. Respice suavissima Virgo Maria inimicos servi tui, quoniam multiplicati sunt. Convertere pia Mater, & salvum fac illum. Beatissima Mater adjuva illum nè pereat. In tua Justitia suavissima Virgo Maria deduc famulum tuum propter inimicos ejus, dirige in conspectu tuo vias ejus. Anima servi tui turbata est valde, & tu suavissima Mater, salva illum nè cadat à via sancta. Amen.

Oratio.

O Maria Virgo sacratissima ad sis famulo tuo, Mater beatissima, adjuva illum ne pereat. Auribus percipe gloriosissima Virgo Maria orationem nostram pro famulo tuo, ne demon gloriatur de ejus perditione. Refugium esto suavissima Virgo Maria huic pauperulo morienti, in hac horribili tribulatione esto illi adiutrix. In lumine fidei gloriosissima Virgo Maria animam servi tui letifica, ut ejus mens non moveatur à timore Domini. A resistantibus dextera tue suavissima Virgo Maria animam servi tui custodi, & presentiam tuam consolare illam. Amen.

Oratio.

O Maria Virgo misericordias tuas cum famulo tuo moriente mirifica, illum in te sperantem salvum fac. Aures tuas gloriosissima Virgo Maria ad servum tuum inclina, & affectum cordis illius exaudi: nam in tribulatione maxima versatur. Respice suavissima Virgo Mater hujus servi tui morientis angustias, & illum libera, & ad te preces nostras pro illo intende. In hac terribili animadversione famuli tui, gloriosissima Virgo Maria invocamus te, quatenus suavi aspectu tuo letifices illum. Ad te suavissima Virgo Maria animam servi tui trahere, non erubescat, quoniam sperat in te. Amen.

Oratio.

O Maria Virgo Beatissima animam servi tui illumina, & tenebras ejus mentales tua prece depelle. ab insurgentibus in famulum tuum gloriosa Virgo Maria libera eum, & à spiritu iniquo protege illum. Re-
spice

ſpice in ſervum tuum morientem ſuaviſſima Virgo Maria, & libera eum ne pereat. Imple clementiſſima Virgo Maria preces noſtras pro hoc famulo tuo, ut ſentiat, quia tu es ſuaviſſima Mater ejus. Auxilium de Cælo glorioſa Virgo Maria mitte ſervo tuo, & de excelfo tuere illum. Amen.

Oratio.

O Maria Virgo beatiffima auxilium tuum nè elongaveris à ſervo tuo, ad illius deſenſionem propera. A framea diaboli glorioſa Virgo Maria animam famuli tui libera, & de manu illius eripe ipſum. Remiſcere miſericordiarum tuarum ſuaviſſima Virgo Maria, & de inferno animam famuli tui libera. In veritate tua glorioſa Virgo Maria animam ſervi tui dirige, & eſto illi ſuaviſſima conſolatrix. Animam famuli tui beatiffima Virgo Maria cuſtodi, & erue illam ne in deſperationem labatur. Amen.

Oratio.

O Maria Virgo ſuaviſſima ſervo tuo quoniam tribulatur miſerere: & nè aſpectu demonis terreatur illum adjuva. Anima famuli tui ô Domina, & gloriſſima Virgo Maria, jubilet in te, & delectetur in ſuaviſſimo Chriſto nato tuo. Reſpice beatiffima Virgo Maria ad famulum tuum, in manibus tuis animam illius ſuſcipe. Illuſtra faciem tuam gloriſſima Virgo Maria ſuper ſervum tuum, in tua miſericordia illum ſalvum fac. à perſequentibus animam ſervi tui ſuaviſſima Virgo Maria eripe illum, & de manu odientium eum libera illum velociter. Amen.

Oratio.

O Maria Virgo beatissima, esto animæ famuli tui in refugium à tribulatione, quæ circumdat illam, tuâ præsentia latifica illam. Apprehende gloriosa Virgo Maria arma, & scutum, & exurge in adjutorium servi tui. Retrorsum avertantur suavissima Virgo Maria, & confundantur dæmones: & nè animam famuli tui obnubilent; tu gloriosa Virgo Domina adjuva illam. Induantur, gloriosa Virgo Maria, dæmones pudore, & confusione, & animæ servi tui in nullo prorsus nocere valeant. Animam famuli tui clementissima Virgo Maria respice, & à deceptione adversarii illam erue. Amen.

Oratio.

O Maria Virgo beatissima, famulo tuo miserere, quoniam undique conculcatur, & dæmon tota die impugnans tribulat animam servi tui. Gloriosa Virgo Maria, fac eum de te exultare, ut delectetur in suavissimo Filio tuo. Redde Beatissima Virgo Maria spirituales letitias famulo tuo, & per te cor illius confirmetur in Domino DEO. Inclina gloriosissima Virgo Maria aurem tuam ad servum tuum, quoniam inops, & pauper est. Adjutrix esto suavissima Virgo Maria famulo tuo, adjuva illum nè in æternum pereat. Amen.

Oratio.

O Maria Virgo suavissima, famulo tuo miserere, quoniam in te confidit anima ejus. Adjuva gloriosa Virgo Maria servum tuum, & salvus erit; medietur semper in lege Domini. Respice beatissima Virgo Maria

Maria in servum tuum, & misere illi. Da spirituale donum illi, ut filius gratiæ sit. In quacunque hora gloriosa Virgo Maria invocaverimus te pro servo tuo, velociter exaudi nos orantes pro illo. Auribus percipe beatissima Virgo Maria orationes nostras pro famulo tuo, & intende ad deprecationem nostram. Amen.

Oratio.

O Maria Virgo dulcissima, exultet servus tuus in tua Misericordia, quoniam tu es suavissima peccatorum respiratio. Anima servi tui gloriosa Virgo Maria exultet in te, non deseras neque despicias illum. Respice gloriosa Virgo Maria afflictiones quas patitur anima servi tui, non derelinquas illum demoni tribuendum. In semitam rectam gloriosissima Virgo Maria animam famuli tui deducas, ne gloriatur Satan contra illum. Ad te gloriosa Virgo Maria pie clamamus pro anima servi tui, ut tuo benigno foveatur presidio. Amen.

Oratio.

O Maria Virgo suavissima famulum tuum ab omnibus angustiis quas patitur, libera, ut jubilet tibi cum omnibus Sanctis. Adhæreat gloriosa Virgo Maria anima servi tui tibi, tu suscipe illam, ut sequatur te. Recordare beatissima Virgo Maria, quia tu es advocata miserorum, & misere animæ famuli tui, ut ad jucunditatem cælestem pervenire valeat. In manibus tuis gloriosa Virgo Maria animam famuli tui suscipe clementer, ut exultet, & letetur de tua gloria, & salvatione sua. Ad te suavissima Virgo oramus pro anima famuli tui, ut per te præsentetur gloriosissimo filio tuo
Domino

Domino nostro JESU Christo perpetuò spiritualiter copulanda. Amen.

Oratio.

O Intemerata, & in æternum benedicta Virgo Maria, totius angustia, & miseria adjuvrix, famula tuo succurre dulciter, & tuam gloriosam faciem ostende illi in hac ultima necessitate sua, & omnes inimicos ejus virtute suavissimi filii tui Domini nostri JESU Christi, & sanctæ crucis, duperde, & à potente Dracone infernali, & ab ejus horribili visione, & ab omni fraude malorum spirituum defende, & protege famulum tuum, & ab omni angustia libera eum, quatenus tecum cum beatis spiritibus Domino DEO in cælorum beatissimo regno spirituales persolvat laudes. Amen.

Oratio.

O Sancte Michaël Archangele huic animæ succurre apud altissimum Judicem. O invictissime pugil, assiste huic famulo in extremis laboranti, & cum potenter à Dracone infernali defende, & à Visione fraudèq; malorum spirituum. Insuper exoramus te preclarum signiferum, ut in hac extrema hora vitæ ipsius, animam ejus benignè suscipias, ac suaviter in sinum tuum recipias, illamq; in locum refrigerii, lucis, & pacis perducas cum Domino JESU æternaliter regnaturam. Amen.

Ad proprium Angelum.

O Sancte Angele DEI, ab eodem huic famulo tuo in custodem, in protectorem, & gubernatorem assignate: quas gratias possumus tibi dignas, vel ipse per
se

se, vel nos pro illo, tuis beneficiis agere, qui à tam multis periculis illum præservasti, tanto tempore protexisti, tantoque tempore ei salutaria procurasti: profecto nullas possumus dignas: beneficia enim tua excedunt. Oramus tamen humiliter de omnibus hujus infirmi negligentis, irreverentis, atque inobedientis veniam illi supplicantes, ut qui tanto tempore indefessus ejus Salutem procurasti, in hac ultima necessitate illum non deseras: sed ab omni formidule, ab omni pusillanimitate, ab omnibus hostium insidiis, ab omni tentatione, & ab omni malo illum protegas ac liberes. Adstas ei nunc fidelissimus Amicus, & custos, quia præter te non habet alium, qui sui curam gerat, qui se defendat, qui suam zeletur salutem: non illum deseras donec reconciliatum DEO offeras in misericordia, & non in judicio. Eja custos omnium fidelissime, lucretur nunc per te Christus hanc animam, à qua non cesses donec compuncta, contrita, atque à DEO in sui gratiam recepta confirmetur, qui sit benedictus in secula. Amen.

F I N I S.



Index Capitum
Quæ hoc libello continentur.

PARS I.

De remota ad felicem mortem Preparatione.

CAPUT I.

Christus imitandus in Morte.

CAPUT II.

Volentes Christum imitari in morte, priùs imitentur in vita.

CAPUT III.

Quidnam in Christi vita imitandum ; & primùm quidem Animi nitor, & bene operandi studium.

CAPUT IV.

De Studio bene operandi.

CAPUT V.

Aliæ in Christo imitandæ virtutes , putà : Abnegatio sui, Amor Dei, & Proximi.

CAPUT VI.

De Amore DEI.

CAPUT VII.

De Amore Proximi.

CAPUT VIII.

Ad felicem mortem juvat, Exemplo Christi sæpe mortis meminisse.

CAPUT

Index Capitum.

CAPUT IX.

Quibus occasionibus memoria mortis elici possit.

CAPUT X.

Memoria mortis ex diurnis actionibus.

CAPUT XI.

Psalmorum versus mortis memoriam refrigerantes.

CAPUT XII.

Ex usu Sensuum, Loco item, & Tempore potest elici memoria mortis.

PARS II.

De Proxima ad felicem mortem Preparatione.

CAPUT I.

Christus imminente morte Sanctissimæ suæ Matri valedicit.

CAPUT II.

Christus Coenam Paschalem celebrat.

CAPUT III.

Discipulorum pedes lavat Christus.

CAPUT IV.

Sanctissimum Eucharistiæ Sacramentum instituit.

CAPUT V.

Argumenti ejusdem Prosecutio.

CAPUT VI.

Cœpit JESUS pavere, & tædere, contristari, & mœstus esse.

CAPUT VII.

Positis genibus, providens in faciem tuam super terram, orabat.

CAPUT

Index Capitulum.

CAPUT VIII.

Pater, non mea voluntas, sed tua fiat.

CAPUT IX.

Et factus est sudor ejus sicut guttæ Sanguinis decurrentis in terram.

CAPUT X.

Apparuit autem illi Angelus de coelo, confortans eum.

CAPUT XI.

Tunc Discipuli omnes, relicto eo, fugerunt.

CAPUT XII.

Christus flagellatur, spinis coronatur, cruci affigitur.

CAPUT XIII.

Pater dimitte illis: non enim sciunt, quid faciunt.

CAPUT XIV.

Amen dico tibi: Hodie tecum eris in Paradiso.

CAPUT XV.

Mulier, ecce filius tuus. Ecce Mater tua.

CAPUT XVI.

DEUS meus, DEUS meus, ut quid dereliquisti me.

CAPUT XVII.

Sitio.

CAPUT XVIII.

Consummatum est.

CAPUT XIX.

Pater, in manus tuas commendo spiritum meum.

CAPUT XX.

Inclinato capite tradidit spiritum.

PARS

PARS III.

De Præparatione ad mortem violentam.

CAPUT I.

Mors repentina hominibus familiaris & frequens.

CAPUT II.

Mortem repentinam improbis maximè metuendam esse.

CAPUT III.

Morti repentinæ Justos etiam obnoxios esse.

CAPUT IV.

Prima ad mortem repentinam Præparatio, *Vigilare.*

CAPUT V.

Altera ad mortem repentinam Præparatio, *Conscientiam sedulo discutere.*

CAPUT VI.

Alia ad mortem repentinam Præparatio, *Quotidie mori.*

CAPUT VII.

Alia item ad mortem repentinam Præparatio, *Testamentum condere.*

CAPUT VIII.

Rursum alia ad mortem repentinam Præparatio, *De morte meditari.*

CAPUT IX.

Postrema ad mortem repentinam Præparatio, *Exercitiis S. P. Ignatii animum excolere.*

Index Capitum.

CAPUT X.

In Eventu subitæ mortis quid facto sit opus.

PARS IV.

*Orationes, Affectus, Aspiraciones
ad impetrandam felicem mortem accommodatæ.*

CAPUT I.

Orationes.

- §. 1. Oratio Dominica, & Angelica Salutatio.
- §. 2. Commendatio animæ serviens bene valentibus.
- §. 3. Orationes sanis & ægrotantibus servientes.
- §. 4. Protestationes S. Caroli Borromæi.
- §. 5. Orationes ad Christum Crucifixum.
- §. 6. Orationes ad B. Virginem.
- §. 7. Orationes ad Angelum Custodem & Sanctos Patronos.

CAPUT II.

Affectus.

- §. 1. Affectus Blasii Palmæ & Pauli de Barry, in epitomen redacti.
- §. 2. Affectus varii in Deum.
- §. 3. Affectus ad Christum Agonizantem.

CAPUT III.

Preces jaculatoriæ, seu Aspiraciones.

- §. 1. Aspiraciones Fidei ad Deum.
- §. 2. Aspiraciones Spei, & Fiduciæ.
- §. 3. Aspira-

Index Capitulum.

- §. 3. Aspirationes Charitatis.
- §. 4. Aspirationes Contritionis.
- §. 5. Adorationis.
- §. 6. Gratiarum actionis.
- §. 7. Oblationis.
- §. 8. Gaudii spiritualis.
- §. 9. Patientiæ.
- §. 10. Resignationis.
- §. 11. Desideria ad cœlestem Patriam.
- §. 12. Aspirationes ad Christum Crucifixum.
- §. 13. Ad Bñs. Virginem.
- §. 14. Ad Angelos, & Sanctos Cœlites.

CAPUT IV.

Quæstiones ægrotis proponendæ.


CAPUT V.

Preces dicendæ ab Adstantibus pro moribundo.

A. M. D. G.



ERRATA,



ERRATA,
Lector Benevole,
sic corrige.

Pag. 4. lin. 7. à fine. *exerendas* Lege : *exercen-*
das.

Pag. 9. l. 12. *moriendum*. adde : *moriendum*
foret.

Pag. 14. l. 17. *Blesfeman*. Lege : *Blesfeman*.

Pag. 22. l. 17. neq; Lege : *negat*.

Pag. 24. l. 7. à fin. *quid tamen*. lege : *quid tam*.

Pag. 27. *Vide pag. 265*.

Pag. 29. *hujus libelli* pag. 227.

Pag. 30. l. 7. *quit*. lege : *qui*.

pag. 31. l. 10. à fin. *necesse*. lege : *necesse*.

pag. 32. lin. 4. *illa*. lege *illa*.

Ibid. lin. 6. *primoribns*. lege *primoribus*.

Ibid. lin. 17 *gloriosi*. lege : *gloriosi*.

pag. 37. l. 2. à fin. *pollicentur*. lege : *pollicerentur*.

pag. 43. lin. 5. à fin. *cogitatonnes*. lege : *cogita-*
tiones.

pag. 47. pag. 265 :

pag 58. l. 12. à fin. *per dolorts*, lege *per dolores*.

pag. 60. lin. 9. *percuissse*. lege. *percuississe*.

Ibid.

Errata.

- Ibid.* lin. 14. irritari. *lege.* irritati.
- pag. 63. l. 5. à fin. Augustinus. *lege.* Augustinus.
- Ibid.* lin. 10. à fin. fodicare. *lege.* fodicari.
- pag. 64. lin. 7. à fin. quâ. *lege.* quæ.
- pag. 65. l. 3. limem. *lege.* limen.
- pag. 66. lin. 12. Paccator. *lege.* Peccator.
- pag. 95. lin. 7. Hoc egit II. *adde.* Hoc egit Philip-
pus II.
- pag. 100. lin. 7. vonvaluissem. *lege.* convaluissem.
- Ibidem.* on est. *lege.* non est.
- pag. 100. lin. 13. tametsi consilio errore timoris præoc-
cupatus: *lege.* tametsi consimili errore &c.
- Ibid.* lin. 8. à fin. Nomine, *lege.* Domine.
- pag. 101. lin. 7. ab ægritudine. *lege.* ab ægritudine.
- Ibid.* lin. 10. ante hac. *adde.* ut ante hac.
- pag. 108. lin. 11. voluit. NB. noluit.
- pag. 110. lin. 2. à fin. qua. *lege.* quam.
- pag. 119. lin. 12. cœlos. *adde.* video cœlos.
- pag. 120. lin. 7. à fin. qui alas. *adde.* qui, si alas.
- pag. 134. lin. 3. omninum. *lege.* omnium.
- pag. 135. lin. 12. expravit. *lege.* expiravit.
- pag. 139. lin. 18. omnlbus. *lege.* omnibus.
- pag. 140. lin. 4. domestiea. *lege.* domestica.
- Ibid.* lin. 6. à fin. aspernati. *lege.* aspernati.
- pag. 146. l. 4. à fin. crux. NB. *lege.* crus.
- pag. 159. lin. ult. à fin. feliceter. NB. *lege.* feli-
ces ter & amplius
- pag. 166. lin. 12. an aliquid. *adde.* an sit aliquid.
- pag. 171. lin. 7. à fin. nnde. *lege.* unde.
- pag. 190. lin. 13. exsiccare. *lege.* exsiccare.
- Ibid.* lin. 9. à fin. composuaris. *lege.* compo-
sueris.

Errata.

- pag. 191. lin. 7. Quotidiè. *lege.* Quotidiè.
pag. 195. lin. 2. à f. quarum. *lege.* quarum.
pag. 196. lin. 13. à f. discedendum. *lege.* discedendum.
Ibid. lin. 10. à fine. concessam. *lege.* concessam.
pag. 197. lin. 6. beatissimus. *lege.* beatissimus.
pag. 202. lin. 4. à fin. maxmiam. *lege.* maximam.
pag. 203. lin. 14. velox & sit. *dele* tō &c.
pag. 218 l. 7. à fin. æternæ. *lege:* æterne.
pag. 233. lin. 2. à fin. tunc. *lege:* tunc.
pag. 236. lin. 6. Lyræum. *adde:* apud Lyræum.
pag. 237. lin. 7. à fin. S. Jon. *lege.* S. IGNATII.
pag. 239. lin. 10. à fin. Emmanule. *lege.* Emma-
nuele.
pag. 240. lin. 7. à fin. JOSEPHUM. NB. *lege.*
JOSEPHUM.
pag. 244. lin. 13. à fin. juvaudisq;. *lege:* juvan-
disq;.
pag. 249. lin. ult. Societate. *lege:* sorte.
pag. 259. lin. 11. à fin. neq; verè. *adde:* neq; fidem
verè.
Ibid. lin. 7. à fin. Pater æternæ. *lege:* Pater
æterne.
pag. 264. lin. 8. Sangnis. *lege:* Sanguis.
Ibid. lin. 17. *adde:* cum Sanctis tuis.
pag. 287. lin. 1. in cruce. *lege:* in cruce.
pag. 288. l. 10. à fin. ex sanguinibus. *lege.* exsan-
guibus.

Errata.

pag. 300. lin. 11. à fin. sacrificio. *lege* : sacrificio.

pag. 301. lin. 6. à f. occultis. *lege*. occultis.

pag. 302. l. 5. Quia. *lege* : *Qui*.

pag. 303. lin. 7. à fin. ut nomine. *adde* : ut in nomine.

pag. 311. lin. 14. peti. *lege* : petii.

pag. 344. lin. 9. tu. *lege* : tuo.

pag. 346. lin. 4. à fine. tui. *lege* : tui.

Index Capitum. part. 2. cap. 7. lin. 2. à fine pre-
videns. *lege* : procidens.



